

A11 $\frac{7}{60}$

не
выдана
илих сор.

~~Ал. 9~~
~~40.~~ 79
60

МАТЕРІАЛЫ

ДЛЯ

ИСТОРИИ РАСКОЛА

ЗА ПЕРВОЕ ВРЕМЯ ЕГО СУЩЕСТВОВАНІЯ,

ИЗДАВАЕМЫЕ

БРАТСТВОМЪ СВЯТАГО ПЕТРА МИТРОПОЛИТА

подъ редакціей

Н. Сувботина.

ТОМЪ ДЕВЯТЫЙ.



МОСКВА.
1895.



БИБЛИОТЕКА
Государ. Историч. Музея
№ 2606
70-4 VIII 1931 г.



МАТЕРІАЛЫ

ИЛИ

ИСТОРИИ РАСКОЛА

МАТЕРІАЛЫ

СЪЕДИНЕНІЕ СЪ СВЯТЫМЪ ДУХОМЪ

ДЛЯ ИСТОРИИ РАСКОЛА.


ИЗДАНИЕ

БРАТСТВОМЪ СВЯТАГО ПЕТРА МЫРОПОДВИЖНИКА

ВЪ САНКТУ-ПЕТЕРБУРГѢ

ВЪ САНКТУ-ПЕТЕРБУРГѢ

ТОМЪ ДВЕНАДЦАТОМЪ



МАТЕРІАЛЫ
X
ДЛЯ
ИСТОРИИ РАСКОЛА

ЗА ПЕРВОЕ ВРЕМЯ ЕГО СУЩЕСТВОВАНІЯ,

ИЗДАВАЕМЫЕ

БРАТСТВОМЪ СВЯТАГО ПЕТРА МИТРОПОЛИТА

подъ редакціей

Н. Судботина.

ТОМЪ ДЕВЯТЫЙ.



ПОЛЕМИЧЕСКІЯ ПРОТИВЪ РАСКОЛА
СОЧИНЕНІЯ ПРАВОСЛАВНЫХЪ.

ЧАСТЬ ПЕРВАЯ.

ПАИСІЯ ЛИГАРИДА

опроверженіе челобитной попа Никиты.

Въ 1866 году, издавая восьмой томъ «Матеріаловъ для исторіи раскола» мы писали въ предисловіи: «Третій отдѣлъ, въ составъ котораго должны войти «сочиненія современныхъ первымъ расколоучителямъ православныхъ писателей, направленные противъ раскола», не можетъ быть обширенъ, и потому, что самое количество сочиненій не велико, и потому, что важнѣйшія изъ нихъ были уже напечатаны вскорѣ же по появленіи ихъ на свѣтъ («Жезлъ Правленія» и «Увѣтъ»), или же въ позднѣйшее время (какъ наприм. сочиненіе Юрія Крижанича о Соловецкой челобитной). Мы желали бы издать только весьма оригинальное, хотя въ сущности не особенно важное, сочиненіе Паисія Липариды, въ переводѣ Полоцкаго, содержащее разборъ челобитной Никиты Добрынина (Пустосвята), да нѣкоторыя мелкія сочиненія, находящіяся въ сборникахъ Синодальной бібліотеки».

Въ теченіе цѣлыхъ восьми лѣтъ, отдавая все свободное отъ служебныхъ занятій время изданію «Братскаго Слова» не могли мы исполнить выраженное въ приведенныхъ словахъ намѣреніе. Теперь же, оставивъ службу при Академіи и имѣя поэтому болѣе свободнаго времени, рѣшаемся, не смотря на оскудѣніе силъ, довершить наше изданіе «Матеріаловъ для первоначальной исторіи раскола» обѣщаннымъ напечатаніемъ Паисіева сочиненія.

Челобитная Никиты, противъ которой написано сочиненіе Лигарида, напечатана, по разнымъ ея спискамъ, въ четвертомъ томѣ «Матеріаловъ». Въ предисловіи къ этому тому сообщены достаточныя свѣдѣнія и о самомъ сочиненіи Лигарида (стр. XI—XIV), которыя и просимъ читателей имѣть въ виду. Въ дополненіе скажемъ здѣсь немногое.

Что разборъ челобитной русскаго раскольника порученъ былъ греку, не знавшему ни русскаго народа, ни русскаго языка, не умѣвшему ни читать, ни писать порусски, это можно объяснить только особеннымъ тогдашнимъ расположеніемъ царя Алексѣя Михайловича и лично къ Паисію Лигариду, открытому врагу патріарха Никона, дѣломъ котораго былъ занятъ тогда царь, и къ его дѣйствительнымъ талантамъ и познаніямъ.¹ Быть можетъ, Паисій, какъ человѣкъ искательный, и самъ напросился на

¹ Любопытно, что первыя полемическія сочиненія противъ раскола были написаны иностранцами — грекомъ Паисіемъ и сербомъ Крижаничемъ; да и Полоцкій, какъ малороссъ, не былъ кореннымъ русскимъ человѣкомъ.

это порученіе, хотя впоследствии писалъ, что составить обличеніе на челобитную Никиты ему поручено было царемъ и соборомъ. Чтобы дать возможность іреку, не знавшему русскаго языка, сдѣлать разборъ русскаго сочиненія и назначаемый для русскихъ, посредникомъ этого хитраго дѣла избранъ былъ Симеонъ Полоцкій, пріобрѣтавшій также значеніе при царскомъ дворѣ. Не зная іреческаго языка, Полоцкій перевелъ челобитную Никиты на латинскій, съ которымъ былъ хорошо знакомъ и которымъ въ совершенствѣ владѣлъ Паисій Лиаридъ; въ свою очередь и этотъ послѣдній написалъ опроверженіе челобитной полатыни же, чтобы съ латинскаго Полоцкій могъ перевести его на русскій языкъ, что этотъ послѣдній и сдѣлалъ. А что тотъ и другой прібыли именно къ посредству латинскаго языка, это подтверждается и находящимися въ рукописи сдѣланнаго Полоцкимъ перевода Паисіева сочиненія, на нѣкоторыхъ поляхъ, латинскими словами, написанными, и потомъ зачеркнутыми Полоцкимъ, относительно которыхъ онъ, какъ видно, имѣлъ сомнѣніе, точно ли передалъ ихъ порусски.

Итакъ челобитная Никиты Пустосвята удостоилась чести (съ его же точки зрѣнія скорѣе подвергнута безчестію) быть переведенной на латинскій языкъ, — привилегированный языкъ тогдашнихъ ученыхъ! Весь ли текстъ челобитной переведенъ Полоцкимъ, или только главныя ея положенія, рѣшить трудно; скорѣе слѣдуетъ допустить послѣднее. Въ

предисловіи Паисій Лиаридъ обѣщаетъ разсмотрѣть челобитную «отъ слова до слова»; а между тѣмъ разсматриваетъ только общія ея положенія, и притомъ не всѣ, не касаясь почти вовсе приводимыхъ Никитой доказательствъ. Известно притомъ, что и самъ Полоцкій въ своемъ «Жезлѣ» приводилъ текстъ Никитиной челобитной въ сокращенномъ видѣ, и доказательства, въ ней находящіяся, также большею частію оставлялъ безъ разсмотрѣнія.

Если принять во вниманіе, что челобитная Никиты была отобрана у нея въ Суздаль и привезена въ Москву въ началѣ 1666 года, и что, съ другой стороны, Полоцкій приступилъ къ сочиненію «Жезла», какъ видно изъ собственноручной его записи на черновомъ спискѣ этого сочиненія, 18-го мая 1666 года, что послѣдовало, безъ сомнѣнія, тогда уже, когда сочиненіе Лиарида признано было непригоднымъ и въ замѣнъ его поручено было соборомъ написать разборъ челобитной именно Полоцкому,—если принять все это во вниманіе, то окажется, что весь ходъ дѣла о Паисіевомъ сочиненіи,—т. е. переводъ Полоцкимъ челобитной Никиты на латинскій языкъ, написаніе Паисіемъ разбора на челобитную, и опять переводъ этого разбора Полоцкимъ съ латинскаго на русскій языкъ,—все это сдѣлано въ продолженіе какихъ нибудь двухъ, или трехъ мѣсяцевъ. Если даже предположить, что работа шла, такъ сказать, совмѣстно, т. е. Полоцкій переводилъ сочиненіе Паисія по частямъ, по мѣрѣ того, какъ оно выходило изъ-

подъ пера этого послѣдняго, и въ такомъ случаѣ нельзя не признать, что дѣло сдѣлано было очень быстро. Тогда, вообще, работали скоро; самыя обстоятельства того требовали. Известно, что и Полоцкій написалъ свою книгу «Жезлъ» меньше чѣмъ въ два мѣсяца (начасъ 1666 may 18 — Finivi 1666. Julii 13).

Сочиненіе Паисія Линарида отличается всѣми качествами, свойственными этому писателю. И здѣсь Паисій успѣлъ показать и свое обширное знакомство съ богатой греческой литературой, классической и святоотеческой, и свой ораторскій талантъ и свою страсть къ многослаголанію, или болтливости, по его собственному выраженію, которая и здѣсь нерѣдко увлекала его въ сторону отъ подлежащихъ разсмотрѣнію вопросовъ. Понятно, что всѣ эти качества, за исключеніемъ знанія святоотеческой литературы, не могли и не должны бы имѣть приложенія въ сочиненіи, посвященномъ разсмотрѣнію раскольнической челобитной и назначенномъ для вразумленія русскихъ раскольниковъ, а вмѣстѣ и для чтенія православными русскими людьми. При этомъ нужно взять еще во вниманіе, что Паисій Линаридъ обнаружилъ въ своемъ сочиненіи, впрочемъ весьма понятную въ немъ, неспособность уразумѣть настоящій смыслъ разныхъ раскольническихъ «омышеній», и такую же неспособность примѣниться и въ способахъ сужденія и въ способахъ изложенія къ понятіямъ русскихъ читателей. Вслѣдствіе всего этого его сочиненіе, притомъ же

весьма невразумительно переведенное Полоцкимъ, и оказалось совершенно непригоднымъ для своей цѣли. Такъ, очевидно, судили о немъ и самъ царь Алексѣй Михайловичъ и освященный россійскій соборъ, рѣшившіе оставить его безъ употребленія и поручившіе самому переводчику Паисіева сочиненія Симеону Полоцкому написать новое опроверженіе на челобитную Никиты.

Итакъ, ораторское произведеніе Паисія Лиариды, какъ полемическое сочиненіе противъ раскола, не имѣетъ цѣны, и тогдашняя духовная власть поступила вполне разумно, не обнародовавъ его и не вводя въ употребленіе въ качествѣ именно такого сочиненія; можно выразить только нѣкоторое сожалѣніе, что новый трудъ составить опроверженіе челобитной Никиты порученъ былъ сею властію писателю, который самымъ переводомъ Паисіева сочиненія, какъ мы сказали, до крайности невразумительнымъ, показалъ себя также не вполне пригоднымъ для такого дѣла. Въ настоящее же время, спустя болѣе двухъ столѣтій, Паисіево опроверженіе челобитной Никиты представляетъ интересъ для ученыхъ, и именно какъ историческій памятникъ перваго у насъ полемическаго сочиненія противъ раскола: въ этомъ своемъ значеніи оно и заслуживаетъ быть изданнымъ печатно. Намъ оно извѣстно только по черновому списку, собственноручно писанному переводчикомъ его — Симеономъ Полоцкимъ: по этому списку мы его и печатаемъ. Существуютъ ли и въ перебѣленные списки, каковыя,

надобно полагать, были сдѣланы для царя и властей, неизвестно. Упомянутый черновой списокъ находится въ примѣчательной рукописи, принадлежащей библіотекѣ М. Д. Академіи (№ 68), и состоящей кромѣ этого, сдѣланнаго Полоцкимъ перевода Паисіева сочиненія, изъ нѣсколькихъ сочиненій самого Полоцкаго черновыхъ же, собственной его руки: «Дѣяній собора 1666 г.» «Жезла Правленія» и др.¹ Какъ и названные сейчасъ два сочиненія, переводъ Паисіева опроверженія на челобитную Никиты, писанъ латинскими, или польскими буквами, весьма мелко и по мѣстамъ весьма неразборчиво,² такъ что требовалось не мало труда и навыка, чтобы разобрать и вполне возстановить текстъ его. Съ благодарностію вспоминаемъ, что въ этомъ кропотливомъ трудѣ немало помогли намъ двое изъ нашихъ учениковъ, бывши студентами, о. Тихонъ Покровскій и Е. И. Орловъ (оба уже покойные).

¹ На первой, не, писанной, тетради этой рукописи, въ началѣ есть неизвестно къмъ сдѣланная старинная латинская надпись: *Demonstratio verae fidei contra schismaticos*; а на послѣднемъ листѣ этой тетради написано рукою Сильвестра Медвѣдева оглавленіе статей «въ сей книзѣ обрѣтающихся», и первая изъ сихъ статей означена имъ такъ: «Паисіа Липаридіа мѣтрополита Газскаго его руки списанія, переводъ и писмо отца Симеона Ситияновича. Отвѣты обличительныя на церковныхъ противниковъ Аввакума и Лазаря.» Оказывается, что Медвѣдевъ, горячій почитатель Полоцкаго, столь восхваляемый нѣкоторыми изъ нынѣшнихъ ученыхъ, даже и не прочелъ сочиненія, содержаніе котораго указываетъ въ оглавленіи, иначе не сказалъ бы, что оно писано на «Аввакума и Лазаря».

² Образчикъ этого письма можно видѣть въ приложенномъ ко 2-му тому «Матеріаловъ» (стр. 40) снимкѣ первой страницы дѣяній собора 1666 г.

Паисій приводилъ иногда въ своемъ сочиненіи цѣлыя греческія изреченія святыхъ отцевъ, или классическихъ писателей древности; Полоцкій, какъ не знавшій погречески, обыкновенно пропускалъ ихъ и означалъ пропущенное точками; точками означаемъ такія мѣста и мы въ нашемъ изданіи. Отдѣльныя же греческія слова въ сочиненіи Литаріда Полоцкій просто копировалъ.

Н. Субботинъ.

24 Декабря 1894 года.





ПАИСІЯ ЛИГАРИДА

МИТРОПОЛИТА ГАЗСКАГО

ОПРОВЕРЖЕНІЕ ЧЕЛОБИТНОЙ ПОПА НИКИТЫ.

Благочестивѣйшему, пресвѣтлѣйшему, непобѣдимѣйшему Государю, Царю и великому князю Алексію Михайловичу, всея великія, малыя и бѣлыя Росіи Самодержцу, во православіи новому Константину, въ премудрости новому Θεодосію, въ побѣдахъ и торжествахъ новому Іустиніану, смиреннѣйшій Газскій митрополита Паисій Лигаридій счастья, благоденствія, здравія тѣлеснаго и душевнаго спасенія желаетъ.

Предисловіе.

Преслалъ быше святыи онъ, великій именемъ и вещію, Василій ко Іуліану отступнику царю святыя Вивліи книги, во еже бы я прочетши не малое воспріяти пользованіе. Но онъ, внегда прочте я, безразсуднымъ нѣкимъ дерзновеніемъ отсла съ сицевымъ прекраткимъ писаніемъ: ἀνέγνων, ἔγνων, κατέγνων, еже есть: чтохъ, разсмотрѣхъ, но обхудихъ. Ему же безбожному отъ прадѣднія вѣры отступнику сицевый острѣйшій отвѣтъ святитель Василій, едва не тремя же словесы спле-

тенный, воздаше...¹ еже есть: челъ еси, но не уразумѣлъ еси, аще бо позналъ бы еси былъ я, никако обхуждалъ бы еси.

По истинѣ азъ прочтохъ и уразумѣхъ, пресвѣтлѣйшій Самодержче, безчествующій оный свитокъ, на Никона бывшаго патріарха лжами исполненный, ересми загаженный и пореченми обремененный, емуже аще бы было требѣ титло нѣкое достойное и необходимое дати, праведно могъ бы подписанъ быти: бляди блядей, безчестія безчестій, сны сновъ, по подражанію Соломоню, иже Пѣсни Пѣсней написалъ есть, и Аристотелеву, иже философію хитрость хитростей, ученіе ученій нареклъ есть, такожде по мысли Божественнаго Григорія, по рекломъ Богослова, празднество празднествъ и торжество торжествъ свѣтлый день Пасхи именовавшаго.

Обаче убо да не возмнится сія по страсти нѣкоей душевной и по человѣкострастію писати и аки угождающе предстательствовавшу Никону ласкательнымъ образомъ вещати, самыя оныя клеветы произнесемъ на средину, ко еже, якоже лежатъ, отъ слова до слова, разсмотрѣти; дабы намъ изъ кладязя онаго Демокритова, или Клеантова, (да не реку изъ сквернѣйшія делвы (?) Данаидскія) простѣйшую и прозрачнѣйшую правду изчерпнути возможи. Намъ бо архіереемъ, евангельскія правды проповѣдникомъ, истину весьма почитати требѣ есть, и ону, яко нескверную

¹ Здѣсь въ рукописи поставлены точки, показывающія, что пропущены подлинныя слова Василия Великаго.

дѣву, ко еже зрѣти, на церковномъ позориши предлагати годствуеть.

Тако Езекиа царь благочестивѣйшій, въ четвертыхъ книгахъ царствъ, во главѣ девятнадцатъ, егда Рапсакій Ассирійскій злохуляше, вземъ книги, вниде въ домъ Господень и распростре я предъ Богомъ, иже въ вышнихъ, и не кромѣ пребогатаго слезъ изліянiя возопи, рекше: Господи Боже Израилевъ, приклони ухо твое и услыши мя; отверзи Господи очи твои и виждь и услыши вся словеса Сеннахирима, яже посла поношая тебѣ, Богу живому.

Распрострохъ же и азъ подобнѣ клеветныя твоя книги, о Никито, свитокъ твой безчестующій, егоже нетако противъ Никону представительствовавшу, якоже противъ всей Восточной Церкви написалъ еси, и призвахъ Бога преблажайшаго и величайшаго, да судить прю нашу, отмститъ же праведнѣ, яко судія и отмститель.

1. Обличеніе на оныя словеса, въ титлѣ положенныя: *Въ Божіи смиреніи.*¹

Усумнивъ есмь, здравымъ ли умомъ и въ самомъ началѣ глаголетъ, или паче глумится сей творецъ, глаголяй въ титлѣ: въ Божіи смиреніи. Ибо смиреніе Богу никоимъ же образомъ приличествуеть, но токмо честь и слава. Тако Ангели пояху: слава въ вышнихъ къ Богу, и на земли

¹ Челобитная Никиты начинается такимъ обращеніемъ къ Царю Алексѣю Михайловичу: «Божіею милостію, въ Божіи смиреніи и въ Христовой кротости благочестивнѣ царствующему» и проч.

миръ, у Луки въ гл. 2; тако видѣ Исаія, въ гл. 6, Господа, сѣдяща на престолѣ превысоцѣ и превознесенна; тако Павелъ глаголетъ къ Тимоѳею, въ гл. 1: Царю же вѣковъ, безсмертному, невидимому, единому Богу честь и слава во вѣки вѣковъ. Христу, по истинѣ Богу, по вочеловѣченіи, яко чловѣкови истинному, приличествуетъ смиреніе, яко того ради смиренная возлюбившему, во еже бы намъ когда либо, ово словесы, ово дѣлы смирится. И тоя ради вины мы архіереи обыкохомъ именоватися *смирении*, якоже и патріархове написуются: *мѣрность наша*, паче же и царіе восточніи сицева титла употребляху, якоже видѣти есть у Матѳея Властаря въ гл. 15. Михаилъ бо царь въ нѣкоей своей грамотѣ глаголаше: *мѣрность наша повелѣваетъ*. Се же все бысть на поправленіе оныя древніа гордости и киченія денницы падшіа, яже кичащій глаголаше: *взыду на высоту облакъ и буду подобенъ Вышнему*.

Ниже, понеже Христосъ Богъ есть, послѣдовательно есть, еже мощи провѣщатися: «о Божіи смиреніи»; ибо отрицаю послѣдовательное, занеже самъ Никита ясно различилъ есть сіа проповѣданія между собою, и иная Богу, яко Богу, причелъ есть, благодать сирѣчь и смиреніе, иная же Христу, яко богочеловѣку, кротость. Тѣмъ же съ нимъ разлучити подобаше, якоже и онъ, творецъ, разлучилъ есть, а не сливати и полагати же...

Итакъ мы къ чловѣку обличеніе согонихомъ и сего невѣжество и безумство праведнѣ обличихомъ, ладію ладією нарицающе и смоковницу смо-

ковницею, по притчѣ. Прочее же да принесетъ сей древнихъ святыхъ отецъ образцы, симъ обычаемъ титло употреблявшихъ, сирѣчь: «во смиреніи Божіи». Ибо донелѣже онъ свидѣтельство не покажетъ намъ явѣ, выну имать быти Никитоборецъ... и весь жестокий Ареопагита. Паче же возбличу его о новствованіи, имже нынѣшніи еретицы излиха веселитися являются. Тако Трифілій обличенъ быше отъ великаго онаго Спиридона за подобное новствование. Ибо егда учился Греческому Трифілій витійствованію, измѣнилъ есть въ своемъ словѣ, глаголюще о разслабленномъ, реченіе оно: возми одръ твой и ходи, и въ сего мѣсто рече: возми ложе твое. Тогда возопи Спиридонъ: еда ты лучше еси Іоанна Евангелисты, иже употребилъ есть реченія онаго: одръ, а не *ложе*? Тѣмъ же убо ничесоже есть измѣнительно, но стоятельно есть при пречестной древности.

2. Отраженіе обличенія, еже на оныя словеса:
*и азъ, богомолецъ твой, видя въ той новой книгѣ
 древнихъ еретиковъ останки.*

Исповѣдуетъ здѣ творецъ себе ревностію благочестія ревновавша и аки остенемъ нѣкимъ возбужденна устремившася на писаніе сихъ, яже, и нехотяща, ума нѣкогого могла бы возбудити, таже ко дѣйствованію званія священническаго, себѣ ввѣреннаго, общія ради пользы христіанскаго сонма, приличствовати. Ибо явѣ о семъ увѣщаютъ свѣтлѣйшіи восточныя церкви свѣтильницы св. Василій Великій и св. Іоаннъ Златоустый, глаголющии, яко

архіереомъ и священникомъ по праведныхъ вѣры догматѣхъ подобаетъ поборати. Ибо проповѣдничее служеніе толико высокое и изрядное же нещуется и вѣрится, яко его достойнѣ употребляша токмо Христосъ Господь, истинный Мессія, и Его святыи Апостоли, Іоаннъ Креститель и иніи священнѣйшіи пророцы, иже ово во дарѣхъ пророчества, ово во святости степенѣхъ изящни видѣни быша. Воистинну отъ правилъ законныхъ, по св. Апостолѣ пятьдесятъ осмому правилу, проповѣдницы слова Божія суть епископи, имже вчинися, еже учить люди ко вѣрѣ приличствующимъ, въ день субботній, въ недѣльный же наипаче: и того ради на мантияхъ рѣки и источники нѣкія носятъ назнаменованныя, еже есть яко ветхаго завѣта и новаго догматы изъ чрева ихъ духовнаго исходятъ на окропленіе церковныя нивы, по реченному у Іоанна въ гл. 7-й: вѣруяй въ Мя, рѣки отъ чрева его истекутъ воды живыя. Но якоже древле нѣцыи именовавшася *ναρδηχοφόροι* тоея ради вины, яко ношаху съ собою палицу, безчинно-пѣяницъ знамя, обаче вещедѣйствомъ мали числомъ безчинству оному прилагавшася, и того дѣля мали числишася... безчинно-пѣяницы. Подобнѣ глаголательно есть о проповѣдницѣхъ нашего окаяннаго вѣка, яко премнози именуются проповѣдницы и церковные учителя, обаче убо мали въ самой вещи сицевыи обрѣтаются. Се же, яко премнози глаголютъ токмо къ ушесамъ, а не ко тайнамъ сердечнымъ, самихъ себе прежде сокрушающе, по оному отъ Тулліа реченію: да горитъ Ветій, аще же хочетъ да горятъ и про-

чіи. Како бо можетъ той, буди во образъ, о воздержаніи слово творити, самъ сый естествомъ си неводерженъ? Егда Христосъ Господь, Учитель учителей, самъ единъ поистиннѣ Равви хотяше нарицатися, прежде начатъ творити, потомъ же учити. Инаково услышалъ бы оную преобычную притчу: врачу исцѣлися самъ.

Ктому, пастырей служеніе есть, еже бдѣти и стада стрещи со всякимъ прилежаніемъ и попеченіемъ, якоже лѣпо назнаменована Теофилактъ. Приводяше во образъ пастыри Виѡлеемскія, и во время зимы бдѣвшія на стражи стада своего, якоже пишетъ Лука во главѣ второй; и того ради достойни быша, еже слышати благое оное вѣствованіе о Христѣ новорожденномъ и небесныхъ духовъ явленіемъ улаждатися. Инако же пастырь, иже дѣйственнѣ ввѣреннаго себѣ стада еже пасти нерадивъ есть, нѣсть по-истиннѣ пастырь, но токмо по имени, а не вещедѣйствомъ. Се же за врожденное отношенія соотвѣтованіе *χρῆσις* и наученіе (*sic*) еже имѣетъ пастырь со своимъ стадомъ. Тойже убо праведнѣ слышитъ гласъ онъ: паси овцы моя, иже самымъ дѣломъ пасетъ стадо, яко епископъ душъ, прилежно та наблюдающъ, яже суть имъ полезна и потребна. Бдите убо вси пастыріе: еже бо единому глаголю, всѣмъ глаголю. У Марка въ гл. 14.

3. Отраженіе обличенія, еже на оныя словеса: *да наки чистая явится церковная нива.*

Дерзаетъ соравняти книгу оную Скрижалей, отъ Никона напечатанную, съ нивою оною при-

точною, плевелми обремененною, священникъ сей Никита, яко той, иже по этимологіи греческаго имене отъ *при* паче... яко мужъ любопривый, нежели отъ *побѣды*... яко побѣждай, имѣлъ бы нареченъ быти. Приличествуетъ воистинну оное изреченіе Аристотелево: сей человѣкъ многая произнести на средину нудится, но мало доводити видится, ежебы вѣры было достойно. Аще бо устремляшеся нѣкая неискусными своими утверженьми, или паче баяньми излучити, обаче убо сравняти подобаетъ вся оная его тверди тончайшимъ паучинамъ, занеже бо никоея суть цѣны и разума. Да уподобятся еще тростемъ зыблемымъ сюду и сюду, преклоняющимся толико, даже праведнѣ возможно есть оное приписать изреченіе: уповалъ еси въ жезлъ тростномъ, аще власатая трость твоя и буяетъ (?). А яко ничесоже доводятъ и сія Никитова наношенія, явѣ будетъ отъ низу глаголатися имущихъ правдолюбивому читателю. Аще убо Аристотель глаголаше: другъ есть Платонъ, другъ есть Сократъ, но паче другини ми есть правда, что намъ годствуетъ глаголати христіаномъ, у нихже Христосъ вѣруется, и истинѣ есть животъ, путь и истина (у Іоан. 14)? Ниже устрашаетъ ны Евангельское реченіе, отъ него на ны изреченное, у Матѹ. 12: иже нѣсть со Мною, на Мя есть, и иже не собираетъ со Мною, расточаетъ. Подобаше бо прежде показати, кто нѣсть со Христомъ,—Никонъ, или Никита клеветникъ,—таже видѣти, кто отъ ею расточаетъ, или собираетъ. Инако возвратилъ бы ся къ началу,

якоже глаголють діалектики, и связалъ бы сей творецъ непослѣдовательная, и сопрядалъ бы *οὐγγηλωσα*, несопрядаемая, и напоследокъ торжествовалъ бы прежде стяжанія побѣды, еже дѣло поистинѣ судится зѣло легкое и посмѣятельное у премудрыхъ и истинно сущихъ философовъ, отъ нихже не нелѣпо завершается, яко кратко-сказаніе: *конецъ дѣло блажитъ*.

4. Отраженіе обличенія, еже на оное: *ибо лучши имать именовать Бога тму и невидѣніе, нежели свѣтъ*.

Отъ притрѣнія¹ кременей раждается огонь, и отъ сраженія винъ происходитъ правда, и отгнану бывшу облаку свѣтлшій день является. Тако разгнавши хитрословесія, имиже видится помрачатися истина небесная, она сильнѣе происходитъ и во человѣческихъ глубочае всѣвается сердцахъ добродѣтель и восхваляется. Прельщается убо мрачный сей человѣкъ въ реченіи *тма*, *γυῶφος*, и поистиннѣ омраченный, егда неощуетъ, яко нѣсть лучши именовать Бога тму и невидѣніе, но свѣтъ. Се же, яко Богъ есть первый свѣтъ, паче отецъ свѣтовъ, по святому Іакову, первому Іерусалимскому архіерею; но Діонисій Ареопагита, а не Никонъ, тако нарицаетъ Бога необъемлемаго, о благій мужу, Никито! Діонисій, глаголю, въ первой главѣ о Тайной Богословіи изъясляетъ, какая есть тма божественная и, призвавъ абіе Пресвятую

¹) Первоначально было написано, и потомъ зачеркнуто, *прираженія*.

Троицу, поучаетъ, како въ ню входити подобаетъ, идѣже на послѣдокъ совершаетъ, яко тайная и неизреченная оная Павла святаго внутрь, во мракѣ, паче нежели пресвѣтлѣйшіи превозсіявають. Оттуду есть, яко Пресвятая Троица высочайшій есть тайныя богословіи верхъ вышенеуразумѣнный; се же, яко токмо христіане тайну тройчества и нераздѣльнаго единства вѣрою познавають и благочестіемъ почитаютъ. Чего ради не нелѣпо вѣра чрезъ тму разумѣтся, та бо есть уповаемыхъ извѣщеніе, вещей обличеніе невидимыхъ, по глаголу Апостола Павла въ посланіи ко Евреомъ въ главѣ 11, на еяже, вѣры, мрачности, яко на тмѣ пресвѣтлѣйшей, за Божіе свидѣтельство утверждаемся, никоей же созданной истинѣ прилѣпляющеся, но отъ всѣхъ вещей восторгомъ нѣкимъ, или отзваніемъ отъ чувственныхъ, или отреченіемъ отъ умственныхъ, ко вышеестественному оному превосхожденію удобѣе возвышаемся.

Сугубыя убо ради вины глаголется божественная тма отъ Ареопагиты. Первая есть, яко Бога во тмѣ пребывати писаніе свидѣтельствуєтъ. Тако Псалмопѣвецъ въ псалмѣ 103: бездна, яко риза, одѣяніе Его; и паки въ псалмѣ 17: положи тму закровъ Свой; и паки въ псалмѣ 96: облакъ и примракъ окрестъ Его. Чрезъ бездну же то знаменуется, яко Богъ ни коимъ же образомъ объятися можетъ; чрезъ лишеніе же, еже есть чрезъ тму, яко сицевъ Его божественный свѣтъ есть, даже никомуже приступенъ. Богъ бо, не приступный свѣтъ пріемлюще, тако тмою окружиться

глаголется, якоже мало-познаваемое незнаніємъ обводится: еже не ради познаваемаго, но не познавающаго дѣля тма глаголется. Тѣмже Богъ тма есть и именуется у люботщателей тайнофилософїи, тако Халдейскія, яко Египетскія и Пифагорическія; не за еже превысочайшій Богъ тму нѣкую въ Себѣ имствуетъ,—не буди се, Богъ бо свѣтъ есть, по Іоан. гл. 1, и тма въ Немъ никакая же есть,—но паче, яко по своему естеству свѣтъ есть безконечный и неприступный. Того дѣля Платонъ исповѣда: о коль зѣло неудобно обрѣсти Бога, иже изъявленъ и сказанъ явѣ никоимъ образомъ быти можетъ! Еже и евреи назнаменовати хотяще, имя Божіе повѣдаху быти ἀρρητον, ἀνεκφώνητον, несказанное, неизреченное. Поистинѣ Іустинъ мученикъ и философъ во увѣщенїи къ языкомъ блажить философа нѣкоего, Акмона реченна, такожде и Трисмегиста Меркурія, тако реченна, за познаніе Св. Троицы, отъ неюже единъ Бога именуетъ πανήριον, еже есть весьма тайна и несказанна, другій же яснѣ исповѣдуетъ Бога умопостиженію неудобна, ко изглаголанію невозможна. Чего вѣще требѣ? Египтяне Бога своего Аммономъ нарицаху, сіе же изъявствуетъ, яко свидѣтельствуютъ Египетскаго искуснїи глаголанія, тайнаго, или утаеніе. Того ради и Саитове, родъ нѣкій Египетскій, изрядно оное написаніе на притворѣ капища Аѣины, еже есть премудрости несозданныя, положили бяху: моего одѣянїя никтоже отъ смертныхъ никогдаже открылъ есть. Чесо ради бысть, яко вси единомыслно Бога необъ-

емлема нарицають. Се же Исаи велегласному подражающе, вопіющему въ главѣ 5: поистинѣ ты еси Богъ сокровенный, ¹ Богъ Израилевъ Спаситель. Но и Моисей же, аще и высочайшаго верха Божественныхъ изволеній достиже, обаче дотолѣ нѣсть сопребывалъ съ самимъ Богомъ, ниже Его видѣ, того ради, яко невидимъ и поистиннѣ ἀθέατος есть.

Вторая вина есть, еяже ради Богъ тма нарицается, яко аще Богъ и праведнѣ свѣтъ есть, обаче убо за излишество сіянія своего остроту ума и свѣтъ притупляетъ, ужасаетъ и помрачаетъ, не инако якоже и свѣтъ солнечный безмѣрный зѣницамъ немощствующимъ свѣтлость и видѣніе отъемлетъ, пачеже и совы птицы очесма нощію есть и тмою, орла же пресильнаго остроту зѣничную пресвѣтлѣйшимъ своимъ сіяніемъ исполняетъ. Обаче видѣти здѣ годствуетъ, сугубъ путь быти познанія Бога: едино убо чрезъ утверженіе, яко Богъ есть животъ, превысочайшая благодать, праведный свѣтъ; другій чрезъ отреченіе, яко Богъ нѣсть солнце, нѣсть камень, нѣсть плоть, но превосходителенъ и вышепревосходителенъ. Поистиннѣ Діонисій, Богословцевъ верхъ, утверждаетъ отреченія во Бозѣ паче утверженія быти преносительна, во гл. 2 о Небесной Іерархіи. И сему предпріятію неразгласно прицѣпляется псаломъ 138: яко тма ея, тако и свѣтъ ея, и нощь яко день просвѣтитсѣ. Отнюдуже навѣршается, яко добрѣ святой Діонисій случи тму

¹ На полѣ противъ этого слова замѣчено: absconditus.

съ высочайшимъ свѣтомъ, сице, яко тма сія таинственная купно есть и пресвѣтла; паче же молчаніе вѣще, нежели Арпократическое, или Пифагорическое во внутреннихъ души силахъ дѣйствуетъ, тако даже въ лѣпоту тма молчаніе наричется, и тайноучитель, и тайнонаставникъ,¹ еже яко Богословія таинство несвященнымъ людямъ изъясляти нѣсть лѣтъ. Добрѣ бо назнаменова Максимъ Тирскій сицевое быти ума человѣческаго безстудство, яко явная сушая и предручная мало почитаютъ и говѣютъ народницы; сушая же тайная и гадательственная со удивленіемъ обыкоша пріимовати.

Бога никтоже видѣ, глаголетъ Ученикъ возлюбленный, еже есть, не разумѣтъ, не познаваетъ, не объемлетъ всякъ ѹмъ созданный, занеже по своему естеству весь Богъ и всяко, якоже глаголютъ училищницы, необъемлемъ есть; и ко сего истолкованію святой Епифаній, воистинну свѣтлѣйшій, ἐπιφανής, (во Анкоратѣ) во своихъ истолкованіяхъ сицеваго употребляетъ подобія, или сравненія: якоже, глаголетъ, зряй на море, аще его появленность, или широту нѣкако и узритъ, обаче занеже его зѣльныя глубины и величайшія долготы не можетъ внутрь прозрѣти, аще бы имѣти ему Аргова и Островиздова очеса, обаче никакоже всевидѣвшъ наричется: тако и пренебесныи оныи и превысочайшіи Архангелове, по глаголу Петра святаго во первомъ его посланіи, Христа, въ Егоже страсти и славы желаютъ приникнути, никакоже объем-

¹ На полѣ написано: mistogogus.

лють, того ради, яко выну остаетъ нѣчто сокровенное, ко еже зрѣти, еже аки облакомъ приосѣняется и обвитое окружается, отвсюду тмѣ обшедши. Се же все бываетъ за врожденное Божества изящное необъятіе, еже всякій умъ созданный превосходитъ, Ангельскій же и человѣческій. И есть убо наверхатель, и праведнѣ, Св. Григорій Нисскій: кая свыше сила понуждающая иныя человѣкъ во тмѣ творящи претыкаться, иныя же во яснѣ свѣтѣ пребывати? но въ насъ самѣхъ, внутрь же, въ нашей силѣ, хотя (sic), и избраніи тмы и свѣта вину людіе державствуемъ, яко да овогда видящи, овогда слѣпи, якоже хотимъ тако и будемъ. Ибо по исторіи не стѣны, не горы, ниже что ино сицевое Египтяномъ лучи солнечніи отъимоваше; но равнѣ убо солнцу вся просвѣщающе, Іудеи свѣтомъ дневнымъ услаждахуся, Египтяне паки видѣти не могоша.

Аще селицы и толицы отцы, аки отъ Евангельскаго прорицалища и притвора Соломона тако прорицаша, о любиме Никито, кто здраваго ума человѣкъ выше сего и ктому усумнѣватися возможетъ о тмѣ божественнѣй? Воистинну никтоже, развѣ слѣпъ сый тѣлесными и душевными очима.

5. Отраженіе обличенія четвертое¹ еже на оныя словеса: *такѡ имате предъ собою смерть вашу, якоже и онъ, иже имать распинатися.*

Ктому напаствуетъ, но любопрительнѣ и безразсуднѣ, кромѣ же всякаго основанія, на оныя

¹ Было написано, и зачеркнуто: *пятое.*

словеса напечатанная: тако да имате предъ собою смерть вашу, якоже и онъ, иже имать распятися за нѣкое погрѣшеніе, и прочее, тако и вы да чаете смерть вашу,

Но прежде, нежели начати ми сіе обвиненіе еже отражати, молю, дадите ми прощеніе и свободу, повѣсть нѣкую дивную предложить. Клеомвротъ нѣкто, Амакіотскій юноша, во первоцвѣтѣніи вѣка си, двоесловіе Платоново о безсмертіи душъ четше, обрѣте окаянный тамо опредѣленіе философіи: философія есть мышленіе о смерти. Абіе самъ Клеомвротъ хотя внезапно философъ быти, толикою ея любовію разжеся, даже абіе низринутіемъ себе кончину житію си нужную наложить ему, якоже повѣствуетъ Амоній во своихъ пролегоменахъ. Подобнѣ мнитмися падшъ быти и Никита, незная словесъ Грека нашего Наѳанаила¹, непщуютъ, негли сія словеса умствительна быти о лицѣ Христа Господа, и того ради смѣло извѣствова быти явственнѣйшую ересь, того ради, яко въ писаніи есть слово о будущемъ времени: иже имать распятися за нѣкое прегрѣшеніе; и тако возбуесловствова, аки восклицающе: се колика, колика есть ваша ересь, яже глаголетъ и непщуетъ Христа имуща еще укрестоватися, иже поистиннѣ не ктому распятъ будетъ, единою за ны распятъ бывъ! Растетъ же вѣщше и худше, егда глаголете хотяща распятися за нѣкое погрѣшеніе того, иже всякія вины есть кромѣ, яко Агнецъ непорочный!

¹ Составитель книги «Скрижалъ».

Непщую же азъ, яко возопіетъ отрицательное
 сихъ и симъ подобныхъ злѣглаголаннхъ слово.
 Обаче убо не того ради избѣжитъ казни, должен-
 ства бо прежде разсудити и размыслити рѣчи,
 яже хотяше написати во своемъ свитцѣ, по оному
 притчесловію: дващи во умѣ, единожды во устѣхъ,
 дващи во устѣхъ, единожды въ трости. Нынѣ
 же о немъ выну возъистинствуется: еже писахъ,
 писахъ. Тѣмъ же убо, да постигнеши правое
 разумѣніе преизряднаго грека Наѳанаила, приди
 со мною и разсуждай, яже ти имамъ назнаменовати
 законнически. Поистиннѣ, аще философія есть
 разсужденіе смерти... по глаголу Платона фило-
 софа, послѣдствуетъ, яко разсуждаяй смерть
 истиннофилософствуетъ, и дѣйственнѣ фило-
 софъ быти непщуется взявляй крестъ свой на
 всякъ день, яко глаголетъ Христосъ Господь у
 Луки въ гл. 9-й. Что паки есть, молю, еже носи-
 ти на всякъ день крестъ свой, развѣ безпрестанно
 о послѣдней смерти вящше и вящше размышляти?
 Помяни, глаголетъ Сирахъ въ гл. 28, послѣдняя,
 растлѣніе и смерть, и престани враждовати. И
 индѣ Екклесіастъ въ гл. 4-й: помяни послѣдняя
 твоя, и во вѣки не согрѣшиши (послѣдняя же
 суть смерть, судъ и адъ). Наблюдаи оно, еже
 не согрѣшиши, сирѣчь не согрѣшиши во вѣки, но
 исправишися, смерть размышляя; яко бо праведникъ
 аще и седмижды во дни согрѣшитъ, обаче именो-
 ванія праведнича не отщетится, того дѣля, яко
 внегда пасти ему, абіе паки же востаетъ: тако,
 занеже скоро бѣжитъ грѣшникъ ко еже раскаятися,

исправляя себе, не глаголется во вѣки согрѣшая, ниже прозванія праведнича погубляетъ. Велія бо разсужденія есть сила. Мысль о смерти сама довольна есть, еже похотный огонь угасити, по словеси святаго Іоанна Златоустаго въ омилиі 10, во второмъ посланіи къ Коринѳомъ: аще, глаголетъ, похоти огнемъ палимъ еси, огонь онъ геенскій предложи умови твоему, и тако абіе угаснетъ и исчезнетъ. Того дѣля преблаго Пророкъ молилъ есть, желая, да живи во адъ снидутъ, еже есть во огонь онъ вѣчный, умомъ своимъ размышляюще, да не послѣжде умерше снити бы во бездну преисподнюю, лютѣйшія оныя казни чувствующе и послѣжде исчезненія. Сему же учителю послѣдова и Исидоръ Пелусіотъ въ посланіи 433 весьма таяжде глаголюще. Воистинну благоговѣнное, благочестное и остроумное бѣ мышленіе христіанскаго стихослова, о страсти Христовой вопрошающа: чесо ради Христосъ Господь пострадалъ въ день Афродиты, нежели во инъ день седмичный? сиче же отвѣтъ воспѣваша:

Въ день умре Афродитинъ Христосъ, плачте люди,
Блудъ вина смерти Сего: убо всякъ чистъ буди.¹

Обаче сея смерти размышленіе, яко жидовское, обличаетъ сей Никита того ради, яко писано есть противу Христу Господу, или по сращенному (?) жизни подателя, или по отвлеченному жизнь нашу

¹ Сначала были написаны, и потомъ зачеркнуты, слѣд. стихи:

Въ день умре Афродитинъ нечистотъ Попратель,
Она виновна, яко умре нашъ Очищатель.

именовательна, на пресвятомъ древѣ крестномъ висѣвша, селико толикая же мученія подъемша нашего ради спасенія за родъ нашъ человѣческій (ниже бо за Ангелы Христосъ пострадалъ есть, но о сѣмени Авраамли, по глаголу святаго Павла). Еда не вѣруеши ты, Никито, креста таинствомъ быти наше исправленіе? Но Исаія сіе повѣствуетъ въ гл. 53 глаголюще: сей грѣхи наша подъемлетъ и о насъ поболѣ. Призри убо, призри на лице Христово, иже положенъ есть и во знамя пререканія! Ибо аще кто либо на змія онаго мѣдянаго взираше, якоже чтемъ въ книзѣ числъ въ гл. 21-й, жизнь привременную живяше; и нынѣ, аще кого угрызетъ сатанино ухищреніе, аще на Христа на древѣ висяща воззритъ, имже смерть умертвися, жизнь имать жити вѣчную. Но писано есть, глаголетъ евреинъ, во второмъ законѣ въ гл. 21: проклятъ есть отъ Бога всякъ висѣй на древѣ. Не прекословлю азъ сице написано быти о ветхозавѣтномъ времени, егда крестъ грѣшныхъ людей казнилище и виселница бѣше; но нынѣ, измѣненію бывшу, бысть онъ лукъ торжественный, знамя побѣды, скипетръ царскій. И о семъ, непщую, умствоваше Іоаннъ Креститель, внегда, ему расти подобаетъ, глаголаше у Іоанна въ гл. 3-й. Се бо возрасте на крестѣ Христосъ, и того ради глаголаше у Іоанна въ гл. 12-й: *аще вознесенъ буду отъ земли, вся привлеку ко Мнѣ*, и индѣ въ гл. 8 у Іоан: *егда вознесете Сына Человѣческа, тогда разумѣете, яко Азъ есмь*, якоже поистиннѣ познася всѣми міра сего роды, егда на крестъ вознесеса.

6. Отраженіе обличенія пятое¹ еже на оная словеса: *и онъ младенецъ изначала даръ бѣ.*

Отрицаетъ Никита, яко Христосъ изначала воплощенія своего бѣ приношеніе, или даръ, аще и яснѣ то проповѣдуетъ царствующій Пророкъ, поюще о Немъ въ пс. 39: жертвы и приношенія на восхотѣлъ еси, тѣло же совершилъ ми еси, всесожженій и о грѣсѣхъ не взыскалъ еси, тогда рѣхъ: се прииду. Рцы ми нынѣ ты, *се прииду* что есть? развѣ еже: се приношуся и во жертву посвящаю себе? Еже и индѣ яснѣе знаменаше, егда вопіяше, глаголюще: текоша во жажды, псаломъ 51.² Предлежитъ здѣ изящное недоумѣніе, паче же въ нашемъ писаніи греческомъ: можетъ бо сугубо пріятися оно *ѣдрамов*, или въ первомъ лицѣ, аки бы глаголюще: азъ самъ текохъ, или въ третіемъ лицѣ, аки: Іудеи текоша на мя, яко людіе жаждніи, якоже имѣетъ писаніе русское. Но како либо пріемлется, выну по насъ есть Давыдское пѣніе³, занеже бо волею пострадалъ есть та, яже претерпѣти восхотѣ и подъяти. Убо сіе Никитино противоположеніе⁴ жидовствуетъ.

Но зрительно есть во святомъ Литургіи таинствѣ тожде знаменовати святыя дары и приношеніе,⁵ каковыя дары приношаху своима руками и царіе ко алтарю во время великаго входа, якоже является изъ Григорія Назіанзенскаго въ словѣ

¹ И здѣсь прежде написано было: *шестое*.

² Должно быть: псал. 61.

³ На полѣ: *deopsalma*. ⁴ На полѣ: *antitesis*. ⁵ На полѣ: *sev oblatam*.

надгробномъ святаго Василія, идѣже повѣствуетъ, яко Валентъ царь завратомъ главы поврежденъ бѣ, внегда отъ него дары Божественной трапезѣ принесени быти имѣяху, тако бо колебаться нача, даже аще не бы нѣкто отъ служитель святилища зыблющася рукою удержалъ быше, бѣднѣ и плачевнѣ упалъ бы. Тѣмъ же жертва, яже на освященіе отлагается и особымъ чиномъ во проскомидіи, или на жертовницѣ уготовляется, даръ нарицатися обыче во священной мистагогіи, яко та, яже праведнѣйшій есть образъ всего житія Христа Спаса нашего между человѣки и пребыванія предъявленіе зрѣнію нашему предлагающе. Яко бо проскомидія она свойственнѣ сокращеніе нѣкое быти видится вся священносвятая литургія, яже есть воспоминаніе вся страсти Христовой, иже повелѣ Апостоломъ: *сіе творите въ Мое воспомина-
ніе*, идѣже оное: *творите* тожде знаменуетъ, еже посвящайте, за еже бо Христовымъ пришествіемъ описася и скончася все оное древнее жертвъ служеніе, повнегда единая изряднѣйшая жертва, яже есть Христосъ, вся соверши предшедшая, и потому добрѣ наносится, яко приношеніе хлѣба глаголется, и есть же, даръ праведнѣ; а яко еже на проскомидіи отлучися оная великая частица и уготовлена на хотящее быти посвященіе, не инако, но акибы тѣло Господне было извлеченно и во чревѣ преблагословенныя Дѣвы созданно, по глаголу святаго Епифанія, иже того ради именуетъ чрево преблагословенныя Дѣвы пещію умственною, въ нейже испечеся хлѣбъ онъ небесный.

Тако бо цѣлуетъ Богородицу сей святѣйшій Кипра предстатель во похвалѣхъ Дѣвы Маріи: радуйся умственная печи, яже огонь и хлѣбъ жизни теплый мірови во пищу принесла еси, отъ негоже, Спаситель міра Христосъ глаголетъ, пріимите и ядите, у Матѹ. въ гл. 26. Она есть нива неоранная, яже слово, аки зерно пшеничное, пріемши, снопъ возрастила есть. Сему слову нашему присвидѣтельствуєтъ Божественное Писаніе, въ Пѣснѣхъ пѣсней, въ главѣ 7, егда глаголетъ: чрево твое стогъ пшеницы затворенна(енъ) въ кринахъ. Чудитжеся потомъ Никита, яко тѣло Господне хлѣбу животному уравниється и отъ грека Наѳанайла, священныхъ чиновъ сказателя и тайноучителя. Да приведется убо Іереміи святаго Пророка изреченіе, утверждающаго въ главѣ 11-й: вложимъ древо въ хлѣбъ его, и истребимъ его отъ земли живущихъ, и имя его да не помянется кому. А еже наносить, всякія кромѣ діалектики наносить, еже есть, яко чудеса Христа Господа еже младенчествовавши, и во святой проскомидіи аки во яслехъ лежаща, предъявленная изъясляютъ Христа Господа несовершенна быти Бога. Се во истинну никоего требуетъ отвѣта, ибо явственнѣе есть ересь Несторіева, яснѣе глаголюща: не покланяюся Богу двомѣсячному и тримѣсячному... паче же явное хуленіе несредственнѣе вѣща, аки стрѣла на Духа Святаго, еже есть на Божество Христа Господа. Но отражу доводъ прямо ему ¹ сице—

¹ Прежде было написано: во прѣмъ, потомъ: ко чловѣку; а на полѣ: ad hominem.

вымъ образомъ: фізіологове, еже есть искусніи естества испытатели, между ними же есть Макробій, глаголють, яко во первой чертѣ зачатія плодъ человѣческій малости пчелы, или поне, якоже хочетъ Аристотель, нравіи нимало превышаетъ, тако даже зрѣнію смертнаго гонзаему и видѣнію нашему едва еже подвержену быти мощи.¹ Нынѣ вопрошаю: кто ли отъ насъ Бога глаголетъ быти не совершенна? Мы ли, глаголющии самой чертѣ зачатія и соединенія Бога и человѣка Господню плотъ всѣми удами до единого быти устроенну, и душу на вся дѣйства тоею премудростію и разумомъ бывшу украшену, имже преимуществова мужъ, бывъ лѣтъ тридесати и трехъ? или Никита, сей священникъ, иже по малу и по общему естеству глаголетъ воображеніе воплощенія Божія содѣяно быти во чревѣ Дѣвыя? Но о семъ абіе долго и пространно стязатися имамъ.

7. Отраженіе обличенія, еже на оныя словеса:
не растяше плотъ Господня по малу, ниже вообразися ображенъми, имиже бываютъ прочая отрочата, и растутъ по малу.

Се Этна изbleва смертоносный огонь свой, се Никита отринулъ ядъ свой сатанинскій: исповѣдуетъ бо Христа Господа нашего по малу-мало растша во чревѣ Препоблагословенныя Дѣвы по обычаю отрочать, еже яснѣ видится быти противно

¹ Прежде было: *подлежати мощи.*

Божественному писанію и множеству св. Отецъ, наипаче Восточныя Церкви. Занеже бо св. Василій, основаніе и столпъ Православныя вѣры, въ словѣ, еже написа о рождествѣ Христовѣ, взываетъ сія, кедре и злата достойнѣйшая словеса. Глаголетъ бо, изъясняюще пишемая отъ Евангелиста Матѳея въ гл. 2: *рождающееся бо въ ней отъ Духа есть свята*: здѣ явно есть, глаголетъ, яко не по общему естеству Господни плоти бысть составленіе, абіе бо совершенно по плоти бысть то, еже внѣ извождается на свѣтъ... не образовася образованми, по малу-мало возрастъ прилагающе... Навершаетъ толикій учительнѣйшій мужъ: и ктому жъ видитмися назнаменовати оное Пророка Іереміи священнѣйшее изреченіе: сотвори Богъ новое на земли, въ гл. 31, жена объять мужа,—не рече: объять отроча, но мужа. Назначени сіе, Никито, и добрѣ. Се же, да изъяснитъ толикій Пророкъ совершенное плоти Господни совершеніе во всѣхъ удѣхъ, въ самой истой чертѣ зачатія, егда еще Мати Божія пресвятою или согрѣваше утробою, или ношаше во чревѣ. Ибо Несторій, иже Богородицу отрицаше быти *Θεοτόχου*, но токмо *Χριστοτόχου* глаголаше, Христородицу, достойную казнь страдале толикаго своего хуленія (черви бо отъ устъ сего пресквернаго человѣка: испадяху, и языкъ сего хульника снѣдаху, якоже свидѣтельствуєтъ Никифоръ въ кн. 14 въ гл. 26). Несторій, глаголю, блядословяше Христа токмо праведна быти человѣка, за добродѣтель постепенно обоженна, и чрезъ дѣлеса совершеніе оно пристязанное (еже... Назіанзинъ именуєтъ) пристязавша или

абіе по крещеніи, или поне по воскресеніи отъ мертвыхъ, всякаго кромѣ внутренняго себе премѣненія. А яко сицеваго совершенія Христось не имяше выну, но по малу пристяжалъ есть, доводствують изъ Евангелія Луки, глаголюща въ гл. 2: *Иисусъ преспѣваше премудростію, и возрастомъ, и благодатію.* На что́ отвѣтъ сотворити хотяще церковнійи учителя, паче же Богословъ, сицевую предаху вину. Сирѣчь яко не премудрости примноженіе и приложеніе пріимаше, понеже Богъ бѣ, никоеяже вещи требуй, но въ божественныхъ лѣпотяхъ весьма сый совершенъ, но яко премудрости проявленіе купно съ возрастомъ плоти по малу вдававшееся и провозсіяваше, еяже ради вины и Евангелистъ возраста умноженію и премудрости возрастъ присовокупилъ есть. Понеже бо мѣръ возраста плоти совершенное естество премудрость си являше. Инако бо коимъ образомъ сама премудрость въ премудрости преспѣвати глаголатися можетъ? Тѣмже, наворачаетъ предреченный Богословъ Григорій въ словѣ 35-мъ... не отъ приложенія бо совершеніе ему дадеся, ниже возрастомъ своимъ пристяжа, но естествомъ и изначала совершеніе имяше. И въ словѣ 51-мъ сицевое даде краткореченіе: Еже имѣ начало, или успѣваетъ, или совершается, нѣсть Богъ. Аще о Христѣ сія нѣкако глаголются, того дѣля, яко помалу себе изъявилъ есть, таящуюся премудрость помалу обнажающе. Глаголетъ Теофилактъ, аки сказатель Богослова, привводяще нѣкихъ непщеваніе, глаголющихъ, яко подобіемъ иконописца вся ту быша,

обыкша прежде образъ сѣнно писати, таже вапы сего совершати.... Обаче же, наворачаетъ толикій мужъ, мнози не имѣють сего во пріятство, ино хотятъ, яко абіе бѣ отроча совершенно. Образи изрядніи предложу вамъ ко еже истолкованію сего умышленія моего. Якоже Зевксисъ или Апеллесъ, нѣкій преславный въ художествѣ иконописанія начальникъ, икону отъ себе искусно написанную не абіе всю обнажати обыклъ есть, но помалу, частноже чувству подвергати: подобнымъ образомъ и Спаситель нашъ Ісусъ Христосъ успѣваше премудростію и благодатію, не яко примноженіе нѣкое пріемлюще (что̀ бо, совершенно изъ начала, еще совершеннѣе быти можетъ?), но яко та, сирѣчь премудрость и благодать, помалу человѣкомъ открывашеся. И того ради Евангелистъ прилагаетъ: *преспѣваше у Бога и человекъ*, еже не имать умствоватися о премудрости Божіи, ейже воистинну ничтоже никогдаже придатися може. Подобнѣ, ниже о премудрости вліянной или врожденной, ейже никогдаже приложение бысть и приданіе, но точію о искусительной, та бо теченіемъ време́не умножися, понеже отроча вящшая въ годы и мѣсяцы и во вся дни таящіяся премудрости дѣлаше приращенія. Положу инъ образъ, вящшій ради свѣтлости. Нѣсть ли солнце во златомъ ономъ денницы времени свѣтло и горящее? Помалу же свѣтлѣе и горящѣе, въ полудни же свѣтлѣйшее и горящѣйшее намъ видится быти. Обаче кто отъ насъ толико въ вещѣхъ небесныхъ есть страненъ, иже не вѣсть, не иное быти солнце на востоцѣ, въ теченіи и

въ полудне, но тожде весьма въ себѣ, кромѣ возраста свѣтлости и теплоты, равнѣ сіяющее пребывать и являтися. Не инако воистинну свѣтъ міра и солнце правды Христосъ Богъ нашъ во чревѣ Преподобнословенныя Дѣвы таинственныя денницы лучи нѣкія, яко первый свѣтъ востокъ, разліялъ есть. Тѣмже рождшуся, или возсіявшу солнцу, божественнаго свѣта лучи даже до Персиды и Аравіи проникнуша, и едва на оризонтъ нашъ солнце таинственное возношашеся, абіе примрачныя старыхъ очеса необычнымъ своего свѣта сіяніемъ освѣтилъ есть. А понеже теченія си солнце возглашати не обыче, даже до совершеннаго дне паче и паче растяше, храмовъ святилища разсматрѣя, учителей умы просвѣщая, еврейская погрѣшенія свѣта полуденнаго яснѣе обличаше, таже напоследокъ въ версѣ божественныя теплоты солнце сіе ста вознесшеся, высокоже во любви нашія возрастѣ все внурися (?) и пребываетъ. Сія вся утверждаетъ своими богословскими словесы Кириллъ Александрійскій патріарха, въ гл. 1 на Іоанна глаголяй, яко чловѣковъ паче чудящихся о Ісусѣ мнѣніе, нежели его совершенная благодать растяше, яко вящше его по вся дни познавающе, паче его успѣвати благодатию и расти непщеваху. Не потому убо еже бѣ, но по немуже являшеся, реченіе оное евангельское Луки святаго весьма разумѣти подобаетъ; инако же мудрствуяй, истиннѣе истинны, Лютрокалвинисуетъ.¹ Ибо Фридерикъ Спан-

¹ Было написано и зачеркнуто: *Со Лютромъ и съ Калвиномъ соеретичествуетъ.*

гемій повѣствуетъ, яко Лютрокалвинистове отрицають всякъ разумъ во Христѣ по естеству чело-вѣчества и утверждаютъ явѣ, яко невѣдѣвшъ бѣ нѣкихъ вещей, или поне навыкъшъ послѣжде, еже и помыслити страшится умъ вѣрный, не реку усты изглаголати, занеже бо выну Христова премудрость бѣ совершеннѣ безконечная и врожденная. И свидѣтельствуется о ней Павелъ въ посланіи къ Колоссаемъ въ гл. 2: *въ немже суть вся сокровища премудрости и разума сокровенна тѣлеснѣ*, еже есть естественнѣ. А яко глаголють училищницы: *дебело...*¹ но связнѣ тождествуются совершеннѣ, того дѣля, яко не дадеса ему Духъ въ мѣру, но Духъ безмѣренъ премудрости и разума, по оному словеси Исаи въ гл. 11: по всему божеству и благодати исполнену, якоже отъ исполненія его вси пріяхомъ и благодать возблагодать, еже есть по сказанію Кирилла Александрійскаго: отъ исполненія сыновня, яко отъ источника неисощимаго божественныхъ благодатей, даръ истекающъ во всякую душу, того дара достойную, вливается.

8. Отраженіе обличенія, еже на оная словеса:
*Ниже соединися и смѣсися Богъ Слово плотію и впо-
 стасію яже бѣше прежде сотворена, но въ лице
 свое, яко есть едино лице Святыя Троицы.*

Аще когда Тезіови Лавиринтъ, мѣсто многихъ пу-тей затрудненіемъ устроенное, показася неудобенъ, Сцилла же и Харивдъ бѣдотворныя горы Улиссови

¹ Одно слово не разобрано.

корабельнику за сраженіе каменей и противныхъ волнъ обуреваніе и пучины зѣло трудна явистася: сиче предложеніе мнѣ сіе трудно видится, и от- всюду недоумѣнными уплетенно, стропотствующе и сиртми (?) бѣднѣйшими исполнено. Здѣ бо преизлишнею темностію обрадовася нашъ Никита, и безмѣстнымъ своимъ невѣжествомъ вся безчинно превращаетъ и сливаетъ. Яже поистиннѣ... подробну испытovati въ великую тяготу произошло бы дѣло. Тѣмже премудростнѣ провѣща, кто либо есть сіе провѣщавый: то, еже есть свѣтло и явно въ писаніихъ, купно съ премудростію есть связано. Того дѣля Сократъ, внегода прочте Ираклія філософа стихотвореніе зѣло темное и недоумѣнное, сія изглаголавшъ носится: сей творецъ воистинну Делійскаго требуетъ плователя (ибо Деліове быша искуснѣйшіи въ водахъ пловцы...). Но да дерзаимъ примракъ попрали, яко глаголетъ псаломъ 17, иже ума нашего очесамъ вредотворенъ видится быти, и вышняго освѣщенія истины свѣтло за дебелость видѣти никакоже попускаетъ. Блядословитъ убо, да не реку буесловитъ, Никита, возстающе на Скрижаль Никонову и глаголюще мѣсто сіе еретическое быти, еже есть: «ниже соединися и смѣсися Богъ Слово плотію и вѣпостасію, яже быше сотворенна». Еда мнитъ сей чловѣкъ два лица во Христѣ быти, якоже и два естества? Да не будетъ. Ибо во Христѣ сугубо естество, лице же едино; два естества во едину вѣпостась стекостася, тако, якоже единому изъ двою, и обоима презъ едино быти, глаголетъ мой Богословъ Григорій во первомъ сло-

вѣ своемъ, яже слова положишася на посѣченіе
всѣхъ еретикъ подобіемъ меча обоюду остраго.

Но молю, глубже вещь да испытуимъ, Богу
свыше поспѣшествующу. Несторій, егда избранъ
бѣ на Цареградское патріаршество, Анастасія нѣ-
когого пресвитера, яко вѣрнѣйшаго си друга изъ
града великія Антіохіи привелъ быше, по свидѣ-
тельству Сократову въ церковной исторіи, иже
егда въ нѣкое время слово творяше ко благо-
честивѣйшимъ людямъ цареградскимъ, на толику
злобу, увы, дерзнулъ есть пребестудне, яко Бла-
гословенную Дѣву Марію рече не именовать Бо-
городицею, Θεοτόκον, того ради, яко не можетъ,
рече, отъ чловѣка Богъ рожденъ быти. возбу-
дилъ есть сей безбожный гласъ велію въ людехъ
молву и смятеніе необычное. Несторій же своего
пресвитера, сичевыя крамолы виновника, весьма
проклятія достойнаго и послѣднія казни, по поу-
ченіи призвавъ къ себѣ, величайшими похвалами
возносяще ублажилъ есть, и тако воежебы свято-
татство святотатствомъ, исполиновъ обычаемъ,
утвердити, истребивше и отрекше Богородицино
имя, Христа Господа въ двѣ ѱпостаси раздѣлилъ
есть, повѣствующе о немъ, яко два естества и два
лица, такожде и два Христа и два Сына быти,
единого убо Бога отъ Бога Отца, другаго чело-
вѣка изъ матере, отъ корене Давидова, юже того ра-
ди Христородицу именоваше. Ибо яко всякая царица,
яже родила есть Царя, и всякая пророчица, яже
роди Пророка нѣкогого помазаного, Христородицею
свойственнѣ именована была бы за мѣропомазаніе:

такo и Прeблагословeнную Дѣву Христородицу именовати поучаше, яко не Бога, рече, роди, но простаго помазаннаго чeловѣка, обычно бо въ писаніи помазанніи христы именуются, якоже естъ оно: *не прикасайтесь помазанному моему и во пророцѣхъ моихъ не лукавьте*, въ псал. 104. Подобнѣ и въ книгахъ вторыхъ царствъ въ гл. 1 чтеться, яко Давидъ рече ко Амалекиту, Саула убившу: *како не убояся воздвинуть руки твоя на Христа Господня: уста твоя на тя възвѣщающа, глаголюще, яко азъ убихъ Христа Господня*. Ктому чтемъ у Исаи: *сія глаголетъ Господь: Христу Моему Киру*, и прочая мѣста, яже оставляю сокращенія ради. Поистиннѣ сію Несторіеву ересь бьетъ нашъ Григорій въ первомъ посланіи ко Кледонію сопресвитеру, аки бичемъ изъ храма Христова изгоняюще сему подобныя еретики, егда глаголетъ: *Аще кто два Сына, единаго отъ Бога-Отца, другаго же изъ Матере, а не единаго и тогожде исповѣсть, той да отпадетъ отъ онаго усыновленія, еже правовѣрующимъ естъ обѣтовано*. Аще убо Богъ и чeловѣкъ и два еста естества, якоже душа и тѣло, обаче не два Сына, ниже Бога. Но да вoкратѣ изреку: ино поистиннѣ и ино еста та, изъ еяже Спаситель, обаче не инъ и инъ же. Не буди се: оба бо сія соединеніемъ едино еста, Богу чeловѣчество воспріемшу. Паки ино мѣсто глаголю: *Яко во Троицы инако вещь умствуется, тамо бо инъ и инъ же во еже бы лицъ не сливати, а не ино и иноже, понеже бо три по Божеству едино суть и тожде*. Еже яснѣе истолкова Кириллъ, на Іоанна, оное изъясняя:

никтоже взыде на небо, развѣ сошедый съ небесе Сынъ Человѣческій. Якоже бо, глаголетъ, есть изъ Бога Слово, такожде изъ жены человѣкъ: единъ паки Христосъ отъ обою, въ сыновствѣ нераздѣлимъ есть и во славѣ боголѣпной. На послѣдокъ же сей воплощенія поборникъ острѣйшій, изслѣдуя оное: *и Слово плоть бысть*, тожде бо есть, глаголетъ, аки бы рещи Евангелисту, яко Слово бысть плоть, или яко Слово человѣкъ бысть, именемъ бо плоти всего знаменуетъ человѣка, якоже человѣкъ разумный есть звѣрь, но сложный изъ души, и отъ сея тлѣнныя и земленныя плоти. Не глаголетъ, яко ко плоти прииде Слово, но яко бысть плоть, да не имствомъ, яко на пророки и иныя святыя, Слово пришедше вознепщуеши, но поистинѣ плоть бывше, еже есть человѣкомъ. Но да не кто самое Слово свойственнаго естества отступивше быти безумнѣ вознепщуеъ, и на плоть предложившеся, и то страдати, егоже весьма страдати не можетъ, абіе приложи Евангелистъ: *и вселися въ ны*, яко да егда двое нужднѣ услышиши, и *вселяшася*, и въ немже *вселися*, въ плоть сего предложася не возумствуеши, но пребывати паче во плоти, яко свойственныя употребляющее плоти, храма сирѣчь онаго, иже есть отъ Пресвятыя Дѣвы, внутри егоже пребываше все исполненіе Божества тѣлеснѣ, по божественному Павлу къ Колоссаемъ въ гл. 2-й. Неблагодаренъ былъ быхъ, аще быхъ умолчалъ пишемое Епифаніемъ, препирающимъ Назареи о Христѣ, о немже глаголетъ, яко пребысть въ Маріи Дѣвы чревѣ уреченное время, си-

рѣчь колико прочіи отрочата носитися обыкоша, донелиже изъ онаго Дѣвыя чрева изыде. О семъ воистинну отрочати глаголаше Исаія въ гл. 9 про-рицающе, *яко отроча родися намъ и Сынъ дадеся намъ*, имиже словесы первѣе истинно рожденно *отроча* показа намъ, во ежебы праведно пріятное естество человѣческое назнаменовати, таже приложи: *Сынъ дадеся намъ*, да тогожде Божіе быти Слово покажетъ, и Божія Сына изъявленна, и съ небесе сошедша, и во чревѣ рожденна, человѣка бывша... тако, даже сугубо въ себѣ естество, Божіе сирѣчь и человѣческое, ему содержати, и того дѣля Бога равнѣ же и человѣка, тогожде свыше даннаго Сына и отроча рожденно. Отселѣ явѣ есть, что отвѣщати подобаетъ на нелѣпая словеса Никитина. Богъ Слово со плотію и лицемъ соединися прежде бывшимъ, благій мужу, ниже первое ниже послѣднее, но едино купно бѣ соединеніе человѣческаго естества съ Божескимъ. Убо явѣ наносиши, на главу твою наносиши угліе огненное собирая. Но да поступимъ прочее ко второму его безбожному предложенію, еже есть сичево.

9. Отраженіе обличенія, еже на оная словеса:
*яже бѣше прежде сотворенна, но въ лице свое, яко
 есть едино лице Святыя Троицы.*

Веліе и дебелое есть сего пона неискуство, и занеже не разумѣтъ, что есть впостаь и лице, того ради бѣднѣ ричется, сѣмо и овамо приражающесе, и ко брегомъ ересей притираяся, никоею дскою вѣры подутверженъ суще, окаянный уто-

патель. Тѣмже нужда быти показамися, да нѣчто проглаголемъ, ради большаго наученія и множайшаго наставленія. Святый убо Павелъ въ посланіи къ Филипписеємъ въ гл. 2-й сихъ словесъ употребляетъ: *сіе бо да мудрствуется въ васъ, еже и во Христѣ Исусѣ, иже себе умали, зракъ раба приимъ, въ немже мѣстѣ презъ умаленіе назнаменова одѣяніе человѣческаго зрака, снисшествіе смиренное, измѣненіе странное. Самое бо Слово Божіе, якоже повѣствуетъ блаженный Максимъ, все полное сущее естество, всякаго премѣненія кромѣ, умалися, все человѣкъ бысть двоестественный, еже есть созданнаго и не созданнаго, безстрастнаго и страстнаго; тойжде впостаѣ бѣ всѣхъ тѣхъ, ихже впостаѣ бѣ, винословія всякаго изъятія кромѣ приемиюще. Итого дѣля Богословъ въ словѣ 1-мъ изъяснилъ есть, въ сія словеса изривающесе сѣмо грядетъ умаленное Божество, сѣмо плоть пріятая, сѣмо новое оное смѣшеніе, Богъ, глаголю, и человѣкъ, едино отъ обою, и обое презъ едино... И показываетъ сей мужъ велій все Божественное естество, во единой своихъ впостасей всему естеству человѣческому слученное бывшее, а не часть части, понеже бо и въ коейждо единой отъ нихъ, яже тогожде суть рода, впостаси совершенное есть естество. Чесо ради бываетъ, яко ниже впостаси, елико есть по естеству, коимже образомъ между собою различствуютъ, но свойствъ токмо, имиже впостаси, аки знаменми нѣкими, изъясняются винословіемъ: ибо впостаѣ есть естество, со личными свойствами слученное, тако яко еже обще есть со*

личными впостахъ имѣтъ. Чесо ради аще едина нѣкихъ впостасей нѣчто пострада, все естество, въ единой своихъ впостасей, пострадавшее глаголется. Обаче того ради нѣтъ нужды еже глаголати, яко вся тогожде рода впостаси страждущей нѣчто испостаси состраждутъ. Имже образомъ и во единого отъ Святыя Троицы Бога Слова воплощеніи все совершенное же Божества естество во единой своихъ впостасей естеству человѣческому, а не часть части, слученную (ное?) быти да глаголемъ; все бо намъ, якоже и священный Діонисій провѣщеваеъ, Божество во едину своихъ впостасей случися. Обаче не буди ми понужденіе того ради глаголати, яко вся Пресвятаго Божества впостаси, еже есть вся три, всѣмъ человѣческаго естества впостасемъ впостаснѣ суть соединенни. Ибо ни коимъ же образомъ Отецъ и Духъ Святый со Бога-Слова воплощеніемъ общее чтолибо имѣта, аще благоволеніе и хотѣніе изымеши.

Сугубо убо во Божественномъ тройчествѣ умуствуется свойство едино естества, другое—лицъ: Естественное же свойство есть то, еже свойственнѣ во единомъ нѣкомъ естествѣ виднѣ же познавается, въ другомъ же никако обрѣтается. Яко въ Божіи естествѣ, еже быти первовѣчну, несозданну, всемогущу, неописанну, и прочяя вся подобная, яже истинно никому иному всутствуютъ естеству, развѣ въ трехъ лицѣхъ познаваемому. Личная паки свойства: еже быти нерожденну, рожденну, исходящу. Есть бо нерожденное Отчее свойство, рожденное—Сыновнее, исходящее—Духа Святаго. По-

добнѣ свойство Отчее есть еже начала не имѣти, Сына же и Духа Святаго не тако, того ради яко къ Нему, аки къ естественной винѣ возносятся, не инако, якоже свѣтъ исходяй отъ солнца. Приемлю же здѣ вину, αἴτιον, обычаемъ греческимъ за начало, якоже αἰτιατόν, винованное, за началованное, тѣмъ сирѣчь обычаемъ, егоже употребляетъ и Святый Иларій, иже не тѣмъ намѣреніемъ употребляетъ, да разнствіе естества въ Божественныхъ лицѣхъ введетъ, но токмо да сосвязаніе нѣкое начала съ началованнымъ проявитъ. Есть убо впостась свойственнѣ естество со свойствы впостасными: аще сіе реченіе и ко простому бышеству простирается, и тако въ семъ знаменованіи тожде есть естество, еже и лице, чесо ради нѣцый отъ святыхъ естества впостасьми нарекоша. Того дѣля св. Епифаній на Поларіаны сія назнаменовати не усумнися. Но да не кого именованіе впостаси самыя возмущенна сотворить, усмотряти подобаетъ, яко того ради впостаси отъ восточныхъ употребляются, да лицъ свойства существенная и бышествовавшая изъясвятъ, не да три оныя впостаси три начала, или три Боги исповѣдять, ибо анаѳемѣ предають они три боги быти глаголющихъ. Прочее впостась, яже свойственнѣ есть, сирѣчь та, яже впостасная свойства имѣетъ прилученна, естество глаголется и есть. Естество же поистиннѣ въ трехъ лицахъ тожде есть; характерная же лицъ свойства различна, якоже рекохомъ, якоже: нерожденное, рожденное и исходящее. Нынѣ убо чесо хочетъ себѣ Никита, глаголяй, яко есть едино лице Святыя Троицы?

еда не хошетъ разлучити лица Сыновня отъ лица Отця и Духа Святаго? или нечестивѣ мнитъ всю пребожественную Троицу воплощенну быти и укрестованну, яже есть ересь арменская, или еоопасхитовъ того ради глаголющихъ: святой Боже, святой крѣпкій, святой укрестованный, помилуй насъ. Но сіе все истребися, и отъ соборовъ святыхъ проклято: тѣмже ни отвѣтованія требуетъ. Писано бо есть въ притчахъ, въ гл. 26: *не отвѣщай безумному по злобѣ его, да не подобенъ ему будеши.* И занеже обѣщахся, да не долгъ въ дѣлѣ семъ явлюся, еже пространнѣ бесѣдовати, отлагаю.

10. Отраженіе обличенія девятое еже на оная словеса: *яко есть едино лице Святыя Троицы.*

Хамелеона звѣря и траву повѣствуютъ естество-слова различный цвѣтъ пріимати, и тако въ всякій часъ удобно прелагаться (измѣняться), развѣ бѣлаго, яко Назіанзинъ глаголетъ, или чермнаго, якоже Плиній непщеваше. Никита же, кромѣ свѣтлыя правды, на всякую ложъ иначествуется подобіемъ басеннаго Протея, о немже притча: Протея премѣнѣйшій. Но начнемъ очищати Наѳанаила и изъ Греческаго же вѣрно истолкуимъ на языкъ славенскій. Глаголетъ убо: ¹ вполстасъ абіе Бога Слова во чревѣ Дѣвы совершенна есть и абіе плоть Бога Слова. Ибо Сынъ Единосущный Отцу, яко сѣмя Божественное, сочини и устрои себе ради плоть одушевленную, съ душею слове-

¹ На полѣ замѣчено: *deest in Skrizal.*

сною и умною, отъ чистѣйшихъ кровей тоя Богородицы, вземъ начатокъ отъ смѣшенія человѣческаго. Не пріять плоть съ сѣменемъ нѣкоего, но пріять ю зиждительно, яко Содѣтель и Создатель естества человѣческаго. Не приложенми по малу, но подъ единымъ совершившуся, якоже выше речеся, ниже соединися и смѣсися Богъ Слово съ плотію и вѣпостасію, яже бѣше прежде сотворенна, но въ Лице свое, якоже (Слово) ¹ есть едино Лице Святыя Троицы. Не тягостно будетъ исписати словеса Святаго Іоанна Дамаскина, изъ него же вся взятъ Наѳанаиль. Сей убо святѣйшій учитель въ гл. 67 изслѣдуя обычай зачатія Бога Слова сія предаде прѣявственнѣ: По сложеніи убо Святыя Дѣвы, сирѣчь егда изглагола: *се раба Господня, буди мнѣ по глаголу твоему*, Духъ Святый найде на ю, очищая ю и силу пріятельну Слова Божества подавая, купно же и раждательну, и тогда осѣни на ю Бога вышняго вѣпостасная мудрость и сила. Сынъ Божій Отцу единосущенъ, яко Божественное сѣмя, и слѣпи себѣ изъ чистѣйшихъ и нескверныхъ ея кровей плоть одушевленную душею же словесною и умною, начатокъ нашего смѣшенія, не сѣменно, но содѣтельно Святымъ Духомъ. Не помалу прилогами (слыши, Никито, не Никонова суть словеса, или Наѳанаилова, но Дамаскинова) совершаему образу, но во едино совершившуся, тое Божіе Слово, бѣвъ плоти вѣпостась, не бо предѣпоставовавшей по себѣ плоти соединися Богъ Слово, но вселився

¹ На полѣ: wide textum Nathan. fol 652.

святѣя Дѣвы (во) чревѣ неописанно въ своей впо-
 стаси изъ чистыхъ присно Дѣвы кровей плоть оду-
 шевленную душею словесною же и умною ипоста-
 стова.¹ Все видиши, пресвѣтлѣйшій царю, до слова
 преведено быти изъ Богословской книги Дамас-
 киновы, иже и въ гл. 72 сія приложити не усумнися:
 Бяше убо плоти впостась Бога Слова впостась, сло-
 жена убо изъ дву совершенну естеству, Божества же
 и чловѣчества. Еже ученіе поновляетъ ниже и про-
 страннѣ толкуетъ глаголюще о Препоблагословенной
 Дѣвѣ, яже, глаголетъ, не просто чловѣка, но
 Бога истинна родила есть, не нага, но воплощенна,
 еже назнаменова и Апостолъ, рекше: *посла Богъ*
Сына своего едиnorodнаго, раждаемаго отъ жены.
 Назнамени, яко не рече Павелъ *презъ жену*, но
отъ жены, аки бы рещи ему: Онъ тойжде есть
 существеннѣ отъ Дѣвы рожденъ, иже есть Сынъ
 едиnorodный Божій и Богъ вчловѣчивыйся во
 своей впостаси, одушевленную себѣ плоть содѣ-
 вающъ, душею словесною украшенную. Самъ же
 бысть себѣ же впостась. Сіе бо изъявляетъ оное:
раждаемый отъ жены, сирѣчь чловѣкъ истинный,
 яко сынъ чловѣчь; не Богоносець же, якоже ху-
 ляше Несторій, θεοφόρος. Ибо Василій въ словѣ о
 Святомъ Дусѣ ко Амфилохію, во гл. 2-й, еретики
 вѣка своего пронзаетъ, отъ слоголовленій ереси
 своя составляющія и прекословящія оное *отъ το*
ἑξου, еже вещество знаменовати, оное паки презъ
τὸ δίου органную вину знаменовати, еже... злое

¹ Все это мѣсто изъ книги Іоанна Дамаскина въ ркп. подвергнуто
 множеству поправокъ, чего на другихъ страницахъ ркп. не видится.

еретическое истолкованіе не всегда и вездѣ неп-
 щуется ложно, ибо частократнѣ частица *отъ* на-
 знаменуетъ вину вещественную и дѣйственную.
 Якоже здѣ назнаменуетъ, егда глаголется Христа
 отъ Духа Свята, еже есть дѣйственнѣ воплощенна
 быти, образно же яко отъ существа Духа Святаго
 Христосъ родися, якоже Анабаптистове безумніи
 повѣдаху, сирѣчь яко Христосъ плоть свою съ
 небесе принесе, и презъ Препоблагословенныя Дѣвы
 чрево, аки сквозѣ трубу нѣкую, преведе, и тоя
 ради вины Св. Григорій въ словѣ 51 провѣща:
 Аще кто Христа сквозѣ Дѣву, аки сквозѣ трубу,
 претекша, а не Божественнымъ въ ней образомъ,
 занеже кромѣ мужеска дѣйства, но человѣческимъ
 по обычаю рожденія воображенна быти речеть,
 безбоженъ есть. Того дѣля и Златоустый въ бе-
 сѣдѣ 3-й, толкующе оно о Дусѣ святѣ исполни-
 тельно есть, глаголетъ: во еже бы отразитися зазо-
 ромъ, яко въ ней рожденное отъ Духа бѣ Святаго...
 то, еже изъяви Епифаній и Аѳанасій, наблюдающіи,
 не рекша Гавріила, яко *рождшееся въ тебѣ...* но еже
 (якоже есть въ греческихъ писаніяхъ)... *родится*,
 дабы поистиннѣ рожденному ею рожденну быти
 вѣроватися. Тожде Дамаскинъ въ гл. 99 глаголетъ:
 вѣпостась Бога Слова прежде воплощенія проста
 баше и не сложна, безплотна же, несозданна, по
 воспріятіи паки плоти бысть плоти вѣпостась и
 сложна... сирѣчь изъ Божества, еже выну содержа,
 и отъ оныя и тояжде плоти, юже воспріять баше,
 со собою приносяще свойства двою естеству, тако,
 даже едина и таяжде вѣпостась несозданна бѣ по :

Божеству, созданна же по человѣчеству, видима, купно же и невидима. Тѣмже прилично наворачаетъ, яко Христосъ Господь не нарицается Христосъ прежде времени воплощенія, то бо мудрствовало бы ересь Оригенову, сонствовавшаго себѣ душъ преждебышество... Убо Христосъ наречеся, егда во чрево Дѣвыя вселися; бысть же плоть непременно презъ помазаніе Божества, человѣчество бо помазася, глаголетъ Григорій Богословъ и Кириллъ Александрійскій. Наблюдателно есть хитрствованіе Аріанское, отрицавшихъ сына Божія быти... презъ едино ѿ, сирѣчь несозданна бывша, исповѣдаху же быти... созданна, а не... рожденна, презъ сугубо ѿѿ. Но воистинну Божественное естество есть нерожденное (еже бо родитися нѣсть естества, но въпостаси), и того ради Отцу дается нерожденное,—того ради, яко ни отъ когожде раждается; рожденное паки Сынови, занеже отъ Отца родися; исходящее Духу Святому, яко отъ Отца исходитъ, якоже засвидѣтельствова Самъ Христосъ у Іоанна. Отсюду явѣ есть еже рещи подобаетъ о трехъ ересѣхъ ложно приведенныхъ и злѣ уразумѣнныхъ отъ сего Никиты. Нынѣ же ко инымъ клеветамъ да приступимъ.

II. Отраженіе обличенія десятое, еже на оная словеса: *о чрево Пресвятыя нашея Богородицы написано: но отверзеся утроба и заключися.*

Богородицу поистиннѣ быти выну Дѣвою и тредѣвою... никтоже отъ православныхъ никогдаже усумнися, понеже о ея дѣвствѣ и праведной...

вся Церковь за членъ вѣры держаше, и вѣчныя казни анаѣмою всегда осуждаше противная мудрствующихъ. Но буди подробну, прилежно же нынѣ три сія саны различныя намъ разсудити: аще бо возглаголемъ прежде зачатія и рожденія, аще въ самомъ зачатіи и рожденіи, аще, напоследокъ, послѣжде обою, выну преблагословенную Дѣву Марію нескверну, неблазненну и нетлѣнну обрящемъ воистинну, якоже вѣруемъ. Поистиннѣ Гелвидіани тяжко буесловствоваху, лживому своему учителеви Гелвидію, человѣку неискусну, а якоже Іеронимъ свидѣтельствуєтъ, едва первымъ писемъ навикшу послѣдовавши, иже сонствоваху, узаконяюще по рождествѣ Христовѣ,—о безбожныя и премерзкія хулы!—Іосифа и Марію не токмо сходящіяся въ бракъ, но и въ совокупленіе, основаніе полагающе ереси своя на оныхъ словесѣхъ у Матѳея: *прежде неже снитися има...*¹ еже не имяше глаголатися развѣ о лицахъ уже сошедшихся. Но убо оное еже *снитися...* не всегда приѣмлется за совокупленіе.... въ знаменованіи стѣсненомъ, но въ пространномъ. Аще бо и тако умствуется, и приѣмлется за совокупленіе, или за дѣйственное двою супругу вдомвоведеніемъ сожитіе; обаче не- всегда сицевое знаменованіе припускаєтъ. Глаголетъ бо Марко въ гл. 3: множество многое народа снидошася къ нему...² и въ Дѣяніяхъ въ гл. 2...

¹ Здѣсь, очевидно, вписанъ былъ у Паисія греческій текстъ 18-го стиха 1-й главы: *πρὶν ἢ συνελθεῖν αὐτοῦς.*

² *πλῆθος πολὺ ἤλθοу πρὸς αὐτόν* (ст. 8).

снидеса народъ и смѣсися.¹ Ниже осудительно есть оно, еже поминаетъ Епифаній на Маріоборцы, еже есть, яко ради Пресвятыя Дѣвы Маріи ублаженія отъ Іосифа познатися не можаше, дондеже роди Ісуса, сеже за необычныя свѣтлости изліяніе отъ лица Богородицына. Ибо аще Моисеово лице, о семъ бесѣдовавша, толико просвѣщенно баше, даже на него сыновомъ Израилевымъ зрѣти не-возможи: кольми паче Марія зрѣна быти не можаше, яже ношаше Господа силъ, истиннаго же законодавца Христа во чревѣ. Ктому Керинтову и Евіонитскую древнюю ересь отместемъ вси православніи, яко, во еже бы имъ показати Христа Господа нага быти человѣка, буесловившыя его отъ смѣшенія Іосифа и Маріи рожденна бывша, якоже свидѣ-телствованное остави Иринеѣ въ гл. 1 на Керинѳа ересеначалника, и доводствуется отъ различныхъ мѣстъ Божественнаго писанія, изряднѣе же отъ Іезекіиля, гл. 44: и рече ко мнѣ Господь: *врата сія затворена будутъ и не отверзутся, и никтоже пройдетъ ими, яко Господь Богъ Израилевъ внидетъ ими, и будутъ заключена; зане старѣйшина той сядетъ въ нихъ.* Егоже мѣста приподобленіе не нелѣпое творитъ Августинъ, въ бесѣдѣ 18 о времени: что суть, глаголетъ, врата въ домъ Господнѣ затворенная, развѣ Марія выну будетъ непорочна? И что есть: и никтоже пройде ими, развѣ, яко и Іосифъ не познаше ея? И что есть: яко Господь внидетъ ими, развѣ яко Духъ Св. оплодоноси ю?

¹ συνῆλθεν τὸ πλῆθος καὶ συνεχύθη (ст. 6).

И что есть: затворенна будутъ во вѣки, развѣ, яко Марія Дѣва прежде рожденія, Дѣва и въ рожденіи, Дѣва и по рожденіи. Часто приносится отъ святыхъ отецъ подобіе нѣкое чрева пресвятыя Дѣвы со Христовымъ гробомъ. Обоя бо запечатлѣнна быста, заключенна пребыста. Чесо дѣля св. Епифаній, стязаніе творяще на Оригена,—кое разнствіе есть между тѣломъ душевнымъ и духовнымъ,—сицевая подлагаетъ: Христосъ изъ мертвыхъ встающе тонкую плоть облече, и вратми затворенными вниде (обаче еже упорнѣ отрицаютъ и не пріемлютъ калвинистове), воистинну Христосъ пройде затворенныя двери. Обаче тонкое, якоже вѣруетъ Епифаній, и духовное, прежде бывшее дебелое и на крестъ вознесенное: воста бо Христосъ отъ мертвыхъ не да ктому умереть, въ послан. 1 къ Коринѣ. въ гл. 15. Тожеде весма и Кириллъ, исполняя оное у Іоанна: *и по осми днехъ явися паки своимъ ученикомъ*, чуднымъ обычаемъ яко Богъ, не бо, якоже мы, отверсти себѣ врата входящему повелѣ, но оставль сіе повелѣніе, пронице врата и посредѣ дому внезапно является. О третьемъ паки санѣ, иже есть по зачатіи и рожденіи Спаса исповѣдуемъ, купно же и вѣруемъ вси и единъ койждо, Преблагословенную Дѣву сицеву всегда пребывшу, нетлѣненъ выну дѣвства цвѣтъ сохраншу, тоже ово достоинства ради Христова (лѣпотствоваше бо тому, иже по божественному естеству едиnorodный Сынъ Божій быше, быти же едиnorodнымъ Сыномъ Матернимъ по человѣческому естеству), ово достоинства ради

Духа Св., Егоже святилище бѣ Дѣвыя чрево (не бо кромѣ оскверненія отъ человѣка употребитися могло бы, Духови Святому изряднѣе посвященное, явѣ Павлу глаголющу, 1 Коринѣ. 3: *аще кто храмъ Божій тлитъ, растлитъ его Богъ*), ово ради достоинства Святыя Дѣвы, яже инако неблаго-дарнѣйшая явилабыся, аще бы сицевымъ и толи-кимъ Сыномъ малодоволствовавши дѣвство, волею прежде зачатія Духови Святому посвященное рас-тлити восхотѣла совокупленіемъ плотскимъ, и вожделѣніемъ похотства, обличающаго невоздер-жаніе и немощь плоти Пресвятыя Дѣвы. Ниже пакоститъ реченіе *первороднаго*, ибо, якоже гла-голетъ Іеронимъ и прежде его Василій св., пер-ворожденный именуется, не по немже братія по-слѣдуютъ, но иже первый рожденъ и ложесна разверзе; не бо всякъ первородный есть едино-роденъ, егда токмо то нарицается первородное, еже ложесна разверзаетъ; и того ради не рече Евангелистъ, яко Марія роди перворожденна сво-его, но просто перворожденна...¹ аки антонома-стическо и... совершенно сицеваго, разсмотрѣніемъ всея твари, аще сіе преимущество восхощеши умствовать разсмотрѣніемъ естества, или благо-дати, или славы, о немже нѣсть мѣсто стязанія.

¹ Τοῦ πρωτοτόκου.

12 Отраженіе обличенія—еже на оная словеса: Но Святому Духу пришедшу на ню и очистившу словомъ Архангела Гавріила, зане скверна прародительная бѣше въ ней.

Сократъ, егда бѣше во узилищи, близъ же бывъ смерти, услышавъ нѣкихъ о безсмертіи души препирающихся, воздвиже умъ свой, купно же и ушеса, лебедское оное глагола изреченіе: старѣюся, выну новому ничесому научаяся. По истинѣ, аще когда желалъ бы научиться паче, нежели научити, наипаче въ сицевой вещи о первородномъ грѣсѣ вожделѣлъ быхъ. Вижду бо мя посредѣ двою великую училищу тѣсно вмѣщаться; а кому на послѣдокъ похвалъ и жребій имамъ дати, ефетическимъ обычаемъ, весьма усумнивъ есмь и объятенъ: поборникомъ ли никоея скверны въ Преподобнословенной Дѣвѣ первородныя познавающимъ, или жестокимъ, онымъ насмотрителемъ, неусумнѣвающимся считати ю съ прочими, отъ смѣшенія Адама исходящими.

Нынѣ убо, о благочестивіи архіереове, мужественныя умы да воспримемъ, и сей вопросъ прилежно и богословски разсмотримъ, чету доводовъ привносяще. Есть убо грѣхъ первородный всѣхъ злобъ, послѣдствующихъ въ сей жизни окаянной и во юдолѣ семъ плачевномъ нами содѣваемыхъ, корень и начало. Того ради царствующій пророкъ Давидъ, пс. 50, сѣтуя провѣщаваше: *и во грѣсѣхъ роди мя мати моя*. Глаголаше въ числѣ множественномъ, употребивъ его въ единственна мѣсто,

занеже бо силою вся преступленія, тако смертная, яко простимая, внутренѣ, содержитъ той грѣхъ Адамовъ. Не инако глаголется, якоже еже мудрствуютъ философовѣ о вѣществѣ первомъ, еже въ силѣ содержитъ вся образы, яже послѣдствительнѣ единъ послѣжде другаго пріимати есть могущее.

Добрѣ сравниваетъ сей грѣхъ первородный св. Епифаній съ смоковницею, стяжаніе творя на Оригена. Сія, прозябши, израстаетъ въ широту величайшую, премногими кореней раменми вездѣ рассыпаяся, ниже престаеъ расти, донелѣже вся растлѣвши падетъ и отъ самыхъ кореней изсохнетъ. Ибо донелѣже плоть живетъ, сею и грѣху жити нужда есть, и тайное въ насъ кореніе утверждати, аще и нѣкими, аки отсѣченми, наказаніи укрощается; и никтоже толико свободенъ отъ грѣха похвалится, во еже бы ему ниже мыслию согрѣшенія содѣяти. Откуда послѣдовательно есть украшаться и умерщвлятися грѣху вѣрою, еже есть крещеніемъ, да не тлетворныя плоды испуститъ; обаче не весьма и даже изъ корене истребляется. Тѣмже убо словомъ Божественнымъ, яко сѣкирою нѣкоею, плодотворящия паки отъ кореней вѣтви отсѣкати понуждени бываемъ. Но къ нашему дѣлу приблизимся, сицевыя прилоги оставше. Павелъ, всѣхъ языкъ учитель и проповѣдникъ, пиша къ Римлянамъ, сія глаголетъ: яко нѣсть праведенъ никтоже, вси уклонишася, вси бо согрѣшиша, и требуютъ благодати Божіа; и ниже индѣ: *въ немже*, сирѣчь въ Адамѣ, якоже толкуетъ Икуменій, *вси*

согрѣшиша. Аще вси, тако Іудеи, якоже и Еллини, подѣ грѣхомъ есмы, и вси уклонихомся, развѣ единого Христа, всякаго грѣха непричастна, что̀ остается глаголати о Преподобнословенной Дѣвѣ Маріи, яже изъ мужеска сѣмене зачата же и рожденна, развѣ яко и она заключается, а не исключается изъ сея общія казни Адамовы? Ниже претитъ исторія рождества Преподобнословенныя Дѣвы, сія предаючи, яко Іоакиму, отцу Маріину, свѣше то извѣщено быше, еже жена твоя зачатъ. Не тако бо есть примательно, глаголетъ Епифаній, воежебы тому, кромѣ брачнаго совокупленія, и безъ мужескаго сѣмене прилучитися, но еже хотяше быти Ангелъ отъ Бога посланный возвѣстилъ есть, дабы послѣжде не быти коему усумнѣнію о еже въ міръ изведется и отъ Бога установится, отъ праведнаго же мужа рожденно быше.

Помню, яко слышахъ нѣкоего проповѣдника, ко еже отразити оное народное и повсемственное положеніе святаго Апостола Павла, сицеваго употребивша силлогизма: никійже звѣрь безсловесный глаголетъ; но ослица Валаамова бѣ звѣрь безсловесный: убо ослица Валаамова не глаголаше. Обаче же обрѣтается въ Божественномъ писаніи, яко глаголаше, рекущи: *вскую мя біеши?* Тоже само и азъ, рече, глаголю о Преподобнословенной Дѣвѣ. Исповѣдаше же, яко то все бысть благодатію вѣчиною, и дѣло чудное десницы Бога Вышняго. Обаче же сіе подумствуется, а не доводится сіе содѣянно быти. О ослицѣ Валаамовѣ, паки, явѣ обрѣтается въ Божественномъ писаніи,

и того ради во усумнѣніи быти не можетъ, кромѣ тщеты священнаго писанія и уятія. Св. Кириллъ въ похвалѣ, юже сложи Богородицѣ Маріи на самомъ же соборѣ Ефесскомъ, между иными похвалами, тамо собранными и положенными, сицевая словеса провѣщаше: Радуйся Дѣво Марія, Мати и раба, Дѣво убо рождшагося ради изъ тебе Дѣвы, Мати паки ради Того, Егоже на объятіихъ своихъ носила еси и млекоу своимъ питала еси, раба Того дѣля, Иже зракъ рабій пріять: вниде бо царь твой во градъ твой, или паче въ чрево твое, и паки изыде, якоже самъ восхотѣ. Врата твоя затворенна суть: зачала бо еси безъ сѣмене и Божественнѣ родила еси. Идѣже разсуждаю реченіе оно *раба*, якоже и сама нарицаетъ ся въ пѣсни своей Марія: *се раба Господня*. Аще раба: убо подъ плѣномъ и она бѣше, и того ради Бога нарицаетъ Спаса своего и Искупителя. Инако бо, да рекуть ми поборницы разумѣнія противнаго, коея ради вины особнымъ обычаемъ Спаса своего нарицаетъ, развѣ ради искупленія, якоже *Бога* именуетъ за величество славы, *моего* паки за воспріятое челоуѣчество? Преизрядное разсужденіе, достойное ума своего, утворилъ есть св. Епифаній, толкуя мѣсто оно Ап. Павла къ Галатамъ 3. идѣже Апостолъ употребляетъ сего глагола...¹ *искупилъ*, повѣдаетъ бо веліе быти разнствіе между еже *искупити*, и еже *купити*. Купуетъ бо той чуждее стяжаніе, еже продаетъ

¹ Εξήγορασεν (ст. 13).

нѣкто нищеты ради, нуждою нѣкою притисненъ, или отъ взаимдателя нѣкоего понужденъ. Христосъ паки сокровищемъ крове своею искупилъ ны есть, не купилъ же: его бо есмы, и якоже глаголетъ пѣта... Нынѣ убо вопрошаю: еда Благословенную Дѣву Христосъ Божественною своею кровію, кресту пристоявшую, искупилъ есть? Аще искупилъ есть, яко дщи Адамова есть искупленна; аще же не искупилъ есть, убо его крове не требоваше и, послѣдователнѣ, не можаше нарицатися ея Спасъ и Искупитель,—сиче же сама она нарицати не усумнѣвается. Да приступитъ здѣ Богословіи учитель, Назіанскій Григорій, иже въ словѣ 38 о рождествѣ Христовѣ сія изреченія далъ есть отъ святаго богословіи проповѣдалища: «Зачася, глаголетъ, Христосъ отъ Дѣвы, душею и тѣломъ предочищенныя»... Здѣ разсуждаю реченіе оно «предочищенныя», и силу полагаю въ его разумѣніи: чесого хочетъ себѣ толикій богословецъ? Аще бо она бѣше подобіемъ солнца пресвѣтлая, и яко снѣгъ чистѣйшая, въ нейже никакаяже скверна и порокъ оставаше презъ сѣмя человѣческое: очищатися ктому не долженствоваше. Назнаменовательно же есть, яко святѣйшій сей Архіерей обыче употребляти многажды реченія... чищенія... боготворенія. Первѣе же убо нарицается чищеніе—крещеніе, второе паки чищеніе—покаяніе, не безтрудное, но многимъ повинное каземъ. Паки идѣже чищеніе, тамо и освященіе; освященіе же желанія главизна и верхъ есть. Тако Богословъ въ гл. 40 на св. крещеніе: Крещенія же, глаголетъ, сія

благодать есть и сила, не кругъ земный, якоже древле, водами заливающая, но всякаго чловѣка грѣхъ чистящая, пороки же и скверны грѣхомъ привлекаемыя весьма стирающая. О θεωσενс паки имени, боготворенія, употребленомъ многократнѣ, наипаче же въ словѣ 35, поучаетъ Богословъ Христа того ради бывша умаленна воспріятимъ чловѣчествомъ, да чловѣкъ возвышенъ будетъ,...¹ плоти дебелость отвергше, сирѣчь да съ божествомъ взыдетъ и со умными вещми востанетъ. Ты же (глаголетъ со еретики своего времени) божество того ради укаряеши, яко дебелость твою пріять, да и ты Богъ будеши. Оба реченія назрѣлъ есть Іоаннъ Св. Дамаскинъ... вѣрный сказатель богословія, якоже видѣхомъ, исповѣдавый Духа Св. пришедша на Святую Дѣву, и очистивша ю. Но речеши: еда даже до времени Спасова² Дѣва чиста не бѣше? Отрицаю послѣдованіе; глаголетъ бо ся чиститися злато и сребро паче и паче, чесо ради Давидъ проаше: *наипаче омый мя*, еже есть вящше и вящше... очисти... Паки, аще вѣруемъ Маврикію Архидіакону великія церкви цареградскія, сложившему синаксарій, чтомый въ Минеяхъ, Преблагословенная Дѣва бѣше отъ Апостола Петра святымъ крещеніемъ омовенна. Убо уже доводствуется ону ктому требовавшу быти чищенія: инако бо, аще бы небыло ко умноженію благодати же и силы, вскую бы употребила тайны крещенія, аще бы изводства своего была лишена

¹ Одно слово не разобрано.

² Здѣсь, вѣроятно, пропущено слово: *зачатія*.

толикая тайна? Тѣмже убо краткореченіе философское выну бѣ и будетъ, вся послѣднѣйшая быти грѣшна и послѣднѣйшей гонзати елико можно требѣ. Того ради ниже превышше мѣры Пресвятыя Дѣвы достоинство превозносящія стужати подобаетъ, ниже унижающія величество славы ея вины всякія кромѣ. Чесо дѣля св. Епифаній на Колиридіаны, Маріи жертву приносившія, аще, глаголетъ, и избранный нѣкій сосудъ и изрядный бѣше Марія, обаче убо жена бѣше, тогожде съ прочими естества, аще душею и умомъ множайшими чести была почтенна. Аннина и Іоакимова дщерь бѣше, юже молитвами и всяческимъ тщаніемъ¹ родителя удостоистася пріяти, обаче тако, якоже не иное отъ прочихъ человѣкъ званіе имяше, но якоже и прочіи отъ мужеска сѣмене, изъ чрева же матерня изыде. Быти бо не можетъ, да кто кромѣ общаго человѣкъ естества на земли родился, единому же токмо приличствоваше, единому естество уступи, яко Господеви и Зиждителеви своему, Богу Слову, еже отъ Дѣвы въ плоть пріятую облещися. Но дадите ми прощеніе, вѣщь инако разсудити хощу. Повѣдаютъ естественныхъ тайнъ имѣющіи искусство, яко аще плодъ, зачатый во чревѣ, будетъ мужескъ полъ, едва по чотыредесятихъ днѣхъ образъ пріемлетъ; аще же женскъ, и медленнѣе ктому приходитъ, якоже немощнѣйшаго сіи естества, но требуетъ, глаголютъ, ко совершеннаго воображенія устроенію сугубо дни 40, сирѣчь 80 дни.

¹ Было: *всяческимъ въ добродѣтеляхъ тщаніемъ*; но потомъ слово *въ добродѣтеляхъ* зачеркнуто.

Нечиста убо есть дни 40 рождшая полъ мужескъ, по левитскимъ книгамъ въ гл. 15, женскъ паки рождшая вся 80 дни въ сквернѣ и нечистотѣ пребудеть, противъ време плодообразованія и явственнаго человѣческаго образа пріятія. Симъ положенымъ бывшимъ, вопрошается: чесо ради западная церковь въ день осмый Декаврїа, восточная же въ девятый празднуеть праздникъ сей зачатїа? Суть согласїа ради глаголющїи, яко едина зачатїе, другая освященїе празднуеть. Но аще образа устроенїе женскаго пола... бываетъ во времени 80 дни, якоже видѣхомъ, кое освященїе души будеть, еже отвнѣ приходитъ, аще нѣсть еще тѣло устроено и образи ¹ воображенно вещественными частными, по глаголу бо фїлософа, душа есть дѣйство плоти, еяже кромѣ человѣкъ нѣсть. человѣкъ, занеже человѣкъ есть сложенъ изъ души и плоти. Но речеши: восточная Церковь поеть: прежде зачатїа чистая освятися Богови? Но усумнительно зѣло является, како разумѣти подобаетъ и прїимати; дѣйственнѣ ли, или страдателнѣ зачатїе, и того ради ничесоже явственное отсюду наворачается. Напослѣдокъ въ пѣсняхъ пѣсней, гл. 4, глаголетъ женихъ: *вся красна еси ближняя моя, и нѣсть порока въ тебѣ*. Но въ греческомъ писанїи вмѣсто порока полагается *μωρος*; бѣ же *μωρος*, по преданїямъ языческимъ, вся обхуждавый, а занеже во Афродитѣ ничесоже обрѣте достойно хуленїа, провѣща сандалїа ея... скрипѣти. Обаче убо въ символис-

¹ Было: членми.

кихъ и таинственныхъ ничесоже наворачается. Тѣмъ же убо Еврейскіе мудрецы сей законъ и обычай имѣша, не всякому возрасту попускати начала книгъ Бытія, Пѣсни Пѣсней и Езекилева пророчества о Церкви, развѣ совершенный возрастъ и мудрость пріемшимъ, якоже назнаменова Іеронимъ въ посланіи къ Павлину. Паки: *жена облеченная въ солнце* есть Преблагословенная Дѣва воистину. Св. Меѳодій вмѣсто сея жены таинственнаго откровенія нещуетъ Апостольскую Церковь, якоже и св. Епифаній прелагаетъ предреченную пѣснь Соломонову на туюжъ соборную Церковь, и ону голубицу быти повѣствуетъ. Откуда явствуется, яко святіи отцы употребляютъ сихъ мѣстъ таинственныхъ по предложенному имъ веществу. Во оконченія мѣсто да будетъ: *се бо во беззаконіихъ зачатъ есмь, и во грѣсѣхъ роди мя мати моя*, сирѣчь: яко нечисто есть естество наше по преступленіи и проклятій, тогда бо Адамъ огнемъ похоти раждеженъ жену свою Евву позна, онаже зачатъ и роди, тако даже похоть есть зачатія начало и вина, зачатіе же рожденія; оба же подъ дѣйствомъ погрѣшительнымъ ¹ бываеа, чесо ради послѣдствова смерть завистию діаволскою. Прелщается убо кто либо есть глаголяй, яко того ради Маріина родителя не не считаетсяъ у Матѳея, да не яко дщи Адамова, грѣхомъ объята, она пріимется,—погрѣшаетъ, глаголю, зѣло, ибо родителя Преблагословенныя Дѣвы считаетсяъ отъ св. Луки презъ Наѳана, Давидова

¹ Было: *подъ грѣхомъ*

сына, якоже презъ Соломона Іосифовы, мужа ея. Паки же тѣмъ самымъ, яко разсуждается Марія, яко Мати Божія, должно есть разсуждати купно быти ю дщерь Адамлю: имяше бо Христосъ не токмо общникъ быти плоти и крове, но и пріяти же сѣмя Авраамле, отъ чреслъ изыти Давидовыхъ, и тако отъ Адамлихъ чадъ нисходити, якоже изряднѣ разсудилъ св. Епифаній въ своемъ краткомъ вѣры истолкованіи, идѣже толкуеть 62 рожденія, или патріаршества, отцевъ родства, преизящнѣйшихъ мужей именми изображенная въ сословіи Вивліобытія. Отъ Адама бо 'даже до Ноя преидоша десять родове, толикожде отъ Ноя даже до Авраама, отъ того до Давида 14, отъ Давида до преселенія вавилонскаго 14, оттуду до Христа такожде 14. Тако убо считаются отъ Адама даже до Христа родове 62, аще краткости ради токмо бо считаются въ Пѣсняхъ Пѣсней, 6: *шестдесятъ суть царицы: едина есть голубица моя, совершенная моя.*¹ Нѣсть убо Никонова ересь, о Никито, но восточныхъ Отцевъ разумѣніе,² полагающихъ подъ грѣхомъ первороднымъ, яко дщерь Адамову, Преподобнословенную Дѣву.

¹ Ст. 7 и 8.

² Было: *непщеваніе*.

13. Отраженіе обличенія, еже на словеса сія: *Зане не сохрани Захарія отецъ Предтечевъ въ пречистой Богородицѣ, но и отнелъже роди Христа, учиняше ю на мѣсть Дѣвъ, убиша его между храмомъ и жертвенникомъ за вину сію.*

Обычно бѣше у Пифагорикувъ, егда вопрошени о какомъ догматѣ философскомъ бываху и о винословіи догмата своего истязовахуся, нечесо ино отвѣщати, развѣ еже, яко учителю Пифагорови сие возлюбися, и вину сиеваго догмата быти сіе, яко сие ему на умъ пріиде, и тако весма свободни отъ всякаго истязанія бываху... Судяшася воистинну, глаголетъ Богословъ въ словѣ з еже на Юліана отступника; аще глаголы и слогами иными, но ктомужде припадаетъ оно: Онъ рече, *αὐτός ἐφη*, къ немуже наше, еже: *върую*. Приходящему бо къ Богу подобаетъ вѣровати, глаголетъ Апостолъ, ко Евр. 11. Вѣровати подобаетъ, о любиме Никито, святымъ учителемъ не инако, якоже вѣруемъ грамматикомъ о знаменованіи реченій, діалектикомъ о мѣстахъ доводствованій, мусикиомъ о согласіи гласовъ, и всякому, во хитрости си искусному, весма вѣровати требѣ есть. И вѣще цѣнится во училищѣ Христовѣ, таинственнаго Соломона нашего, вѣра, нежели во всѣхъ ученій собраніи и академіи. Отрицаю и доводствую: *безъ вѣры бо нѣсть возможно угодити Богу*, ко Евр. 11. *Невъруяй осудится*, у Марка въ гл. послѣдней. *Вѣмъ, емуже вѣровахъ и извѣстенъ есмь*. 1 Тим. 1. У Исаи въ гл. 7, на послѣдокъ замыкаетъ: *аще не вѣрите, не уразумѣете*.

То паки, о Никито, еже отрицаеши, Василій повѣствуетъ, Григорій Нисскій воспоминаеть, Епифаній свидѣлствуетъ, Никифоръ Каллистъ прясно исповѣдуетъ. Поистиннѣ же на всякомъ судѣ побѣждаетъ многихъ жребій и того ради глаголется яко притча... «разумѣніе многихъ». Тѣмже убо кто дерзнетъ противенъ быти толику счету учителей и отцевъ св., видяще млечный путь, звѣздами исполненный, развѣ Кротеріа изоченная, не тако тѣлеснѣ, якоже умнѣ. Обаче убо да не кто возмнитъ себѣ сія слова токмо кичивая быти и напыщенною нѣкоею гордостію изреченная, се изведемъ похваленныхъ творцевъ на посредокъ позорища, всякаго пристроенія кромѣ. Видитмися, яко вижду здѣ пресмыкающуюся люто-рокалвинскую ересь, или змія таящаяся въ травѣ, якоже обносится притчею. Ибо Фридерикъ Спангемій, во усумнѣніи 28 явственнѣ свидѣлствуетъ лежати... во апокрифахъ всю сію исторію, юже ниже преданіемъ именуеть, но весьма быти баснь повѣствуетъ; акибы преданія церковная, яко баснословія быти держателна, а не яко исторіи писаніемъ преданныи быти непщевателны. Недостовѣрная бо исторія есть не писанное преданіе. Послушаимъ, глаголетъ, дивнаго сего умышленія: глаголють сіи... людіе, яко Іоакимъ и Анна, Препоблагословенныя Дѣвы родителя, въ неплодномъ супружествѣ стужиша си, напоследокъ же отъ Бога премногими молитвами упростиша ю себѣ и отъ пеленъ Богу ю обѣтоваша, въ осмое же лѣто Богу въ Церкви представиша, воеже бы воспитанной быти во

оградѣ ея; на мѣстѣ дѣвамъ устроенномъ. Вся сія воспоминаетъ св. Григорій Нисскій въ словѣ на день рождества Христова. Еже, яко смышленіе, отрѣваетъ вышешоянненый лютрокалвиниста того дѣля наипаче, яко Нисскій тако начинаетъ дѣло повѣстовати: сличахъ убо нѣкую апокрифу исторію, сицевыя о ней предающую повѣсти. Первѣе силу полагаетъ въ реченіи: апокрифа. Но якоже уже все помянухъ, то апокрифа глаголется, еже нѣсть всѣмъ явственню, но малымъ презъ преданіе предложено. Тако обрѣтается во Евангеліи: *ничтоже тайно, еже не въ явленіе пріидетъ*; гречески глаголется...¹ Ниже пакоститъ предлогъ *ἀπό*, еже аки вещь тайную знаменуетъ; ибо Апокалипсисъ есть вещи откровенныя явленіе. Чесо ради Іустинъ Мученикъ и Философъ, въ двословіи съ Трифономъ Іудеемъ, возопи: не невѣсте, о друзи, премногая словеса тайно быти и сокровенно изреченная... идѣже *ἀπό* предлогъ пріемлется вмѣсто *ἐπί*, или *περί* предлогу. Тѣмже не всегда апокрифонъ пріемлется вмѣсто недостовѣрнаго, или лжеписаннаго и тайнаго, или за неизвѣстнаго творца повѣствованіе. Сію же исторію, яко праведную о неплодною Преподобословенныя Дѣвы родителю и о ея введеніи въ Церковь повѣствуетъ Епифаній въ ереси 79, отъ негоже взялъ другій св. Епифаній въ словѣ о похвалѣ Пресвятыя Дѣвы, якоже Никифоръ Каллистъ отъ Евводіа древнѣйшаго творца, въ книзѣ 2 гл. 3 церковныя исторіи, и

¹ Разумѣются слова: οὐδὲν γάρ ἐστιν κρυπτόμενον ὃ οὐκ ἀποκαλυφθήσεται. Мат. гл. 10, ст. 26.

Дамаскинъ же, о вѣрѣ православной въ книзѣ 4 гл. 15, изъ негоже почерпнулъ есть и другій новѣйшій Дамаскинъ въ своемъ греческомъ Сокровищѣ. Еще же и Церковь повсемственная сичевый день... введенія въ Церковь яко священносвятый праздновати обыче. Задаеть ложь вышепомяненный лютрокальвиниста Нисскому Григорію. Повѣствуетъ бо, яко святая Анна подражала есть другой Аннѣ, матери Самуиловой, и того дѣля во святая святыхъ прииде и моли Бога, да не законнаго благословенія лишится, нечесоже противъ закона согрѣшивши. Усумнѣніе творять слова она: приде во святая святыхъ... Како бо можаше быти, еже женѣ внити внутрь святая святыхъ, еже едва святому Іакову лѣтъ баше, по свидѣтельству Евсевіеву, за особое нѣкое винословіе, сирѣчь того ради, яко Назарей баше. Аще же Епифаній повѣствуетъ его дѣйствовавшая законная, и того ради попущенно быти ему, еже внити во святая святыхъ, яко священничество употреблявшему, яко высочайшему архіерееви.. воистину Гордіѣское сего узла инако разрѣзати не возможемъ, развѣ яко вся Церковь, аще и не свойственнѣ, святая святыхъ именовася, сирѣчь священническая, сіе, якоже свидѣтельствуеть священное писаніе, глаголюще во Исходѣ въ гл. 29: *седмь дній очистиши олтарь и освятиши его, и будетъ олтарь святая святыхъ, всякъ прикоснувыйся олтарю освятится.*¹ Паче же и самый даръ пожренныи за грѣхи нарицается просто, во Исходѣ, гл. 30, *святая святыхъ.*² Дерзаю инако толковати слова

¹ Ст. 37.

² Ст. 10.

оная—святая святыхъ, и случати смѣю съ послѣд-
 ствующими (яко да составленіе презъ преложеніе
 будетъ): моли Бога, сирѣчь святаго святыхъ. Убо
 не къ Церкви, но къ Богу относити требѣ есть,
 якоже умствова и Никифоръ, глаголяй: молитъ убо
 Бога и въ Церкви пребываетъ тошно, да не отпа-
 деть благословеній законныхъ молящихся, якоже
 чтется о Аннѣ супругѣ Елкановѣ, при празѣ дверей
 дому Господня молившейся, въ кн. Царствъ гл. 1.
 Ниже да возмнится сіе истинное быти гонзаніе и
 простое... занеже бо сицевое глаголаніе и обычай
 употребляемъ есть, извычаемъ принятый во свя-
 щенныхъ писаніихъ. Повѣствуется во вторыхъ
 книгахъ Маккавейскихъ, г. 14., о священницѣхъ
 сице молящихъ, якоже есть въ греческихъ Вивліяхъ
 и нынѣ: о святе святыхъ, всѣхъ Господи.... сохрани
 нескверенъ во вѣки храмъ твой, секрати освящен-
 ный. Но речеши: восточная Церковь поетъ во тро-
 парѣхъ вечернихъ, во святая святыхъ вшедшую
 непорочную дѣву отъ самага Захаріи, отца Пред-
 течева, воведенну. Тако есть: ибо при странѣ быша
 келіи низшія и высокшія; къ высокшей же келіи,
 въ нюже входити по пятинадесять степенехъ нужда
 быше, притече скоро и бѣгомъ трилѣтняя юница,
 и въ ней девять лѣтъ пребываше. Да лають, елико
 хоцуть, лютерокалвинове, иже и нужно должен-
 ствуютъ соизволити, яко быша во храмъ и окрестъ
 святая святыхъ различныя келіи, въ нихже ев-
 рейскія дѣвицы хранени бяху... якоже явѣ есть отъ
 книги 2 Мак.—Но настоиши: мужескъ полъ, или
 первородніи токмо посвящавшася Богови, а не женскъ

полъ: како убо посвятися дѣва, женска бывши пола? Отвѣтую, яко первородніи посвящени быша по закону, а не по обѣту, Препоблагословенная же Дѣва бѣ по обѣту, а не по закону посвященна. Тако убо ничесоже наносится намъ противно, исповѣдающимъ, по священному писанію, обѣты Богу обѣщанныя весьма хранителны быти, якоже сохрани Іевфай, приносяя единородную дочь свою по обѣту, сотворенному Всемогущему Богу. Но да приблизимся ко вещи нашей, да не отъ предпріятія удалимся. Негли глаголетъ Нисскій въ томъ же словѣ о рождествѣ Христовѣ: не безгодно будетъ, егда непорочныя Матере того приведемъ свидѣтеля, иже между храмомъ и жертвенникомъ убіенъ бысть. Сей есть іерей Захарія, не іерей токмо, но купно и пророкъ же. Сей убо, божественнымъ мановеніемъ ко еже познавати тайная наставленъ бывъ, свѣдый же дѣвства таинство въ рожденіи нетлѣнномъ сохраненно, отъ мѣста, во священномъ храмѣ дѣвамъ закономъ устроеннаго, Дѣво-Матере не отдалилъ есть. Мѣсто же оное быше между храмомъ и олтаремъ. Егда убо слышаша іудеи Царя всяческихъ ко животу человѣческому божественнымъ чиномъ пришедша, блюдущеса, да не цареви подчинятся, іерея, сицевая о его рожденіи свидѣтельствовавши, у самага олтаря жерща убиша. Таяжде поновляетъ братъ его, преподобнѣйшій и киновіямъ первооснователь Василій, въ словѣ, сложенномъ о Христовѣ рождествѣ, близь середины: повѣсть нѣкая есть, и здѣ къ намъ преданіемъ принесеса, яко Захарія, на мѣстѣ дѣвѣ Марію устрой, по

рожденіи господнемъ, отъ Іудеевъ убіенъ есть между храмомъ и олтаремъ, оклеветанъ сый отъ народа, яко чудное оное знамя и преславное дивство утвърждалъ есть, сирѣчь дѣву, родшую кромѣ поврежденія дѣвства.—Паки, аще добро есть и красно, еже братіи жити вкупѣ: кольми паче согласовати въ томъ же членѣ и догматѣ братіи? Многихъ ли ищещи, о Никито, свидѣтельствъ? Но глаголетъ первѣйшая истина: во двою, или тріехъ свидѣтельствѣ станетъ правда. Убо излишняя будутъ и... множайшая приводити. Сими убо, яко довольными, да удовлимся.

14. Отраженіе на оныя словеса: *Марію и прочимъ дѣтемъ дѣтородителницу глаголютъ іудеи; тожде и книги новыя никоніанскія утврждають, наричуще дѣву дѣтородителницу.*

Не толикими лютыми мученми и различными казнями Максиминъ онъ, или Максиміанъ мучитель святыя Христовы мученики мучилъ есть, еликими безчествующими титлами и прилогами клеветными укаряетъ злобный онъ попъ предстателствовавши себѣ древле Никона. Поистинѣ Архангелъ Михаилъ, якоже видѣти есть въ соборномъ посланіи св. Апостола Іуды, не смѣяше суда навести хулна на діавола, нареченна Самаилъ, иже Божій слуга толкуется, и ни единымъ словомъ жестокииъ его пронзити, или уязвити дерзнулъ есть, егда съ нимъ о Мосвеевѣ тѣлеси прашеся, да не іудеомъ предложится ко поклоненію и почитанію, но тѣмъ единымъ жестокайши его поразилъ есть, яко ни

единымъ же словомъ изволи его укорити. Аще винословія о семъ желаете, принесу. Бяше падшая денница иногда на небеси высочайшъ Архангела Михаила, якоже всѣхъ небесныхъ начальникъ, и много его превосхождаше тако достоинствомъ, якоже и мѣста высокою. И тако не лѣпо непщева быти, аще и видѣлъ есть его къ своимъ припадающа ногама, еже нанести суда хулна и онаго словомъ нѣкимъ безчестнымъ обругати, яко бывша единою древле себе началнѣйша и высокша. Ты же, о Никито, не помянувъ здраваго онаго совѣта: добрѣ глаголи о началствующемъ... сый ниже епископъ, ни архіепископъ, ниже митрополита, но единъ отъ меншихъ священникъ, бывшаго твоего пастыря дерзнулъ еси толикими злословствы укарати, нарицати же блядословца, хулника, аріанорачителя, аполинаріева ученика, друга несторіева, маркеллинова, діоскорова, на послѣдокъ въ навершенія мѣсто іудея, сирѣчь врага Христова жесточайшаго именуеши! О неизреченныя гордости! О проклятаго безстудства, даже послѣднія достойнаго казни, ко прочихъ наказанію и трезвенію! Кто ты, рцы ми, постави судію толикому архіерею, егоже токмо соборъ святой, въ Дусѣ Святѣ собранный, можетъ и долженствуетъ изтязати и судити? Паки: мній отъ болшаго благословляется, не противнѣ. Глава превышаетъ, не нога. Солнце освѣщаетъ, не освѣщается. Вскую не стоиши въ чину твоёмъ священническомъ, но добраго чина предѣлы преступаеши, иже единъ самъ содержитъ и связуетъ тако высокшая вся, якоже и низшая? Но безумныхъ есть

число безконечное, глаголетъ во царѣхъ премудрѣйшій Соломонъ. Но да изыдетъ на стязанія мѣсто:

Ересь обновити тщится древле умерщвленную и смердящую безумный Никита, ересь глаголю Маріоборцевъ, блядословившихъ Пресвятую Дѣву Марію по рождествѣ Христовѣ со супругомъ своимъ Іосифомъ имѣвшу быти совокупленіе, аще и всѣмъ явѣ есть, яко ему осмдесять лѣтъ имѣвшу вручена бысть отъ священникъ, не кромѣ изряднаго чудесе (единъ бо токмо Іосифовъ жезлъ паче всѣхъ прозябѣ), Преблагословенная Дѣва ко еже сохраненію дѣвства, ко помощи въ путешествіи и на всякую нужду въ противныхъ приключеніяхъ. Остроумное нѣкими дѣлается усумнѣніе, чесо ради попустилъ Богъ, еже отъ Кесаря Августа прописатися вселеннѣй. И отвѣтуютъ, яко бысть то глубокимъ Божіимъ совѣтомъ и сокровеннымъ таинствомъ, воежебы сирѣчь зазору предваритися, егоже гонзнути Преблагословенная Богомати не могла бы, аще бы въ домѣ своемъ, въ Назаретѣ, Спасителя своего и нашего родила бѣше: едва бо шесть еще преидоша мѣсяцы, отнелѣже св. Іосифъ поятъ ю въ жену себѣ, якоже отъ Ангела бысть ему повелѣніе, у Мат. 1. Яже воистину ащебы во Назаретѣ родила бѣше, могло бы сосѣдомъ и знаемымъ и ближнимъ извѣтъ быти ко оглаголанію, яко сиче роди скоро, едва имѣючи шесть мѣсяцей. Убо Богъ, дабы всякому предотложитися и устранитися ово злозачрѣнія, ово клеветанія извѣту, и

ни единой бы оглаголанія остати винѣ сосѣдомъ о рожденіи Дѣвыя, егоже виновника и време не весьма не вѣдяху, сотвори, еже переписатися все-леннѣй и всякому во свой градъ призыватися, дабы тѣмъ же трудомъ Дѣвѣ во Виѣлеемѣ шествовати и со мужемъ своимъ Іосифомъ, и тако отъ всякаго сосѣдовъ роптанія свободнѣй быти. Тако Богъ любитъ удаляти зазоры. Толико убо отсутствуетъ, ежебы совокупленія ради Преблагословенная Дѣва Іосифу была вручена, егда изряднѣе ко хотѣвшихъ быти свидѣтельствъ проповѣданію соблюдашеся, и воеже бы явѣ быти не блядиво и таинственное быти пріятное человѣческое Богомъ естество, но извѣстнѣйшими свидѣтельствами пособствующими кромѣ мужескаго сѣмене, Духа же Святаго дѣйствомъ и силою сооруженное. Поистинѣ Іосифъ, бывъ лѣтъ 40, роди первороднаго своего сына Іакова, праведнаго по рекломъ, иже и Іустъ наречеся; потомъ же родися ему Іосій, таже Симеонъ и Іуда; дщери паки двѣ—Марія и Саломія. Како убо возмогша родитися изъ Маріи, иже прежде обрученія Маріина родишася отъ Іосифа, еще млада бывша? Инако да повѣдятъ намъ клеветницы имена чадъ, яже роди (простите ми, безмѣстная глаголющу) по Христѣ Марія. Но никакая же измыслити возмогутъ и сами лжи архитектонове, ибо вещь неправедна и именъ лишается. Но да покажемъ сія вся отъ хронологіи. Вѣстно есть всѣхъ согласіемъ, во время иродово, въ лѣто царства его 33, Христа Господа рожденна быти во Виѣлеемѣ Іудейскомъ. По Христовѣ принесеніи во Церковь Іосифъ

бѣжа во Египетъ по увѣщанію ангелскому, купно со матерію и отрочатемъ Іисусомъ, ради лютѣйшаго младенцевъ Виѳлеемскихъ избіенія. Тамо, божественѣ преселився, и пребысть двѣ лѣтъ. Иродъ же изчезе въ лѣто царства своего 37, и наслѣдствова ему сынъ Архелай, девять лѣтъ царствовавый. Посемъ царствова Агриппа, подъ нимже, двадцатое лѣто царствовавшимъ, Христосъ Господь распятъ есть и умре между двою злодѣевъ, Тенданъ и Скеванъ нареченную, или по иныхъ именованію Димасъ и Геста. Іосифъ убо, егда возвратися изъ Египта, осмдесять лѣтъ имѣвъ и четыре, преживе иныя 8 лѣтъ, со Христомъ всегда пребывая. Сія же, якоже свидѣтельствуеть Епифаній, несовершенно иждивъ, Іосифъ умре. Христосъ же, еще отроча, въ домѣ Іосифовѣ воспитовася со Богородицею. И се явственно есть отъ Евангелія Луки св. гл. 8., глаголющаго сиче: *се мати твоя и братія твои внѣ стоятъ*, никакова къ тому сотворше помяновенія о Іосифѣ, того ради, яко уже онъ смертію животъ премѣнилъ быше.—Рекохомъ Іакова быти первородна, иже преживъ лѣтъ 96 отъ сея жизни отъиде, присное сохранивъ дѣвство и одѣянія же бѣлаго употребляше. Обаче злѣ нѣщии собирають отъ бѣлаго одѣянія Іакова быти онаго юношу, иже оставивъ плащаницу,¹ еюже одѣянъ бывъ, гонзаше: у Марк. 14. Ибо и сына Зеведеева Іоаннъ и Іаковъ бѣлыми одѣянии одѣвахуся, тому подражающе Іакову. Не можаше

¹ Было: *синдонъ*

убо быти братъ Христовъ по плоти Іаковъ, занеже уже созрѣлъ лѣты бѣше и между Апостолы считашеся...¹ нарицается юноша, гречески *неанискосъ*,² иже глаголется сый поне 25 лѣтъ, возрастъ угодный имуще ко пріятію началства: отнюдуже, егда бѣше юноша, Иродъ царствованія силу пристяжа, побѣдивъ уже Антигона. Но речеши со Гелвидяны, яко о братіяхъ Христовыхъ помяну Матѳеѣй въ гл. 13. Тако есть; но братія именуются по еврейскому языку всѣ, между нимиже обрѣтается союзъ или сродничества, или южичества, или присвоенія, или закона, или любви, или исповѣданія, или сана тогожде. Тако Іеронимъ противъ Гелвидію, братія, глаголетъ, въ писаніи божественномъ нарицаются четверообразно: естествомъ, родомъ, сродничествомъ и любовію. Поминаетъ то Апостолъ, егда въ посланіи ко Римляномъ, въ гл. 9, о іудеѣхъ глаголюще: *молилбыхся о братіи моей, приложи абіе толкованіе: по сродницѣхъ моихъ по плоти.* Чесо дѣля той-жде Павелъ, въ Дѣян. въ гл. 22, ко Іудеомъ бесѣдовавъ, возгласи: *мужіе братія.* Тако Давидъ Іонафана нарицаетъ брата и Гезіодъ... смерть сестру сна нарече, и наблюдаѣ просто Евстахій, яко вси природніи именуются у грековъ... братія. Но да окончимъ сіе противословіе съ фізіологомъ. Свидѣтельствуютъ естественныхъ вещей изслѣдители, яко лвица точію едино чадомъ³ рож-

¹ Было: *пребываше*. Далѣе одно слово не разобрано.

² Такъ именно написано это слово у Полоцкаго.

³ Было: *единожды*.

даетъ.¹ Убо аще Христосъ скимемъ наричется во Бытіи гл. 49: годствуетъ послѣдователнѣ глаголати лвицею быти Пресвятую Дѣву Марію, яже единого скимна Христа родила есть. Не грамматическо убо наносится отъ дѣтородителницы... многія сыны родитися, егда дѣтородителница, противъ греческаго писанія, не многія, но единого знаменуетъ, аще Никита, яко невѣжда, языка греческаго и изрядства сложенія незнающъ, противное умствуетъ, бѣднѣ въ граматичѣ погрѣшая.

15. Отраженіе слова, еже на словеса сія: и яко приносими дары Богу и яко вмѣстообразни суть сотвореніи пресвятаго тѣла.

Видѣвше Израилтяне предивную ону пищу, содержащую всякаго вкуса сладость, по свидѣтельству Соломону въ книзѣ Премудрости, въ гл. 16, не вѣдѣша, коимъ ю именемъ нареши подобаше. Егда же отъ нея вкусиша, тогда возопиша: *ману*, что есть се? Поистинѣ, во единомъ таинствѣ евхаристіи все исполненіе благодатей божественная премудрость заключи и умножи. Чесо ради многоразличными именми, аки символми знаменательными, священное сіе собраніе убогатила есть. Сіе есть отъ Ареопагиты именуемое тайна тайнъ... ко нему—

¹ За симъ было написано, и зачеркнуто, слѣдующее: *О нейже вещи различни различная обрѣтоша винословія и вины полагають. Намъ единая вина довлѣетъ: скимень рождается по 26 мѣсяцѣхъ, песіи имѣюще зубы, и возскакивая матернее раздираетъ кохтми чрево и терзаетъ ложесна зубами, толико, яко никоею прежде похотію страствоватися ей, растерзанымъ ложеснамъ бывшимъ.*

же сицевое моленіе творить: но ты, о божественнѣйшая и священнѣйшая тайно, обложенная ти символически, гаданій покровенія открываючи, явственнѣ намъ изъявися и мысленная наша очеса изряднымъ и явственнымъ свѣтомъ исполни. Аще же согласиши, чесо ради жертву сію таинственную тайною тайнъ именуеть?—яко между тайнами изряднѣйшая и пречестнѣйшая есть, не инако токмо, якоже мѣсто священнѣйшее внутреннія сѣни, идѣже кивотъ соблюдашеся, святая святыхъ нарицашеся. Подобнѣ и пѣснь изряднѣйшая, аще и во гаданіи провѣщанная, Пѣснь Пѣсней именовася. Равнѣ и сія жертва двою ради вину сицевымъ порекломъ надарена есть. Первая вина, яко она самого Христа, егоже Діонисій святаго святыхъ нарече, всѣхъ тайнъ узаконителя и освятителя, содержитъ, отъ негоже прочіи тайны всю силу освященія имѣють и его силою дѣйствуютъ, ежелибо содѣвають. Вторая, яко, по тогожде свидѣтельству Діонисія, никакаяже тайна, или чина архіерейска, или служенія епископскаго, кромѣ сея тайны свершается; и, да многшая обыму единымъ словомъ,—вся тайны во евхаристіи совершаются и на ней оканчиваются. Оттуду, да реку мимотечнѣ, надъ преставшимся священникомъ седмь Евангелія честися обыкоша того ради, яко презъ вся седмь тайнъ пріятъ быше законно: крещеніе, мвропомазаніе, покаяніе, евхаристію, елеопомазаніе, священство, супружество, и прочимъ въ тѣхъ же служитель тайнахъ быше правилнѣ, яко священникъ чиновный.

Но назнаменательно есть трекратное въ литургіи быти приношеніе. Первое въ предложеніи проскомидіи, отлученнѣй бывши жертвѣ, посвятитися имущей, отъ прочаго хлѣба. Оттуду приношенія, или принесенія, или дары именуются. Никто бо древле бѣше не приносяй хлѣба и вина своего во храмъ, на еже дѣло изрядное есть мѣсто Августиново въ словѣ 115, о времени приношенія, — глаголетъ: имже бы на олтари освятися, приносите, усрамлятися подобаетъ честному человѣку, аще чуждыми приношеніи причастится. Того дѣля приношенія, яже не пріимовавхуся, именовашася... какова бяху людей злбныхъ, блудникъ и кающихся. Того ради зѣло прилежно сія діаконми разсматривахуся, взыскующими, сицевая ли бяху, или нѣ. — Второе приношеніе бываетъ въ началѣ литургіи, вегда вѣрныхъ святыя дары пречестно отъ предложенія во великій алтарь вносимы бывають. — Третіе приношеніе, на послѣдокъ, егда величайшимъ гласомъ и теплѣйшимъ благоговѣйствомъ возглашаются оная словеса: *твоя отъ твоихъ Тебѣ приносяще*, и прочая, еже отъ діакона крестобразно преложенными руками воздвизается и самому Богу предъявляется; юже добродѣтель поминающе Церковь, аки всѣхъ себѣ подчиненныхъ возглашаетъ полными устами: благодаримъ! да сія тайна истинно будетъ благодарствіе; се же яко даръ Божій есть и якоже отъ Божія добрая благодати исходящъ.

Но речеши: самъ Наѳанаилъ исповѣдаетъ въ гл. 15, яко того ради каются оныя святыя дары отъ священника, яже лежатъ отложенныя во че-

стномъ предложеніи, яко уже суть посвященны Богу и ему принесенны, и аки вмѣстообразныя сотворенны пресвятаго тѣла и крове? Тако есть. Но что убо отъ сихъ наносиши, о Никито? повѣждь, любиме. Ибо твердиши, яко суть посвященны Богу весьма совершенно прежде самыя литургіи. Было бы то послѣдняго безумства, да не реку неистовства. Вскую бо потомъ нужда была бы литургію совершати, аще бы оныя дары были совершенно пресуществени? А еще дивно есть: всякихъ словесъ посвятительныхъ кромѣ (аще она суть дѣйстви- телнѣ проглаголана; аще же молителнѣ, не стя- зуюся) были бы дары Богу посвящени въ предло- женіи. Аще же поистинѣ не суть совершеннѣ по- священи Богу, якоже вещедѣйственнѣ не суть посвященни, но токмо начинателнѣ, или умоли- телнѣ, уже явѣ показуется, сія праведнѣ быти изреченная, чрезъ образъ риторскій, *еналлаге* речен- ный, иже образъ еналлаге обычно въ писаніи по- лагается и употребляется, въ то сирѣчь время, егда есть вещь извѣстно хотящая быти и событіемъ кромѣ усумнѣнія будущая. Тако Исаія, въ гл. 8., *и зачатъ, глаголетъ, и роди сына*. Како дѣва зачатъ и роди, яже имѣяше едва не по тысящи и шести сотъ лѣтѣхъ зачати и родити едиnorodнаго Божія Сына? Сія вся, глаголетъ Епифаній, не у исполнена быша, но совершитися всячески имѣша. И паки тойже Исаія въ гл. 53: *яко овча на заколеніе ведеса, яко взятся отъ земли животъ его*. Уже видиши, како преднѣйшая послѣжде повѣствуется, и по- слѣдняя, аки уже бывшая излагается. Яко овча,

глаголетъ, на заколеніе ведеса, временемъ прешедшимъ, еже долженъ быше въ будущемъ рещи, поведется, яко же еще онъ веденъ не быше, о немже пророкъ прорицаше; обаче дѣло самое аки совершенное предлагается отъ пророка, ибо таинство оное, дарованное пророкамъ уставленіе, мимоити, или не событися не можаше. Что убо дивно, аще вмѣстообразныя глаголются приношенія въ предложеніи, чрезъ премѣненіе време́не наре́ченная, яже всячески имѣють пожрена быти и пресуществитися божественнѣ?

Еще усмотряти годствуе́тъ, яко тожде есть антитипонъ¹ и исотипонъ вещей въ тайнѣ евхаристіи, ибо предлогъ *αυτι* греческій временемъ и равенство знаменуетъ, яко же назнаменова Константинъ Ласкарій въ своей грамматицѣ, временемъ же за противный образъ прие́млется: тако бо змій мѣдяный повѣсися не яко образъ Христа, но яко противоположный; подобнѣ и антихристъ противенъ будетъ Христу, и яко противникъ толкуется нынѣ. Но речеши: како суть *антитипа* пресвятѣйшее Христово тѣло и животворящая кровь Его? Занеже Господь явственнѣ во Евангеліяхъ указателнѣ и дѣйствителнѣ глаголетъ: *се есть тѣло мое и сія есть кровь моя?* Отвѣтую, яко тако у внѣшнихъ, якоже и божественныхъ учителей рече́ніе сіе *антитипонъ* не исключаетъ вещи истины и присутствія, яко же нещуютъ лютрокалванисты; но токмо назнаменуется обычай присутствія. На еже прино-

¹ Было написано: *вмѣстообразное*. Такъ и далѣе, во всѣхъ мѣстахъ гдѣ употреблено слово *антитипонъ*.

сятъ различная винословія. Оное началнѣйшее видится быти. Тѣло Христово страдателнѣ приимается антитипонѣ во евхаристіи, якоже и крещеніе своихъ образовъ есть антитипонѣ; аки бы образъ было, емуже соотвѣтоваша вся древняя образы, иже о Христовѣ плоти. И по сему обычаю агнца пасхалнаго и самыя манны вмѣстообразное правѣ именуется. Еще же антитипонѣ наречется, или символъ, винословіемъ видовъ хлѣба же и вина, чувству очесъ подпадающихъ. Вмѣстообразное паки именуется чрезъ сравненіе съ тѣломъ Христовымъ во страсти, еже бяше видимое и касаемое.

Ниже да речеши, тожде нѣсть самаго себе символъ, или знамя. Раздѣлительно бо есть сие: то, еже всячески и просто есть тожде, никогда же есть символъ себе самаго: соизволяю; то, еже есть подъ различнымъ образомъ: отрицаю. Ибо ничесоже возбраняетъ символомъ нарицатися себе самаго по различному разсужденію; яко же и здѣ различный нѣкій образъ есть тогожде тѣла, яко есть подъ видомъ тѣла, и яко есть подъ видомъ плоти распятыя. Тѣмже тѣло Христово, понемуже есть въ тайнѣ, себе самаго знаменуетъ, якоже бяше на крестѣ, и себе самаго тайна есть, и образъ страданія своего и кровавыя жертвы.—

Речеши паки, аще единою Христось пожресе и укрестовася, чесо ради у насъ по вся дни поновляется жертва сія Евхаристіи? Отвѣтую первѣ: яко сие вторити поучаетъ Павелъ 1 къ Кор. 11. *елижды бо ясте хлѣбъ сей и чашу сію пиете, смерть*

Господню възвѣщаете. Второе отвѣщаю, яко повсѣдневною сею жертвою прилагается намъ частица нѣкая силы жертвы креста, еяже жреніе толико Богу бѣ пріятно, даже готовъ есть всѣмъ чело-вѣкомъ его ради дати оставленіе согрѣшеній, имже бы его сила была приложена. Чтò бо пользуют немощнаго врачества, въ мѣропродавницѣ хранимая, аще не пріимутся, ко еже уврачеватися, и не приложатся ко язвамъ тѣлеснымъ? Ибо доволная цѣна бѣ Христомъ принесена, еяже ради Богъ готовъ есть вся міра сего согрѣшенія оставити, аще бы токмо цѣна [тая чело-вѣкомъ угоднѣ была приложена. Прилагаетжеся изряднѣ чрезъ сію господню литургійную жертву. Есть убо антитипонъ, по разсмотрѣніи начала реченія, то, еже подставляется вмѣсто образа. Истина же проявившися, образы и сѣни изпраздняетъ. Истинное же тѣло Христово, тысящми образовъ проявленное, яко свѣтъ, по тмѣ надходящій, блистаетъ и сіяетъ. Чтò убо дивно, аще Наѳанаилъ антитипонъ хлѣбъ нарече, паче же прежде посвященія, егда св. Дамаскинъ явѣ исповѣдуетъ: аще нѣцыи, глаголетъ, нарицаху вмѣсто-образное хлѣбъ и вино, не послѣжде, но прежде посвященія?

Но речеши: како суть антитипонъ, занеже Господь явственнѣ во Евангеліи и указателнѣ повѣствуетъ: *се есть тѣло мое, и сія есть кровь моя?* Св. Іоаннъ Дамаскинъ, гл. 24. о свяtosвященныхъ Христовыхъ таинствахъ, разрѣшаетъ усумнѣніе сіе, глаголюще: якоже единою рече Богъ: да изведетъ земля и израститъ, и даже доселѣ изращаетъ,

бывшу уже одожденію, сиче единою рече: *сіе есть тѣло мое, сія есть кровь моя*, и всемошнымъ его повелѣніемъ бываетъ, дондеже пріити ему, бывающу дождю въ новомъ семъ дѣлательствѣ призываніемъ . Св. Духа, егоже со дождемъ равняетъ, безъ негоже никакоже земля прозябаетъ. Аще же о обычаи вступиши, наддаеть сей св. отецъ, якоже и Преподобная Дѣва вопрошаше Гавріила Архангела: како сіе будетъ?—довольно есть мнѣ рещи, тебѣ же слушати, яко Духъ Св. найдетъ и содѣлаеть естество и умъ превосходящая. Подобнѣ глаголю, яко Духомъ Святымъ вышеестественнѣ сія дары прелагаются, еже развѣ сама вѣра обиметь. Но здѣ вижду премногія смущающіяся и отрѣвающія умствование св. Дамаскина, глаголющаго, яко антипиа глаголють нѣцыи святыхъ отецъ тѣло и кровь Господню (во первыхъ Богоносный Василій исповѣдуетъ), но не по освященіи святыхъ даровъ, но прежде освященія... нарицатися. Ниже да речеши развращенъ нынѣ быти чинъ литургіи св. Василія, ибо тѣмъ же удобствомъ, имже се повѣствуется, отрицается. Но настоиши: св. Златоустый въ бесѣдѣ о предательствѣ Іуды, о словахъ Господнихъ бесѣдующе, яснѣ исповѣдуетъ, сіе слово предложенныя дары прелагаетъ. Тако поистинѣ. Но разсудително есть прежде, что знаменаетъ глаголъ греческій...¹ Свидѣ въ реченіи..... глаголетъ, яко знаменуетъ сей глаголъ наставить, направить,

¹ Здѣсь, какъ въ слѣдующихъ потомъ мѣстахъ Полоцкій, очевидно, не разобралъ греческаго слова; почему и замѣнилъ его точками.

и призываетъ во свидѣтеля Дамаскіа творца, въ сицевомъ знаменованіи сего глагола употреблявшаго. Убо направить паче, неже преложити знаменуется, и тако тожде есть... еже и... угодно-слагаю. Того ради и великій Діонисій нарицаетъ епископа.... церквеначалника по обычаю Лакедемоновъ, иже начальники градскія нарицаху.... правители, или... яко же тыя же самыя именовашу Аѳиней, яко тыя, иже ко благому и изрядному житію иныя направляху же и наставляху изряднымъ нѣкимъ чиномъ. Сихъ никако не вѣдый, Дамаскинъ повѣствуетъ ко исполненію тайны требъ быти и слова молителная, яже суть: *и сотвори убо хлѣбъ и сію чашу, преложивъ Святымъ Твоимъ Духомъ*. Аще иже бяху совершеннѣ преложена, почто убо паки оное *сотвори*? Ибо еже сотворено, несотворенно быти не можетъ. Аще же единою дастся скважня сія, еже святыя отцы погрѣшити и прелститися, уже исчезаетъ праотчая вѣра. Но утверждается умышленіе Дамаскиново свидѣтельствомъ Василія святаго въ кн. 6. о Святомъ Дусѣ, гл. 27. (егда же глаголю Василія, именуя велій составъ всея церковныя тверди, финика глаголю всѣхъ учителей, о немже истинствуется оно Екклесіаста гл. 4: *единъ есть, втораго не имѣетъ*, глаголю мѣрило всѣхъ вещей). Сей убо провѣщаваетъ: нѣсмы довольни словеса Апостоломъ, или Евангеліемъ воспоминаемыми во освященіи, но прежде и послѣжде глаголемъ иная, яко велію силу ко тайнѣ имущая, и яже отъ ученія, писаніемъ не преданнаго, мы пріяхомъ. Нынѣ вопрошаю: что знаме-

нують оная словеса: *прежде* глаголемъ и *посльжде* глаголемъ, развѣ яко словеса Христова суть *предисловная*, призваніе же Духа Святаго суть прочая *оканчавающая*, яко тая, яже обоя, аки частныи образы, совершаютъ цѣлое таинство, якоже непщуетъ и Марко, Ефескій по рекломъ, о сей вещи вопрошенный. Паки сія оба образа непщуетася аки нѣкая частная образа, взаимъ себѣ не противящаяся, паче же суть единъ нѣкій златый союзъ, едино священнѣйшее общество, единъ пространшій токъ благословеній, приходящій ово на дары предложенія, ово на хотящія отъ нихъ причаститися: того бо ради просимъ, да пріидетъ и оѣнитъ паче же и паче принесенныя дары, дабы въ насъ святости умножитися, разширяюще ю и размножающе наводненіемъ даровъ небесныхъ изобильнѣйшимъ. Истинно, Амфілохій повѣствуетъ въ житіи св. Василія сицевое исхожденіе Св. Духа съ небесе; и онъ епископъ, егоже обличаетъ Агапитъ, исповѣда свободнѣ, яко того ради укоснулъ, еже изглаголати образъ *посвященія*, яко по обычаю не видѣхъ, глаголетъ, сошествія Духа Святаго на мя. Воистинну святыи Апостоли, обычнѣ литургіи совершающе, яко исповѣдуетъ Прокль святой, патріархъ Цареградскій, безпрестанныя дѣяху молитвы, величайшую силу небесную свыше въ таинствѣ истекающую изрядно познавающе. Праведнѣ во всѣхъ таинствахъ Церковь наша восточная обыче Духа Святаго призывати, яко дѣйствующую вину и силу производящую. Тѣмже въ крещеніи, воеже бы водѣ силою, дѣйствомъ и пришествіемъ Св. Духа

освятитися. Въ муропомазаніи и въ елеосвященіи, да равную добродѣтель муро святое, или елей болящихъ пріиметъ, молитвы, сія же теплыя, испу-
щаетъ. Въ покаяніи такожде воспоминаетъ даръ Духа Святаго ко оставленію согрѣшеній. Въ хиро-
тописаніи божественная благодать призывается, яко образъ бышествующу уже веществу рукопо-
ложенія. Въ супружествѣ благодать купно дается. Что убо дивно, аще равнѣ и здѣ изводство умо-
ляется Святаго Духа!? Не хочу отбѣгати къ пре-
дыдущимъ философскимъ расположеніямъ, или къ преднимъ начинательствамъ, ниже къ послѣд-
ствующимъ онымъ премѣненіямъ, яже обыкоша бывать съ нѣкимъ протяженіемъ и наступствомъ
времени, еже ко образа приведенію. Не хочу, глаголю; ибо се философское паче есть, неже богословле... Окончимъ св. Θεοφιλαктомъ, иже толкуя оныя словеса: *се есть тѣло мое*, наблюдаетъ самое быти тѣло Господне, еже посвящается на престолѣ, а не антитипонѣ, того дѣля, яко Хри-
стосъ не рече быти антитипонѣ, еже есть образъ, но просто и совершеннѣ: *се есть тѣло мое*, еже неизреченнымъ дѣйствомъ прелагается... Идѣже видите яко антитипонѣ пріемлется, не во мѣсто исотипонѣ, но за образовательное... якоже разу-
мѣють гордостнѣ Лютрокальвинистове. И о семъ доселѣ. Отнюдуже явѣ есть, что глаголати подо-
баетъ къ Никитѣ, о антитипѣ обличающему нашего грека Наѳанайла.

16. Отраженіе обличенія, еже на словеса сія: священникъ вземъ дары на главу благодично исходитъ и тако носяй я приносить въ жертвенникъ, ходивъ сквозь люди тихо, и тѣи поютъ и припадаютъ къ нему.

И на оныя:

Припадаютъ вси, приничуще къ священнику.

Премудрѣйшій Соломонъ въ своихъ притчахъ въ гл. 4. сие увѣщаетъ: не уклонися ни на десно, ни на шуе; занеже, глаголетъ философъ, концы суть порочны, добродѣтель же утверждается въ срединѣ. Воистину, аще когда въ срединѣ стояти подобаетъ, стоятелно же есть и во обычаи поклоненія, егоже излиха злѣ употребляютъ Лютро-калвинистове. Трегубъ убо обычай есть поклоненія: Latria, Hyperdulia, Dulia. Latria убо, или поклоненіе божественное, самому Богу, въ Троицѣ единому, приличствуется. Сего ради св. Епифаній, обличая Коллиридіаны, Богородицѣ, яки Богинѣ, поклонъ творящія, изрекль есть: Отецъ, Сынъ и Духъ Святый да поклоночтется, Маріи же никтоже да восхощетъ поклонятися, сирѣчь яко Богинѣ подумствуется. Не бо женѣ, ниже мужеви, но единому Богу таинство оное почитанія назнаменовуется, ради высочайшаго величества... *Да небудутъ, повелѣ Господь, тебѣ бози ини развѣ Мене,* но единого чти Бога. Того ради идолопочитаніе быше мерзко, яко честь, самому Богу приличную, людіе идолослужители господамъ и демонамъ приношаху, никоимъ же образомъ имъ достойную. Извѣстнѣ тріе волсви, иже припадше Ісусу въ пе-

ленахъ младенствовавшу поклонишася, не народнаго и обычнаго восточнымъ родомъ поклоненія употребивша, но выше обычнаго, якоже ихъ и пришествіе не человѣческо быше, но весма небесное, и звѣды явленіе всячески чудесно. Суть, иже протяжаютъ сіе поклоненіе къ Дѣвѣ Маріи, отъ еяже лица сіяше луча нѣкая славы, къ почитанію и поклоненію высочайшему зрѣвшія на ню понуждавшая; се же, яко чувствуя сына, чувствуетъ же и мать, и почитая сына и отца почитаетъ, зане оба плоть едина еста. Того дѣля Валентъ царь разгнѣвася на епископа, ему самому поклонившася, сыну же его не воздавши поклоненія, еже за величайшее безчестіе вмѣняшеся. Обаче убо услыша царь—аріанинъ оное обличеніе: како не прогнѣвается на тя Богъ Отецъ, внегода ты Его Сыну, яко едиnorodному, не поклоняешися? Соизволити убо годствуетъ преблагословенной Дѣвѣ честь *Hyperduliae*, сіестъ просто почитателну, изящныхъ ради ея добродѣтелей—благочестія, любви, смиренія, доблества, яже изряднѣе въ преизящномъ ономъ орудіи божественномъ превосхождаху и всѣмъ во образъ довольно излиха предложенная описуются. Ниже успѣваетъ оно, еже наношаше нѣкто Лютрокалвиниста во Іерусалимѣ изъ Епифанія, яко никакаяже честь даятелна есть Дѣвѣ. Ибо Епифаній многажды оно поминаетъ: Марія въ чести да будетъ, Богъ же да почитается поклоненіемъ *Latriae*, сирѣчь богодостойнымъ, егоже поклоненія, *Latriae*, благословеннѣй Дѣвы не повелѣваемъ, но точію оное—*Hyperduliae*, яко превосходящей всю тварь, ангелскую же и человѣ-

ческую.—Что хощеши, глаголаше Ассвиръ царь, сирѣчь Артаксерксъ третій персидскій самодержецъ, къ царицѣ Есѣири. въ гл. 5., небойся, не бо на ты, но на вся прочія сей законъ уставися. О Вирсавіи паки, въ кн. 3 царствъ, въ гл. 3, чемъ, яко поставися престолъ царевой матери, яже сѣде одесную сына Соломона, ейже и реклъ быше: рцы, ниже бо что отрещи могу ти. Она бо есть дѣва жена, юже уготова Господь, якоже речеса о Ревецѣ: буди въ тысящи темъ и да прииметь сѣмя твое грады сопостатъ. Сія поистинѣ глаголются, суть же живые образы, или антитипка Преблагословенныя Дѣвы.—Но настоить Фредерикъ Спангемій: сама, глаголетъ, Дѣва исповѣдуетъ: *себо отнынѣ... блажатъ мя вси роди*, не рече—поклонятися... Но се не крѣпко зѣло и худо, глаголаше Ѳемистоклъ. Еже-либо хотяще онъ, купно и мати его хотяще; и его же мати его желаше, и онъ же желаше. У Аристотеля поется: другъ твой азъ, и яко едина душа на двѣ плоти раздѣлися. Но Марія и Христосъ едина плоть есть: тѣмже не погрѣши онъ, иже рече, яко Маріина плоть укрествовася: сеже, яко плоть Христова взятъ отъ пречистѣйшихъ кровей Преблагословенныя Дѣвы. Поистинѣ Христосъ нарекованъ быше отъ вѣкъ, еже воплотитися; но яко сынъ Маріинъ предувѣденъ есть и презнаменованъ. Воплотися, но изъ чрева Дѣвыя, но изъ утробы Маріины; положиши во яслѣхъ, но дѣвичими руками; принесеша во церковь, но Дѣвою Маріею; бѣжаша во Египетъ, но со Дѣвицею купно; проповѣда народомъ, но послушаша его про-

повѣдавши Дѣва; сѣдитъ посредѣ учителей, но между ними обрѣте его Дѣва Марія; начатъ чудеса творити, но по прошенію Дѣвы Маріи; виситъ на крестѣ, но близь пристойтъ кресту Дѣва Марія; взыде Христосъ на небо, но пріятъ послѣжде и Матерь свою Дѣву Марію. Како убо отлучаеши Христа отъ Маріи, о лютрокалвиниста? Аще никогдаже Христосъ отлучися отъ Дѣвы Маріи, терзаеши воистину одежду несошвенную, сирѣчь пречистѣйшую плоть Христову.—Написа Павелъ къ евреомъ: *и да поклонятся ему вси ангели его*, сирѣчь и прежде воплощенія, и по воплощеніи поклонятеленъ есть Христосъ. Послѣдователнѣ же, въ себѣ и чрезъ себе поклонятельный Христосъ во плоти явился, якоже и на Ефесскомъ соборѣ узаконися, еже единымъ поклоненіемъ съ божествомъ плоти Христовой почитанѣй быти, единымъ, сирѣчь, Христомъ, еже не исключаетъ отношенія раздѣленаго. И се есть, яко святіи отцы древніи земнымъ нѣкимъ подобіемъ изъявити хотѣша, глаголюще: яко царь съ діадимою, порфирною и ризами своими есть почитаемъ, тако и Христосъ съ естествомъ си человѣческимъ и со плотію своею почитается поклоненіемъ. Но оставимъ уже сія, и да возвратитжеся къ дѣлу своему слово наше.

Аще священническій чинъ освященія силу имѣетъ, воистину почитателенъ есть аки ангелъ священникъ, занеже священницы аки ангели именуются въ Писаніи. Яко Малахія въ гл. 2: *яко устнѣ іереовъ сохраняете разумъ и закона взыщу отъ устъ его, яко ангелъ Господа Вседержителя есть*, глаголетъ.

Что убо дивно, аще припадають и приничуть къ
 нему Хриstopочитатели, святыя дары носящему? За-
 неже бо ангели прежде воплощенія поклономъ
 почитахуся; по воплощеніи же никако: виждь, *не*
поклонишимися, глаголаше ангелъ къ Іоанну, *кле-*
вретъ бо твой есмь. Аще клевретъ, священникъ чесо
 ради нѣсть покланятеленъ? *Предъ лицемъ съдаю*
востани и почти лице старчо. Блаженна еси, о
 Лакедемоніа, толикими честми старцы твоя почи-
 тавшая, отнюдуже мудрецъ онъ провѣща: на вся-
 комъ мѣстѣ хотѣлъ быхъ юнъ быти, въ единой
 же старъ—Лакедемоніи Спартанской. Пресвитери
 наши старцы суть, аще не вѣкомъ, поне достоин-
 ствомъ. Тѣмже убо во велицѣй части имѣтелни
 суть. Окаяненъ Ксерксъ, на слушавый совѣтовъ
 старчихъ, но юношескихъ токмо, ибо съ великимъ
 безчестіемъ бѣжаше самъ единъ, побѣжденъ бывъ
 съ безчисленными ратьми отъ греческихъ жителей.
 Добрѣ Франкове священники своя, Дуриды наре-
 ченныя, имѣша яко судіевъ, имже честь высочайшая
 воздавашеся и ихже аще кто суда не послушаше,
 глаголетъ Кесарь въ шестомъ своихъ толкованій,
 съ нечестивыми и злобными вмѣняшеся. Чтѡ же
 мы о праведныхъ священницѣхъ сотворити имамы,
 о нихже написася у Исаіи въ гл. 61: *вы священ-*
ницы Божіи наречени будете, служителіе Бога нашего,
речется вамъ. Сіи воистинну не телцы жрутъ и
 скоты же польскія, но нецорочна Агнца Христа
 Господя по вся дни, ниже проливають крове смрад-
 ныя скотовъ, но оную предрагую Христову, вся
 скверны міра омывающую. Они васъ, о вѣрніи

христіане, отраждають въ святомъ крещеніи; они питають пресвятѣйшимъ причастіемъ, божественною пищею и питіемъ пресладчайшимъ; они васъ утврждаютъ мвропомазаніемъ ко еже ходити во путѣхъ Господнихъ; отческимъ любленіемъ они васъ наказують жезломъ покаянія; они васъ сочетаютъ въ супружество ко еже новыхъ чадъ рожденію; они вамъ даютъ благословеніе чрезъ таинство священства; они вы укрѣпляютъ на одрѣхъ изнемогающія, помазуютъ же обычаемъ церковнымъ тѣло послѣднимъ его помазаніемъ. Ихъ ли убо послѣжде, отцевъ вашихъ духовныхъ, не возлюбите, не почтете? Уразумѣйте, молю, еже пишетъ Павелъ въ посланіи первомъ къ Коринѣомъ, въ гл. 4. *Аще и мнози, глаголетъ, пѣстуны имате о Христѣ, но не мнози отцы, о Христѣ бо Ісусъ благовѣствованіемъ вы родихъ.* Но слышу васъ глаголати: мы чтемъ точію благія священники. Убо самую токмо добродѣтель почитаете, а не достоинство и санъ священническій, егоже получиша свыше? Не разлучителна сія еста оба, но случителна: сей бо наипаче обращается во честь и славу Божію. Реклъ быше онъ кесарь западный, Барбароса реченный: не тебѣ, но Петрови; но услыша абіе: и мнѣ и Петрови. Подобнѣ глаголи ты о злобнѣ священницѣ: не тако тебѣ честь воздаю, яко Христу; тебѣ же, поелику еси Христовъ служитель, по оному у Луки въ гл. 10. *слушайъ васъ, Мене слушаетъ, отметаяйжеся васъ, Мене отмѣтается;* и у Іоанна въ гл. 20: *якоже посла мя отецъ, и Азъ вы посылаю.* Подобно мѣсто чтемъ о Самуилѣ

пророцѣ въ книгахъ первыхъ царствъ, въ гл. 8: *не тебе, глаголетъ Господь, уничижита, но мене, не царствовать ми надъ ними, исполни, надъ Іудеи.* И занеже Марія ропташе на Моисіа, проказою бѣ повреждена, обаче не Ааронъ, въ тожде падый погрѣшеніе, иже бѣ бога египетскаго, Аписъ реченнаго, истукатель. Разсуждаетъ бо св. Кириллъ въ своихъ Глафирахъ, сирѣчь въ избранныхъ: чесо ради, глаголетъ, Ааронъ, купно съ сестрою роптавый на Моисіа, якоже имѣется въ книгахъ числъ, глаголюще, не самому бо Моисеови глагола Господь, но и намъ, чесо ради, глаголю, нѣсть поврежденъ проказою, якоже и Марія сестра его? Отвѣтуетъ лаконически: занеже бо священничество дѣло веліе и драгое предъ лицемъ Господнимъ, того ради Ааронъ гонзну вида проказы. Священникъ бѣ Іеремій малѣйшія веси, Анаѳфоѡ реченныя, но услышалъ быше отъ Бога: *се поставихъ тя днесь на языки и на царства, да исторгнеши и разориши расточиши, и разрушиши, и созиждеши и насадиши.* Не худа ли есть земля? Обаче въ своихъ объятіяхъ раждаетъ злато. Кто убо за худость земли возгнушается златомъ? Такожде и отъ тернія раждается шипокъ: тернія ли ради, емуже прикасающеся уязвляемъ, купно и шипокъ отвержемъ? Три же чести приличествуютъ священникомъ, отцемъ нашимъ духовнымъ: любовь, почитаніе и послушаніе. Подобаеть убо любить я, и во знамя добродѣтели нужная имъ пособствованія подати и въ нуждахъ имъ помоществовати, того ради, яко священничество не отъ чловѣкъ, а отъ Бога по-

дается, и никтоже себѣ емлетъ честь, развѣ иже призывается Богомъ, якоже Ааронъ. Доброе есть нѣкихъ мышленіе, сичевое разсужденіе творящихъ: или Богъ самъ іереа постави, яко поистиннѣ достоинъ явися, или яко изъ недостойнаго достойна его іерейства сотворить. *Богомъ да не глаголеши зла,* во Исходѣ, въ гл. 22, еже есть священникомъ, по оному Давидскому: *вы бози есте.* На послѣдокъ писано есть: *князю людей твоихъ не рцы зла.* Того дѣля св. Павелъ излиха вины нещеваше и на послѣдокъ исповѣда, невѣдѣвша себе быти, яко нанѣже глаголаше: *бити тя имать Богъ, стѣно новапленная,* іудейскій архіерей быше, въ Дѣяніяхъ, въ гл. 23, Павелъ, глаголю, писавый къ Тимоѳею въ первомъ посланіи, въ гл. 5: *прилежащии добръ пресвитери сугубыя чести да сподобляются, пачеже труждающіися въ словъ и ученіи.* Почудительно убо есть, како возможе быти, еже священнику Никитѣ писати сія, яже написа желѣзнымъ писаломъ на свою братію сопресвитеры, лишаяще ихъ и гражданскія чести.

17. Отраженіе обличенія еже на оная словеса:
нѣцыи же поклоняются до земли, якоже преждеосвященнымъ даромъ, егда входитъ священникъ, яко мнитмися прельщаются невѣдуще разнства литургіи преждеосвященныя и литургіи не освященныхъ даровъ, яже послѣжде освящаются.

Соломонъ между иными глаголаньми своими гадателственѣ въ Екклесіастѣ, въ гл. 2, оное же провѣща: *премудраго очеса въ главѣ еіо...* Что есть,

молю, егоже хочетъ премудрѣйшій сей царь? Не вси ли людїе имѣють очеса во главѣ утвержденная? Ей тако; но не вси вся разсмотряють обычаемъ персидскимъ, иже по свидѣтельству аристотелеву въ Економическихъ, вся своима очима разсмотряху и подробно каждо едино разсуждаху очеснѣ, отнюдуже оное изряднореченіе: персово око господне коня упитеваетъ. Той убо истинно мудръ именуется, иже маніемъ, движеніемъ очесъ и назрѣніемъ увѣщаетъ своихъ... Но сей Никита, присно въ дому сидѣвый, чуждыхъ нравовъ и обычаевъ никогдаже видѣ, и того дѣля во многихъ невѣжествуетъ, умствовавшие дебѣлымъ нѣкимъ невѣжествомъ. Похваляетъжеса Улиссъ отъ Омира и Еней же отъ Виргилія въ томъ, яко оба многая видѣста, многая претерпѣста, изгнанствующе сѣмо и овамо... Нѣсть ми невѣстно Григорія Нисскаго толкованіе на сіе соломоново изреченіе, еже есть, яко глава человѣческая выпрь есть, да къ небесному роду взираетъ и выпреняя усматриваетъ. Очеса бо не грядуть на землю естествомъ своимъ, но небесная зрятъ, идѣже Христосъ есть. Того ради премудраго очеса, яко же глаголетъ мудрецъ, въ главѣ его суть. Чесоже ради не при главѣ, но въ главѣ повѣдаются быти? Того дѣля, да на вышняя и выпреняя смотритъ и взираетъ, сый человѣкъ поистиннѣ, Гречески...¹ реченный, не отъ земли, но отъ горѣзрѣнія произведенный и реченный. Соблазнися Никита преизлишнею чес-

¹ Здѣсь, очевидно, пропущено слово *ἀνδρῶπος*.

тію, во время великаго входа бывающею. Мы же воистину чинъ сей, яко предревній, соблюдаемъ, цѣль и неврежденъ держаще, и чести ко божіи славѣ возносити не отрицаемъ, пачеже и ко христовой чести творимъ ю, вѣры дѣйства купно содѣвающе и благоговѣнство имуще веліе, утверждающеся досточестіемъ Симеона Селунскаго архіерея, священныхъ чиновъ изряднаго сказателя, ихъ же и поборителя острѣйшаго, иже сицевый обычай не токмо не преизлишній, но и весьма похвалительный быти утверждаетъ, сирѣчь яко припадаютъ вси вѣрніи съ моленіемъ къ священникомъ. Ибо являетъ входъ сей великій, по свидѣтельству св. патріарха Германа, входъ онъ превеличайшій отъ Виѳаніи во Іерусалимъ градъ. Тако и мы вышеобычнымъ нѣкимъ лѣпотствомъ его совершаемъ, четцомъ сирѣчь предыдущимъ съ возженными свѣщами, іеродіакономъ чинно послѣдующимъ, смиренною же и кадиломъ кадящимъ и рипиды благоговѣнно несущимъ, и святой дискосъ покровомъ покровенный преносящимъ, священникомъ паки премногимъ потиръ святой и иная священная олтаревая орудія держащимъ, аки ангелскимъ чиномъ подражающимъ. Предстоящіи же, честно взирающе, главы своя благоговѣнно прикланяють, нѣцыи на колѣна припадаютъ, наипаче же тѣлесную нѣкую болѣзнь терпящіи іерейскимъ ногамъ подстилаются, отраду нѣкую пріяти, чающе. Все же молятся, гласъ оный благоразумнаго разбойника, на крестѣ каявшагося, многажды усугубляюще: *помяни мя Господи, егда пріидеши во царствіи си...* и служащихъ священ-

никъ молитвамъ себе кождо вручающе, вопіющихъ же: всѣхъ васъ православныхъ да помянетъ Господь Богъ во царствіи си. Св. Кирилъ, глаголюще о Несторіи, егоже и антихриста именуетъ, исповѣда, яко Несторій клевететъ на правовѣрныя... о проста человѣка чести, емуже отвѣтуетъ: мы Христа Господа имамы на небеси, Его же почитаемъ и поклоняемся; Онъ бо, естествомъ Богъ сый, бысть человѣкъ намъ подобенъ, не погубляюще божества, но человѣческое естество возносяще честію. Нынѣ причитають намъ нѣцый пореченіе... почитаніе хлѣба и вина. Но далече буди отъ насъ сіе пореченіе. Истинно Николай Кавасилій сія повѣствова въ толкованіи литургіи въ главѣ 24: аще же нѣцый суть, входящу священнику со дары, на землю падающіи и аки тѣло и кровь Христову преносимыи дары почитающіи и молящіи, входомъ преждеосвященныхъ даровъ прельщени суть (невѣжество убо есть, а не погрѣшенія развращеніе), невѣдуще разнствія сея и оныя литургіи. Сія бо въ самомъ входѣ не совершенныя и неосвященныя имать дары; оная же совершенныя и освященныя, Тѣло же и Кровь Христову. Воистинну честь Божія должна есть жертвѣ освященнѣй, пресуществленія ради. Честь паки меньшая и много низшая жертвѣ принесеннѣй еще токмо за общество посвященія. Наставляти убо подобаетъ люди простыя и неискусныя. Благоговѣйнства же никогда угашаши годствуетъ, или почести оныя внѣшнія удерживати. Паки, аще вещь нѣкая, Богу отданая, яко вода священная въ праздникъ Богоявленій

святыхъ, крестъ писанный, или и мало начертанный, обыче въ народѣ возбуждати благоговѣйство: что дивно, аще толикое видяще благоустроение, преспростой народъ дѣйства благочестія своего творитъ, занеже и Вританстіи людіе царскій престолъ почитаютъ просто, пачеже образъ царскій. Но вещь явнѣе и пространнѣе истолкуемъ. Литургіи части изряднѣйшія пять токмо назнаменуются отъ Св. Діонисія. Въ его бо время не у быше проскомидія, предуготовленіе хлѣба же и вина, но послѣжде, во время Златоустаго, составися. Первыя есть оглашенныхъ, даже негли до великаго входа, сирѣчь пренесенія хлѣба и вина. Нѣкими сія первая часть *литургіа* оглашенныхъ именуется, въ ней же сказывастася епистолія и евангеліе. Вопіющу послѣжде діакону: елицы вѣрніи присутствуютъ да останутъ, во еже ово священнымъ причаститися, ово теплшія и таиншія молитвы ко Богу возсылати. Вторая часть есть самое пренесеніе хлѣба и вина, еже многими сослужительми и различнымъ устроениемъ и благолѣпіемъ содѣвается, якоже рехомъ. Третія есть посвященіе, имже хлѣбъ и вино пресуществляется и прелагается въ тѣло и кровь Христову. Чесо ради Святой Златоустый въ книзѣ 6 о священствѣ сице глаголетъ, яко въ то время посвященія и ангели іерееви присутствуютъ и небесныхъ силъ весь чинъ гласы воздвизаетъ и мѣсто алтаря близкое... во честь лежащаго ангельскихъ ликовъ исполнь есть. Идѣже разсуждаю оно, яко лежитъ агнецъ, сирѣчь Христосъ, на престолѣ почтеный, якоже глаголетъ и

Богословъ въ словѣ 11. Четвертая есть принесеніе Тѣла и Крове Христовы, егда высочайшимъ гласомъ и прилежнѣйшимъ благоговѣйствомъ отъ священника возглашаются оная словеса: твоя отъ твоихъ тебѣ приносяще, яже словеса изваяна быша на дражайшей и святѣйшей оной трапезѣ отъ Іустиніана царя прехитростиѣ устроенной. Пятая и послѣдняя есть, святыя оныя жертвы снѣденіе и пріятіе, якоже исповѣдуетъ и Іустинъ святой во второй своей апологіи, иже глаголетъ, яко вѣрніи причащаются... пищи оной духовной, презъ благодарстводѣяніе содѣянной. Того ради глаголется евхаристіа, яко, данну бывшу и пріяту божественному оному причастію, на святомъ оканчивается благодареніи. Сія сиче назнаменовавше, оно уже взыскателно остаетъ намъ о преждеосвященныхъ. Подлагаю же, яко истинно трегубу быти литургію во святѣй нашей церкви: первая Василиева, вторая Златоустаго, третія нарицаемая преждесвященная, еяже первый начальникъ ктобы былъ нѣсть извѣстно. Обаче извѣстнаго есть извѣстнѣе, сіе дѣло литургійное зѣло быти древнее, того ради, яко и соборъ Лаодикійскій ея творитъ помяновеніе въ канонѣ 49, егда глаголетъ: не подобаетъ въ чотыредесятницу хлѣба приносить, развѣ въ дни суботнія и недѣльныя. Древнее бо преданіе бяше, яко Апостоли, во время страсти Христовы, въ печали превеличайшей обрѣтахуся и два дни отъ пищъ и питія постящеся воздержяхуся, ничесоже въ пятокъ великій и въ субботу же великую вкушающе. Паче же о святомъ Іаковѣ братѣ Гос-

подни обносится, яко ничесоже хотѣ ясти даже до воскресенія Христа Господа, ему же и явился ублаженъ сый по тріехъ днѣхъ во еже утѣшити. Поистиннѣ Никита Пекторатъ, Студійскій іеромонахъ, приписуетъ сію литургію Василию Святому; но зѣло прельщается, ибо святой Василій живяше много послѣжде, многими лѣты по соборѣ Лаодикійскомъ, имже возбраняется служеніе литургіи во святую великую Четыредесятницу. Максимъ, по рекломъ Маргуній, въ Синаксарѣ числа 12 Марта непщева быти литургію сію великаго Григорія Двоеслова, тако реченна отъ книгъ, отъ него написанныхъ чрезъ вопросы и отвѣты. Глаголють же Грекове, яко уставы ю изъ древняго нѣкаго преданія, егда быше посланикъ, на востокъ посланный. Еже преданіе...¹ и самый по литургіи отпустъ народа, идѣже бываетъ честное воспоминаніе Григорія Двоеслова, ни коему о иныхъ бывшу помяновенію. Суть исповѣдующіи творца быти сея литургіи святаго Германа Патріарха Цареградскаго, предживша многими лѣты собору, иже въ Труллѣ, о преждесвященныхъ явѣ глаголющу въ канонѣ 52. Чесо ради въ древнихъ евхологіяхъ написуется сиче: Святая литургія преждесвященныхъ, отъ святаго отца нашего Германа Патріархи цареградскаго *истолкованная*. Суть, напоследокъ, непщующіи уставлену быти и собрану быти отъ различныхъ творцевъ, коемуждо сирѣчь влагающе своя молитвы, аки символъ. Отъ святаго убо Ва-

¹ Вѣроятно, пропущено слово *утверждаетъ*, или *указуетъ*

сила положенну быти оную молитву.. *Вонми Господи*, и другую... *Благодаримъ тя*. Отъ Святаго же Григорія Двоеслова послѣдною молитву...¹ *Владыко вседержителю*. Прочія, предыдущія отъ св. Германа, или поне отъ сокровища нѣкоего святаго мужа, или Апостола взятыя. Поистинѣ, яко Апостоли скоро иногда и кромѣ многихъ молитвъ и пространныхъ, ово страха ради Іудейска, ово за гоненіе мучителей, совершаша литургію, свидѣтельствуєтъ довольнѣ тойже Григорій Двоесловъ въ книгѣ 7, въ епистоліи 49, идѣже утверждаетъ, яко они иногда едину Господню молитву прочетше, совершаша. Тѣмже, наворачаетъ отсюда, еще отъ Апостолъ прекраткую сію литургію уставлену быти и собрану по времени и вчинену быти на дни святаго великаго поста за сѣтованіе; и того ради можаше Лаодикійскій соборъ оная написати, яже послѣжде написалъ быше. Но каколибо есть, о древности ея никтоже усомнѣвается. И явѣ убо есть оное быти служеніе преждесвященныхъ, въ немже прежде уже суть освященная святыя дары. Иное же служеніе литургіи обычныя, въ немже по велицѣмъ входѣ святыя дары прелагаются и пресуществляются. Убо зѣло злѣ сливается сіе двое, смѣшивая, а не раздѣляя, Никита сей безумный, никакоже помянувъ, о нихъже вѣщаетъ Апостолъ къ Римляномъ въ гл. 12: *не мудрствуимъ паче, неже подобаетъ мудрствовать, яко о всякомъ праздномъ словѣ, якоже*

¹ У Паисія, очевидно, во всѣхъ этихъ мѣстахъ приведены были начальныя слова молитвъ и по греческому тексту.

есть писано у Матѣеа, слово хотящїи на страшномъ судѣ воздати.

18. Отраженіе обличенія, еже на оная словеса: *яко діакономъ, инокомъ, мірскимъ и женамъ мощно есть младенцевъ крестити въ нуждѣ.*

Пантирве камень есть, между камнями предрагими причтеный, въ немже едино естество всѣхъ царствъ виды любочестнымъ нѣкимъ подражательствомъ совокупи, якоже и въ святомъ таинствѣ крещенія благодатей исполненіе всутствуетъ и вмѣшается, ибо оно есть всѣхъ таинствъ дверь, корень и источникъ. И того ради св. Діонисій святое... богорожденіе именовати не усумнѣвается. Паче же Григорій святыи Богословъ въ словѣ і.... сирѣчь святое почитаніе пресвятыя Троицы нареклъ есть. Ибо Пиндаръ пояше, между стихіями изряднѣйшую воду быти... еже прилагательное къ водѣ крещенія пренести не усумнѣваемся, яко бо вода просто угодна есть ко всякому очищенію, ибо егда тѣло сквернами и блатомъ бываетъ покаляно, водою обыкохомъ измывати и тако чисто сотворяти: тако и въ божественной сей бани и таинственномъ семъ крещеніи самую воду приємлемъ, во еже бы намъ чувственною вещью не плотское сіятельство изъявити, ибо благодатию крещенія бываемъ паче снѣга убѣлени, Пресвятаго Духа свѣтомъ озаряющесе. Но къ дѣлу ближае да приступимъ. Вопросається первіе, чесо ради Христосъ Господь, хотяще сіе таинство узаконити, изволилъ е въ водѣ содѣяти, нежели во иной вещи? Отвѣтуется обычно:

вящаго ради удобства сего таинства, понеже есть не точію отъ нужды посредія, но и отъ нужды заповѣди. Рече бо Ісусъ просто у Іоанна въ гл. 3: *аще кто не родится водою и Духомъ, не можетъ внити во царствіе Божіе.* (Того ради, рече Златоустый, вода изъ ребръ Христовыхъ изтече, во еже бы омытися благоразумному разбойнику, ко еже мощи внити въ рай). Долженствова убо удобная устроиться сего таинства вещь и всѣмъ присутственнѣ бышествоваши ради напрасныя нужды. Во правду же, по долгу слугитель тайны крещенія есть епископъ, егоже врученіемъ, или поне отсутствія ради, есть іерей епархійный. Аще же нужда настоятъ, присутствуетъ же діаконъ, можетъ и онъ крестити; аще же причетникъ присутствуетъ, преимуществуетъ всякому людину и женамъ. Развратити же сицевый чинъ смертный грѣхъ есть, того ради, яко чинъ, Богомъ преданный, нѣсть развратителень. Аще же закона пременение... по глаголу св. Павла къ Евреомъ въ гл. 7 попускается, того ради.... яко много можетъ: что дивно, аще и въ семъ таинствѣ сицевое правило появляется? Патріарха Александрійскій Тимоѳей попускаетъ оглашенныя възбѣсновавшіяся крестити, аще налжится нужда смертная, и сицевую даетъ вину да не тощъ преселится отъ жизни, не несуща съ собою божественныя благодати путнопищи.... И Карѳагенскій соборъ въ правилѣ 12 о младенцѣхъ,—подобаетъ ли крестити я, или ни, наворачаетъ весьма еже крестити, того ради, яко во усумнительныхъ дѣлѣхъ, безбѣднѣйшая часть есть избира-

тельна.... глаголетъ Матѣей Властарь въ главѣ о крещеніи. Придаждь, яко лучше есть (прочая въ равенствѣ содержаще) креститися отъ бѣльца младенцеви, нежели всякаго крещенія кромѣ умерети; занеже надъ крещеннымъ усопшимъ надгробная поются, тѣло же погребенію предается; инако же, аще бы родители оставили младенца некрещена, непщевани были бы аки убійцы. Аще же твердо держати восхощемъ, яко самимъ токмо священникомъ крестити приличествуетъ, посвященнымъ же, *αγιέρω*, никако или яко ниже діакonomъ крещеніе подати годствуетъ, вопіють на ны Дѣянїа апостольская. Чтемъ бо въ гл. 8. яко Филиппъ діаконъ крести Евнуха, Еѳіopa и сицевую тайну служилъ есть, егда бо путешествоваху, прїидоста къ нѣкой водѣ (яже и доселѣ обрѣтается и чтится), *рече же Евнухъ: се вода, что возбраняетъ ми креститися?* Воистинну, по Никитову разсужденію, возбраняетъ и долженъ быше Филиппъ отвѣщавати, яко нѣсмь священникъ, ему же самому крестити подобаетъ. Обаче убо ничесоже сицевое изрекль есть, но желанное крещеніе подалъ есть, не ожидая, — глаголетъ св. Григорій Нисскій, обличая отлагающихъ крещеніе, — гостинницы,¹ или града, или веси, или мѣста освященія, аще токмо обрящетъ вѣру въ прїемлющемъ.² Доводствуютъ еще словеса Евангельская у св. Іоанна въ гл. 4, во вмѣстительныхъ реченная: *Іисусъ же самъ не крещаше, но уче-*

¹ Было: *пристанища*.

² Здѣсь, на недописанной строкѣ, вписано рукою же Полоцкаго: *nil deest*.

ницы Ею. Здѣ вопрошаю: како ученицы Христовы, не у бывше священницы, достойнѣ крещаху? Извѣстно, яко зѣло не творяху... безразсуднѣ и неправильно. Но речеши: правила апостольская глаголютъ, яко діаконъ некрещаетъ, ниже жертвоприноситъ. Отвѣтую: глаголетъ о законѣ обычномъ и не настоящей нуждѣ. Его же на изъясненіе привнесу образы нѣкія. Священникъ, глаголетъ Номоканонъ ¹ простой крещаетъ въ нуждѣ, аще инъ священникъ не обрѣтается къ служенію сицевыя тайны. Паки, священникъ не имать крестити, развѣ егда постенъ; обаче настоящей нуждѣ можетъ и не постенъ сый. Паки, въ святые великія четырдесятницы постъ, аще нужда есть, лѣтъ есть крестити, и иная симъ подобная... Дивно же есть оно, еже о святомъ Аѳанасіи, еще дѣтствовавшемъ, лѣтописи церковныя предають намъ, и Фотій въ своей Книгохранильницѣ довольно свидѣтельствуетъ, яко онъ въ Нилѣ рѣцѣ сверстники своя отроки крестилъ есть, сицевое же крещеніе вмѣнися отъ Александрійскаго въ то время Патріархи яко: праведное и правильное.

Но задаси ми: св. Василій нещуетъ въ еписколіи къ Амфілохію, въ правилѣ 47, яко *Енkratиты, Саккофоры и Апостактиты* паки крестити подобаетъ, развѣ негли аще бы они отмѣтали таковое покрещеніе... или презъ иную нѣкую економію, или... Но прежде неже отвѣщати ми, видѣти подобаетъ, яко сей святой учитель вся преступники

¹ Эти слова: *глаголетъ Номоканонъ* вписаны послѣ, въ оставленномъ пробѣлѣ.

на три части раздѣляетъ, научаетъ же ино быти ересь, ино схизма, ино парасинагогу. Ересь же убо ту быти опредѣляетъ, яже противное вѣрѣ погрѣшеніе нѣкое держитъ. Схизму паки быти расколъ, въ церковныхъ пряхъ нѣкихъ израсшій. Парасинагогу напоследокъ, егда упорніи пресвитери, или епископи съ міряны схожденія правилнаго¹ имѣти не хошутъ. Тѣмже убо отъ схизмы и отъ парасинагоги возвращающимся ко церкви отъ вѣщающаго преданія безъ крещенія пріимати увѣщаль есть. Еретики же крестити нещуетъ, якоже и Кипріанъ, иже того ради хошетъ да крестятся схизматики, яко отъ общенія церкви удалени бяху и препята бысть нѣкако онымъ благодать Св. Духа, ея же на прочія къ тому изливати никако же могутъ. Но еже подлучаетъ, есть разсужденія достойно. Того ради, глаголетъ паки, подобаетъ я крестити, егда восхотятъ ко церкви возвратитися, яко отъ бѣльцовъ быша крещени... Убо уже видится крещеніе отъ мірянъ сотворенное неправильно быти и не твердо, занеже нужда есть сицевая очищати праведнымъ церковнымъ крещеніемъ. Послѣдовательнѣ же, исключается крещеніе отъ мірянъ бывающее, яко неправедное. Но праведнѣ разумѣти требѣ есть толика учителя о законѣ обычномъ глаголавша и кромѣ всякія нужды, занеже міряне поистинѣ не суть служителие таинства общій, ниже правило, или заповѣдь во все имъ дана есть, еже явѣ исповѣдуетъ Августинъ въ книзѣ 2 во епи-

¹ Было: законнаго.

столиі 113. Паче же и Никифоръ Царьграда патріарха, явственнѣ повѣствуяй, яко простой инокъ и діаконъ можетъ крестити. Еще намѣни(?) и помѣстный соборъ Еливерфинскій, иже устанавливаетъ, да плывущіи кораблемъ, нуждѣ настоящей, отъ коего либо вѣрнаго креститися могутъ. Призову святаго Григоріа Богослова на укрѣпленіе разумѣнія нашего. Сей бо въ словѣ о святомъ крещеніи сицевое усумнѣніе предлагаетъ: что же о тѣхъ речеши, иже еще младенцы суть, ниже или тщету, или благодать разумѣютъ,¹ еда и ихъ крестити имамы? Отвѣщаетъ: тако всячески, аще нѣкая бѣда нудить; лучше бо кромѣ всякаго разума освятитися, неже кромѣ печати и крещенія² отъити. И сицевое винословіе по насъ есть. Обрѣзаніе, въ день осьмый совершатися обыкшее, бѣ образъ крещенія. Но обрѣзаніе можаше быти тако отъ мужеска яко и отъ женска пола, Убо можетъ быти и крещеніе, образованное обрѣзаніемъ,³ тако отъ мужеска пола, яко и отъ женска, ради внезапныхъ и нечаянныхъ приключеній, никоимъже образомъ и пособствомъ устранимыхъ. Убо тогда банею очиститися весьма полезнѣе есть. Паки. Ножемъ обрѣзаше Авраамъ сына своего Исаака, въ книгахъ Бытіа въ гл. 21. Сепфора же каменемъ обрѣзала сына своего въ Исходѣ въ гл. 4, въ то время, егда ангелъ Господень иска его⁴ убити.

¹ Было: чувствуютъ.

² Было: освященія.

³ Было: обрѣзанія антитипонъ.

⁴ Было написано: Моисеа.

Усумнѣвается здѣ св. Кириллъ въ своихъ *Глафирахъ*, кого губитель онъ ангелъ хотяше убити, Моисеа ли, за продолженное негли обрѣзаніе сына его Гирсема, или самого первороднаго, якоже необрѣзаннаго. Но како-либо разумѣтся, довольно есть, яко Сепфора обрѣза сына своего. Якоже по премногихъ ученію и отъ Преподобнословенныя Дѣвы обрѣзанъ быше и Ісусъ младенецъ, аще же нѣцѣи сіе дѣло причитати обыкоша отцу мнимому Іосифу. Можетъ убо датися¹ и крещеніе, еже св. Епифаній веліе именуетъ обрѣзаніе, отъ бѣльца и людина, или поистиннѣ и отъ жены христіанскія просто ради нечаянныхъ и внезапныхъ приключеній, имъ же многажды нетокмо предварити, но ниже врачевати ихъ кто либо можетъ, наипаче же егда душа въ бѣдѣ бываетъ вѣчныя погибели. Вопросъ древле быше отъ Александрійскаго патріарха Марка: како быти можетъ, еже пресвитеромъ крещати, муромъ помазывать, грѣхи оставляти, занеже сія дарованія и служенія суть свойственна епископомъ? Отвѣщаетъ же ему Валсамонъ Антіохійскій патріарха, яко сія суть свойственная служенія епископомъ, абаче суть попущенна и священникомъ, скудости ради... архіереевъ и за рѣдкость. Такожде и въ первоначальной церкви, егда веліа гоненія бяху, и иноцы простіи... грѣхи оставляху; оттуду извѣтъ похитилъ есть Ареопагита Діонисій обличати Демофила онаго, иже грѣшника нѣкоего обличалъ есть, ктому же и священника добраго

¹ Было: *попуститися*.

неистовствомъ нѣкимъ обезчестилъ быше. Да не непщуетъ никтоже похваляти ми міряны, священническая служенія кромѣ всякія нужды совершающіа. Не буди то мною. Ибо св. Епифаній въ толкованіи вѣрѣ Максима нѣкоего поминаетъ, иже мірянинъ суще божественныя таинства и священія безчиннымъ нѣкимъ дерзновеніемъ и безумною гордостію совершати дерзнулъ есть. Якоже и иніи два иноцы въ толикую дерзость пріидоша, даже епископская служенія дѣйствовать не усумнѣшася. Иніи, паче обычая церковнаго, отъ Аріанъ къ церкви возвращающихся паки крестити не убояшася, яко же въ Ликіи нѣкто пресвитеръ обыче содѣвати, своимъ разсудомъ еретики крестивый паки, кромѣ вселенскаго собора уставу. Вопросыши: чесо ради неможетъ усугубитися крещеніе? Отвѣщаю, яко едина бѣ и смерть Христова, послѣдовательнѣ же и едино чистительное крещеніе... Чесо ради въ символѣ вѣрующіи исповѣдуемъ: исповѣдую едино крещеніе. Которыхъ же паки крестити подобаетъ, уставися на различныхъ соборахъ. Поистиннѣ Августинъ предаетъ преизрядное правило, еже есть: тыя паки крестити, иже погрѣшаютъ во образѣ, отъ Христа преданномъ и во Евангеліи написанномъ: шедше крестите *во имя Отца и Сына и Святаго Духа*. Елицы убо еретицы не разориша образа сего крещенія, никако покрещававхуся, ибо непщевахуся цѣлое даяти крещенія таинство, аще вѣра ихъ и не быше цѣла, но лжами нѣкими осквернена.¹ Того ради, яко же повѣдаетъ Кедринъ въ своей

¹ Было: *растлѣна*; потомъ: *окаляна*.

Синопсіи церковной, іерей онъ аріанскій Димитрій, измѣнивый образъ крещенія, глаголюще: крещается *нѣрк*¹ во имя Отца, чрезъ Сына въ Святаго Духа, абіе видѣ воду замерзшу въ крестилницѣ.

Вопрошается еще: аще отъ никогдаже бывшихъ Христіанми можетъ датися крещеніе? Отвѣтуетъ Августинъ въ книзѣ 2, въ епистоліи 113, яко ничто же есть утвержательно безразсуднѣ кромѣ достовѣрія святаго собора. Чудо воспомяну, молю же да не возсмѣтесе даже до кончины чудесе, праведная бо повѣмъ и тайная Божія судьбы. Егда Кипръ островъ плѣнися Турки, тогда Баша (*sic*) онъ побѣдитель и торжественникъ, узрѣвъ Христіанскую дѣвицу, красотою никимже предваренную, излиха возлюби ю; по времени же чада приживе съ нею; но она слезъ не преставаше изливати тогда наипаче, егда роди первороднаго своего: увы мнѣ, глаголюще, окаянной, яже роди толикими болѣзнями Турка. Сія услышавъ Баша, начать возлюбленную жену свою утѣшати: чесо ради, глаголюще, рыдаеши горко? Сотворю азъ отроча перворожденное христіанина, аще желаеши, аще токмо ты явственнѣ словеса оная нуждная, ушесамъ моимъ повѣдающе, изъявиши. Извѣстила² съ радостію кипрская жена; и принесеннѣй бывшей водѣ, изреченнымъ же бывшимъ отъ Баши словесемъ Господнимъ, рекшаго: крещается рабъ Божій Іоанъ во имя Отца и Сына и Святаго Духа, аминь, предаде Баша отроча въ руцѣ матернѣ. Таже, малу

¹ Такъ, пославянски, сокращенно написано и у Полоцкаго.

² Было написано: *соизволила она*.

мимошедшу времени, понужденъ бывъ Баша изыти съ морскими ратми на Егейское море, нынѣ же именуемое *Архипелагъ*; взять же съ собою жену и сына, юже послѣжде остави на островѣ Хійскомъ. Она же по немалыхъ днехъ извѣтъ приѣмши, преблагую и нуждную вину обрѣтши, посла отроча въ соборную церковь, посвященную во имя Архангела Михаила, воеже бы законно окрещену быти, непщующи первое оное крещеніе неполезно быти, яко отъ Турка дѣйствованное. Что вѣще? Прииде время, по обычныхъ священнодѣйствіяхъ, еже отрочати крещену быти; егда же погрузити его обычаемъ церковнымъ священникъ въ воду хотѣше,—о неизреченнаго чудесе! о позорище преужасное!—вода въ купели¹ абіе видима бысть смерзшая. Ужасеся тогда іерей и трепетенъ сущи, иде со тщаніемъ къ митрополиту, Ипполиту именемъ; повѣствуетъ случай. Удивляется архіерей, таже свѣще освѣщенъ изглагола: отъиди ты и вопреси: еда отроча сіе бысть когда водою крещеніа омовенно? Истязана бѣ жена Кипрская, исповѣда, яко Баша мужъ ея словеса Господня глаголаше и обычаемъ Христіанскимъ крестилъ его. Еже услышавъ благочестивѣйшій онъ и премудрѣйшій митрополита Ипполитъ, повелѣ токмо муромъ святымъ отроча помазати и прочія священнодѣйства по чину совершити. Яже, послушливъ сый, священникъ съ радостію сотворилъ есть. Промчеса оное чудо и въ книгахъ митрополіи оныя начертано

¹ Было: въ крестилници.

обрѣтается въ будущую толика чудесе память. Еже азъ самъ моима слышахъ ушесма отъ премудрѣйшаго Мелетіа повѣствованіе, по рекломъ Сириги, егда бѣхъ въ Царѣградѣ. Но о сихъ довлѣетъ. Вѣмъ бо краткость нынѣ всѣми любиму быти и лаконичество пржежеланно, по глаголу бо Пиндарову... краткость годѣ есть.

19. Отраженіе оныхъ словесъ никитовыхъ: *и тѣ, государь, всѣ таинственныя въ мѣропомазаніи прилашенія (прежде бывшая) нарушены злымъ еретическимъ вымысломъ, послѣдую отпадшія вѣры Римскія неpravославному крещенію.*

Время верженія каменій, время же собиранія ихъ, Екклесіастъ глаголетъ, во еже бы мощи святымъ учителемъ бити противныя, паки нуждѣ належащей, яко же толкуетъ св. Григорій Нисскій, исполняя мѣсто сіе. Уже убо соберемъ каменіе Христово, ко еже поразити главу суетнѣйшую Никитову, о немже можетъ истинствоватися Езопово изреченіе... о какова глава безъ мозгу! Сѣтуетъ здѣ своимъ обычаемъ Никита, яко отсѣчена быша въ мѣропомазаніи изъ Требника отъ сихъ словесъ: *печать дара Духа Святаго, оная: да избудетъ стыда, его же первіе преступивъ чловѣкъ ношаше. Аще осѣчена суть, добрѣ суть отсѣчена и истреблена; ибо первозданнаго Адама не отвергаетъ святое мѣро, но крещеніе отгоняетъ. Такожъ на лицѣ отъ сихъ словесъ: печать дара Духа Святаго, аминь, оная отсѣчена. да откровеннымъ лицемъ славу Господню зритъ, и*

то глаголетъ быти *порушено*. Но благо отсѣчено
 есть и смазано, аще когда бѣ написано: не мвро-
 помазаніемъ бо, но крещеніемъ паче несредственнѣ
 стяжемъ благодать видѣнія блаженнаго, развѣ аще
 восхотѣлъ быхъ сіе глаголати косвеннѣ, по Апо-
 столському правилу 47, глаголющему святое мвро-
 помазаніе быти часть святаго крещенія. Но нѣсть
 того ради полагательно во образѣ мвропомазанія.
 Не бо любимъ приложенія, наипаче же... въ ве-
 щѣхъ вѣры. Прилагаетъ еще отвержено быти на
 очесѣхъ глаголанное по сихъ: *печать дара Духа*
Святаго, аминь, оная: да зрѣтъ очима свѣтъ Святыя
Троицы, первыя доброты образъ. Давши, не соиз-
 воливши же. Мыслию внутренюю, а не очима свѣтъ
 Святыя Троицы зрится, занеже Богъ есть Духъ, очима
 же телѣсными никогда видится. Развѣ восхощеши
 матафорически глаголати; но ты тропомъ и обра-
 зомъ никогда же учился еси, того дѣля ниже
 сего тебѣ соизволяю. Паки смазано есть, еже гла-
 голашеся на ушесѣхъ по сихъ: *печать дара Св.*
Духа, аминь, оная: да пріиметъ ушима слышаніе
таинства духовнаго евангелія Христова. И сіе добрѣ
 смазася, ибо сей даръ, еже слышати таинства ду-
 ховная, крещеніемъ пристязается, якоже и обоне-
 вати божественная ноздрями, и вкушати устнама
 истинное тѣло и кровь Христову, и еже облещися
 во броня правдѣ персми, и руцѣ же простирати
 на благая дѣла крещеніемъ свойственнѣ пріобрѣ-
 таемъ, по глаголу великаго Богослова Григорія
 Назіанзинскаго, егоже слова по божественныхъ
 писаніяхъ почитаю и пріемлю. Сей бо въ словѣ 40,

еже есть о святомъ крещеніи, сицевая прилоги, якоже глаголется, чрезъ совокупленіе привноситъ: крещеніе есть сіяніе душъ, жизни на лучшее предложеніе, плоти отверженіе, слова приобщеніе, созданія исправленіе, грѣха потопъ, свѣта общеніе, тмы погнѣніе; крещеніе есть колесница ко Богу, шествіе ко Христу, вѣрѣ утверженіе, ума совершеніе, небеснаго царствія ключъ, жизни премоушеніе, работы отгнаніе, узъ разрѣшеніе, сложенія въ лучшій санъ обращеніе. Что вѣще воспоминати требѣ? Крещеніе всѣхъ благодѣтельствъ господнихъ изряднѣйшее и лучшее... Того ради именуемъ е даръ же и благодать, и крещеніе, и помазаніе, и освященіе и нетлѣніа одѣяніе, и отрожденія купель, и печать, напоследокъ и всякимъ изряднѣйшимъ именемъ именуемъ. Даръ убо именуется, яко ничесоже привнесшимъ дается; благодать, яко и должникомъ; крещеніе, яко грѣхъ въ водѣ погребается; помазаніе, яко святойъ есть и царскій характеръ; освященіе, яко сіяніе есть и свѣтъ; одѣяніе, яко срамоты нашея покровъ; купель того ради, яко оmyваетъ; печать напоследокъ, занеже сохраненіе есть и господствованія знаменованіе.

Но речеши: святой Кирилль Іерусалимскій, въ третьей катихизи, подобная прилагаетъ тайнѣ миропомазанія, егда помазанія по тѣлеси творительная толкуеть. Тако есть; но хошу, да помниши, яко отцы святіи иногда чрезъ прилаганіе нѣкое и похвальное глаголютъ возвышеніе, ко еже возвысити похвалами вещь, себѣ предложенную. Сіе

извѣстно у всѣхъ есть, яко святое крещеніе плоть очищаетъ и умъ освящаетъ; мѣропомазаніе же вѣру утверждаетъ; божественное причастіе Христа намъ соединяетъ; исповѣданіе небесный есть восходъ, свободженіе же отъ грѣхъ намъ даруетъ; бракъ о Господѣ нечистоты возбраняетъ; священство силу духовную умножаетъ; напоследокъ, святыи елей небесное царство дарствуетъ и останки грѣховъ стираетъ. Но временемъ усмотрѣти подобаетъ, яко имя... *печать* пространно пріемлется. Глаголетъ бося пресвятѣйшее знамя крестное печать, имже пресвятѣйшимъ знаменемъ, глаголетъ Св. Епифаній, и демони связуются. Чесо ради на прогнаніе демоновъ сицеваго знамене крестнаго употребляти обыкохомъ... Сице святая Іустина прогна діавола... Пачеже и отступникъ онъ Іуліанъ въ величайшемъ страстѣ и бѣдѣ бывъ, прибѣглъ быше къ сему знамени креста святаго и имъ прогналъ бѣсы. Прочее, свойственнѣ... печать тайна мѣропомазанія именуется того ради, яко самымъ мѣропомазаніемъ и крестомъ бываетъ запечатлѣніе, егда священникъ помазывая святымъ мѣромъ глаголетъ... *печать дара Духа Святаго, аминь*, аки утверждающе и глаголюще: сіе, еже тебѣ предаю, есть печать дара Духа Святаго. Еже явѣ есть изъ святаго Кирилла Іерусалимскаго, въ 18 катихизи: печать, глаголетъ, вамъ дадеся изъ дара и причастія Св. Духа. Паки нарицается... печать, сирѣчь силъ запечатлѣніе, якоже умствова Григорій святыи, о сестрѣ Горгоніи глаголюще. Дерзновенно, глаголетъ, реку, яко печать благодати быше очищеніе крещенія въ ней.

Вѣдательно же есть, яко древнихъ оныхъ временъ омовеннымъ святымъ крещеніемъ не давашеся святое муропомазаніе. Вина началнѣйшая бѣше, яко муропомазаніе токмо епископамъ соблюдашеся, яко собственое имъ дѣло. Потомъ же наступствомъ времени, за скудость служителей епископовъ начаша то возисполняти и дѣйствовати началнѣйшіи іереи, каковы суть нынѣ протопопове, святымъ муромъ крещенія помазываютъ. Новатіани сію тайну муропомазанія весьма оставиша, якоже и нынѣ лютрокалвинистове туюжде отвергають и отмѣщутъ, аки нѣчто суетное и непотребное. Свидѣтельствуеть о семъ нашемъ изглаголаніи Θεодоритъ о баснѣхъ еретическихъ, о новатіанахъ разглагольствуяй тѣхъ, въ книзѣ 3: иже отъ самыхъ Новатіанъ крещены бывають, яко священнаго муропомазанія не творять, чесо ради отъ оныя ереси Церкви плоти пріобщающихся всесточестніи отцы муропомазывать повелѣша. Сице узакони соборъ, иже въ Царѣградѣ, въ правилѣ 7 глаголюще: напечатавше и помазавше прежде святымъ муромъ на челѣ, на очесахъ, на ноздрѣхъ, на устахъ, на ушесахъ, къ церкви припускаемъ; печатающе ихъ глаголемъ сія: *печать дара Духа Святаго, аминь*. И добрѣ воистинну, ибо святое муропомазаніе знаменуетъ Святаго Духа исполненіе, души дарованное, егоже еретицы дати не могоша и сицеваго изводства благодати въ душахъ содѣяти. Но задаетъ намъ трудъ святой Меѳодій патріарха Цариградскій, иже отступившихъ отъ вѣры, паки же ко церкви возвратившихся узакони

паки мвромъ святымъ помазывати, обычаемъ крещенныхъ. Но три суть тайны усугублятися немогущія печати ради: крещеніе, мвропомазаніе и священство. Разныи разная отвѣтуютъ; обычнѣйше же разумѣніе ¹ есть, яко мвропомазаніе оное просто быше чиновное и знамя нѣкое внѣшнее примиренія; занеже бо благовоніе оно внѣшнее погубили бяху отреченіемъ вѣры: уже паки воспріяти тщатся, да паки будутъ по словеси оному павлову... благоуханіе Христово. Св. Іустинъ мученикъ и философъ въ вопросѣ 135 вопрошаетъ: чесо ради мы прежде елеемъ, таже мвромъ святымъ печатани бываемъ по совершеніи крещенія? Христосъ же Господь прежде мвромъ бѣ помазанъ, потомъ же страдалъ есть. Отвѣщаетъ: яко Марія оная, помазавшая Господа прежде смерти, то сотвори предваря, якоже свидѣлствуетъ Евангелиста. Аще предвари: убо прежде достойна време не помаза: убо не бываетъ по нѣкому противленію. Но оно на Господѣ бывшее прежде подобна бысть времени; въ крещающихся паки въ приличное время бываетъ. Прочее елеемъ помазуемся, да помазанницы ² будемъ; мвромъ же помазани бываемъ во воспоминаніе того, иже мвропомазаніе погребеніе свое непщева быти. Симъ придати годствуетъ Симеона Селунскаго, глаголющаго: вода убо знаменуетъ омытіе и очищеніе, елей божіе милосердіе и кротости скорость являетъ, пачеже на святыя подвиги взывается, аки борець, крещенный, да

¹ Было: *умствованіе*.

² Сверху надписано: *Христы*.

аки подвигъ сего міра хотящъ содержати, радостенъ изыдетъ.¹ Еже и Прокопій наблюде, толкуя оное Исхода: *омыши ихъ водою*. И того ради, подлагаетъ: людіе пріятія уже благодати свидѣтеліе, поютъ оное, изъ псалма 31: *блажени, имже отпустишася безаконіа*, веселіа ради духовнаго и отрожденіа во святой купели, яже круглостію своею матернее чрево предъявствуетъ. Паки вѣждь и то, о Никито, яко въ елеопомазаніи глаголются оная словеса, яже обрѣтаются въ Евхологіи: *на чель убо глаголетъ: помазуется рабъ Божій елеомъ радости; на перстьхъ: во исполненіе души и тѣлу: на ушесъхъ: въ слышаніе вѣры; на ногахъ: во еже ходити ему по стопамъ заповѣдей твоихъ; на рукахъ: руцѣ твои сотвористъ мя и создастъ мя, или, яко во иныхъ обрѣтается Требницѣхъ: воеже непорочно воздеждати руцѣ свои во святая и дѣлати правду на всяко время и благословити Господа.*² И тако помазавъ все тѣло крещаетъ его іерей и держаще его просто и при коемждо словесѣ глаголаніи погружая и взимая его отъ воды. Ты же и въ семъ клеветникъ явился еси, глаголюще на ны, яко не употребляемъ трехъ погруженій, но тріехъ обливаній, егда мы вѣмы добрѣ, чрезъ три оныя погруженіа смерть, погребеніе и воскресеніе Господне знаменается, якоже отцы святіи восточныя церкви древле уже нашь научиша, наипачеже Діонисій Ареопагита въ служеніи о крещеніи, ихже аще быхъ здѣ тщился приводити, тожде сотворилъ быхъ, яко

¹ Было: *нисходитъ*.

² Со словъ: «или, яко во иныхъ»... вписано сверху и сбоку.

аще быхъ совы вводилъ въ Аѳины, идѣже бѣше гнѣздо совіе, или дрова ввозилъ въ лѣсъ, по обычной притчи.

20. Отраженіе оныхъ словесъ: *и тѣ, Государь, ереси римскія внесены суть изъ книгъ греческихъ, печатанныхъ растлѣнно въ трехъ латинскихъ градахъ въ Римъ, Паризъ и въ Венецію.*

Исаіа въ гл. 56 Іудеевъ именова псовъ нѣмыхъ за безстыдство на Христа Господа и за возстаніе нанъ. Повѣдаютъ бо фізіологове, яко пси неистовіи¹ того ради нѣмы бѣвають...., яко неистовство² самое творить ихъ беззубыхъ... Вси воистинну, по словеси Епифаніеву, еретицы суть пси неистовіи,³ имже подражающе и Никита лаесть оныя типографы, имже долженъ бѣ благодарствіе возсылати за то, яко книги наша церковныя, не имущимъ намъ типографіѣ, своимъ накладомъ печатають и изображаютъ. Воистинну праведнѣ мысль мою изъявлю въ томъ, ради отложенія всякаго усумнѣнія, яко лучше было бы, аще бы здѣ, во царствующемъ и богоспасаемомъ градѣ Москвѣ, сицевыя книги греческія церковныя точнѣе были печатаны. Оттуду бо послѣдовалъ бы не малый прибытокъ: вси здѣ бы притекали, еже куповати сицевая книги и не малой цѣною. При томъ помяну, яко на Карѳагенскомъ соборѣ бысть

¹ Бѣло. бѣщенны.

² —бѣшеніе.

³ —бѣшеніи.

вопросъ о книгъ извѣстіи, и судиша всѣмъ онымъ соборомъ искати дѣяніи собора Никейскаго отъ трехъ патріархъ, яко праведнѣйшихъ, сирѣчь отъ Антіохійскаго, отъ Александрійскаго, и отъ Цариградскаго, еже бы изволили преслати, своихъ рукъ приложеніемъ утвердивше. Да поищетъ убо и нынѣ Никита Евхологіевъ рукописныхъ изъ святыхъ обителей великихъ, и горы Синайскія, и горы Аѳонскія, и изъ самыя патріархіи Іерусалимскія; аще же обрящетъ я съ печатными несогласная, тогда языкъ свой киникійскій да подвигнетъ и да обличитъ о неправдѣ печатанія въ Римѣ, Венеціи и въ Паризѣ. Но всякаго разсмотрѣнія и разсужденія кромѣ сія глаголати, лающа есть и клеветуща и кинического Діогена свойство... Но о семъ довлѣетъ!

21. Отраженіе оныхъ словесъ: *и тѣхъ же, Государь, новыхъ книгъ въ крещенной молитвѣ напечатаны звѣзды Богу собесѣдницы, еже есть безмѣстно и ложно.*

Ликургъ премудрѣйшій Лакедемонскій царь спиршестввенникомъ, въ домъ свой царскій входящимъ, сія глаголати обыклъ быше: сквозѣ сія врата ни единого да изыдетъ слово, не хочу бо, да яже глаголашася и содѣяшася въ дворѣ дружески внѣ его явятся и народствуются. Оттуду она притча... бывающая въ дому, да не явятся людямъ. Проявилъ есть Никита бывшая доселѣ тайная и немногимъ ¹ знаема.... о нихже лучше бѣ

¹ Было: *малѣйшимъ*.

молчати, да не соблазняются младенцы ¹ въ дусѣ... Воистинну сей вопросъ весь есть о имени, и того ради скоро освобождуся, разсмотря купно съ словописателми глаголѣ онъ...², иже, да правдѣ реку, многая и различная имать въ себѣ знаменованія, и того дѣля сказатель греческій тое пріѣлъ есть, еже непщева праведнѣйшее и предпріятію угоднѣе (худше бо прежде бѣше предложено на языкѣ словенскій, еже—*тебѣ молятся звѣзды*, егже никоимъ же обычаемъ глаголѣ греческій знаменуетъ). Тѣмже убо, аще бы мнѣ дано свободу ³ толкованія сего слова, реклъ бѣхъ: *тебѣ присутствуютъ звѣзды*, сирѣчь яко созданіе Создателя своему и Творцу. Иже обычай глаголанія зѣло есть обыченъ въ священномъ писаніи. Се бо *присутствуемъ*, писано есть.... Но занеже не ношу лица сказателнича, но паче защитническое и поборническое содержу, глаголю добро быти новое никоніатское толкованіе, сирѣчь: *тебѣ звѣзды собесѣдуютъ*. Аще же воспросиши: како звѣзды бесѣдуютъ? Отвѣтствую: тѣмъ обычаемъ, имже всяко дыханіе хвалитъ Господа. *Небеса повѣдаютъ славу Божию*. Како повѣдаютъ?—молю тя. Занеже небеса не суть одушевленна, не пріемлемъ бо та, яже Ямвлихъ, Порфирій и Проклѣ о небесныхъ кругахъ безмѣстно и безумно мудрствоваху. Паки, аще душа разумная не бѣ, егда вси крузи небесніи создани бяху, коимъ образомъ быти можетъ, еже небесамъ одушевленнымъ быти?

¹ Было: *маліи и отрочата*.

² Очевидно, у Паисія написанъ былъ глаголѣ *ἐντοῦχάμεν*.

³ Было: *вольность*.

Оттуду идо́лослужене́ воста, еже за бо́ги почита́ ду́шепагубнымъ погрѣ́шеніемъ звѣ́зды, елико-елико очима зрятся, егда должни паче бяху людіе поне ви́димыхъ вещей красотою и чиномъ пристяжати Бо́га познание, а не съ отрече́ніемъ истиннаго Бо́га тварь. толико величати, якоже добръ Апостоль, къ Римляномъ пишу́ще, помяну́лъ есть. И Григорій въ словѣ́ 34 своимъ обычае́мъ на слово о Бого-словіи́ къ новымъ римляномъ Царигра́дскимъ сіа глаголаше: умъ, глаголетъ, искони созданая раз-суждая,... не преста здѣ; но яже очима видима суть ко Бо́гу возведе, аки Давидское оно изгла-голаше, въ псалмѣ́ 38: *удивися разумъ твой отъ мене*. Еще отъ самаго созданія уже убо разсуждай и удивися,—кая суть вѣ́тровъ хранилища ¹ и кая снѣ́га сокровища. ² *Кто*, яко же глаголетъ Іовъ, *есть рождый ірадіе росное*, въ гл. 38, *чьего изъ чрева изыде ледъ* и прочая. И поистиннѣ, якоже въ отчинѣ́ (?) Богъ есть аки зеркало, въ немже возсвѣ́тятся вся созданія, тако въ пути против-нымъ обычае́мъ созданія суть зеркало, въ немже Богъ видится. Чесо ради Апостоль въ первомъ посланіи къ Римляномъ, въ гл. 1: *невидимая Божія твореньми помышляема видима суть*, и въ первомъ къ Коринѣомъ, въ гл. 13: *видимъ нынѣ́ якоже зерцаломъ въ іа́даніи*.

Но ниже малопочитателно есть Пахимерово толкованіе, глаголющаго, яко неглаголаніа ³ имѣ

¹ Было: сокровища.

² —хранилища.

³ —безсловесіа.

проповѣдуется убо о вещѣхъ безсловесныхъ и бездушныхъ положителнѣ. Еще же проповѣдатися и о вещѣхъ духовныхъ и невещественныхъ утвердителнѣ такожде, или положителнѣ. Чесо дѣля нарицаемъ... чины небесныя неимушїя силы глаголанїа ¹, занеже не глаголють тѣлесными орудїими, сами суще безплотни, ² и аки между собою глаголють, молчанїемъ взаимъ слово себѣ сообщающе; ибо притчею глаголется, яко ихъ есть гласъ *возстроимый*... тварь же нѣкоимъ образомъ есть... духовныя лѣпоты слѣдъ и отгласованїе нѣкое, или подобїе гласоотникновенїа особнаго и тайнаго звука образъ. Симъ придаждь, яко Василїй Великїй въ словѣ 4 въ Ексагемирїе ³ рассуждаетъ, стихїа... сице быти нареченны того ради, яко себѣ приличествуютъ и согласуютъ и угоднымъ между собою и изряднымъ же чиномъ содружаются. Есть бо... тожде, еже... согласно. Занеже бо кругъ міра аки *лиководителство* есть, вся между собою благочинно въ согласїе стихїи устроена имѣяй. Сице Пифагоръ у Іустина мученика на увѣщанїе, еже къ языкомъ, глаголаше: начала вселенныя стихїа суть, изъ ихже согласїя и соединителства числъ прекрасное рождается сладкопѣніе, или симметріа. Но инымъ, царскимъ же путемъ шествовати намъ подобаетъ. Іовъ въ гл. 38 сія имѣетъ до слова: *егда быша звѣзды, восхвалиша мя гласомъ велиимъ вси ангели мои*, а яко во иныхъ пишется вивліахъ:

¹ Такъ исправлено вмѣсто написаннаго прежде: неизреченныя.

² Было: *безтѣлесни*

³ 'Εξαμερία—шестодневъ.

егда мя хвалиша купно звѣзды утренніи и глашаху вси сынове Божіи. Се хвалятъ звѣзды; разумѣются здѣ чрезъ звѣзды... небесныи онѣи духове девяти чиновъ, якоже явѣ есть отъ предложеннаго мѣста. Вопрошаетъ св. Епифаній на *Архонтики*: вскую ангели отъ Бога едва не безчисленни создашася? и отвѣтуетъ: ради божественныя славы согласованія и безсмѣстнаго онаго Богохваленія,¹ воеже бы величайшаго Царя и Бога свѣтлости и вѣчному достоинству высочайшаго царствованія выну прославлятися. Но и егда глаголетъ Богъ Отецъ: *прежде денницы родихъ тя*, не едину токмо звѣзду денницу разумѣлъ есть, глаголетъ Епифаній, но и прочія многія звѣзды, яже въ четвертый день созданы суть, пачеже и ангели, иже съ небомъ и землею созданы, купно разумѣются; аще бо не бы съ небомъ и землею ангелы были созданы, не реклъ бы Іовъ: *егда быша звѣзды, восхвалиша мя ангели гласомъ своимъ*. Ниже дерзаю рещи, наворачаетъ здѣ отецъ святой Епифаній, прежде небесе и земли Ангелы созданы быти и того ради Бога о созданіи звѣздъ хвалиша и прославляша: глаголетъ бо Моисей: *искони сотвори Богъ небо и землю*. Убо прежде небесе и земли ничтоже созданныхъ бѣше, занеже она бѣста начало всея твари. *Еда есть число воевъ его*, глаголетъ Іовъ въ гл. 25; *луна не сіяетъ, звѣзды же нечисты суть предъ нимъ*. Положи убо, о Никито, перстъ на устнѣ твои, аки второй Арпократъ, и буди Пифагорикъ, чрезъ

¹ Было: *богопроповѣданія*.

пять лѣтъ молчаніе соблюдушь. Уже бо и звѣзды хвалятъ, гласъ издають, пачеже и собесѣдуютъ, якоже видѣхомъ. Семо приличствуетъ оно Давидово: *и птенцы врановы призываютъ Господа*, вопль бо онъ, егоже имъ скудость пищи изводитъ, прошенію нѣкому подражаетъ.

22. Отраженіе оныхъ словесъ: *Никонъ, сложеніемъ трехъ первѣйшихъ перстовъ крестъ воображая, Формосову тересъ обновляетъ.*

Царствующій пророкъ Давидъ, въ псалмѣ 91 сице воспѣваетъ: *и вознесетъ ся яко инорога¹ рогъ мой.* Еже пѣніе Іустинъ мученикъ и Философъ въ двоесловіи съ Трифономъ іудеемъ сице толкуетъ: рози... въ множественномъ числѣ того ради глаголетъ, яко единъ онъ рогъ, веліи вѣтви отобоюду имѣяй, трезубень нѣкако быти знаменуетъ и креста же воображаетъ. Единъ бо есть право стоящъ рогъ, иже и возносится, непозыблемъ же пребываетъ во срединѣ, превосходяй тако даже отъ обоюду, яко рози край² прилученныя являются. Паки Исаіа въ гл. 5 о знамени крестномъ проповѣдаше: *во онъ день воздвиженъ будетъ Господъ знаменіе странамъ дальнымъ и совоздвижется отъ конца земли.* О немже знамени и Давидъ бесѣдующе въ псалмѣ 4 глаголетъ: *знаменася на насъ свѣтъ лица твоего, Господи.* Напоследокъ невѣста, сирѣчь Церковь Христова, глаголаше въ пѣснѣхъ пѣсней, въ гл. 8: *положиша*

¹ Должно быть: *единорога*.

² Было: *верхи*.

мя яко печать на сердци твоємъ и яко печать на мышцѣхъ твоихъ. Но, увѣдѣвъ мнѣ, бысть сіе знамя крестное въ знамя пререкованія и, якоже святыи Симеонъ прорицаше, въ знаменіе пререкаемое... Уже бо расколъ есть и разгласіе, коимъ обычаемъ творително есть сіе знаменіе креста святаго. Прочее, еже хошутъ, да глаголютъ прочіи. Да преодолѣтъ же выну еже древнее есть... Паки Василій святыи въ книзѣ о Святомъ Дусѣ, въ гл. 27, между иными преданіи апостольскими повѣствуетъ креста пресвятаго знамя быти... Слова толика учителя здѣ написати не отреку: и воеже, глаголетъ, помянути ми прежде, еже преобычесть намъ, сирѣчь знаменіе креста Христова кто научи? Нынѣ уже четыре патріархїи сїце обыкоша крестъ изображати, якоже мы обыкохомъ творити. Убо мы праведнѣ подражаемъ святымъ отецъ стопамъ, на преданіихъ древнихъ утвердившеся.

(Чесо ради св. Павелъ во второмъ посланіи къ Селуняномъ, въ гл. 2, глаголетъ: *тъмже убо братіе стойте и держите, имже научистесь или словомъ, или посланіемъ нашимъ*. Возмется отсюду изрядное и непреоборимое обличеніе на еретики нашего времени, иже преданія церковная отмѣщутъ, егда вѣровати не хошутъ развѣ пишемыхъ книгами, излиха неискусно препирающеся, едино быти писаніе праведное вѣры и нравомъ правило... Еще и Діонисій Ареопагита, святаго Павла ученикъ, Апостоловъ сверстникъ и клеветъ, явѣ научаетъ преданія апостольская и церковная неписанная тогожде достовѣрія съ писанымъ словомъ Божіимъ

быти, и яко тѣми не менше, якоже и писанми церковными Церкви правитися нужда есть. Слова толика Богослова виждь положеная въ Церковной Іерархіи въ гл. 1. Но къ дѣлу нашему да приблизимся не въ мудрости плотстѣй, но въ благодати Божіей уповающе, якоже глаголетъ св. Павелъ во второмъ посланіи къ Коринѣомъ, въ гл. 1, тако: воежебы быти въ насъ ей, ей, ни, ни. Аполинарій, излиха хвалившись о семъ, яко многія книги тако витійско, яко піитически написалъ, между же иными написалъ быше ону, о Троицы надписаную, въ нейже свое безбожіе весма и всячески открылъ есть, степени тамо нѣкія, силы же различіе сонствовавъ въ томже и единомъ Божествѣ. Паки: Троицу и онъ исповѣдаше, но изъ великаго, вящшаго и величайшаго составлялъ ю, Духа святаго наричуще великаго, Сына вящшаго, Отца величайшаго, егоже и солнце именоваше, якоже лучу-Сына, сіяніе-же Духа Святаго; тѣмже Отца выше почиташе, Сына почиташе, Духа святаго подпочиташе. И тако чрезъ различныя сія степени, сирѣчь чрезъ великое, вящшее и величайшее, Божества силу и могущество онъ никакоже сохраняше, лѣствицу поставляюще Божества, якоже глаголетъ Григорій Богословъ въ посланіи первомъ къ Келидонію, не къ единому достоинству и чести равенству три лица возносяще, но съ небесе, сирѣчь изъ естества Божественнаго, движуще.)¹

¹ Все это мѣсто и въ рукописи заключено въ скобкахъ, сдѣланныхъ красными чернилами.

Сія, положивъ, сице встаю. Ормяне (sic) знамя креста воображаютъ первымъ великимъ перстомъ съ двома послѣдними, аки полагающе въ Божествѣ степени различныя, негли подражающе въ семъ ересеначальнику Аполинарію. Убо трема перстми, сирѣчь первымъ и двома послѣдними, знаменающіися Арменомъ паче и Аполинаристомъ подражаютъ, занеже въ нихъ обрѣтаются величайшее, вѣщшее и малѣйшее. Но да лучше уразумѣтися силѣ обличенія, ¹ разсмотрителна суть имена особная перстовъ. Первый убо перстъ именуется *αυτοχεις*, ² вмѣсторучный, иже силою и крѣпостію прочія персты превосходитъ и нещуется аки другая рука. Того ради приточнѣ глаголется, еже стиснути вмѣсторучнаго, ³ вмѣсто благожелательства. Второй перстъ указательный именуется... иже инымъ именемъ спасенный наричется, того ради, яко указываетъ и относитъ, егоже и ко указанію всякія вещи употребляемъ. Средній перстъ, иже мѣрный глаголется, равно отстоящъ отъ послѣднихъ, гречески *μεσος* реченый, яко между послѣдними мѣсто имать. Четвертый врачевскій, или перстенный именуется, ибо обычай древнимъ быше на семъ перстѣ перстень носить, тако лѣвая, якоже и десная руки. Еяже вещи сугуба дается вина отъ Макробіа. Первая, яко на томъ перстѣ бисеръ перстенный отъ всякаго поврежденія есть безвреднѣйшій. Вторая, яко извѣстно есть отъ разсѣченныхъ тѣ-

¹ Было: доводствованія.

² *αυτοχειρος*?

³ Было: перстъ великій.

лестъ человѣческихъ, жилу нѣкую тончайшую отъ того перста къ сердцу человѣческому проходити; того ради показася древнимъ еже той перстъ перстеномъ, аки вѣнцемъ, увязати. Врачевскій же наречеся, гречески... занеже его употребляютъ врачеве къ познанію клецанія жилы. Послѣдній, малѣйшій же перстъ именуется ушесный того ради, яко егда имъ ушеса изчищаются, гречески *μωφ* именоватися обыче отъ мухи, скоктающія скоты.¹ Нынѣ изнуряется усумнѣніе, которыхъ перстовъ употребляти должны есмы въ воображеніи знамене крестнаго. Паки Латины знамя креста воображати обыкоша всею рукою. Того ради, между погрѣшенми латинскими и сіе считается, сирѣчь, яко знамя креста воображаютъ пятма персты; та же знамя креста творяще цѣлуютъ е... Блядословитъ убо Никита глаголя, того ради Формосу папѣ три первыя персты отсѣчены быти отъ наслѣдника Вонифантіа, яко тѣми тремя персты обыклъ быше знамя креста воображати Формосъ папа; ибо не отъ Вонифантіа но,—Платину истиннѣйшаго житія римскихъ папъ списателя услышимъ,—отъ Стефана. Стефанъ шестый римскій папа, рече, великою ненавистію Формоса папу возненавидѣ, даже вся Формосова дѣйства истребилъ и воничтожествовалъ, паче же Формосовъ трупъ изъ гроба извлекъ, и всего архіерейскаго обнаживъ одѣяніа, мірскимъ же облекъ и обычаемъ мірскимъ погребѣ, первіе два перста десницы отсѣкъ, имиже обыче священ-

¹ *Μωφ* значитъ оводъ.

ническая жертва осязатися; таже вовергъ въ Тивръ, сія изрещи словеса не усумнися, яко Формось клятву си не сохрани, юже своею рукою написалъ быше, еже никогдаже въ Римъ возвратитися, ниже архіерейскаго сана пріимати, изъ егоже единою отъ Іоанна папы низложенъ былъ. Юже обаче презрѣвъ и неразмыслнѣ нивчтожествовавъ, въ Римъ паки пріиде по повелѣнію Мартина папы, имже и разрѣшился и свободенъ отъ клятвы явѣ всѣмъ народствовася, и тако архіерейство, Стефану надежное, предварилъ есть, по жестокомъ ономъ на Іоанна папу возмущеніи, иже на послѣдокъ во-верженъ бѣ во узилище долговременно. Отсюда явѣ есть, яко Никитова повѣсть есть баснь, иже глаголетъ за крестное воображеніе сія ему прилучитися, иное за иное еретическимъ обычаемъ повѣствуя винословіе, сеже на прелщеніе неискусныхъ людей лестно приводя и ковно.¹ Ложнымъ убо утверждается основаніемъ Никита и подлагаетъ то, еже прежде довести ему подобаше. Ниже бо Вароній сея лжи когда либо воспоминалъ есть. Еще три камени имамъ, имиже новаго Голіаѳа Никиту поражу и низрину. Но прежде назнаменательно есть имя *Ума* всѣмъ тремъ лицамъ божественнымъ приличствовати. Обаче изряднѣе же Отець *Умъ* именовася... якоже Слова, всякіа страсти кромѣ, или теченія, родитель. Божество бо, яко отъ всякаго вещества отлученое, небезмѣстно

¹ Все это мѣсто, начиная со словъ: *ибо не отъ Вонифатіа....* написано послѣ, сверху зачеркнутыхъ восьми строкъ (разобрать зачеркнутое невозможно) и въ выноскѣ подъ страницей.

Умъ глаголется. Сіе воистинну таинство изображаемъ мы, Грекове, егда соединяемъ первыя три персты, яже и покладаемъ на челѣ, тожде аки глаголюще, яко Богъ Отецъ Умъ есть и глаголется, отъ негоже раждается Сынъ едиnorodный. Таже тыяжде самыя персты абіе полагаемъ на чревѣ, таинство воплощенія преевственнѣ изображающе, дѣйствомъ Святаго Духа совершенное во чревѣ Пресвятыя Дѣвы. Возносимъ паки тыя персты на правую страну, таинство воскресенія воспоминающе. На послѣдокъ же на шуію приносимъ, преславнаго вознесенія тайну знаменающе. Суть же на послѣдокъ метаніе творящїи, коеже знаменовати снисшествіе во адъ души Христовы ради святыхъ отецъ, тамо аки во узилищи заключеныхъ. Но сія да будутъ речена аки символическая, обаче же изъ древняго преданія изъятая. (Здѣ не могу удержатися, дабы ми не возглашати на еретики вѣка нашего. Гдѣ ли вы есте, иже ны благочестивыя и того ради гоните, яко спасеннымъ крестнымъ знаменіемъ, аки ношеніемъ отъ чародѣяній нѣкимъ на повседневныя демонская навѣтованія, самыя ны ограждаемъ? Не мухи отгонимъ,—ни,—о во злочестїи кощунницы!—но демоны во бѣгство-обращаемъ. О немже еще быхъ свидѣтельства приносить тщился, свѣтилникъ воистинну въ полудне возжигати, образомъ Діогена, явилъ быхъ ся. Доволенъ есть единъ свидѣтель Тертуліанъ въ надписанїи о вѣнцѣ воинствѣмъ, якоже всякъ узритъ, что о немъ еще отъ начала Церковь непщеваше. Аще же и Порфирій онъ христїаноборецъ и... врагъ креста святаго жестокий

глаголати обыклъ бѣше, яко не истинно отъ христіанъ демони прогонимы бывають, но токмо волхвованіе нѣкое; обаче убо Никифоръ, въ книзѣ 8, въ гл. 23, повѣдаетъ, яко обычай бѣ древле, еже пищу и питіе знаменати креста знаменемъ христовымъ, еже и нынѣ благоговѣйніи и благочестніи людіе творять прежде пищи пріятія. Паче же св. Златоустъ въ бесѣдѣ 54 на Матѳеа сія рещи не усумнѣся, яко вся намъ приличствующая симъ знаменемъ крестнымъ совершаются, ибо или аще отродитися намъ требѣ есть, или таинственною оною пищею питатися, или хиротонисатися, или что ино дѣйствовати, вездѣ присутствуетъ знамя побѣды. Что вѣщше? Вся церковная таинства сего силою совершаются).¹ Но на подвигъ да снидемъ, сичевые оставивше прилоги. Егда множество народа Израильска проси Ровоама, Соломонова сына, въ третьихъ книгахъ царствъ, въ гл. 13, дабы ихъ яремъ изволилъ облегчити,² услыша оное приточное отвѣщаніе: *юность моя толстѣйшии есть чресла отца моего...* Се уже явѣ малѣйшій перстъ пріемлется за малую и худую вещь. Убо аще примется малѣйшій перстъ за лице Духа Святаго, абіе истинствовалобыся оно, сирѣчь малѣйшее, о лицѣ Духа Святаго, послѣдовательно же со Аполинаристы, или съ Армены едино и тожде-бы мудрствовали глаголателно Никитовы способницы о Божествѣ Святаго Духа. Тоже весма глаголателно есть о богачѣ ономъ пировницѣ, просившемъ отца

¹ И въ рукописи все это мѣсто заключено въ красныя скобки.

² Было: ихъ бремя изволилъ умалити.

Авраама, еже послати Лазаря съ малѣйшимъ перстомъ въ водѣ омоченымъ. Малѣйшій убо перстъ знаменуетъ скудость, а не изобилваніе. Коимъ убо образомъ послѣдній и малѣйшій же перстъ возможетъ когда либо Духа Святаго знаменовати, иже сокровище именуется и есть всѣхъ духовныхъ благодатей? (Ибо якоже опрѣснокъ несовершенъ глаголется и непщуется... того ради, яко кваса не имѣетъ, вопреки же хлѣбъ квасный именуется цѣлый... тѣмъ же всячески обычаемъ)...¹ Совершенніи персты именователны суть первѣйшіи персты наши, разсмотрѣніемъ оною дву персту послѣднѣйшую. Но аще сіе не дозволитъ, иное приложу крѣпшее обличеніе. Глаголетъ Исаіа въ гл. 40: *кто измѣри всю землю юрстію?* а яко иніи содержатъ переводы: *кто повѣси тремѣ персты тяготу земли?* Никто воистинну возвѣщаетъ мѣрити послѣдними, но первыми персты, яко крѣпшими. Такожде и Тѣма Апостолъ, содержаый естествомъ соединеная не послѣдняя, но предняя два перста, имаже Христовъ испыта бокъ (послѣдую же народное мнѣніе держащимъ, того ради именована бывша Тѣму близнецемъ, яко перста имѣ соединена и случена). Но и Пилать, егда свѣтлѣйшее оно титло надписаше еврейски, гречески же и латински, трехъ первыхъ употребилъ есть перстовъ ко еже написати е, ихже употребляемъ обычно на писаніе. Чтемъ во Исходѣ, въ гл. 31, двѣ онѣ скрижалѣ каменѣ перстомъ Божіимъ написанѣ

¹ И эти слова обнесены скобками.

бывшѣ. Тожде имѣемъ во второмъ законѣ, въ гл. 9: и даде ми, Моусей глаголаше, Господь двѣ скрижалѣ каменнѣ, начертаннѣ перстомъ Божиимъ. Перстъ Божій по Теофилактѣ есть Духъ Святый, единосущный Отцу и Сыну, якоже и перстъ единосущенъ всей плоти. Тѣмже егда искидаше бѣсы Христось Господь, изгоняше я благодатию Св. Духа. И тако егда чародѣи глаголаша у Фараона, видяще чудеса сотвореная Моусеемъ: *се есть перстъ Божій*, чрезъ перстъ Божій Духа Святаго разумѣти подобаетъ. Послѣдовательно же средній, не малѣйшій, пріятеленъ есть, якоже назнаменова изъ новѣйшихъ Муссіи епископъ и Дамаска питомецъ въ своемъ греческомъ Сокровищѣ. Оставляю, яко знаемое, святаго Мелетіа дѣло,¹ иже истолкова таинство Пресвятыя Троицы первыми тремя персты, якожъ и Македоніа патріархи обычай, иже аще и спящъ, тремя себе персты сими назнаменовати обыклъ быше по навыку, егоже бдяще пристяжалъ быше частыми дѣйствы. Хощу бо явиться... яко Омиръ краткоглаголивъ, а не пространенъ, якоже Антимахъ пита мрачнѣйшій. Обаче убо вящихъ желаяй, неже сія доводы... разсмотрѣти можетъ наши труды, сотворенны на прорицаніа цареградская, такожде наблюденіа, яже въ похвалѣ св. Николая, идѣже пространнѣе... бесѣдовахомъ о сицевой вещи. Излишнее бо вознепщевахомъ таяжде паки и паки возновляти, дважды тойжде камень двигати, по обычной притчи.

¹ Было: книгу.

23. Отраженіе оныхъ словесъ: *Никонъ повелѣтъ благословити люди инымъ образомъ, различнымъ отъ древняго знамене благословенія.*

Раздѣли естество естествующее... Богъ тре-
блажайшій же и величайшій руцѣ наши на персты,
егоже еще вину отъ Стагириты философа во-
вопросилъ бы еси, познаеши то содѣяно быти
ради угоднаго орудій употребленія. Еще о томъ
же отъ Плинія взыщеша... услышиши то быти
содѣлано ради благодатей пространнѣйшаго об-
щенія. Того ради Титъ, Рима сладость, обыкль
бѣше возглашати: прїидите вси ко мнѣ и благода-
тей воды, аки отъ рѣки, черпайте. Оттуду оное
его краткореченіе: отщетиномъ нынѣ дне, о друзи,
никогого благодѣянія кому либо сотворше. На-
последокъ, еще вопросилъ бы еси Григорія Нис-
скаго, речетъ сицевое перстовъ раздѣленіе быти
нуждное ко изъявленію силы витїйства. Сей бо
въ человѣческомъ дѣйствѣ, въ главѣ 8, сице пи-
шетъ: тѣмже еще бы кто рекль, естеству глаголющу
руцѣ глаголанія ради даны быти, сей бы не погрѣ-
шилъ отъ правды, понеже бо еже писмены отъ насъ
изобразатися слово обыче рукъ дѣйствомъ. Тѣмъ
подвиженъ Демосѣинъ, между всѣми ветїими словес-
нѣйшій, вопрошенъ бывъ: елика нужна суть ко
еже слово имѣти?—три, отвѣща, —перво, еже быти
дѣйство, второе—дѣйство, третіе паки—дѣйство.
Имиже словесы ничесоже ино восхотѣ изъявити,
яко дѣйства въ витейскомъ глаголаніи присутство.
Мы паки дерзновенно исповѣдуемъ, яко того дѣля

раздѣли естество руки на персты, воеже бы пресвятѣйшему сему имени **Іс. Хс.** угодно изображену быти, якоже назнаменована св. Германъ, патріарха Цариграда, въ своей Стеоріи о литургіи, такожде и Николай Малаксій архипресвитеръ Навплійскій. Ибо наше сіе благословеніе содержитъ таинство; благословеніе же твое, о Никито, есть простое и никоея тайны изображаетъ. Уже бо отвержено есть, пачеже и обличено, яко Троицы таинство тремя оными послѣдними персты не можетъ ся знаменовати. Но время уже таинствъ гаданія разрѣшати. Обаче прежде зрѣти годствуется, яко въ Христѣ Господѣ три бяху достоинства, или благая, совершенная божественнѣ: царство, іерейство и пророчество. Іерейское же достоинство имѣ отъ Авраама, яко священника, иже трилѣтнюю юницу повелѣніемъ Господнимъ, въ Бытіяхъ въ гл. 15., пожерлъ быше; и того дѣля и Матѳеѣй Христово родословіе сотче отъ Авраама, яко характера и всего іудейска рода главы. Приноситъ бо священническій даръ, яко священникъ, Христосъ Господь Отцу своему и выну за ны дары предъявствуетъ, иже и самого себе принесетъ, воеже бы, совершеннѣйшую и живую за ны жертву пожерше, ветхаго завѣта жертву испразднити. Непщевабося презъ преимущество у Іудеевъ Мессія сѣмя Авраамле, по сотворенному обѣту, яко въ томъ Авраамли сѣмени вси роди благословитися имѣста, въ Бытіяхъ въ гл. 12; благословятъ же о имени Христовѣ, еже изображается различными перстовъ согбеніи. Назнаменователно къ тому есть, яко имя сіе пре-

святѣйшее Ісусъ есть Іудейское; обаче же святіи отцы ко греческой этимологіи не безгодно привлекоша. Ибо св. Епифаній свидѣтельствуєтъ... тожде быти еже... ¹ влекуще имене этимологию, якоже поминаєтъ святой Кириллъ Іерусалимскій въ Катихизисѣ 6. Такожъ и Кириллъ Александрійскій въ Глафірахъ, иже глаголетъ... Ісусъ аки спасаѣй. Аще бо Еврейски Ісусъ спаса знаменуєтъ, обаче преносителнѣ врача и печалника не безгодно толковати лѣтъ есть. Якоже и Назіанзинъ сіе имя Пасха, еже Еврейски знаменуется прешествіе, онъ преведе... отъ страданія производится. Ісусъ бо праведный бѣ и есть врачъ душъ и тѣлесъ. И якоже глаголаше Петръ Апостолъ въ Дѣяніихъ въ гл: 10: иже пройде благодѣтельствуя и исцѣляя вся насилуемныя отъ діавола. Обыкоша бо святіи отцы отъ этимологіи доводствовати. Тако Анаклитъ производитъ имя Кифы... отъ главы. Тако Оригенъ Адамантскій имя αἰου, святаго, глаголетъ тожде быти, еже внѣ земли. Тако Діонисій Ареопагита производитъ монаха... отъ единства, аще инымъ годѣ бысть яко монахъ наричется отъ μονος и ἄχος, сирѣчь единъ и печальный. Имя паки Христа Господа, по Великому Василию въ гл. 12, есть всея вѣры исповѣданіе... и знаменуєтъ Отца помазавша и, Сына помазана, Духа Святаго, иже есть самое помазаніе, по оному въ Пѣснѣхъ Пѣсней: *мѣро изліанно имя твое...*

¹ Здѣсь очевидно пропущены еврейское и греческое начертанія имени *Іисусъ*,

По истиннѣ у Тертуліана Христосъ не презъ І, но презъ ІІ пишашеся, и прорицашеся отъ древнихъ Римлянъ Chrestus. Есть же Гречески Χρῆστος аки благій, а не Χριστός помазанный, яко пророкъ, яко царь, яко іерей по чину Мелхиседекову. Сія сице истолковавше, приидемъ уже къ подвигу. Святый Евангелиста Лука въ послѣднѣй главѣ Евангелія своего сія слова изобрази: *изведе же ихъ (сирѣчь Апостолы) вонъ даже до Вифаніи, и воздвигъ руки свои, благослови ихъ.* Нынѣ молю: еда что знамене тогда изобразилъ есть, или ни? Рцы, о Никито! Извѣстно Болгарскій предстатель Теофилактъ воспоминалъ есть, яко намъ образъ Христосъ показа, да и мы, шедше, благословеніемъ нашихъ оградимъ. Но поистиннѣ Христосъ согбенными персты и протягненыма руками, образуяще пресвятое имя свое *Исусъ Христосъ*, Апостолы своя благословилъ есть. Коимъ паки домысломъ понуждаемъ есмь, еже сіе глаголати? Яснѣ изъявлю. Вопрошаетъ святый Епифаній: занеже отъ корене Давидова бѣ Христосъ, обаче на престолѣ Давидовѣ никакоже сѣдѣ, пачеже, якоже глаголетъ Іоанъ, въ гл. 6, егда придоша помазати его, онъ же сіе познавъ, гонзну, и таися во пустыни. Но и Гавріилъ между иными и сіе благовѣствова, яко Христосъ на престолѣ Давидовѣ взыдетъ. Сей гордійскій узелъ сице разрѣшаетъ святѣйшій архіерей, препирающе Назареи: чесо ради престолъ онъ глаголетъ Давидовъ и царское сѣдалище?—ничтоже ино есть, развѣ Церкви святыя священство, еже, царское купно же и архіерейское до-

стоинство во едино совокупльше, дарова ему Господь, и Давидовъ онъ престолъ никогдаже имущъ погибнути въ тожде привнесе. Тамо бо Давидовъ престолъ безпрестаннымъ наслѣдствомъ даже до Христа наслѣдствова; подъ пришествіе же Христа Господа преста отъ колѣна Іудова оное царей наслѣдство, иже даже до того времени народа вожди быша. Ибо Александръ, Александріи сынъ, единъ отъ христовъ, сирѣчь отъ помазанныхъ князей, христа діадиму возложи себѣ, бѣ же купно царь и іерей. Егда паки Иродъ иностранецъ, искоренивъ Давидово племя, пріялъ діадему, престолъ пренеслъ на себе, чловѣка весма иноземна. Оттолѣ убо достоинство царское въ церковь пренесено бѣше, и отъ обою достоинству, царскаго сирѣчь и іерейскаго, пространства слагается. И тако Христосъ сугубымъ обычаемъ царскій престолъ имѣетъ ¹, сирѣчь того дѣля, яко плоть иматъ отъ корене Давидова прозябъ, и яко есть царь Божествомъ, еже онъ же содержитъ яко вѣчный царь славы; іерейства паки достоинство того дѣля получи, яко и Аароновъ архіерей бѣше и всѣхъ архіереевъ правитель и начальникъ... Чесо ради Іаковъ, Господень братъ и Апостолъ, первѣйшій всѣхъ епископъ есть поставленъ во Іерусалимѣ, сирѣчь въ царствѣ Христовѣ, егоже царства не будетъ конца. И томужъ самому Іакову, по свидѣтельству Егезиппову, то чести дадеся, во еже бы ему на всякъ годъ въ святая святыхъ единожды входить, занеже бо

¹ Одно слово не разобрано.

Назорей бѣше, и того ради отъ мясъ и вина выну воздержашеся. Но и митру, или вѣнецъ... ношаше на главѣ сей нашъ архіерей первѣйшій, яко высочайшій архіерей. Еже протягаетъ до святаго Іоанна Евангелиста блаженный Поликарпъ у Евсевія, въ книзѣ 5, въ гл. 23, яко митру, или вѣнецъ ношаше. Иже наслѣдницы Іеросолимскаго нашего Іакова Апостола благословляютъ тѣмъ обычаемъ, имже мы благословляемъ, изображающе пресвятое имя Ісусъ презъ указательный и средній перстъ; презъ великій же, презъ перстенный и презъ ушесный образующе имя Христово, купно же достоинство царское Христово и іерейское Іусово, символически знаменуемъ. Твоимъ паки благословеніемъ, о Никито, ни царское достоинство, ниже іерейское изображается, ниже самое имя пресвятѣйшее изображается и сказывается. Убо мы, апостольскій чинъ содержаще, держимъ крѣпко, якоже и иная прочая церковная преданія. Тако Назіанзинскій богословъ, въ словѣ 19, о отцѣ своемъ Григоріи разглагольствуя, сія исповѣдуетъ: Еще недугуя во день пасхи, всѣхъ дней величайшій, въ дому дѣйствуетъ, краткимъ нѣкимъ обычаемъ совершая пречестную литургіи жертву. И совершилъ на послѣдокъ дивнымъ обычаемъ... сирѣчь Пресвятѣйшую Евхаристію силою Святаго Духа и благодатію дѣйствованою. Духомъ убо присутствуя народу, аще плотію и отсутствоваше немощи ради. Таже, наворачаетъ святѣйшій учитель, егда благодатственная словеса изглагола и благослови народъ... тако присутствовавшія, якоже

и отсутствовавшия. Аще благословилъ, извѣстно обычаемъ епископовъ восточныхъ благословилъ есть, егоже обычая и мы употребляемъ, ему наступнѣ послѣдующи. Сѣмо приличствуетъ оно глумленіе египетскаго священника на Аркады изреченное: О Солоне, Солоне вы грекове, аще здѣ обитателие именуется; обаче дѣти есте, занеже ничесоже отъ древняго ученія обрѣтается въ васъ. Новая суть, не древняя твоя благословенія, о Никито! Вѣру ими мнѣ, яко дондеже не доведеша сихъ отъ святыхъ писаній, никогдаже прилѣпимся тебѣ. Но воспоемъ купно съ царемъ Давидомъ: *стрѣлы младенецъ быша язвы ихъ*, въ псал: 63. Іосифъ, якоже имѣемъ въ Бытіяхъ, въ гл. 48, егда взялъ сыны своя, Ефрема на правую си руку, но Израилеви ошуюю, Манасію же противнымъ обычаемъ, на шуйцу свою, Израилеви же одесную, ради благословенія, тогда Израиль протягнувъ десную и возложи на главу Ефремову (сей бо быше юншій), шуйцу паки на главу Манасіеву, премѣнше руцѣ, о немже негодова Іосифъ, видя старѣйшаго ниже вчинена. Обаче убо знамя быше послѣдѣ положенія народа Іудейска во языцѣхъ. Глаголи убо, о Никито, различныя виды благословенія сонствовавый: кое отъ пяти оныхъ твоихъ благословеній сновидѣныхъ употребися отъ Израиля во благословеніи дву сыну Іосифову? И паки научи ны: какое быше оно благословеніе Ангелово, иже борбу творяше со Іаковомъ, вопіющимъ въ Бытіи, въ гл. 32: *не пущу тебе, аще не благословиши мене?* Ибо азъ никоего инаго бла-

гословеніа отъ старѣйшихъ моихъ научихся, развѣ
 одинаго благословеніа, еже о имени Ісусъ Христовѣ.
 Чесо ради егда благослови Господь Авраамови
 въ бытіяхъ въ гл. 22, по искушеніи о сынѣ его
 Исаацѣ, Христовѣ антитипѣ, пожретися имѣвшемъ,
ублагодарю тя, глаголаше, и умножу сѣмя твое.
 Умноженно воистинну бѣ сѣмя Авраамле во вся
 роды бывшія сынми приобщенными Ісусъ Хри-
 стомъ... Яко бо вѣрова Авраамъ, сице и сіи вѣрою
 во всыновленіе придоша... якоже умно назнаме-
 нова Теофилактъ. Но вскую много упражняюся
 сими прилогами? Мелхиседекъ, егда узрѣ Авраама
 патріарха, отъ пораженія царей приходяща, благо-
 словенми пріятъ и, и по правдѣ, вѣрѣ и благоче-
 стіи, якоже имяше, благословилъ есть: благослови
 же во имя будущаго Мессіи, неинако, якоже Іоанъ
 Предтеча, крестивый во будущаго Мессію... при-
 ходящія къ покаянію омываше, якоже имѣемъ
 въ Дѣяніяхъ Апостольскихъ, въ гл. 19: *Іоанъ, рече,*
крести крещеніемъ покаянія, людемъ глаголя: во ірѣ-
дущаго по немъ да вѣруютъ, сирѣча во Ісусъ Хри-
 ста. И поистиннѣ Аврааму патріарсѣ благослови,
 яко болши его бывъ, пачеже отъ него десятину
 взялъ. Тако бо подобаше быти, да Авраамъ не
 обрѣзанному священнику... (три бо священницы
 быша въ необрѣзаніи: Авель, Ное и Мелхиседекъ)
 священная дѣйствовавшу, хлѣбъ и вино прино-
 сившу, даръ десятинный дастъ, занеже бо будущее
 бѣ иногда во ежебы обрѣзанія свойственному
 священству, начало отъ него ведущему, никако
 со священствомъ Церкви препиратися, или равня-

тися возмоци, похвалнѣе величаяся о левитскомъ священствѣ. Ложь буду, аще именованіе Ісусъ того не утверждаетъ. Что бо ино *iota*, 'первое писмя имене Ісусъ, знаменуєтъ, развѣ число десятое? Десятину же взялъ отъ Авраама Мелхиседекъ за Ісусъ Христа, емуже должны суть платитися десятины и первоплодіа. Того ради Павелъ, языкъ учитель, ко Евреомъ глаголетъ, въ гл. 7... одесятствоваша наслѣдницы Левіевы, еще въ чреслахъ отчихъ суще, имѣющіи же повелѣніе одесятствовать люди, якоже разсуждалъ есть святой Кириллъ, Александрійскій патріарха. Но приидимъ уже и въ Сивиллійскія книги. Константинъ, между святѣйшими цари пресвѣтлѣйшее солнце, челъ есть нѣкое сивиллійское Акростихида предъ отцы собора Никейскаго, якоже видѣти лѣтъ есть у Евсевія въ гл. 19. Акростихисъ же есть нѣкій извѣстный родъ стиховъ, начальными писмяны, между собою сплетенными, слово нѣкое изображая. Сивиллина убо Акростихисъ вкратцѣ сія тайная словеса изображаетъ: *ιχθυς*,¹ яже пространнѣ сіе изъясляютъ. *Ісусъ Христосъ Божій Сынъ спасъ, Крестъ...* яже Акростихисъ отъ Кикерона латински уже была истолкована, аки нѣкое изрядное дѣло. Пачеже Августинъ въ книзѣ о градѣ Божіи, въ гл. 23, исповѣдуетъ сію самую изъ греческихъ книгъ показану быти отъ Флаціана мѣстосовѣтника, яко вещь нѣкую предивную. И до сея мню акростихиды Германъ патріарха Цареградскій приглаголствова,

¹ Въ текстѣ рукописи были поставлены точки; а сбоку написано это слово *ιχθυς*.

иже разсуждая и умомъ си обращаѣя благословеніе, отъ архіерея даемое по чтеніи Евангеліа, сія исповѣда: Благословляетъ архіерей окрестъ стоящу народу... знаменаетъ же сицевое перстовъ изображеніе число перваго пришествія Христа Господа... Прииде же Христосъ Господь въ пятьтысящномъ пятьсотномъ и осмомъ лѣтѣ ¹ отъ созданія міра. Послѣдствующее число, благословеніемъ назнаменованное, знаменуетъ второе Христово пришествіе, яко судіи. Паки имя Ἰησοῦς ² содержитъ шесть писмянъ въ себѣ, яже писмена знаменуютъ, или шесть міра вѣковъ, по тысящницѣхъ, выну сице вопіющихъ: шесть тысящъ міръ. Такоже и оно Орѣеово отъ Платона помянутое... или презъ разсужденіе шесть алфѣ содержимыхъ въ Бытіяхъ, сирѣчь въ краткомъ оглавленіи... всѣхъ вещей Господа. Алфа паки тысящу знаменуетъ: тысяща бо лѣтъ у Господа яко день вчерашній, иже мимоиде. Но рцемъ паче, яко шести писмяны изображаются оныи шесть первіи Ісусъ Христа родителіе. Ибо Адамъ, иже по глаголу Ерифтрійскія Сивиллы знаменуетъ четыре міра части (ибо презъ первое α знаменуетъ... Востокъ, презъ δ... Западъ

¹ Было: *іоду*.

² Любопытно, что Полоцкій, не смотря на столь ясное начертаніе имени Спасителя Ἰησοῦς, переводя латинское *jesus*, постоянно писалъ: Ісусъ. Точно также и въ черновомъ «Жезлѣ Правленія», писанномъ польскими же буквами, онъ писалъ имя Спасителя чрезъ одну іоту. Только въ 10-мъ возобличеніи на Лазаря, гдѣ именно идетъ рѣчь о начертаніи имени Спасителя, онъ написалъ Іисусъ, но не попольски а славянскими буквами, доказывая, что именно такъ слѣдуетъ писать. Въ печатномъ же изданіи «Жезла» вездѣ имя Спасителя напечатано *Іисусъ*, и даже сокращенно *їйс*.

презъ второе а... Сѣверъ презъ ѡ... Югъ), первый пожре тѣлца Богу и принесе въ Дусѣ десятину и первенцы плодовъ. Вторый Сифъ, писмена еврейская изобрѣтый, и два столпа велія создавый себѣ, еюже единъ плинфтянъ бѣше, другій мраморный, воежебы, аще бы имѣло быти сожженіе, или потопъ, не растлится, глаголетъ Іосифъ въ книзѣ первой древности. Третій Еносъ, въ егоже время начатъ идолослуженіе и лестное боговъ живыхъ почитаніе: сей единъ въ родѣ своемъ праведную и прадѣдную вѣру содержаше, благочестіе просвѣтилъ есть, и егда прочіи труды пролагаху въ назданіе градовъ, онъ единъ въ своихъ наступницѣхъ все свое положи попеченіе въ расширеніи чести Господни, ко высочайшей и будущей жизни поощренъ сый. Четвертый Каинанъ, иже отъ Луки въ святомъ родословіи положиися, послѣдовавшаго сказанію седмидесятъ и дву сказателей, а не Еврейскому писанію, еже бѣ не цѣло... Того ради и Епифаній, глаголюще противъ Мелхиседекитовъ, остави Каинана, занеже бо ему дѣло бѣше съ Самаряны, развѣ книгъ Еврейскихъ не блажившими. Той Каинанъ роди Малалаила, якоже пишетъ Моисей въ Бытіи, въ гл. 5, иже Малалаиль роди Іареда, родившаго Еноса,¹ иже пренесеса во еже бы не видѣти ему смерти, и напослѣдокъ Іліи иматъ содружитися, да будета два изрядная свидѣтеля на обличеніе Антихриста: аще и третій прилагается нѣкими Іоанъ Евангелиста,

¹ Такъ написано вмѣсто: *Еноха*.

яко Евангелскаго закона проповѣдникъ, якоже Илія будетъ закона писанаго проповѣдатель, Еносъ ¹ же свидѣтель самаго естества. Во свидѣтельство же приводятъ оно въ Апокалипси, въ гл. 10: подобаетъ ти паки пророчествовати въ людехъ, и во языцѣхъ и во царехъ многихъ. Прочая, яже глаголются о имени Ісусовѣ, мимоиду молчаніемъ. Онаго токмо не умолчу Марина Хіискаго разсужденія. Сей бо свидѣлствуетъ имя Ісусъ быти прекраткое заключеніе всея Богословіи, и тако доводствуетъ: *iota* ι, еже есть просто и чисто, знаменуетъ божество, или душу Христову, *Ита* η—плоть отъ четырехъ стихій сложенную., *ооо*—Пресвятѣйшую Троицу,—*σ* бо Отца знаменуетъ, *ο*—Слово рожденное отъ Отца, *υ* Духа Святаго исходяща. Таже послѣднее *σ*—самое слово, воплощенное и рожденное изъ Маріи Приснодѣвы въ послѣдняя времена. ²

Видиши елика таинства содержатся въ нашемъ Греческомъ благословеніи, о Никито? Не хочу же въ прочая входить таинства, сирѣчь яко Христосъ единосущенъ Отцу, и намъ по человѣчеству есть истинно гомоусіосъ ³ единосущенъ, сирѣчь отъ нашего существа, глаголетъ бо Апостолъ, яко сѣмя Авраамле пріемлетъ. Глаголяй паки гоміусіонъ, сирѣчь подобноестественна, не глаголетъ истинна

¹ Должно быть: Енохъ.

² Послѣ столь яснаго доказательства, что правильное начертаніе имени Спасителя есть *Ісусъ*, казалось бы не слѣдовало Полоцкому писать *Ісусъ*. Этимъ свидѣтельствомъ, и свидѣтельствомъ Сивиллы. Полоцкій воспользовался потомъ для 10-го Возобличенія на Лазаря.

³ Было написано прежде: *человѣкосущенъ*.

человѣка, но подобіе сына человѣческа. Но Апостолъ, тайнъ Спасовыхъ сказатель, не подобіа насъ научилъ есть; глаголетъ бо: *человѣкъ Христосъ Богъ*. Въ первомъ посланіи къ Тимоѳею въ гл. 2, единъ Господь Ісусъ Христосъ, имже вся; еще онъ писаше: *Ісусъ Христосъ вчера и днесь, тойже и во вѣки*.

Воистинну Аполлинаріи есть извѣстно... а не мы... Христу поклоняющіися, Богу, человѣчество пріемшему. Павелъ бо, пишуще къ Евреомъ, въ гл. 1 глаголетъ... сирѣчь Христу перворожденну... во плоти явится хотящу. Тѣмже во плоти, а не кромѣ плоти Христу поклоняться должно есть. Того дѣля Назіанзинъ, въ словѣ 42, поклоняйся, глаголетъ, тебе ради повѣшеному, и самъ же ты умозрительнѣ вися, яко разбойникъ укрестованъ, искушай умомъ, познай Бога... Есть убо Богъ весь съ плотію си, и весь человѣкъ съ Божествомъ презъ нераздѣлимую ипостась. Сіе реченіе все естество изъявляетъ, весь паки ипостась явствуетъ, не инако, якоже и сіе реченіе ино естество показываетъ, инъ же ипостась, паче же всего человѣка пріять, сирѣчь плоть и душу, умомъ и разумомъ и словесемъ украшенную, и всему весь соединися, да всему человѣку спасеніе даруетъ. Инако бо часть тая человѣка, яже бы не была имъ пріята, не уврачуема пребыла бы. Еже явѣ обличаетъ Аполлинаріа, человѣчество Христово души чуждо быти буесловивша. Чесо ради святой Кирилъ сія подлагаетъ, изъявляюще оное святаго Іоанна Евангелисты: *никтоже взыде на небо, развѣ сошедый*

съ небесе, сынъ человѣческій: яко бо есть отъ Бога Отца Слово, такожде отъ жены человѣкъ; единъ же есть Христосъ изъ обою, въ сыновствѣ не раздѣлимъ есть. Аще же нѣкимъ сіе невозможно быти нещуется, еже во единой и тойжде вѣпостаси плоти убо страдати, Богу же Слову безстрастну пребывати: человѣческимъ нѣкимъ образомъ сіе можно быти потщуся показати. Царская багряница¹ волна нѣкогда бѣше, сей желвѣя кровь примѣсися, и багряный шаръ даде ей. Егда убо, во еже бы нитемъ быти, прядеся, кто отъ нею страда крутънїе: ² волна ли? или шаръ? Тѣмже лѣтъ есть сіе глаголати: волнѣ человѣка равняти, багряному же шару Бога Слова подобити, иже плоти воспрїятой во страстѣхъ и на крестѣ соединенъ бѣше, обаче никоимъ же обычаемъ страстемъ подчиняшеся. Еще вопрошается: како три лица собою всѣми, кромѣ слитїа, соединены и едины суть? Образъ же сицевой подается отъ Ареопагиты въ гл. 2 о божественныхъ именахъ. Сравняетъ бо свѣщи горящія, или лампы возжженныя свѣтъ, во едино совокупльше, презъ себе бышествующыя, со свойствы вѣпостасными, собою ипостаствующими, во свѣтѣ пресущественномъ ³ Троицы раздѣльно соединенными и соединеннѣ раздѣленными. Ибо аще въ храминѣ, трема свѣтилы освѣщенной, будещи ходити, три сѣни происходятъ; ктому аще велию дску свѣтилникомъ онымъ положиши во

¹ — порфира.

² — вращеніе.

³ Было: *вышестественномъ*.

прямо, въ еяже срединѣ будетъ дѣла, свѣтильники три презъ ту скважню три свѣтлости вопреки пропускаютъ. Отнюдуже домышляемся, яко исходящія лучи на воздусѣ купно взаимъ не сливаются, но еще суть и соединены мѣстомъ, обаче мни быти раздѣлены и свое свойство хранить между собою раздѣлено. Еще же лучи, глаголетъ Св. Діонисій, за безплотное свойство, обаче на плоти бышествоующыя, дарованіе сіе пристяжаютъ, яко и соединены взаимъ, и купно раздѣлены между собою чудно быти могутъ: много паче то имѣютъ, яже паче отъ плотей суть отлучена, паче же всѣхъ Троичества пребожественнаго вѣпостаси, еяже убо тако единости, якоже и раздѣленія общеніемъ нѣкимъ каждо едина на послѣдокъ по своемъ свойствѣ степенно единство и раздѣльность относитъ. То паки, еже послѣдствуетъ въ Діонисіи, еще кто когда лампаду изнесетъ изъ дому, купно изыдетъ вся свойственная свѣтлость, ничесоже прочіихъ свѣтлостей съ собою купно влекуще, ниже что своя имъ оставляя, къ таинству воплощенія отнесе Пахимерій, толкуя купно оно въ Іоанна въ гл. 16: *Азъ изыдохъ отъ Отца*. Сынъ бо бысть человѣкъ, иже бѣ свѣтильникъ нѣкій челоуѣчества, возженный свѣтомъ Божества. Не влече съ собою Отца, ниже Духа Св., ниже что свойственно Божества има остави, пачеже тожде все Божество въ нихъ сущее принесе, пребывая въ нихъ. Къ тому же воплощенія таинству отнесе сей же образъ Леонтій монахъ, искуснѣйшій творецъ, въ книзѣ, юже написа противъ Несторію и

Евтихію, идѣже учитъ тако существа мощи соединитися, смѣшеніа кромѣ, яко же здѣ развѣ смѣшеніа соединяются сіяніа звѣздъ, цѣлу сущу свойству количества въ качествѣ.

Но речеть Никита: чесо ради сія?... О благословеніи тебѣ бесѣдователно есть, а не о Христовѣ единствѣ. Но въ памяти держати подобаетъ ти, лживѣйшему мужеву, яко оклеветалъ еси насъ между иными, аки два Христа проповѣдающихъ, юже стрѣлу воспящаю на тя, обраща сичевымъ обычаемъ: Кто отъ насъ два Христа глаголетъ?—ты ли, первая два перста возношай, просто горѣ держаще? или азъ, тажъ, благословяще, съ таинствомъ согибаяй? Тако ветій онъ, егда десную си воздвиже горѣ, глагола... О земля! Тужде потомъ ниспусти, внегда глаголати... О Боже! Услыша абіе, яко злѣ бесѣдуетъ рукою. Тако и ты злѣ бесѣдуеши рукою, благословяще, не послѣдуя стопамъ отецъ, чину отъ древнихъ воспоминаенному и произведеному отъ *ἔδοις*, долгимъ нѣкимъ обычаемъ, иже законъ не писаный именуется и есть, по глаголу Назіанзина, отъ преданій Апостольскихъ долговременнымъ наслѣдствомъ устроеный, отъ различныхъ иконъ и образовъ изображенный и народствованный, къ намъ наслѣдникомъ различными образы и таинства принесенъ. Еда тя всѣхъ мудрѣйша непщуети быти? и тя единаго тайная Христова познавша сонствуеши? Будетъ тебѣ воистинну, о Никито, горе, и паче горе и злая погибель паче злыя вѣсти, якоже писаніе повѣствуетъ. Пачеже, по глаголу Спасову, золь сый, не можеша

благихъ глаголати, ниже поработити ума твоего на служеніе Христово хочещи, по словеси Апостольскому, въ первомъ посланіи ко Коринѣомъ въ гл. 10. Того ради вложить подобаетъ въ скверная уста твоя броды... якоже глаголетъ св. Епифаній, да не ктому глаголеши словесъ неистовыхъ и лжи полныхъ. Лгати бо, глаголетъ св. Кирилъ, есть мерзко... и единыя истинны едина и сама есть другини правда... Помолимъ убо... Бога Слова, да никогда погрѣшимъ отъ предложенія правды, но за ню и кровь нашу пролити готови будемъ.

*Отраженіе оныхъ словесъ: яко Латинскій кръжъ Никонъ повелъ знаменовати на просфоръ, или на приношеніи Агнца.*¹

Вопросъ древле быше во Аѳинѣхъ, сирѣчь въ самомъ Греческія земли пупѣ, что бы было купно мало и величайшее? Разніи разная отвѣщаху. Первый убо повѣда быти оно, еже аще и малѣйшее количествомъ есть, обаче вся видитъ. Другій повѣдаше быти самое сердце, яко то, еже малѣйшее есть въ количествѣ си, обаче пространствомъ на вся распространяется, сиче даже Александеръ онъ Макидонскій, услышавъ отъ Демокрита философа, еще вяще обрѣтатися міровъ, возопити, глаголется: увы, мнѣ окаянному, иже и единого міра подчинити ми не могу! Третій языкъ исповѣда быти. Сей малѣйшій и величайшій есть за пребогатую его

¹ Были сначала написаны подлинныя слова челобитной: «Отраженіе на оныя словеса: *Да по егужъ Никонову велѣнію въ Служебникахъ на агнецъ Божіи вмѣсто креста Господня, напечатанъ латинскій кръжъ.*

силу, яже временемъ великая мала быти являетъ, и вопреки малая велика творить и показываетъ. Четвертый, напоследокъ, рече быти самага чловѣка, звѣря словеснаго, иже хотя микрокосмось, малый міръ, именуется, обаче велій міръ есть нарицателенъ, занеже его ради вся создася вселенная. Паки святыи Варѣоломей Апостолъ богословію рече быти пребогатую и пространную, поелику сирѣчь отъ твари, или отъ изводствъ, или, якоже глаголютъ философы, отъ послѣдншаго къ познанію Создателя и вины первыя приходится; тужде паки богословію быти кратчайшую, поелику Богъ есть не показателенъ отъ предншаго, и всякія вины лишенный, чесо дѣля Аристотель умирающе возопи: вина винъ помилуй мя! Той же Апостолъ, якоже видѣти есть у Ареопагиты въ книзѣ о именахъ Божественныхъ, Евангеліе повѣствова быти пространное, сирѣчь разумомъ и совершенствомъ; паки же краткое и умаленное, яко содержитъ кратчайшую вѣры и любви заповѣдь, яже во мѣсто всѣхъ неудобныхъ закона вѣчнаго чиновъ наста, якоже Екуменій толкуетъ. Чесо ради Апостолъ Павелъ въ гл. 9 именуетъ Слово сокращенно... сирѣчь Слово воплощенно, даже до естества чловѣческаго сокращенно и испразднено, еже спасе останки Израиля. Обаче же дерзаю глаголати сіе... написаніе пресвятаго креста, еже изображаемъ печатію на просѣирѣ ІС Х, быти купно малѣйшее и величайшее. Малѣйшее, по реченіамъ,¹ величайшее по

¹ Было: по словесемъ.

разуму **ЇѢ. ХѢ. НІ. КЯ.**, еже обаче Никита яко Латинское обличаетъ. Ибо Латины обыкоша на своихъ опрѣсноцѣхъ Христа укрестована изображати и писати въ образѣ кругломъ. Мы же, грекове, просфиру съ написаніи уже предреченными и въ образѣ четверограновитомъ самымъ крестомъ знаменуемъ, яже печати не въ Римѣ, но въ святой горѣ изваятися и рѣзатися отъ иноковъ тамо живущихъ обыкоша, вмѣсто рукодѣліа имъ своего... и оттуду во вся страны Греческія благоговѣинства ради раздаются. Отъ того бо времени, егда правовѣрнѣйшій Царь надъ мучителями побѣду одержа, три кресты воздвиже въ царствующемъ си градѣ, Цариградѣ. по свидѣтельству Никифорову въ книзѣ 8 въ гл. 32, ихже первый имѣ написаніе **ЇѢ.** второй **ХѢ.** третій **НІ. КЯ.** Оттуду убо новаго Рима жителіе начаша крестъ тѣмъжде реченніи начертавати **ЇѢ ХѢ** и во сицевыя побѣды память назнаменовати и на своихъ приношеніихъ **НІ. КЯ.**... Сію печать святой крестъ именоваша. Истинно Платонъ, реченный Аттичскій Моисей тоя ради вины, яко догматы, иже не искуснымъ обычаемъ писанія написаны быша отъ пророкъ, своимъ онъ словеснѣйшимъ языкомъ на Греческій языкъ преложи прекрасно,—сей, глаголю, философъ исповѣда въ своемъ Тимеѣ, яко слово само себе распростре ¹ подобіемъ письмене **Х...** сирѣчь, якоже истолкова Іустинъ мученикъ и философъ, укрестовася. Но письма **Х** нѣсть четверограновитое совершеннѣ, занеже видъ имать

¹ Было: *укрестова*.

письмене ово греческаго, ово латинскаго *Х крестообразнаю*, обаче за крестъ *крестообразное* сіе письма нещевася. Убо отъ меншаго до вящаго, занеже латинскій крестъ четвероконечный, есть якоже и греческій четверограновитъ, за истинный креста образъ держателенъ есть всѣми, иже на чѣтыри углы раздѣляется. Креста бо часть высшая верхомъ своимъ обращается въ небо, низшая къ кентру зритъ, оба бока прочая вся объемлетъ. Того ради и изъ четырехъ древъ составленъ бѣ крестъ Христовъ, изъ певга, изъ кедра и кипариса; титло же изъ маслична бѣ древа. Егда убо вознесенъ быше Христосъ Господь на крестъ, взыде яко новый Давидъ на свое сѣдалище, яко новый Соломонъ на престолъ свой, яко Ездра на высочайшую амвону. О, знамя превышающее всякая знамена, будущая и прошедшая, о немже прорече Исаіа въ гл. 5, *воздвинетъ Господь знаменіе странамъ далнымъ, и совоздвижетъ я отъ конецъ земли*. Сіе есть знаменіе всякія благодати, о немже въ псал. 85: *сотвори со мною знаменіе во благо*; такожде и въ псалмѣ 4: *знаменася на насъ свѣтъ лица твоего, Господи*. Сіе напоследокъ знаменіе есть мира съ Богомъ, будетъ бо знаменіе завѣта между мною и тобою, глаголаше Господь въ Бытіи, въ гл. 9. Лукіанъ онъ, бѣжелецъ и отступникъ, на судѣ о седми гласныхъ, приводитъ письма *тау* оклеветаемое отъ писмани сигма о разбои: Напоследокъ износится судъ на *тау*, да укрествуется, занеже глаголють образъ самаго креста знаменуетъ, и того ради да страждетъ свойственнаго характера висѣльнику. А яко

таѡ крестъ знаменуєтъ, имамы у Іезекііля пророка въ гл. 9: *на встѣхъ, на нихже есть знаменіе, не прикасайтесь*; а яко во иныхъ Вивліяхъ обрѣтається: всякаго же, на немже узрите таѡ, да не убіете. Но т, о Никито, нѣсть совершенный крестъ, не имать бо высшія части; обаче же выну т во креста мѣсто имѣся. Паче же Константинъ правовѣрнѣйшій царь преизрядное оное знаменіе, еже отъ римлянъ Лаварумъ именовася, во символъ пресвятаго креста пренеслъ есть благочестнѣйши. Чесо ради Прудентій, о немъ глаголюще противъ Симмаху, сице пояше:

Христосъ изобразися бисерми со златомъ
 На багряномъ Лаварѣ, на щитѣ богатомъ
 Христосъ знаменашеся. Верхъ же украсися
 Крестомъ огнеобразнымъ, иже нань взложися.

Се Христосъ знаменася на багряномъ Лаварѣ. Что дивно, аще на приношеніихъ вообразился? Но речеши: латины сице образуютъ на своихъ опрѣсноцѣхъ? Моглъ бы отвѣтовати Никонъ: Еда убо еже либо творятъ латины отринуті подобаетъ? Они молятъ Бога, поютъ вечерняя и утреня пѣнія, постятъ во бдѣніихъ, назидають нищепиталища и сиропиталища, инокини питають, аки новыя весталы. Убо мы, оссы, вся ли сія отринемъ за ненависть, яже къ нимъ, и омраченіе? Никако. Ниже бо того ради, яко Іудеи чтутъ ветхій завѣтъ, мы его чести отвращаемся? Или занеже туркове милостыню творятъ нищимъ, мы ли того ради будемъ кромѣ всякаго милосердіа на нищыя?

Есть разсмотрѣніе во вещехъ. И ино есть догма, по глаголу св. Василія, иноже чинъ. Но сія глаголана да будутъ аки мимошественнѣ. Обаче же да лѣтъ ми будетъ возопити здѣ: О, воистинну не благодарна ума къ Никонови, многая безмѣрная отъ средѣ истребившему! И да прочая умолчу, осмнадцать просфиръ на жертовницѣ кто когда научилъ есть? Не равное ли се было безмѣстнупотребленіе? Сихъ ли ради блаженныхъ ¹ преданій самага Никона ненавидите? Но и Христа Іудеи ненавидѣша сицевыхъ ради обличеній. *Горе вамъ, вопіаше у Матѳея, въ гл. 23, яко одесятствуете мятву, аниѳъ ² и куминъ, и остависте вящшая закона. Возди слѣпії, оцѣжающіи комафа, велблуда же пожирающіи.* Но придемъ къ брату Великаго Василія, Григорію Нисскому, да научить ны креста таинства. Сей воистинну, словопреніе творяще на Евноміа въ словѣ 3, святаго Павла привводитъ сицевая о крестѣ гадателнѣ бесѣдующа, въ посланіи къ Ефесеомъ въ гл. 3: *да можете разумѣти со всѣми святыми, что широта, и долота, и глубина, и высота.* Идѣже св. Григорій Нисскій на образъ креста преноситъ, часть верхнюю высоту именуя, глубину же—яже нижае поперчнаго полагается, поперчнее паки презъ оба конца широты, или долготы именовъ знаменающе, тако, даже симъ велицѣй изъяслятися тайнѣ, яко небесная, подземная и вся тѣхъ, яже суть послѣдняя, содержатся и укрощаются Тѣмъ, Иже сію

¹ Было: растлѣнныхъ.

² ἀνίθου.

велию и неизреченную силу въ семъ креста образѣ показалъ есть. Тожде доводство пространнѣе разширяетъ въ Христовѣ воскресеніи. Образъ, глаголетъ Нисскій, пресвятаго креста и великій Давидъ, о себѣ глаголя, изобразилъ есть въ псал. 138. *Камо пойду, глаголетъ, отъ Духа Твоего, и отъ лица Твоего камо бѣжу? Аще възыду на небо (сія есть высота) ты тамо еси. Аще сниду во Адъ, (се есть глубина) тамо еси. Аще возму криль мои рано, сирѣчь на востоцѣ солнца (се есть широта) и вселюся во послѣднихъ моря, сиче же западъ именуетъ (се есть долгота).* Видиши, како образъ креста описуетъ? Того дѣля тойжде великій Апостоль, въ гл. 2 къ Филипписсеомъ пишуще, еже имать быти, глаголетъ, яко тому, иже превыше всѣхъ вознесенъ есть о имени Ісусъ Христовѣ, *всяко колѣно поклонится небесныхъ и земныхъ и преисподнихъ:* имиже словесы презъ образъ креста раздѣляетъ Христово поклоненіе. Тожде и моимъ разумомъ знаменуетъ *ι, Іота*, оное у Матѳея въ гл. 5, аще *ς*, поперечною чертою на подобіе поперечницы стемене вѣтрилна слученое, возумствуется, еже и небесе постояннѣе и земли твердѣе, и всѣхъ вещей устроенія извѣстнѣе есть. Но о образѣ креста доселѣ. Нынѣ къ сфрагидѣ, сирѣчь къ печати приидимъ.

Наблюдохомъ выше сіе имя *Сфрагисъ* быти имя равногласное. Изряднѣе еже три имѣетъ знаменованія: первое крещенія, второе благословенія, третіе знамене креста святаго. Того ради св. Епифаній, обрѣзаніе крещенія образъ глаголюще, о Авраамѣ

повѣда его... повелѣніемъ Божіимъ знамя плоти
своей окрестъ сотворивша, того ради... Назіанзинъ
именуетъ ны крещенныя, не знаменованныя. Знаме-
новани бо суть, яко же явѣсть изъ Апокалипси,
іудеи вѣровавшии во Христа и крестившіися во
имя Его, якоже истолкова Ареѳа Кесарійскій
Архієпископъ. Паки Епифаній философъ моли
святаго Епифанія да дастъ ему еже есть во Хри-
стѣ знаменованіе... соизволи и крести его святой
Иларіонъ. Тѣмже обычаемъ глаголетъ въ ереси
на Назаряны, идѣже бесѣдующе о Іудейскомъ пат-
ріарсѣ, Иллилъ именемъ, иже близь смерти бывъ
восхотѣ креститися, моляще епископа Триверскаго
да крестить его: молю тя, глаголаше, да ми Хри-
стово знаменіе дарствуеши... Такожъ въ житіи
святаго Епифанія подобная нѣкая чтутся, идѣже
повѣствуется отъ Епифанія крещенныя быти Царя
Θеодосіа сыны, сирѣчь Аркадіа и Оноріа. Знаме-
нуетъ же и благословеніе, яко же видѣти есть въ
житіи святаго Епифанія, иже благослови вся ше-
ствовавшия съ собою ко лву, исходящу изъ пу-
стыни на пагубу мѣстъ прилежащихъ. Тойжде
егда назнаменава Карина діакона жену, абіе ис-
цѣлѣ. Еще же возлагающе руку на Іоанна Епис-
копа Іерусалимскаго десное око отверзе, паче же
и Θеодосіа Царя, приблизившася и прикоснувшася
ногама си, трижды его назнаменовавъ... исцѣлилъ
есть. На послѣдокъ *Ссфранисъ* знаменуетъ знаменіе
креста святаго. Тако Епифаній Персидскаго Царя
дщерь, не у бывъ іерей, трижды назнаменава... и
рече духови мучившему ю: бѣжи въ непроходная

мѣста, и абіе отступи отъ нея. Еще же и сарацины услышавше о Епифаніи, изъ Персиды приходящемъ, приступиша къ нему во еже благословитися знаменемъ крестнымъ. Поистиннѣ просфора потому именуется *сфраисъ*, яко имать знамя крестное. Молчи убо, о Никито, и да не прилежиши ктому противъ сицевому знамени *сфраидосъ* хухнати.¹ Ниже молчаніемъ прейти годствуетъ реченіе просфора, яже и приношеніе² именуется, яко на хотящее быти посвященіе нарекованная. Но первіе усмотрятелно есть, еже просфору зрѣти распространяться ово до даровъ токмо принесенныхъ, ово же къ даромъ посвященнымъ. Образы то явственнѣо будетъ. Осмый канонъ Апостолскій сицевая повелѣваетъ: Аще кто епископъ, пресвитеръ, или діаконъ, или инъ отъ причетникъ по совершеніи жертвы не причастится,... вину да повѣсть. Тако Евсевій въ книзѣ 6 своєї исторіи, въ гл. 35... егда сотвори жертвы³ и комуждо единому часть таинства раздѣляше и прочая, подражаніемъ Христови, иже, по свидѣтельству Златоустаго, причастися отъ своєї плоти же и крови, таже раздаваше прочімъ причастіе святыхъ... Суть же нѣціи мнящіи, яко и Іуда испи отъ крове Христовы, частицу же злобнѣ утаилъ есть. Того ради Θεодоръ Антидорскій епископъ назнаменаше, яко Христосъ явственнѣ и знаменателнѣ воспоминавъ глаголаше о чаши: *пійте отъ нея вси*, ибо и Іуда,

¹ Было: *роптати*.

² — *жертва*.

³ — *приношенія*.

аки понужденъ, испи отъ крове Христовы, егоже не глаголаше, частицу своея плоти раздавая, но просто рече: *пріимите и ядите*, не изображая онаго *вси*, того ради, яко Іуда сохрани частицу, яко да іудеемъ на поруганіе ю покажетъ. Тѣмже глаголется въ тропарѣ, чтомомъ во время причастіа мірянъ:... не повѣмъ бо врагомъ твоимъ тайны твоея, яко Іуда. Да видятъ убо отселѣ лютрокалвинистове, кого имѣють своего сонмища начальника, купно же и рачителя: Іуду предателя, ругавшася пресущественію. Паки частицы хлѣба посвященнаго *maribis* изряднымъ именемъ именуются, пріемше реченіе отъ онаго. Евангелскаго мѣста: *Маріа же благу часть избра...* Чесо ради въ молитвахъ, прежде причастіа чтомыхъ, просити обыкохомъ, со святымъ Василиемъ, во еже бы безъ порока пріяти сподобитися намъ... посвященую частицу, юже святой Златоустый златымъ по истинѣ реченіемъ именовати обыче *бисеръ и уголь горящъ*. Угль бо есть, недостойныя опалая... Есть же еще зрѣти онъ хлѣбъ, просфиру, на жертовницѣ предъявляти, во еже бы изъ нея Христову тѣлу презъ посвященіе быти. Оттуду *ἁσὺμβολος* именовася кромѣ приношенія своего причащавыйся, хлѣба своего и вина не приносивый. Того ради святой Кипріанъ обличаше тыя жены, паче же богатые, яже *въ недѣлю* безъ жертвы прихождаху, кромѣ своего приношенія; не во вся бо соборы мѣсто имяше общеніе и совершеніе божественныхъ таинъ, якоже ясно есть изъ Сократа писателя церковнаго, иже свидѣлствуетъ въ среду и въ пятокъ въ Але-

ксандріи быти кромѣ совершенія святыхъ таинъ. И по сему разуму соборъ Лаодикійскій, въ канонѣ 44, заповѣда въ чотыредесятницу жертву совершати развѣ суботы токмо и недѣли... Не яко же злѣ нѣщии непщеваху, дабы не быти извѣтомъ разрѣшенія поста, но, яко же добрѣ назнаменова Зонара, яко постніи дни суть дни сѣтованія, того ради не подобаетъ жертвы приносить. Тоже утверждается паче и паче, яко постящии ниже мирнаго цѣлованія братіи даяти обыкъ имѣша, по свидѣтельству Тертуліанову, того ради, яко цѣлованіе мирное въ то время токмо бываше, внегда быше причастіе и совершеніе таинствъ. Аще же вѣрити годствуєтъ, яко же всячески вѣру яти подобаетъ, Симеону Солунскому, ниже приношенія быти могутъ отъ лицъ народнѣ грѣшащихъ: повелѣваетъ бо отъ женъ, аще и вѣрныхъ, но невѣрнымъ мужемъ сочетаныхъ, приношенія не пріимати на хотящее быти посвященіе, но точію, и то по великому снисхожденію, елей и кандилу, да не впадутъ, глаголетъ, въ сицевое отчаяніе... Обаче же и о семъ усумнѣвается зѣло Богословъ Назіанзинскій, утвердився о семъ Давидскомъ пѣніи: *елей же іръинаго да не намаститъ главы моя...* Наблюде Симеонъ, яко нѣсть требѣ приносить жертвы о еретицѣхъ и о грѣшницѣхъ народныхъ въ жертвовницѣ того ради, яко суть уди гнилыи и отсѣченныи, паче же заключаетъ, еже не даяти имъ хлѣба и благословеннаго. Есть же хлѣбъ благословенный, святаго вмѣсто причастія даемый, егоже пріємлють не угодни сущии къ святому

таинству, и не приготовльшіися. Древле бо Христіанскій народъ сходяхуся во святое собраніе; наступленіемъ же времени, егда древняя она теплота угасе, помалу отъ прадѣднаго онаго благоговѣинства рачительство озябе, того ради именуется гречески *ἀντίδορον*, вмѣсто святаго причастія, яко всякъ христіанинъ, яко же повелѣваетъ Номоканонъ, сирѣчь книга законная, чистымъ же сердцемъ и отъ всякаго смѣшенія отлученъ сый пріимати должнствуетъ, и святыя иконы цѣловати благочестно, чистая бо чистымъ, и святая святымъ раздѣлительна суть и раздавательна. Еже и сами языци соблюдоша, отнюдуже ихъ преобщій онъ гласъ быше: далече идите скверныи... Сѣмо приличствовати видится канонъ осмый Θεοφιλα, Александрійскаго патріархи, возбраняющъ оглашеннымъ причащаться отъ приносимыхъ... но токмо клирицы да раздѣляютъ между собою. Еже тожде другій Никифоръ, реченый исповѣдникъ, поновляетъ, въ кононѣ 5, глаголетъ бо: да кающіися и епитиміями обложенны токмо причастятся отъ хлѣба онаго ломаного благословеннаго, исповѣдавшие прежде своя согрѣшенія. Но воспросиши: когда бысть сего хлѣба благословеннаго первое узаконеніе? Отвѣщаетъ Валсамонъ быти на соборѣ Антіохійскомъ, во время Константіа совершенномъ. Тако бо написуетъ въ толкованіи канона втораго. Изъ сего, яко же видится, канона хлѣба благословеннаго раздаяніе изыде, воеже бы нужду имѣти и тѣмъ, иже не могутъ святыхъ и животворящихъ тайнъ быти причастницы, даже до конца божественнаго

таинства пребыти, и его изъ рукъ священническихъ, ко еже освятитися, взимати. Поистиннѣ, нѣсть неискусна ума разсужденіе, еже повѣствуетъ даемъ быти сей антидоръ вмѣсто дарованія и мзды тѣмъ, иже присутствовала вечернему пѣнію, утрени, напоследокъ же и всей божественной литургіи жертвѣ. ¹ Имѣетъ бо своя дарованія святая мати церковь, имиже своя дѣлатели чествуетъ. Чудное смиреніе повѣствуетъ Пахимерій о царѣ Михаилѣ Палеологѣ, абіе по плѣненіи Цариграда отъ Латинъ, въ пріятіи сего хлѣба благословеннаго: приступи бо во еже сей святой хлѣбъ пріяти и отъ священника благословеніе получить изъ престола си, даже до святыхъ вратъ, въ то время отвореныхъ. Обаче же назнаменательно есть сугуба рода быти хлѣбъ благословенный, народный сирѣчь и тайный. Народный, иже по сконченіи литургіи раздѣляшеся между вѣрныя во знамя любви и единости, о немже глаголаше Августинъ въ книзѣ второй о грѣсѣ, въ гл: 26: аще, глаголетъ, нѣсть тѣло Христово, обаче святой есть, и святшій отъ пищъ и питій, имиже питаемся. Тайный же, иже отъ епископовъ посылашеся въ свои области и въ близкія, о немже святой Павлинъ, хлѣбъ, рече, единъ святости твоей, единости твоей послахомъ, въ немже и Троичества твердость содержится. Еже помяну, и соборъ Лаодикійскій въ канонѣ 14, идѣже возбраняетъ пресылати въ различныя области епархіи сицевыя хлѣбы благословенныя вмѣсто благословенія во

¹ Было: *посвященію*.

время святыя пасхи. Но и Карѣагенскій соборъ заповѣда отъ сихъ таинствъ, или хлѣбовъ благословенныхъ, людямъ не священнымъ пріимати дерзати, того ради, яко изъ нихъ, глаголетъ, бысть таинство; наричутжеся таинства, аки предварительнѣ, не инако, якоже и частицы прежде посвященія жертвы и приношенія именуются. Тѣмже не престаю дивными похвалами возносить Никона, ово иныхъ ради благочиній церковныхъ, чинно умноженныхъ, ово же наипаче за сей пресвятый чинъ хлѣба благословеннаго, егоже воведе благочестивымъ умомъ, раздѣляя по совершеніи литургіи сицевый антидоръ, онемже глаголаше Кавасила: они же благоговѣніемъ къ архіерею приходяще, хлѣбъ пріемлютъ, и цѣлуютъ десницу, яже секрати пресвятѣйшее тѣло Христово держаше. Еда и въ семъ хлѣба благословеннаго раздѣленіи дерзаеши, о Никито, клеветати сицеваго іерарха? Но Іустинъ мученикъ и философъ, во второй своей апологіи, востанетъ на тя и возопіетъ, яко древніи христіане обычай имѣша обносити и отсутствующимъ благословныя ради вины отъ сего хлѣба... Не токмо бо таинство Евхаристіи къ отсутствующимъ и странствующимъ людямъ ношашеся, ради соблюденія благоговѣинства и священныхъ таинствъ присныя памяти сохраненія, иже въ противныхъ бѣдахъ, и въ морскомъ обуреваніи, и въ должшихъ путехъ посвященную частицу съ собою блюдуще, преношаху, якоже явѣ есть изъ святаго Василія, изъ св. Кипріана, и Григорія Двоеслова. Но и сицевый антидоръ аки... съ собою тѣмъ же ношаху, того ради,

воеже бы тѣмъ, надежднѣе и святѣе почитающимъ должшія путешествія пріимати отъ благословеннаго онаго хлѣба и освященнаго на литургіи молитвами литургійными, причащаться имущимъ. Но воспрекословиши, глаголя: откуда хлѣбъ благословенный сицевое пріемлетъ благословеніе, въ литургіи бо не обрѣтается особная молитва таможде назнаменованная? Извѣстно, яко Симеонъ Селунскій въ книзѣ о храмѣ непщева общими молитвами жертвенника благословитися, и того ради нарицаетъ хлѣбъ освященъ быти на проскомидіи... молитвы надъ собою сотворенныя пріемлющій. Николай паки Кавасилла глагола тѣмъ самымъ быти освященъ, яко хлѣбъ принесенный есть Богу, и съ его... середины, аки отъ нѣдра благоплодна, изведется жертва рукою іерейскою. На послѣдокъ святой Германъ патріарха глаголетъ, яко Богородична просфира плоти ея образъ имать,¹ и тако изъ раздаянія просфиры Богородичны христіанскому роду происходитъ вѣруется здравіе и освященіе, и тоя ради вины, наворачаетъ сей святой патріарха, яко сицевый благословенный хлѣбъ ради обремененныхъ злобами, сирѣчь кающихся, причастіа лишенныхъ, сіе приношеніе, святостію изобилное, вмѣсто инаго святшаго въ торжествѣ литургиномъ подставляется и жрется... На послѣдокъ вѣдати подобаетъ, слыши о Никито и знамени добрѣ, яко частицы, яже за живыя и усопшія изъемлются, носятъ образъ тѣхъ лицъ... яже ихъ приносятъ и предъявляютъ

¹ Было: яко двѣици плоти раздѣленіе хлѣба благословеннаго и жертвы мѣсто имать.

во храмъ Божіи. Пять бо обыкоша просфиръ на проскомидіи предлагатися... и отъ началныя убо просфиры изъемлется антидоръ. Аще же не довлѣетъ множеству народа, можетъ отъ другія просфиры Богородичны взятися и раздѣлитися, паче же и отъ третія уравнилнѣ, за девять чиновъ церковныхъ принесенныя, по подобію девяти чиновъ небесныхъ, взятися. Никоимъ же обычаемъ, глаголетъ Симеонъ Селунскій, подражая Герману святому, отъ четвертыя взятися можетъ антидоръ, ниже отъ пятыя, за усопшія предложеныя. Но о сихъ многая собирати излишнее непщевахомъ, яко... наученія паче, неже словопренія доводства.

25. Отраженіе оныхъ словесъ: яко Никонъ измѣнилъ древній чинъ освященія храма, сирѣчь о антимисахъ на престолѣ.

Слово антимиссія (да нѣчто отъ числъ Пифагорическихъ возмемъ) отъ пяти слоговъ состоитъ. Есть же слово латинское, по свидѣтельству Іоанна Китрскаго епископа, еже аще гречески толковати восхощеши, антипана, или антитипа трапезныхъ, сирѣчь украшеній трапезныхъ, видъ носящая наречеши купно съ Валсамономъ. Тако Никита, по рекломъ Сейдесъ, вся патріархіи пяти чувствомъ сравниваетъ: Іерусалимскаго убо равняетъ видѣнію, того ради яко въ немъ Христосъ первѣе познася; Антіохійскаго—уханію, ибо благая воня оттуду произыде имене христіанскаго и во всю вселенную разширися; Римскаго—вкушенію, того дѣля, яко

въ самомъ градѣ стараго Рима святой Петръ вкусилъ есть горчайшую крестную смерть... Александрійскаго—слышанію, того дѣля, яко воплощеніа таинство тамо отъ волхвъ проповѣдася и идолочтеніе истребися; Цариградскаго—осязанію, еже чувство протягается ко всѣмъ, и того ради сія патріархія вселенская именуется... ради господствованія надъ прочими. Основаніе же имать сіе умствованіе на реченіи *χαράι*, идѣже *χ* знаменуетъ Константинопольскую, *α* Александрійскую, *ρ* Римскую, *α* Антіохійскую, *ι* Іерусалимскую. Вскую сія мною помянушася? развѣ, яко сицевыя вселенскія главы подобнымъ обычаемъ употребляютъ антимисіевъ, аще Никита и въ семъ клевететъ на Никона о латинствованіи неправедно. Паки престолы епископскимъ благословеніемъ посвященныя всякому, священная дѣйствующу, нуждныя быти единомышленнымъ тако восточныя, якоже и западныя Церкви согласіемъ узаконися. Нынѣ паки занеже неосвященныхъ храмовъ премного восточная страна имать, ниже каменные трапезы сѣмо и овамо преносити удобно есть, уставы отъ многихъ уже вѣковъ плащенца нѣкая, антимисії нареченная, вмѣсто престола и обычаемъ его посвященная, имѣти во употребленіи. Убо идѣже нѣсть церковь посвящена, возисполняетъ лишаемое сила антимисія освящающая. Того ради храму, не у сущу посвященну, священная дѣйствовать кромѣ антименсія, или антимисія (обояко бо глаголется) никогда же попустися. Коимъ бо обычаемъ, глаголетъ Китрскій епископъ Іоанъ, олтарь освятить даръ, аще

освященіа не будетъ причастенъ. Влѣпоту убо священнику, не употребляющу антими́ссіа, наказаніе дадеся, весма низложеніе, ибо антими́ссіи въ то время совершаются, въ неже освященіе храма архіереемъ дѣйствуется. Того дѣля антими́ссіи зовутся, и суть намѣстницы трапезы Господни. Архіереи паки священная дѣйствовать не могутъ въ храмѣхъ неосвященныхъ, ибо глаголетъ Валсамонъ въ 7 канонѣ собора: зѣло смиряется епископства достоинство, идѣже нѣсть престола, на немже апостольскій епископъ поставляется, и яко не суть и иная, храма посвященіе и лѣпоту слагающая. Дадите ми, молю, свободу, еже презъ отступленіе... нѣчто проглаголати... во назданіе многихъ и довлесотвореніе. Іоанъ Калвинъ каноникъ Новіодуренскій, въ скверное преступленіе приклоненъ быше: сей, увѣщанъ бывъ трищи и чотырижды тайно отъ своего правилнаго пастира, обаче никогда воспятися, ниже на лучшее еже жити обратися. Убо ревностію архіерейскою поревновавъ, пастырь низложи его по обычаю изъ священническа сана. Еже низложеніе Калвинъ услышавъ, оная безбожная словеса отрыгну: Что убо? Еда самъ азъ не тожде имамъ достоинство и силу? Едино, едино есть священство, и никое же есть разнствіе между церковники. Суть нѣціи [обаче горе имъ], иже секрати быша калвинистове, иже весма отрываютъ архіерейское достоинство, и вся равны творяще, дѣлають Церковь преукрашеную Вавилономъ возмущеннѣйшимъ, якоже поеть псалмопѣвецъ. Единаго привведу Діонисіа Ареопагиту,

бесѣдующа премудрѣйши о сей Іерархіи церковной, въ гл: 5, юже онъ на три дѣлитъ раздѣленіа, ихже первое есть, глаголетъ, креститися хотящихъ очищеніе,... второе, очищенныхъ освященіе,... третее, первыя исполняющее совершеніе... Діакони очищаютъ, священники освящаютъ, епископы совершаютъ. Сей бо есть пресвятѣйшій законъ вся іерархіи, еже первыми вторымъ нѣкакимъ обычаемъ водитися... Образъ буди въ стклѣ, еже солнце пріемлетъ и... освѣщаетъ: Оттуду собирается похвалное подчиненіе... еже связуетъ, по свѣдѣтельству Назіанзинову, небесная съ земными, человеки съ Ангелы, высочайшую іерархію съ сею нижайшею. На послѣдокъ наворачаетъ толико изрядный учитель сими словесы: убо Божественный чинъ архіерейскій тойже есть первый, высочайшій и послѣдній. Первый, занеже отъ него прочимъ яже свойственна суть даруются; послѣдній, яко на немъ весь чинъ церковный окончевается, сирѣчь тѣмъ образомъ, яко же и всякая іерархія... на Спасителѣ нашемъ Ісусъ Христѣ совершается. Обаче же изряднѣе архіереови дадеся мѣросвященіе, олтаря посвященіе и церковниковъ въ сихъ становленіе.¹ Услышите сіа вси языци и людіе, услышите: аще не будетъ чинъ іерархичный, не будетъ мѣро, ни олтарь, ниже кое священство будетъ. Аще же и іереями крещеніе дѣйствуется правилно же, но презъ снисхожденіе нѣкое сіа творитъ священникъ. Оглавленнѣ воспоминався съ Ареопагитою, иже учитъ

¹ Было: *пачиненіе*.

архіерея убо совершати, священника же освящати, діакона же очищати: того ради, яко добрѣ на- знаменова Пахимерій въ томъже мѣстѣ, епископъ же можетъ дѣйствовати служенія низшихъ, священникъ же не можетъ тѣхъ, яже суть епископля, инако дерзалъ бы та, яже ему никако прилич- ствуютъ. Обаче убо о отступленіи довлѣетъ, да не безгодное все дѣло явится... Велій вопросъ быше и древнихъ временъ: еда усопшія подобаетъ въ храмѣ погребати? О мученицѣхъ нѣсть усумнѣ- нія, и о святыхъ мужѣхъ, понеже потолику храмы именуются *martiria*, поелику тамо мученицы пола- гахуся. Оттуду извѣтъ пріемъ, златый языкъ Зла- тоустаго глаголаше,¹ яко Христосъ у вратъ ры- баря Апостола и прочія сонма Апостольска, подо- біемъ вратаря царемъ, бдѣти изволилъ есть; при- глаголствуетъ толикій учитель къ плоти правовѣр- нѣйшаго царя Константина, иже быше во храмѣ святыхъ Апостолъ спогребенъ. Тамо бо, сирѣчь во храмѣ святыхъ Апостолъ, положенъ есть Тео- досій, Аркадій, и прочіи, по словеси Никифорову Калистову въ книзѣ 14 въ гл: 58, паче же и самъ Іуліанъ отступникъ. Но наблюдательно есть, яко не внутрь, но... погребени быша въ нижайшемъ мѣстѣ храма. Ибо храмъ святыхъ Апостолъ мощемъ посвященъ быше. Аще бо не было бы мощей му- ченическихъ сокровище въ молитвенницѣ положено,¹ кой либо трупъ человѣческій свободно могли бы погребенъ быти, по Θεодору Валсамону и по

¹ Было: *утверди*.

законѣхъ царскихъ. О святомъ Епифаніи повѣствуетъ Метафрастъ, яко внутри Церкви погребенъ быше, еже доволнѣе и пространнѣе повѣствуетъ ученикъ его Савинъ Діаконъ: Взять копало и прочіи, начаша мѣсто копати, идѣже имѣша положены быти предрагія отца святаго мощи. Обаче Логвинъ и Петроній возбраняху; но честный діаконъ купно съ Савиномъ вопіяше: да погребутся отца святаго мощи на семъ мѣстѣ; азъ о семъ молю повелителя православнѣйшаго царя. Иже царь (царствоваше въ то время Аркадій) чести ради толикаго мужа въ ней повелѣ погребенну быти, сіе прилагающе изряднореченіе: выше закона человѣческа жившу отъ общаго мѣста, закономъ опредѣленнаго, отлучитися весма долженствуетъ. Знаменають сіе тожде Симеонъ Θεссалонитскій, разглаголствуя о мѣстѣхъ погребанія, и утверждаетъ въ обычаѣ быти, еже архіереомъ по древнему нѣко-ему воспріятому обычаю внутри олтаря погребатися... не инако, яко же и тѣлесемъ святыхъ, ради архіерейскаго чина достоинства, еже, яко отъ различныхъ сказателей исчерпну, свидѣтельствуєтъ. Прилагаетъ же, яко царіе окрестъ храма выну... должныствуютъ погребатися. Ибо аще царскаго достоинства помазанія и сподобишася, обаче лаици ¹ непщуются быти, и суть же по истиннѣ. Но нынѣ,—о временъ! рече, о нравовъ!—вся бывають развращенна гордости ради и любоимѣнія ², купно съ невѣжествомъ слученаго, ибо и міряне

¹ Было: *несвященни*.

² — *лихоимства*.

богатіи погребаются внутрь храмовъ, извѣтомъ того, яко христіане суть. Но слыши, о, возлюбленне брате,—глаголетъ Θεσσαλονитскій,—христіанинъ еси, но не іерей. Между іереємъ паки и лаикомъ веліе всутствуетъ разнствіе. Истинно же отъ Пресвятыя Троицы изводствуется всякое отчество и чинъ, небесный же и земный. Низрѣваяй убо архіерея отъ своего сѣдалища и чина, иже, по глаголу Климентову, мѣсто Божіе держитъ на земли,... дерзаетъ подобнѣ обычаемъ исполиновъ движати Бога самаго, Виновника всего чина архіерейскаго, изъ престола Его Божественныя славы, и съ небесе, елико есть въ себѣ, низрѣвати, иже нѣсть злаго учиненія Богъ... ниже на лица зрѣтель. И того ради должнствуетъ всякъ пребывати въ немже отъ Бога званъ есть санъ, поборяюще о благочиніи церковномъ. Но о сихъ довлѣ глаголати.

26. Отраженіе обличенія на оная словеса, яже о антиміисахъ преносимыхъ изъ мѣста на мѣсто, яко сей чинъ есть схизматическій, и Римскія вѣры обычай.

Ираклитъ философъ и Демокритъ взаимъ бращая нравы: единъ бо, елижды либо изъ дому исхождаше, плакася, разсуждая непостоянство міра и вещей человѣческихъ бѣды; другій, исходя изъ жилища, абіе смѣяся, того ради, яко ему вся непщевахуся подвержена быти суетству, чесо ради Гелазинъ наречеся, яко на смѣхъ разрѣшашеся,

имармены (?) случаи и измѣняемыхъ вещей непостоянство умомъ си размышляя и рассуждая. Смѣхъ же и плачь купно и мене срѣтаета, внегда Никитово безуміе и невѣжество внутрь мя рассуждаю: плачуся бо, и со Іереміею восклицаю: *кто дастъ воду главь моей, да плачуся сего іерея безумію?* Отъ другія же страны Захаріинъ... серпъ летающъ егда рассуждати ми, и оная словеса поминати: *и азъ вашей пошибели посмѣюся, порадоуюся же всегда, всѣми удесы трепещу, яко паки и паки о антими́сахъ усугубляя, излиха же смущая, къ латинству Никона отпадша исповѣдуетъ.* Видѣхъ азъ самъ моима очесома во время Матѳея Вассараты, князя милостива, сѣнь не неизрядную вмѣсто храма бывшую, въ нейже совершашеся и литургія на подвижимомъ престолѣ, антими́сомъ украшеномъ. Ибо, якоже поучаетъ Матѳеѣй Властарь въ главѣ 15 о антими́сахъ, сіи содержатъ силу освященія, за неже суть намѣстницы освященныхъ трапезъ, и содержатъ въ себѣ святыхъ мощей частицы... Тако христіанстіи царіе, внегда имъ ратовати съ варвары, сицевыхъ сѣней, аки храмовъ молитвенныхъ, употребляти обыкоша, и тамо священная обычаемъ христіанскимъ дѣяху, еже во еже бы имъ, церковныхъ служеній лишившимся, не весма отчуждаться, древнимъ Іудеомъ подражающе, иже единою рукою стѣны назидаху града Іерусалимска, другою же оружія, во еже бранити себе, держяху. Никое убо здѣ явствуется латинство, аще восхощеши, или ни, исповѣдати, о Никито, но общее согласіе обою церквію. Тако обрѣтаю, на посвященіи антими́совъ:

именоватися антими́сы... Молитбося архіерей, святя
 я: самъ убо нынѣ, Господи, Духа твоего низпосли,
 и олтари ¹ сія посвяти. И нижае: молимъ, Господи
 всемогущій, яко да прошеніа рабъ твоихъ внидутъ
 предъ тя, и на олтарь сей, вѣрныхъ твоихъ по-
 мазаніемъ помазанный, свѣтъ твой и истинну твою
 низпосли и освяти. Вопрошающе ми, даждь от-
 вѣтъ, о Никито: чесо ради олтари именуются ан-
 тиміисы? Азъ сужду, яко не безъ посвященія ан-
 тиміисовъ посвящатися обыче новый храмъ, и яко
 мѣсто олтарей, Богу посвященныхъ, употребими
 бывають. Того ради полагаетъ Чиновникъ тамо-
 же, яко архіерей знаменаетъ антими́сы своею
 рукою, глаголюще: се освятися и совершися и
 бысть олтарь, святая святыхъ, во имя Отца, и Сына
 и Св. Духа. И абіе мажетъ мазаніемъ святаго мвра.
 Сицевые антими́ссы, пресылатися обыкоша въ
 различныя епархіи, якоже и святое мвро, еже дре-
 вле отъ Римскаго папы, нынѣ же отъ Цариград-
 скаго патріархи вездѣ разсылается, не инако, якоже
 отъ Антіохійскаго разсылаемо бываетъ въ особныя
 своя епархіи, между нимиже нещуется быти вся
 Иверія. Выше того обрѣтаю архіерея, внегода ма-
 зати ему антими́ссы священносвятымъ мвромъ...
 крестообразно, обыхша пѣти аллилуіа. Ибо ниче-
 соже частѣе у насъ сего умна аллилуіа. Ибо въ
 служеніихъ чотыредесятницы сіе пѣніе учащаемъ,
 многаши усугубляюще аллилуіа; и тожде во упо-

¹ Было: *престолы*; такъ и далѣе во всѣхъ мѣстахъ, гдѣ встрѣчается слово *олтарь*.

требленіе пріємлемъ на погребеніи мертвыхъ. Латины обыкоша пѣти аллилуіа въ день пасхи, во знамя нѣкоея радости; противнѣ же Грекове во дни постныя, въ знамя нѣкое сѣтованія. О семъ же гаданіи чуднымъ обычаемъ чрезъ многое время препиратися не престаша, царствовавшу Константину Мономаху, патріаршествовавшу же Михаилу Керуларію. Ибо Латины судиша аллилуіа пѣснь быти торжественную, и радостную, а не за сѣтованіе и сердцесокрушеніе. Обаче же и Латины древле сего аллилуіа употребляху на погребеніихъ, якоже свидѣтель достовѣрнѣйшій есть святой Іеронимъ, разглаголствуя о смерти Фавіоли. Пишетъ бо сице: Тогда вѣсть, летающе, толикія печали провѣщательная, всего града люди на погребеніе собра: звяцаху псалми; позлащенные же кровы храмовъ на высотахъ ударяху аллилуіа. Се аллилуіа есть сѣтованіе, а не восклицаніе,... Во истинну, во Испаніи, по Исидору, и во времена поста пояху аллилуіа. Африческая же Церковь по пентикостіи во всякую недѣлю, во знамя воскресенія будущаго, пѣти обыче. Обаче же единодушно вси трищи пояху, а не дващи аллилуіа. Се же по святой Апокалипси, въ главѣ 19, идѣже трижди аллилуіа поминается отъ пресвитеровъ во славу Пресвятыя Троицы. Послѣднее бо аллилуіа есть аки истолкованіе и заключеніе... не инако, яко же и мы, егда трищи аллилуіа поемъ, абіе прилагати обыкохомъ: слава тебѣ Господи... Подлучу словеса мудрѣйшаго Ареѡы въ толкованіи сего мѣста апокалиптическаго. Аллилуіа, рече, знаменуетъ еврей-

ски хвалите Господа... есть же благодарствіе нѣкое за Божіе оправданіе противу блудницѣ попраной—Вавилону. Трищи же глаголется отъ пресвитеровъ аллилуіа во знамя славословленія Пресвятыя Троицы... Того ради и святіи мученицы, егда привождяхуся на убіеніе и къ висѣльницамъ, полными уже усты за будущее знамя побѣды сіе... аллилуіа пѣти обыкли бяху. Острѣйшій есть умъ святаго Германа патріархи во истолкованіи аллилуіа. Хотите, да во среду его разсужденіе воведу? Хотите негли? *Ѳ*л, рече, Отца знаменуетъ, *І*л—Сына, *Ѳ*ла—Духа Святаго, тѣмже треусугубително есть, а не удвоително алилуіа, да тако изъявитъ святыя Троицы таинство, яже во Троичествѣ Лицъ, а не во двоицы состоитъ. Симъ придаждь Симеона *Θ*ес—салоническаго, въ таинствѣ крещенія глаголющаго сіе пѣніе быти пророческое, того дѣля, яко святыи пророцы, Божественнымъ исполнени Духомъ, пояху е. Того ради царствующій пророкъ толико псалмовъ сложи на аллилуіа, еже есть: Богъ пріиде, того ради Его вси хвалите. Ожидаша бо вси перваго и втораго Мессіи пришествія, и исполненія благодати. Того дѣля церковь повсемственная еще и пріятъ Христа, обаче паки пріити хотяща ожидаетъ, еже судити живыя и мертвыя, и того ради выну сицевое пѣніе поетъ днемъ и нощію... аллилуіа, еже да подастъ намъ Богъ во небесномъ Іерусалимѣ мощи воспѣвати, во вѣки вѣковъ аминь. Буди. Буди.

27. Отраженіе сихъ словесъ: не подобаетъ антиміисовъ чрезъ седмъ дни на престолъ на посвященіе полагати, якоже Никонъ сонствова, отъ ложныхъ писаній сіе исчерпающе ученіе.

Мысляща мя многомножае, чесо ради у Іудеевъ седмочисліе въ толикомъ почитаніи имяшеся, абіе Христосъ срѣтаетъ, егоже пресвятое имя седмію писмяны состоитъ *χριστος*. Еже наблюде и святыи Епифаній... Седмъ бо даровъ Духа Святаго на Немъ бяху, сирѣчь: духъ премудрости, духъ смысла,¹ духъ совѣта, духъ крѣпости, духъ вѣдѣнія, духъ благочестія, духъ страха Божія. Чудишижеся послѣжде, о Никито, аще антиміисы посвященны чрезъ² цѣлыи седмъ дни на престолѣ полагаются. Воистинну не отъ Латинъ сіе пріято есть, но отъ Греческихъ Отецъ³. Слыши убо когда либо Матѳея Властаря, въ главѣ о антиміисахъ что толкуетъ, заключающе: Антиміисы освященія силу обществуютъ, юже имъ храмовъ преосвященныхъ служительство и седмодневная на престолѣ жертва дарствуетъ чрезъ Ісуса Христа Господа нашего, имѣющаго въ десницы си седмъ звѣздъ, въ Апокал: въ гл. 1, еже есть седмъ Ангеловъ началнѣйшихъ, или архіереовъ седми церквей, во Азіи правителей, якоже сказуется во Апокалипси, глаголющей: Таинство седми звѣздъ, яже видѣлъ еси въ десницы моей,

¹ Было: *разума*.

² Доселѣ Полоцкій писалъ постоянно *prez* (презъ); теперь, какъ бы вразумленный Никитою, начинаетъ писать: *czrez* (чрезъ).

³ Было прибавлено: *святыхъ*.

и седмь свѣтилникъ златыхъ: седмь звѣздъ Ангели седми церквей суть, седмь же свѣтилникъ седмь церквей суть. Тожде самозаключается въ главѣ 2, егда глаголетъ: *сія глаголетъ держай седмь звѣздъ въ десницы своей, и ходяй посреда седми свѣтилникъ златыхъ*, по оному Давидскому: *въ руцѣ еіо концы земли, и верхи горъ еіо суть*. Но кій шумъ непріятный входитъ во ушеса моя? кое ихъ отгласуетъ ко мнѣ восклоненнымъ и воспященнымъ гласомъ? Уже, уже вси твои пять патріархове погрѣшиша, иже и... именовани бяху, тако даже о нихъ возмоши правдствоватися оному, Апокал. въ гл. 6: *и звѣзды небесныя падоша на землю, яко смоковница отмѣтаетъ пупы своя отъ вѣтра велика движима*, и оное Христово, у Матѳея: *звѣзды спадутъ съ небесе*. Аще же нѣцыи философски сіе реченіе преносятъ до паръ земныхъ, обаче унше излагателно есть съ Теофилактомъ, яко поистиннѣ во время послѣдняго суда помрачится солнце, и луна не дастъ свѣта своего,—се же, яко не ктому будетъ ихъ кая нужда и употребленіе, занеже бо земля будетъ новая и небо новое. Суть вся сія преносящіи къ горчайшему времени страстей, егда солнце и луна повсемственное оное страдаста оскудѣніе, егда и Діонисій вопіяше: или Богъ страждетъ, или вся тягота міра разрѣшается... якоже повѣствуетъ Свидѣ. Но и ко времени антихристову премнози преносятъ, егда иматъ быти совершенное всѣхъ вещей измѣненіе и преложеніе... и на сей разумъ Андрей Кесарійскій архіепископъ преноситъ и провѣщаетъ, яко тогда падутъ явствующаяся въ мірѣ свѣтила... тако, да

якоже звѣзда разнствуеть отъ звѣзды во свѣтлости, тако тогда будетъ и въ помраченіи. Но уже глаголють Никитовы клевети, сотворше въ наведеніе и разрѣшеніе чрезъ единственныхъ частей счисленіе: ко указанію нашему да приступимъ. Римскій папа, аки денница, за изящное престола своего преимущество ¹ паде, о немже истинствоватися можетъ оное въ Исаи въ гл. 14: *Реклъ еси во умъ твоємъ на небо възыду, и выше звѣздъ небесныхъ поставлю престолъ свой, и сяду на іоръ висоцъ, на іорахъ высокихъ, яже на стверъ, възыду выше облакъ, и буду равенъ вышнему; обаче же во адъ низвлечеса, и съ ошибомъ своимъ низвлече третюю часть звѣздъ небесныхъ, якоже поминаеть Апокалипсисъ въ гл. 12.* Зоря утренняя, Цариградскій патріарха, паде, по плѣненіи отъ турковъ Цариграда, въ лѣто отъ рождества Господня 1453 мѣсяца Марта 29 дне. ² Прочіи тріе патріарси и по нуждѣ турецкому и малѣйшему маанію повинуются, якоже и каждо единъ архіерей греческій. Убо ли преодолѣша врата адова церкви соборной? О, чудныя и безмѣстныя хулы отъ генскихъ вратъ, сирѣчь отъ еретическихъ устъ, изреченныя, обычаемъ лютрокалвинскимъ! Еще: царствуетъ царство антихристово, егоже предитеча есть Махметъ, иже, греческими писмены назнаменованый, содѣваетъ число апокалиптическое 666 *Моаретисъ*. О римстѣмъ ничесоже реку; о прочіихъ не благодаренъ былъ быхъ, аще молчалъ быхъ.

¹ Было: *киченіе*.

² — *числа*.

Но дадите ми прощеніе, да высочае всю вещь повторю, отъ начала даже до конца. Егда плѣнися Константинополь отъ Махмета, бѣ стязаніе: гдѣ бы былъ Цариградскій патріарха? Увѣщенъ же бывъ о смерти Григорія патріарха во время плѣненія, повелѣ всему клиру новаго въ его мѣсто избрати патріарха. И избранъ быше Генадій, мужъ по истиннѣ нарочитый, тако въ святости житія, якоже во ученіи преизящный. И явствованъ бѣ турецкому царю, иже вопросивъ обычая христіанскихъ царей, услыша, яко во обычаи быше новоизбранному патріарсѣ ¹ царскою си рукою жезлъ пастырскій подаяти, ² и съ великимъ свѣтлоявствованіемъ на кони сѣдящу окрестъ града Константинополска обводиму быти. Соизволи Махметъ, и повелѣ жезлъ серебряный принести, и коня бѣлаго на язденіе уготовати. И тако свѣтлоявственнѣ Генадій патріархъ шествова въ патріархію. Еще же между иными грамоты царскими считаетъ Матѳеѣй Властарь быти же и сію, еже воздвизатися на патріаршество тому, егоже самъ царь восхощетъ... Кодинъ Куроплата прилагаетъ, въ гл. 20, глаголюще о архимандритѣхъ: егда, рече, отъ патріарха избрани суть, и крестомъ знаменани, отходятъ и они въ полату, и чествуютъ повелѣтеля, и отъ рукъ жезлъ... [или... тако реченный отъ отческаго попеченія произведеннымъ реченіемъ] приѣмлютъ. Тако убо турокъ не врѣвается въ дѣлеса вѣры, но всякаго оставляетъ

¹ Было: нову патріарсѣ избрану бывшу.

² — явствовать.

во своей вѣрѣ и чинѣ... единыя токмо требуя отъ подчиненныхъ годишныя дани. Отнюдуже является патріаршее наслѣдство быти правильное, и даже доднесъ неповрежденное пребывати Божіею благодатію. Но да стыдятся глаголати иная нечестивѣйшіи мужи: аще Цариградскій патріархъ никоея содержитъ власти, никоея будетъ имѣти и Московскій патріархъ, занеже онъ отъ Іереміи на патріаршество вознесся. Никтоже паки, по обычной притчѣ, даетъ, егоже не имать. Не погибе убо чинъ церковный между турки и срацины, сеже бысть судьбами Божественными, да не кто отъ царей и князей возмнитъ висѣти чинъ церковный. Поистиннѣ равно разстояніе здѣ вижду между іудейскими архіереими, и нынѣшними патріархи. По плѣненіи бо Вавилонскомъ даже до рождества Христова изряднѣйшее и началнѣйшее достоинство іудейское и внѣшнее досточестіе при архіереехъ пребываше, чесо ради постоянное и свѣтлое наслѣдство ихъ быше. Не тако князей мірскихъ,—се же, да научатся князи церковь собою стояти, ниже отъ ихъ сана и здравіа висѣти. Ибо плѣненіа ради Вавилонскаго не исчезе іудейскихъ архіереовъ чинъ и санъ, но паче въ людехъ Божіихъ стяжа вѣщшее нѣкое началство. Истинна есть, яко истреби турецкое свирѣпство цари Константинополскія, но не возможе патріарховъ и церковныя іерархи оттуду искоренити, ниже когда возможетъ, по обѣщанію Христову, истребити. Ибо посредѣ гоненій іераршеское наслѣдство торжественныхъ апостолскихъ престоловъ, корней

всего міра христіанскаго, соблюдеся цѣло, и свѣтитсѣ по всему міру даже до дне нынѣшняго, съ правильнымъ наступствомъ, егоже здѣ счести отрещи не имамъ. По Генадіи убо, егоже царь турскій цѣлуя, рече... со благополученіемъ прави патріаршество, наступи правильно Іоасафъ, порекломъ Кузанъ, по семъ Марко Ксилокоравъ, мужъ премудрый, по немъ Исидоръ, всякими добродѣтелями украшенный, по семъ Сѹмеонъ Трапезонтскій, по семъ Діонисій, Марка Ефесскаго ученикъ, по семъ Рафаиль Сербинъ, по семъ Максимъ, всякимъ ученіемъ обдарованный, по семъ Нифонъ словеснѣйшій, по семъ Манассія изъ горы святыя, инако реченный Максимъ, по семъ Іоакимъ, по семъ Пахомій, по семъ Теофилъ, по семъ киръ Іереміа, шествовавый во святыи градъ Іерусалимъ, воеже бы тамо видѣти святыи свѣтъ... въ неже время воведенъ быше въ папіархію неправильно Іоаникій, егоже яко преступника и... вси и каждо по единѣ патріарси, изобщивше, изложиша, и сѣдѣше паки Іереміа, иже Іова, купно согласующимъ прочимъ патріархомъ, на патріаршеское возведе достоинство, якоже явѣсть отъ Хризовула, данаго во время правительства царя Θεодора Ивановича. Многшая ниже воспоминаемъ.

28. Отраженіе оныхъ словесъ: *Никонъ приложи въ пѣнии Трисвятаго: сила, еже приложеніе не быше дръвле.*

Повелѣлъ быше Богъ треблажайшій и величайшій въ книзѣ Числъ, въ главѣ 10, Моисеови, святыхъ

сказателеви: *сотвори себѣ двѣ трубы сребряны, кованы сотвориши я, и сынове Аароновы да трубятъ трубами.* Что знаменаетъ сія двоица трубъ сребряныхъ? Отвѣщаетъ святой Кирилъ въ книзѣ о поклоненіи, си двѣ трубѣ знаменовати сугубъ во церкви проповѣданія родъ. Ихже единъ ко правымъ догматомъ вѣрующія приводитъ, ихже не хранящія услышатъ оное апокалиптическое: *внѣ пси, внѣ зліи дѣлатели!* Другій паки родъ ко приличству нравовъ приводитъ и на путь христіанскаго содружествованія. Рѣхомъ уже выше со святымъ Василиемъ, ино быти догматъ, ино же чины проповѣданій. Настоящее наше предпріятіе есть весма и совершеннѣ богословское, о немже бесѣдовати намъ нынѣ подобаесть. Первѣе же подложително есть, Трисвятое взято быти отъ царствующаго пророка Давида, поющаго: *Вожжада душа моя къ Богу крѣпкому живому...* Идѣже чрезъ Бога умствуетъ Отца, чрезъ крѣпкаго—Сына, чрезъ живаго Духа Святаго. Паки и Ангели у Исаіи пояху трисвятое: *святъ, святъ, святъ, Господь Саваоѣ, Пресвятая Троица* пѣніе и явный символъ. Того дѣля Симеонъ Селунскій сей вмнѣ трисвятое глаголетъ быти истолкованный, ово отъ Ангелъ, ово отъ Давида. Отъ Ангелъ убо, яко святъ хвалится, отъ Давида же яко Богъ... Отецъ нерожденный отъ Ангелъ; Сынъ рожденный, яко святой и яко крѣпкій... отъ царствующаго пророка. Духъ Св. яко безмертвый отъ Давида, и яко святой отъ Ангелъ... *Помилуй насъ* есть заключеніе... отъ тогожде Давида пріятное, еже ко Богу самому во

Троицы единому относится, никоимъ же обычаемъ къ святымъ, ихже токмо молимъ, да ходатайствуютъ о насъ, грѣшныхъ сынѣхъ Еввы въ семъ юдолѣ плачевномъ. Единъ бо Господь есть милосердъ и милостивъ, чесо ради царствующій пророкъ вопіяше: *помилуй мя Боже по велицѣй милости твоей*, еже есть: обычаемъ нѣкимъ страннымъ и неупотребляемымъ. Но вещь выше возносимъ. Теофанъ историкъ, достовѣрнѣйшій свидѣтель, такожде и Кедренъ Георгій, и Іоанъ Дамаскинъ, свидѣтеліе достовѣрнѣйшіи, повѣствуютъ чудо, еже приключися на полѣ Византійстѣмъ во время Θεодосіа Младаго, и Прокла святѣйшаго патріарха. Егда бо въ великую седмицу весь градъ волновашеся трусомъ земли, весь же народъ прилежнѣе вопіяше: Господи помилуй! киріе елейсонъ! тогда о третіемъ часѣ, всѣмъ видящимъ, приключися восхищену быти нѣкому юноши на воздухъ (четца быти сего повѣдаютъ нѣци) и гласу слышану, повелѣвающу ему, да епископу и людямъ возвѣститъ, во еже бы Трисвятое сіе творити и глаголати: святыи Боже, святыи крѣпкій, святыи безмертныи, помилуй насъ, никакоже влагающе оное ѿопасхитовъ: укрестованныи за насъ. Убо Проклъ святѣйшій предстоятель, сіе пріемши разумѣніе, повелѣ людямъ сиче пѣти, и абіе преста трусь. Погрѣшаше воистинну зѣло Петръ Кнафей, такожде и Павелъ Самосатскій, буесловившіи укрестованну быти за ны всю Пресвятую Троицу. Божество бо, суще безстрастно и безсмертно, страдати и умрети никакоже можетъ. Образотворятъ

же нѣцѣи раздѣженнымъ желѣзомъ, еже аще и ударяется, обаче огонь ничесоже страждетъ, ниже измѣняется... но паче и паче свѣтлѣетъ и сіяетъ. Тако и Божество въ Христѣ ничесоже страда, страдавшу человѣчеству. Иный образъ изряднѣй и свѣтлѣй приводитъ св. Кирилъ Александрійскій патріархъ: якоже, рече, въ бисерѣхъ сіятелства убо блистають, и внутрь ихъ свѣтятъ, аще же кто восхощетъ сіе *соединеніе* умомъ разлучити, возумствуетъ отъ единыя страны самъ собою бисеръ, отъ другія паки свѣтъ, иже въ немъ разліяся, обаче единъ подлогъ обою... Тако о Христѣ умствуется: снисхождася бо тайнымъ обычаемъ Божество купно и человѣчество, якоже купно тойже и человѣкъ намъ подобенъ, и Богъ выше насъ есть. Того ради единородный и первородный быти глаголется. Оттуду Назіанзенскій Богословъ день рождества Христова именова Богоявленіемъ, воеже бы оба Христова естества назнаменовати, и убо рождество—человѣческое, Богоявленіе паки Божіе изъявляетъ естество. Еже все образуетъ чрезъ... еже есть свѣтилникъ двоичный, якоже чрезъ свѣтилникъ... троичный Пресвятыя Троицы таинство сѣнопишется: яко бо три свѣтилници, якоже вѣтви изведены, отъ тогожде и единого корене исходятъ, такожде равнѣ отъ тогожде единого Божества три купно впостаси бывають, и есть явнѣ противъ Арію, Македонію и Аполинарію; яко двѣ свѣщи... сія два естества не сліяная... Христа Господа образуютъ,—то, еже явѣ ратуетъ на Евтихіа, безумствовавшего предложено быти естество человѣческое въ Божіе,

того дѣля, яко крѣплшее влечеть къ себѣ то, еже есть немощнѣе. Но слышимъ святаго Кирила, сицевую вѣру намъ предающаго, еюже увѣщаетъ Максима Цариградскаго архіерея, да держитъ аки котву извѣстную и твердую души своея: Единородное, глаголетъ, Божіе Слово, ниже преложеніа,¹... или измѣненіа... или слитіа,... или смѣшеніа... пострада, ниже въ то, еже не бѣ... измѣнися, пребысть же паче и въ нашемъ естествѣ еже прежде бѣ... И того ради Христосъ единосущенъ Отцу, и намъ по человѣчеству быти вѣруется, тако, якоже плоти быти изъ Богородицы Маріи, не бо подобно-сущенъ... еже есть изъ нашего существа Христосъ есть. Да никтоже убо по соединеніи раздѣленіа намъ примышляетъ, ниже на человѣка Еммануила раздѣлно и на Бога паки да раздѣляетъ, два лица творяще. Но во еже бы намъ ко предпріятію приступити. Клевещеши, о Никито, на Никона о приложеніи въ послѣднемъ трисвятомъ.... Иже бо прилагаетъ, или отлагаетъ подпадаетъ анаѳемѣ: *да не приложите*, глаголетъ во второмъ законѣ, въ гл. 4, *къ словесемъ, еже Азъ заповѣдаю вамъ, ниже да отымете отъ нихъ*. И въ послѣдней главѣ Откровенія: *аще кто приложитъ на нихъ, наложитъ Богъ на него язвѣ*. Нѣсть приложеніе, но истинное толкованіе, слыши, о Никито. Ибо приложеніе тогда глаголется быти, егда входитъ нѣкое разнствіе во предѣлѣхъ, или егда предлагается нѣчто новое, еже не быше въ

¹ Было: *вращеніа*.

предреченыхъ. Образъ буди: Богъ глаголется быти всемогущъ, и есть сицевъ; аще бы ся приложило, яко есть вседержитель, никое же будетъ приложеніе, зане проповѣдается о томъ же, но токмо речется быти истинное толкованіе, того ради, яко никимъ же обычаемъ измѣняется разумъ и предложеніе. Приложеніе же тогда глаголется быти и есть, егда что различное и новое полагается въ предложеніи. Да будетъ образъ: Духа Святаго исходити отъ Отца кромѣ времене... есть различно отъ того, яко исходитъ временно... и отъ Сына, занеже проповѣданія суть различная, иное же лице Отчее, и Сыновнее. Не впадаетъ убо въ анаѳему Никонъ, яко обычаю нашему Греческому подражая положи въ трисвятомъ *сила*, ибо истинно есть сила превосходителнѣ и оттягненнѣ... Пресвятая Троица. И да удалятся Никитова буйства, есть бо сила Богъ Отецъ, сила Богъ Сынъ, сила Богъ Духъ Святыи; обаче не... силы въ множественномъ числѣ, ибо сія силы суть Ангельскія крѣпости, и того ради Богъ глаголется Саваоѳъ, еже есть Господь силъ, и... Господь силъ. Еда не поемъ въ день пентикостіи... едина сила Святыя Троицы? Есть по истиннѣ Богъ... еже есть имѣяи силу естествомъ и чрезъ Себе самаго, и того ради вся, яже хочетъ, можетъ, противнѣ же не хочетъ, ибо *никто же блазъ, токмо единъ Богъ*. Глаголетъ Іоанъ въ Откровеніи, въ гл. 21: *стѣна граду имущая основаній дванадцать, и на нихъ имена дванадцати Апостоловъ Аинчихъ*. Како убо глаголетъ Павелъ въ первомъ

посланіи къ Коринѣомъ, въ гл. 3, глаголюще о Христѣ, о камени угольномъ, развѣ егоже основаніа инаго никтоже положити можетъ? Отвѣтую. Петръ и прочіи Апостоли суть каменіе и основаніа, но не суть собою каменіе и собою основаніе, сіе бо самому Христу приличствуетъ, иже истинно есть... якоже есть чрезъ себе животъ, чрезъ себе мудрость... И того ради Павелъ Апостолъ, глаголюще о Христѣ въ первомъ посланіи ко Коринѣомъ, въ гл. 1, *Христосъ есть, глаголетъ, сила, Божія мудрость...* Паче же Ареопагита Діонисій его именуєтъ... чрезъ себе крѣпкую силу. Чесо дѣля Экуменій толкова сіе реченіе *сила*: Христосъ, глаголетъ, и его страсти суть величайшія крѣпости доводства, того дѣля, яко мучителіе, тщавшіися имя Христово истребити, сами на послѣдокъ истреблени быша чрезъ древо крестное, еже цвѣтетъ даже до настоящаго дне, и святыи крестъ, иже нѣкимъ являшеся буйство быти, весь міръ спасе. Въ лѣпоту убо нарицается Пресвятая Троица крѣпкотворная сила... паче же отъ Архангела Гавріила, преблагословенной Дѣвѣ радостная благовѣствовавшего о таинствѣ воплощенія: *Духъ Святыи, рече, найдетъ на тя и сила Вышняго осынитъ тя*. Назнамени добрѣ. Наноситъ абіе Теофилактъ, како Святую Троицу изъяви, нарицаѣ Духа Святаго, силу-Сына, Вышняго-Бога Отца, егоже Никійскій соборъ именуєтъ всемогуща... или Вседержителя: глаголетъ бося Вседержитель Богъ того ради, яко вся изведенная содержитъ во своемъ положеніи и чинѣ, воеже бы не мощи ихъ чиновъ и союзовъ разрѣшиться.

Есть убо Всемогуцій, яко всѣхъ творецъ, Вседержитель паки, яко всѣхъ сохранитель. Многшая о Божіи могущствѣ чти у Кипариссіоты.

Но вопросиши: вскую паче полагается въ трисвятомъ *сила*, неже иное Божіе свойство? Отвѣтую: занеже ничто ино содержитъ въ служеніи смертныя тако, ничто паче отъ грѣхъ ихъ удаляетъ, яко Божіе сіе всемощество. Чесо дѣля, вегда слышати всякому чловѣку Бога быти всемогуща, и яко никако можетъ Его воли противитися, абіе боится, и ко любви Его подвижутся вси, во еже бы гнѣва Его гонзнути и казни послѣдующія на грѣшники. Еда не помните, яко егда Христосъ Господь быше во вертоградѣ, абіе рекшу ему: *Азъ есмь*, вспять идоша и на землю падоша, у Іоанна въ гл. 19? Бояхуся воистинну гласа силы Его, въ псал. 67, не инако, якоже въ день судный, егда речетъ Ісусъ: *идите проклятіи во онь вѣчный*. Воистинну окаяннѣйшіи суть нечестивыи и аѳеистове, иже или отрицають Бога, яко безумный... или не боятся Его, яко всемогущаго, занеже бо Онъ можетъ душу и тѣло погубити. Что мухъ хуждшее? Обаче и сими побѣди Фараона Египетскаго. Что аще бы лвы и парды на сего царя гордаго пустилъ быше? Единымъ токмо Ангеломъ, якоже имѣемъ въ книгахъ 4 царствъ, въ гл. 19, въ едину ношь осмьдесятъ пять тысящъ уби воевъ: что бы сотворили, аще бы легионы и тысящи тысящей Ангеловъ послалъ на погубленіе? Елики тмы и темъ тмы во общемъ потопѣ утопаша? Аще единымъ токмо очесъ маніемъ, въ Бы-

тіяхъ і 7, столпъ Вавилонскій разорилъ есть? Сампсонъ Божій слуга елико Филистеовъ единого осла челюстію побѣдилъ есть: что еще бы громы и молніины стрѣлы свыше извергль? Отверзеса земля и пожре Даѳана и Авирона, въ числѣхъ, въ гл. 16, егда зміими смертоносными наказа ропотники? Что еще бы множества послалъ демонская? О, воистинну всемогущества Божія!, о, неизреченныя силы Пресвятыя Троицы, еяже еще боялбися Никита, не восталъ бы противу его силъ и крѣпости, обличая Никона во вещи не обхудимой, но весьма похвалной. Баяніе Езопово здѣ предложу вмѣсто навершенія. Смышляетъ баснословъ¹ волка, егда хотяше овна² убить, отъ негоже никогда же никоею обидою раздраженъ быше, различными преступленіи клеветавша. Овну же вся клеветы ложно наносимыя удобъ отражавшу, обаче волкъ противныхъ стремленій не оставляше; егдаже праведнѣ одолѣти не возможе, зубы побѣдити потщася: возмущаеши ми, рекше, воды ко еже пити. Слушайте молю басноприложенія. Никита ненавистію нѣкою суетною возненавидѣвъ Греки, срамляся негли, еже вины кромѣ ихъ ненавидяй явитися, вины и преступленія смышляетъ на Никона, во еже бы его ненавидѣти, аки гречествующа показался. Но напоследокъ правда по насъ побораесть. Аще же Богъ будетъ съ нами, кто на ны? Воистинну, ни единъ лестникъ и клеветникъ ни единъ постоитъ.

¹ Было: мифологъ

² — овца.

28. Отраженіе оныхъ словесъ: *Никонъ злѣ истолкова полагаяще вмѣсто истиннаго Господа.*

Салесъ Милезійскій вопрошенъ не единожды отъ мудрецовъ Греческихъ, якоже повѣдаетъ Плутархъ въ своей бесѣдѣ: что бы было древнѣйшее? что краснѣе? что вящшее? что скоршее? что мудрѣе? что крѣплѣе? что напоследокъ непобѣдимѣе?—сическое даде отвѣтованіе, яко ничесоже Бога есть древнѣе, занеже всегда бѣ, ничесоже міра краснѣе, ибо есть образъ высочайшія красоты, ничесоже вящшее мѣста, ибо вся въ себе пріемлетъ... и содержитъ, ничесоже скоршее мысли нашея человѣческія, яже вся пребѣгаетъ, ничесоже мудрѣе време, ибо изъясляетъ яже суть тайна, купно же и сокровенна, ничесоже крѣплѣе нужды, яже есть неумолителна, ничесоже напоследокъ хотя непобѣдимѣе, яже вся содѣваетъ, отнюдуже глаголется: хотящему ничесоже не удобно; вся побѣждаетъ любы. Обаче же азъ хотѣлъ быхъ едино и тожде быти купно древнѣе и краснѣе, и вящшее и скоршее, мудрѣе и крѣплѣе и непобѣдимѣе, каковъ по истиннѣ есть Духъ Пресвятый, егоже языцы именоваша ума, по святому низіанзинскому богослову, иже умъ по разуму Анаксагора философа вся править и строить, и вся раздѣляетъ тричастнѣ... якоже поетъ Хійскій Омиръ. Но нѣкая предисловіа подложителна суть. Первіе же, по Діонисію Ареопагиту, сугуба есть богословіа: Случная... и раздѣльная.... Случную ту именуеть, еяже есть та, яже въ Бозѣ

суть нераздѣльна и всей Троицы обща, зрѣти. Сицева суть: естество Божественное, свойства его и приличства, вся яже ко внѣ, яже всей Троицы приличествуютъ. Раздѣльную паки богословію ту именуеть, яже раздѣльная и разлучная въ Бозѣ созерцаеть, и славить еже ко внутрь. Каковы суть Божественныя вѣпостаси, исхожденіа лицъ, свойства вѣпостасная и ежелибо Божественному лицу коему суть свойственна. Обѣ богословіи нарицаеть быти Духа Святаго богословію.. аще и раздѣляетъ на утверждающую... и отрицающую... по просвѣщеніихъ, отъ святыхъ отецъ намъ преданныхъ... Симъ прилагаетъ святой Максимъ, святаго Діонисія преизрядный сказатель, яко изъ божественныхъ именъ иная пріиматися обыкоша отъ повсемственныхъ смотрѣній, яко: царь, творецъ всемошный. Сія бо суть имена Божія смотрѣнія въ родѣ. Отъ частныхъ паки смотрѣній глаголется: Богъ боговъ и Господь господей, Царь царей. Не вси бо, но нѣціи глаголются бози, господіе и царіе. Ктому наблюдателно есть изъ Григорія, попревосхожденію¹ реченнаго богослова: два святая завѣта речена бывша земледвиженіе, единъ отъ идолослуженія къ закону Моисеову, другій отъ Моисеова закона къ Христову Евангелію; и третее земледвиженіе писаніе намъ вѣщаеть, еже есть преселеніе отъ сего житія въ другое, смерти всякія и смятенія² странное. Обаче сія не напрасно измѣни-

¹ Было: по преимуществу.

² Было: измѣненія.

шася, да не насиліємъ нѣкимъ привлечемся, но токмо увѣщаніемъ приведемся. Ибо еже нѣсть свободно, ниже есть долговременно.... Тѣмже убо первіе, истребивше идолы, жертвы попустилъ есть всемогущій собою Господь; таже, отдалше жертвы, обрѣзанія никако возбрани, во еже бы отъ языкъ Іудеемъ различствовати. Се же все обычаемъ врачевъ, яже недугующимъ Іудеомъ нѣкая попустилъ быше, во ежебы напоследокъ отъ жидовствованія въ Христіанство преложитися и Христіанми быти, по малу къ Евангелію принужденнымъ бывшимъ. Обрѣзаніе убо быше точію совѣта и строенія на нѣкое время, якоже христіанство есть цѣлаго и всего совершенства... даже до кончины міра. Симъ прилагаетъ Богословъ, яко изъ вещей иныя суть, яже глаголются, яко Богъ глаголется спати, и бдѣти, и гнѣватися въ божественномъ писаніи, еже во истиннѣ вещи не обрѣтается, ибо нѣсть Богъ плотенъ. Се же токмо смыслися къ понятію нашему человѣческому.... Иныя вещи аще и суть, обаче не глаголются, яко быти не рожденну, не началовану, безсмертну, еже есть чужду исчезненія, именно бо и явственнѣ въ писаніи сія реченія не обрѣтаются. Обаче же изъ самага священнаго писанія собираются сичевая именованія. Яко отъ Исаіи, глаголющаго въ гл. 44: *Азъ есмь первый, Азъ и по сихъ, и предо Мною нѣсть Богъ инъ, ниже по Мнѣ будетъ.* Такожъ изъ Апокалипси: *Азъ есмь алфа и омега, первый и послѣдній.* Иныя вещи ниже суть, ниже глаголются, яко еже быти Бога [не буди ми и помыслити] нечестива, Бога

блага же и зла по Манихейску, и яко образъ круглый есть четвероуголенъ, яко человекъ есть простъ, а не сложенъ отъ души и тѣла. Сія вся суть отъ истинны далека и лжами исполнена. Иныя напоследокъ суть же и глаголются, яко Богъ есть троиченъ и единъ, Духъ Св. есть едино лице отъ Св. Троицы, Сынъ Богъ же и человекъ, и истинно.... Но уже на подвигъ да изыдемъ, за вѣнецъ неувядающій... маслина изъ подвига.... Есть истинно Духъ Святый Духъ истинны. Тако имѣется у св. Іоанна, въ гл. 14: *Азъ умолю Отца, и инаго утѣшителя дастъ вамъ, да будетъ съ вами во вѣки, Духъ истинны, еоже міръ не можетъ пріяти.* Такожде и въ гл. 15: *Егда же пріидетъ утѣшитель, еоже Азъ пошлю вамъ отъ Отца, Духъ истинны, иже отъ Отца исходитъ, той свидѣлствуетъ о Мнѣ.* Тѣмже убо церковь католическая, сими основанми утверждшися, молитву творить: «утѣшителю Душе истинны».... Есть истинно Духъ Св. истинный; но точію Духъ истинны въ священнѣйшихъ писаніихъ. Аще же и глаголется негдѣ истинный, да похвалятъ мѣсто священнаго писанія совершенно и праведно; донелѣже бо явственными реченми сего не изъявятъ, никогда азъ безопасно приложуся ихъ толкованію.

Но инудѣ да преїдетъ наше бесѣдствованіе.¹ Между животомъ и смертію не дается среда, якоже и между работою и господствомъ сицевая среда у философовъ и богослововъ не попу-

¹ Было: винословствованіе.

щается. Рабъ бо, яко рабъ, господь быти не можетъ, развѣ чрезъ нѣкое величайшее злоупотребленіе и словоизмѣненіе. Вскую ми нужда будетъ приносить во свидѣтельство святаго Павла слова, идѣже Христосъ Господь, ко ученикомъ бесѣдующе, себе истинно Господа быти утвердилъ есть, у Іоанна въ гл: 13. *нарицаете мя господа и учителя, и добръ глаголете, есмь бо*, превосходителнѣ, сирѣчь, и по естества господствованію.... А яко и Духъ Св. есть Господь, доводится изъ Павла, къ Римляномъ въ гл. 8 глаголюща: *не пріясте бо Духъ работы наки въ боязнь*. Боязнь бо нѣкимъ образомъ съ естествомъ работы случися и спряжеся. Аще убо Духъ Св. нѣсть Духъ работы, благо наносится отъ вѣщаго къ меньшему, яко истинно есть Духъ господства и яко есть, естественнѣ, своезаконенъ... и свободенъ. Паче же, отъ Божественнаго писанія понужденъ, со дерзновеніемъ провѣщаю, яко ниже насъ божественный глаголь хочетъ рабы быти, занеже наше въ лучшее исправися естество. Тако ко ученикомъ своимъ глаголетъ высочайшая Истинна у Іоанна въ гл. 15: *не ктому васъ глаголю рабы, но друзи*. Аще убо то, еже по намъ есть, заключаетъ Григорій Нисскій, Евноміа препирающе, отъ работы безчестіа будетъ свободно нѣкогда, како всего міра Господь поработится.... Рабъ бо сый, невѣдѣти должнствуетъ, яже Господь его творить. Паки безчестіе есть самая работа. Сынъ же царскій, раждайся, въ работу не родится, но на господство. Убо аще отъ Господа Духъ Господь исходитъ, яко царь изъ

царя исходитъ, а не яко рабъ, занеже бо Отецъ есть Царь царей, и Господь господствующихъ. Поларіане соизволяху Троицу быти единоестественну, обаче не хотѣша мощи глаголатися сія три... быти единого Господа и Бога, въ словесѣхъ точію разнствующе. Ибо аще единого естества и божества есть Святая Троица: послѣдовательно есть еже исполняти ю Сынови, якоже и Духови Св. и обоему Богомъ быти и отъ божества обществовати. Аще же Сынъ глаголетъ у Іоанна въ гл. 14: *умолю Отца и инаго утѣшителя пошлетъ вамъ*, пошлетъ же *во имя мое*. Аще во имя Христово посылаетъ Отецъ, уже Христосъ свою честь и достоинство весьма явственну сотворилъ есть: убо не яко раба посла Духа Св. Богъ Отецъ, или подчиненнаго, но яко Бога, себѣ единосущна. Утверждается то изъ святаго Павла, пишуща къ Галатамъ въ гл. 4: *посла Богъ Духа Сына своего въ сердца наша, вопіюща Авва Отецъ*. Тѣмже мы нѣсмы раби, но сынове пріобщеніи. Како убо Духъ Св., аще рабъ быше, а не Господь, насъ вѣрныхъ возможетъ сотворити господы, и чрезъ пріобщеніе сыны Божиими? Помню, яко чтохъ и ушима моима пріяхъ святой сей символъ цариградскій, отъ всея церкви нынѣ держимый и повѣствуемый, составленъ быти отъ Григорія, по рекломъ Богослова, прежде престола си Цариградскаго оставленія. Но Григорій Назіанзинъ, якоже видѣти есть въ его богословскихъ состязаніихъ, ничесоже ино тщашеся, точію ересь Македоніеву поспрати же и истребити. Тѣмже, егда положи въ символъ реченіе сіе *хѳріον*,

Господа, тѣмъ весма обычаемъ умствова, имже и первый соборъ Никейскій на Аріа, бесѣдуя о божествѣ Сына, узаконяя быти Господа, *κὺριον*, вышеумствова. Инако ничесоже опредѣлилъ бы и никоимъ же образомъ истребилъ бы, искореняя гидру стоглавую Македоніеву. Сей бо лжепророкъ исповѣдаше Духа Св. быти Духа истинна, ниже быти Духа погрѣшенія... о немже самъ ни мало сумняшеся, ниже отрицаше, то едино весма дерзаше и проповѣдаше, Духа не быти истинна Бога и истинна Господа. Тѣмже глаголателно есть и вѣрително Назіанзинскаго богослова, егда положи въ символѣ Цариградстѣмъ вѣрую въ Духа Св., вѣровавша, яко въ Господа, а не яко въ истиннаго Духа, инако бо возвратил-бы-ся толикій мужъ къ началу, *το ἐν ἀρχῇ*, якоже глаголють философовѣ... Воистинну Богословъ въ словѣ 44 различныхъ употребляетъ обличеній, ко еже утвердити се, оное же есть началншее: аще Господь есть, яко сицевъ отъ всѣхъ покланяемъ быти имѣетъ, ибо послѣдовательно Богъ есть, аще же Богъ, и Господь будетъ, послѣдовательно же почитателенъ купно со Отцемъ и Сыномъ, о немже Македоніане негодоваща, и соизволити сего не хотѣша. Ниже ползуетъ нѣкихъ прибѣжище, яко лучше звяцаетъ въ Рускомъ языцѣ, Духа святаго истиннаго быти, неже быти Господа, и тожде знаменовати Духа быти истиннаго, еже Духа истинны. Уже бо помянухомъ веліе быти разстояніе между сима реченіима, и едно отъ другаго различствовати, да не будетъ слитіе въ божественныхъ именехъ.

Но прочее да поступимъ поспѣшеніемъ Пресвятаго Духа. Вѣдати подобаетъ, яко егда дается кому нѣкое превосходительное имя единыя ради вины высшія, тожде имя пренестися не можетъ ко иной винѣ меньшей, того ради, яко обхудилося, но токмо къ той первой винѣ высшей и вящей. Глаголють бо законоискусныи, яко почитанія суть распространителна, а не умалителна. Но вяществуетъ имя Господа, неже имя истиннаго въ божественныхъ именехъ: убо сіе имя, вящее сущее, даятелно есть Духови Св., а не имя, еже мнится меньшее. Меньшее паки быти, еже быти истиннымъ, неже быти Господемъ, доводствуется. Зане того ради Христосъ не нарицается Сынъ Святаго Духа, аще и зачатъ изъ Духа Святаго, яко чрезъ первое оное сыновство вящее, рожденъ сый изъ Отца, сицевое имя пристяжалъ есть прежде неже изъ Духа Святаго зачася. Убо подобнѣ, занеже именованіе Господа есть изрядншее, и изъ перваго умствования божества меньшее именованіе¹ есть еже быти истиннымъ: оно проповѣдателно есть паче, неже сіе, еже много есть низшее, ниже божества изъясляетъ совершенно. Но да приступитъ къ намъ Ареопагита Діонисій, и своею острою богословскою умъ нашъ да утвердитъ. Сей бо, глаголюще о божественныхъ именехъ въ гл. 2, сицевая изрещи не усумнѣся.... Господство всего міра все Божество содержитъ. Идѣ же разсуждаю реченіе оно господство, и сіе доводствую. Все Бо-

¹ Въ обоихъ мѣстахъ написано было вмѣсто именованіе—реченіе.

жество содержитъ господство, егоже ради Господь именуется тако Отець, якоже Сынъ и Духъ Св. Убо аще не речется Духъ Святый быти Господь, будетъ ложно предложеніе Ареопагитово. Ложно же быти не можетъ: убо заключительно есть Духа Святаго быти Господа, того ради, яко все Божество содержитъ господство... Но далечае поступимъ. О Бозѣ Отцѣ, родившемъ Сына, блажится и проповѣдается реченіе Господь.... Но завѣщаетъ таможде святый Діонисій, яко и Духъ Господь есть: *послеши, поетъ псалмопѣвецъ въ псалмѣ 103, Духа Твоею, и созиждутся*. И въ Дѣяніихъ Апостольскихъ въ гл. 5, обличая Ананію, Петръ Апостоль рече: *почто сатана исполни сердце твое солгати Духу Святому*. Видиши, о Никито, како Діонисій весь, коликъ есть, полагаетъ свое тщаніе ко еже показати Духа Святаго быти Господа.

Раздѣляютъ богословцы сія три предложенія, еже вѣрити Богу, вѣрити Бога, и вѣрити въ Бога. И тако вѣрити быти Бога нѣсть первыя вѣры членъ, ибо и демоны вѣрятъ и трепещутъ, по нашему Іерусалимскому предстателю, въ посланіи си соборномъ. Отсюду подвигся, Дамаскинъ исповѣда, яко быти Бога всѣяно есть отъ естества.... Того дѣля въ нуждахъ и въ различныхъ бѣдахъ къ высочайшему Богу вси прибѣгаемъ, аки ко общему нѣкому прибѣжищу и твердыни. Вѣрити Богу есть уповати Богу, и тако разумѣти подобаетъ оное мѣсто у Іоанна въ гл. 2: *самъ же Іисусъ не вдаяше себе въ вѣру ихъ*, а якоже во иныхъ лежитъ переводѣхъ: не вѣрова себе самаго имъ, сирѣчь не упо-

ваше имѣ. Вѣрую мя тебѣ, есть обычай древній глаголанія, и знаменуетъ уповаю на тя, или тебѣ. Егда убо вѣруемъ Богу, показуемся имѣти сами упованіе и весма е кѣ нему образнѣ чествовати, по оному: не обинуяся уповаю на Бога и неубоюся, сеже яко Богъ истиненъ есть. Но имѣется во второмъ законѣ, въ гл. 32: и того ради благословляется мужъ уповаяй на Бога. Остаетъ убо быти свойственное дѣло Христіанскія вѣры вѣрити въ Бога, во Троицы единого, во наше оправданіе, занеже бо *праведникъ отъ вѣры живъ будетъ, и: праведникъ уповаяй, яко левъ будетъ безъ страха,* въ притчахъ въ гл. 28. Тако вѣрова Авраамъ въ Бога, уповая Богу въ надежду благодати, противу надеждѣ естества, по разуму святаго Павла къ Римляномъ въ гл. 4. *Буди, глаголетъ Апокалипсисъ въ гл. 2, вѣренъ до смерти, и дамъ ти вѣнецъ живота.* Сія сиче истолковавше, тако настою вѣры предлогъ, поелику лѣтъ есть, должнствуетъ быти тойжде и неизмѣненъ, по многимъ писаніа мѣстамъ. *Ты же тойжде еси,* глаголетъ псаломъ 101. *Азъ есмь сый,* глаголетъ Богъ, *и не измѣняюся.* Но аще речется: «въ Духа Святаго истиннаго», уже предлогъ вѣры не былъ бы тойжде, но измѣненъ, занеже господство, а не истинство проповѣдается о Отцѣ и Сынѣ. Глаголемъ бо: «вѣрую во единого Бога Отца вседержителя,» еже есть тако видимыхъ, яко и невидимыхъ Господа. Вѣруемъ «и во единого Господа Ісуса Христа». Убо, во еже бы предлогу вѣры быти томужде и неизмѣнну, глаголателно будетъ: вѣруемъ и во единого «Духа Господа» тако,

дабы господству *христѣ* проповѣдаться о всѣхъ трехъ лицахъ равнѣ и неизмѣнно. Но настояти будещи: Платонъ исповѣдуетъ: аще Богъ есть, убо не лжетъ; аще ли лжетъ, нѣсть Богъ. Убо Богъ есть истиненъ. Убо ко разнству отъ чело-вѣковъ, иже суть лживы, по оному псалму, *всякъ челоувѣкъ ложъ*, Духъ Святый, иже Богъ есть, именователенъ есть истинный, не инако, якоже Христосъ глаголется «Богъ истинный отъ Бога истинна». Отвѣщаю: никтоже отречеть Духа Святаго быти Духа истинна, но токмо глаголемъ, яко рече-нiе *христовъ* не полагается вмѣсто истиннаго, но вмѣсто Господа. Паче же воспяшаю обличенiе къ челоувѣку. Егда глаголемъ: «и во единого Господа Исусъ Христа», уже полагается реченiе... аки Господь, и чаственнѣ... аки истинный. Явственнѣ. убо, аще Духъ Святый былъ бы Господь, и истинный купно уже явственнѣ положитися должн-ствоваше во святомъ символѣ Никейскомъ. Нѣсть положено явѣ во святомъ символѣ Никейскомъ, ни на сакосѣ патріархи Фотіа, на немже весь символъ златыми писмены изобразися, ни во иныхъ символѣхъ отъ святѣйшихъ патріарховъ различными времены сѣмо пресланныхъ. Пачеже по все-ленскомъ второмъ соборѣ Цариградскомъ послѣд-ствующи вси собори неразнственнѣ и неизмѣнно благочестнѣ пріаша, ничесоже прилагающе, или отлагающе отъ сего святаго символа. Убо нѣсть глаголателенъ въ символѣ Духъ Святый купно Господь и истинный, по глаголу святыхъ отецъ Никейскаго собора, того ради, яко нѣсть купно

явѣ положено въ Никейскомъ символѣ Господь и истинный. Да будетъ въ навершеніа мѣсто Симеона Селунскаго изряднѣйшее умствование. Искони, якоже лежитъ въ Еврейскомъ языкѣ, *Бози* сотвори небо и землю; проповѣдуется реченіе множественное *Бози*, яко еже знаменовати три лица быти создавшая небо и землю. Ибо у грамматиковъ видится быти злое согласіе, егда совокупляется число множественное съ единственнымъ; обаче въ таинственной Богословіи есть праведнѣйшее и истинное согласіе. Ктому Исаіа, извѣствуяй намъ, яко ангельскій умъ трици поется отъ божественныхъ духовъ: *святъ, святъ, святъ*, иже на послѣдокъ заключаютъ: *Господь Саваоѣ*. Реченіе паки Саваоѣ, по предреченому Симеону, знаменуетъ... вседержителя. Се, како проповѣдуется вседержитель равнѣ и неизмѣнно о трехъ лицахъ? Убо занеже есть Господь Саваоѣ, Духа Святаго Господа полагати годствуеть въ символѣ, а не истинна, занеже Саваоѣ никоимъ обычаемъ сего знаменуетъ. Симъ придаждь, яко Адонаи тожде есть еже Господь, или вседержитель, у Іезекіиля. Глаголетъ бо пророкъ:.... *Адонаи Господи*. Паче же и Святый Павелъ, изъ егоже святіи отцы собирають Божество Святаго Духа, явственнѣ глаголетъ: *Господь же Духъ есть; идѣже, паки, Духъ Господень, тамо и свободство*, Видиши, о Никито, како изъ господства изводится Божество Духа Святаго, а не изъ самыя истинны. Добрѣ убо предрекохомъ господство быти изъяснительное нѣкое... всея Пресвятыя Троицы, въ нейже есмы, живемъ

и движемся. Нѣсть убо, якоже Платонъ хотяше; Святый Духъ душа міра: яко Духъ Святый оживляетъ, а не оживляется. Господь и Духъ Господень: тѣмже купно спокланяемъ есть и сославимъ со Отцемъ, купно и съ Сыномъ. Богъ же почитается яко Господь. Писано бо есть: *Господу Богу твоему поклонишися, и Ему самому послужиши*, у Матѳея въ гл. 4. *Богъ Господь и явился намъ*, си есть Христосъ. Богъ и человѣкъ.... Убо, занеже покланяемъ есть и сославимъ Духъ Святый купно со Отцемъ и Сыномъ, поклонопочитателенъ есть, яко Господь, поклоненіемъ богодостойнымъ, занеже есть истинно творецъ небесе и земли, иже вся созда, Богъ есть, глаголетъ Апостоль къ Евреомъ въ гл. 9 и къ Римл. въ гл. 2. *изъ Него, чрезъ Его и въ Немъ вся суть*. Изъ Его, Бога Отца, аки отъ образа перваго, иже въ себѣ вся содержитъ и имѣетъ. *Чрезъ его*, си есть чрезъ Сына, иже есть сила Отца и вина дѣйствительная всѣхъ вещей, идѣже наблюдательно есть оное *чрезъ, ѿ оѣ*, не пріиматися орудійно, якоже пряхуся Аріане, но началственнѣ.... Инако бо наноситъ Теофилактъ: Аще Сынъ есть самое орудіе отчее въ міротвореніи, міръ былъ бы честнѣй и лучшій самага Сына Божія, отча орудія, занеже орудіе усугубителнѣ, яко орудіе, есть низшее и меншечестное. И *въ немъ*, си есть, въ Дусѣ Святѣ, иже есть вина конечная всѣхъ вещей, носяй вся словомъ силы своея, по оному приточному въ гл. 16: *всяческая себе ради содѣла Господь*. Того ради во Апокалипси именуется Алфа и Омега, начало и конецъ, всякаго дѣла.

Духъ Господень, глаголетъ Моусей, *ношашеся верху водъ*; или, якоже чтеть изъ Сирска языка св. Василій, *належаше верху водъ*, или *согрѣваше воды Духъ Святый*, обычаемъ кокоши, во еже бы имъ дати силу воспріятія образовъ, во умѣ божественномъ уже предуготованныхъ. Святый Григорій Нисскій имя Θεος производитъ изъ видѣнія... и того ради просто именуетъ Бога назрѣтеля нашего, и смотрѣтеля.... Обаче же святый Аѳанасій Синаита хочетъ сие нарицатися Бога... за изряднѣйшее расположеніе вещей созданныхъ. Обаче оба заключаеа, и преблаго, яко именованіе Бога знаменуетъ дѣйство, а не естество....

Приди убо, святый Душе, и освяти умы тѣхъ, иже о твоємъ господствѣ колебаться явствуются, воежебы единомудушно вѣрующе глаголати: «и въ Духа святаго Господа животворящаго, изъ Отца исходящаго»; и рекутъ вси людіе: Аминь.... Есмы бо истинныи душъ пастыріе, и слова Христова вѣрныи икономи, святымъ подражающе: Василію Великому, и Григорію Богослову, паче же и Аѳанасію, о немже самъ Назіанзинъ повѣствуетъ, яко Римляны, между собою несогласныя, онъ примири,¹ обѣ бо странѣ кротко и благодатно призвавъ къ себѣ, и словесъ разумъ прилежно и тщаливѣ разсудивъ (бѣше же вопросъ о вѣпостаси, три ли глаголати подобаше вѣпостаси быти, или лица); егда же согласны обрѣте, и елико есть ко ученію никоимъже образомъ между собою разгласующія, тако дѣло

¹ Было: соедини.

соверши, да не именъ употребленіе попускающе
вещми ихъ связалъ есть, сирѣчь яко Отець истин-
но есть и вѣстаетъ, Емуже да будетъ честь
и слава во вѣки вѣковъ.

29. Отраженіе сихъ словесъ: *Писано есть въ Ни-
коновой Скрижали о гмнѣ Богородичномъ, отъ Ко-
смы Епископа Маіумскаго сложеномъ, аки во время
страстей Христовыхъ отъ него нѣтъ бысть, Бого-
родица же Дѣва возвеселися зѣло и аки усклабися.*

Есть птица нѣкая, юже Италиане Армелиніа
именуютъ, чистоты толикая любительница, даже
волить уловленна быти, неже свои нозѣ блатомъ
покаляти и мало осквернити, не инако якоже и о
Пифагорѣ пишется, егоже егда врази постизаху
Кротонятове, во еже бы убити его, достигль даже
до нивы насѣяныя бобами, ихже аще бы хотѣлъ
топтати, могль бы былъ смерти гонзнути удобно,
обаче онъ ста неподвиженъ, глаголюще: изволяю
паче уловленъ быти, неже бобы сія ногама попи-
рати, и тако уловленъ и убіенъ бысть. Онъ бо
между прочіими учаше воздержаніа отъ бобовъ,
аки отрицаѣя философъ бобовъ ясти, тоже из-
лишняго ради ихъ надутіа, еже ума упокоенію
видится быти излиха противно, занеже вѣтроро-
денъ зѣло бобъ есть и изваренію неудобенъ, яко-
же повѣствуетъ Климентъ Александрійскій въ гла-
вѣ 2 Строматъ си; ктому яко обычѣ возмущати
соніа, изъ нихже происходятъ волхвованіа, сеже
все ради дебелыхъ паръ, испущеныхъ до мозгу.
Прилагаху симъ нѣціи Пифагорици, яко бобъ рав-

няется человѣческой главѣ, по обычному оному стиху.... Тожде есть бобы ясти, еже главы родителей. Теофрастъ, въ книзѣ 5 о винахъ естественныхъ, пишетъ кожи бобовыя, окрестъ кореній древесъ новосаженныхъ всыпаныя, абіе изсушати дрevesа. Отнюдуже, глаголетъ, жены неплодствовать за ястіе бобовъ. Ктому кровь раждаютъ и похоть возбуждаютъ. Сія и иныя символы подобнѣйшія вѣдуще, предобрѣ Пифагорическая Теано, егда отъ мучителя нуждашеся явѣ извѣстити, егда ни бичми ниже коими либо муками возвѣстити хотяше, угрызе языкъ си, и тако отсѣченный исплева на мучителя абіе. Якоже и Александрійская она дѣвица ископа очеса си рукама своими и мучители предложи я, ихже красотою толико уловленъ быше. Но, о воистинну-крѣпость преблагословенныя Дѣвы, кресту предстоявшія, егда острѣйшій мечъ душу ея проболъ быше, по Симеонову прореченію, о нейже святой Амвросій: «стоящу подъ крестомъ Богородицу читаю, плачущія же ея никако обрѣтаю»! Стояше бо подобіемъ финикса, тяжкая страждущи, яко поистиннѣ Маріа, еяже и имя знаменуетъ возвышенная.... Не невѣмъ трагедіи о Христѣ страждущемъ, юже нѣцїи приписовати не Григорію Богослову, но Аполлинаріеви усилствуютъ, и достоѣпно отрѣцають сіе дѣло быти толика богослова, занеже въ томъ вводится Богородица стнящая и рыдающая. Тамо бо обрѣтается сицевый стихъ, иже дивнымъ образомъ нѣсть ми годѣ... «Душею болѣзненною плакаше гласящи: увы, увы, увы, увы, мнѣ окаянной! погибаю»... Отъ сихъ

убо и соподобныхъ зазрю быти Назіанзиново. Но о семъ не хочу остро стязатися, и уже къ Никитовымъ лживымъ словамъ обращаюся, емуже приличствуетъ оное антистрофонъ премудраго: «о, да будетъ ми ума капля едина, неже делва имармены». Усклабитися глаголетъ благословенную Дѣву Ксанфопуль Никифоръ, патріархъ Цариградскій, вегда услышати ей новое пѣніе.... *Честнѣйшую Херувимъ*, еже зѣло обхуждаетъ той, иже ни концемъ, якоже глаголется, перста прикоснуса образомъ вѣтійскимъ. Риторове бо шипки смѣются, туги и симъ подобная, образомъ метафорическимъ повѣствуютъ. Отнюдуже Назіанзинъ во увѣщеніи къ Дѣвамъ сице поетъ... во святая святыхъ вошла еси смѣяся, си есть веселшая вошла еси въ монастырь. Равнѣ во время пасхи поемъ... *Ликуй нынѣ и веселися Сіоне*. Но како ликуетъ и скачетъ гора Сіонъ бездушная? Не вся ли сія глаголашася чрезъ образъ? Тѣмже обычаемъ святой Кирилъ въ похвалахъ благословенныя Дѣвы Маріи, радуйся, глаголетъ, Марія Богородица, еяже ради ангели ликуютъ... архангели веселятся... страшныя вѣны испущающе. Не могу здѣ удержатися, во еже бы ми напоследокъ не возгласити: о, воистинну дебелости сего человѣка, Никиты! Кто изъ смертныхъ дерзнулъбы пѣти вѣнъ во время страсти Христовы, егда и Апостоли утекоша, еще же и самыи ангели прегорко плакаху? *Поражу пастыря*, глаголаше Христось, *и разыдутся овцы*, у Марка въ гл. 14. И како Христіани присутствовати тогда могоша, иже ниже сицеваго имени тогда пристязаша, но по преславнѣмъ вознесеніи Хри-

стовѣмъ? Едва Никодимъ, нощный онъ ученикъ, и Іосифъ изъ Аримаѳеи погребеніе Христова могоша отъ Пилата одержати. Повѣствователно убо есть, яко благоговѣиствомъ подвиженъ Косма пѣснописецъ, внегода памяти страстей совершатися, во великую оную седмицу, сичевое пѣніе во честь преблагословенныя Дѣвы издалъ быше. Тѣмже убо погрѣшивша сего Никиту... поползновеніе памяти быти непщую, и аки скокъ нѣкій... изъ одинаго вмна во другій мною быти. Писано бо есть отъ святаго Германа патріарха Цариградскаго, онъ вмнъ, во второмъ антифонѣ пѣваемый, *Единородный Сынъ, Слово Божіе*, сложенъ отъ Іосифа и Никодима, егда во новѣ гробѣ тѣло Христово съ веліимъ попеченіемъ погresti тщяхуся. Отсюду памяти поползновеніе Никитѣ приписую, въ неже многаши и изрядніи мужіе пасти обрѣтаются. Прочее же излиха неискусенъ судимъ былъ бы безумный сей Никита, аще бы вѣрилъ въ великій оный пятокъ Косму, иже ниже рожденъ въ то время быше, пѣвша быти пѣснь оную о Пресвятой Богородици. Суть, иже глаголють сей вмнъ *Единородный Сынъ* написанъ быти отъ Святаго Кирила патріарха великія Александріи противъ Несторію, отрицавшу Христово божество, совершившуся Ефескому собору. Обаче Кедренъ свидѣлствуетъ, отъ Юстиніана царя составленъ быти въ то время, егда тщася приложити въ символъ оная словеса.... *единъ сый отъ Святыя Троицы*. Но занеже удержася отъ благочестивѣйшихъ отецъ шестаго вселенскаго

собора, ради общаго онаго суда: ничесоже прилагателно или умалително во правилѣ вѣры,—сеймнѣ сложи, или поне повелѣ сложити сицевый, *Единородный Сынъ*, яко знамя нѣкое воздвиженое... противу единовол(ни)комъ. Таже вѣдателно есть пѣніе сіе: *Достойно есть яко воистинну блажити тя Богородицу*, даже до оныхъ словесъ: *матерь Бога нашего*, сложено быти во царственномъ градѣ Константинополстѣмъ отъ златаго языка Златоустаго, тѣмъ извѣтомъ, егда различными еретицы дерзаху ношю нѣкія пѣсни пѣти во укоризну воплощенна Бога Слова. Послѣжде же святой Косма приложи оная словеса: *Честнѣйшую Херувимъ*, даже до конца, якоже свѣдѣтельствуеть Ксанфопуль, мужъ искуснѣйшій и церковныя исторіи писатель изряднѣйшій. Да нѣмствуютъ убо еретицы вси, тако новіи, якоже и древніи, сущіи Маріобореи! Молчи ты во первыхъ, о Манихее, ибо аще не бы облеклъ мя Христосъ, не спаслъ бы мя. Аще не взялъ бы души, о Аполинаріе, душа моя и умъ мой, иже есть око души, не исправила быстася. Молчи, о Аріе, отрѣцавый Слово рожденно быти тако изъ Отца, якоже и изъ Маріи. Умолкни, о Павле Самосатскій, ибо плоть Христова не сниде съ небесе, но взята есть изъ Маріи Дѣвы. Того бо ради речеса Христосъ плодъ чрева дѣвича, яко родися отъ Дѣвы. Ибо прочіи сынове отчѣ суть плодъ, глаголетъ Теофилактъ, Христосъ же Сынъ чрева есть дѣвича и нарицается плодъ, едина бо сама его родила есть... и того дѣля святой Василій повѣдаше Христа не быти рожденна

по обычаи нашемъ челоѣчестѣмъ, ибо мы раждаемся изъ мужеска сѣмене, Христосъ же чрезъ оѣненіе Святаго Духа, вмѣсто мужа дѣйствовавши.... не инако, якоже первый Адамъ созданъ бѣ отъ Бога, и сама мати наша Ева изъ ребра Адамова сотворися. И се есть оное четвертое въ притчахъ Соломоновыхъ, въ гл. 24, егоже не можаше сразумѣти: *тріе ми, рече, суть невозможни разумѣти и четвертаго же не свѣдѣ: слѣда орла паряща по воздуху, и стези корабля плывуща по морю, и пути змїя ползуща по камени, и пути мужа въ юности его, или, яко иныи Вивліи имѣють: и пути мужа въ юницы.* Христосъ бо есть орелъ, высоко парящій въ день своего еже на небеса вознесенія. Корабль въ морѣ—во время гоненій, наипаче же въ день страстей. Змїй возвышенъ на древо креста, такожде и въ каменнѣмъ гробѣ положеный. Мужъ на послѣдокъ въ юницы, яже есть Дѣва Марїа, изъ неяже родися челоѣкъ совершенный, аще видѣнъ бысть отроча. Бысть же совершенъ тако въ разумѣ, яко и въ благодати, якоже предрекохомъ, приравняюще же оное пророчество Іеремїи пророка въ гл. 31: *жена обыметъ мужа.* Жена сирѣчь она, исполнь благодатей, украшенная добродѣтелми, отнюдуже правилнѣ наречется¹... и благословенна между всѣми женами, паче же и возвышена во время страстей, изряднѣе же за врожденную ея господскую добродѣтель, всякую женскую силу превосходящую. Но уже да речемъ нѣчто о имени Богородичнѣмъ, обаче изъ-

¹ Было: *именовася*.

ятое изъ различныхъ вертоградовъ отецъ святыхъ греческихъ. Ниссійскій убо Григорій въ день Рождества Христова глаголетъ, яко святая ея родителница, яже благодать знаменуетъ, егда желаній своихъ бысть сподоблена, воспріять же дщерь, именова ю Марію, во еже бы и самымъ именемъ свѣдѣлствовати пріятное дарованіе отъ Бога Доволно убо гадателствова толикій святѣйшій учитель, ибо Іеронимъ въ книзѣ о именахъ Еврейскихъ предасть, яко мнози непщуютъ Марію толковатися: *освѣщаютъ мя сія*, или просто *освѣтителница*, или *смирна моря*. Унше же есть, глаголетъ, да речемъ знаменовати *звѣзду моря*, или *горькое море*. Но въ языцѣ Сирстѣмъ Маріа госпожа именуется, аще секратіи стязаются сіе имя быти сложеное изъ Сирскаго и Еврейскаго, и глаголють знаменовати госпожу моря. Но много пространнѣе толкуетъ святой Епифаній преблагословенныя Дѣвы Маріи именованіе въ похвалахъ, яже о ней сложилъ есть. Марію, глаголетъ, сказывати обычай имамы госпожу, *хуріау*, и надежду, ибо роди Господа, иже есть надежда всего міра. Паки имя Маріа толкуется смирна моря, того ради, яко имѣ родити бисеръ безсмертный... маргариту въ мори, си есть въ мірѣ, Христа Господа, пристанище нашего покоенія. Паки Маріа толкуется освѣщенная... яко та, яже есть освѣщенна отъ своего и Божія Сына, и вся концы земли освѣтила. Напоследокъ святой Прокль, патріархъ Цариградскій, въ бесѣдѣ¹ о воплощеніи Христовѣ, многая о таинствѣ во-

¹ Было: *омиліи*.

площеніа глаголавъ, многія собираетъ похвалы о Дѣвѣ Маріи, но зѣло метафорически сія глаголетъ: есть пречудное онаго строителя тканіе, въ нейже неизреченымъ нѣкимъ обычаемъ пречуднаго онаго соединенія риза содѣяся, егоже ткагель бысть Духъ Св.—прядущая сила, свыше осѣнившая; волна—древніа Адамли кожи; утокъ нескверный—плоть дѣвичая; чолнецъ ткательскій—безмѣрная носившіа благодать; дѣлатель—Слово, слухомъ вшедшее.... Маріа есть гора несѣкомая, отваленный имѣющая камень Христа, о немже мудрѣйшій Даниилъ глаголетъ: *отсѣчеса камень отъ горы руку кромѣ*, си есть безъ мужа. Твердый камень Христа дѣва родила есть кромѣ бѣды и болѣзни, Еввы антитипонъ, иже и самую Еву возстави и паки въ рай насади. Но воистинну вся вещи неудобныа чловѣкъ ни глаголомъ сказати можетъ, ниже умомъ помыслити: отнюдуже глаголаше и праведнѣ повѣдаше Сократъ: се едино вѣмъ, яко сего единого не вѣмъ. Тако Аристотель, о немже Лукретій глаголаше, яко родъ чловѣческій остроуміемъ прехождаше, егда всѣхъ вещей естество изслѣдова, со всею своею премудростію, егда же Еврипово естество и его движеніе познати и изслѣдовати хотяше, но никоимъ же обычаемъ можаше, глаголетъ Ноній, Греческій сказатель Богослова въ главѣ 4, яко въ часть рѣки Евриппа воверзеса, сія словеса изрекше: занеже Аристотель не поялъ Евриппа, Евриппъ убо да поиметъ Аристотеля. Подобная бѣ кончина Плинію, иже егда Везувіа горы пламенеродныа, лежащія близъ Неа-

поля, пламеней не поятъ, самъ ся въ ню воверзе, якоже и Емпедоклъ, иже во Етну гору Сикилійскую безсмертіа ради волею самъ ся врину. Мы убо да плѣнимъ разумъ нашъ во служеніе вѣры, ничесоже внѣ предѣловъ мудрствоватьи усиленно. Ибо излиха возвышающіися вѣщимъ падаютъ паденіемъ въ Скиллу и въ Харивдъ ересей.

30. Отраженіе оныхъ словесъ, Яко подобаетъ на Никона¹ собрати свнодъ, на немже не токмо церковнымъ мужемъ, но и мірскимъ присутствоватьи требъ есть.

Во обычаи положено быше у Аѳинъ гаждательная си писати и на столпѣхъ ваати; быше же онъ столпъ четвероуголна образа, на немже имя гаждаемаго укорителнѣ² нарѣзывашеся, отнюдуже слово оное обличительное Гречески... именовася, и оставаше изваанна во будущую дѣла память. Равнѣ егда кто изъ училища Пифагорическаго исхождаше, на столпѣ имя его писашеся, съ сицевымъ написаніемъ: сицевый философъ умре. Воистинну и Никита мертвъ есть, яко отходитъ отъ училища отецъ святыхъ. Не хула ли всимъ видится, свнодъ собирати съ присутвіемъ мірянъ! Сей свнодъ былъ бы химерическій и подъ прегубомъ луны положителенъ. *Братъ, глаголетъ въ притчахъ, въ гл. 18, пособствованъ отъ брата,*

¹ Было: *противъ* Никона.

² — *ругатель*.

аки градъ твердый. Никита же, аще бы былъ поистиннѣ... си есть своихъ братій священниковъ любитель, въ сицевыя чудесная словеса не изривалбыся.¹ Паки, св. Павелъ былъ воистинну своихъ любителнѣйшъ, и того ради желаше быти анаѳема, си есть отлученъ отъ Христа, въ посланіи къ Римл., въ гл. 9. Моисей сродниковъ своихъ бысть же рачителнѣйшъ, и къ Богу сицевая словеса глаголаше, во Исходѣ въ гл. 38: *аще ирѣхъ имъ оставиши, остави, аще ни, отъ книжи, юже написалъ еси, и мене истреби....* И тако врагъ своихъ сосвященниковъ именователенъ есть Никита, егда калвинскимъ обычаемъ Вавилонское смущеніе умышляваше. Слыши ты, куплю дѣющіи никогда же видѣни суть на соборѣ, того дѣля, яко явственнѣ сіе есть противъ закономъ соборовымъ. Кто Георгія Схоларія изученшъ?—Обаче синодалному соборови присутствовати нѣсть дерзнулъ, ибо быше мірянинъ, аще саномъ и совѣтникъ. Но уже на мѣрилахъ разсуждающе сія положимъ, во еже бы паче и паче правдѣ возсіяти. Павелъ Апостолъ, пишуще къ Ефессеомъ, въ гл. 4, глаголетъ, яко Христосъ даде церкви си *пастыря и учителя.* Пастыри же и учителя суть воистинну епископи, церквей частныхъ пастыріе бодрѣйшіи... Того ради, глаголетъ Августинъ, отъ Бога дадошася епископи, во еже бы слово и таинство вообщили. Но въ церкви яже учиненное гражданство глаголется яко ополченіе чинно устроенное. Есть чинъ пастырей

¹ Было: *не испадаль бы.*

же и овецъ; паче же между пастырми священницы суть низшіи, высшіи паки епископи и архієпископи, митрополити и патріарси, яко тіи, иже вси седмь таинства равно раздають, Божія слова ученіе раздѣляютъ, и свое стадо пасуть во единой чести и душѣ званія. Убо истинно суть епископи.... И церковь, еще (аще?) пребывающи подъ турскимъ мучительствомъ, подъ нечестіемъ святотатскимъ, подъ господствованіемъ жестокимъ, нѣсть антихристова блудница, но Христова невѣста, Христово исполненіе, и Христово тѣло таинственное. Истинна убо Христова церковь есть, упещренна, имѣетъ же учителя своя ко назданію удовъ, къ Ефесеомъ въ гл. 4; имѣетъ начальники, имже повиноватися требѣ есть, къ Евреомъ въ гл. 13; есть градъ, у Матѳея въ гл. 5, и домъ Божій, въ посланіи 1 къ Тимоѳею, въ гл. 3, въ немже вся по чину имѣють быти. И тако по сему чину бываетъ проповѣданіе слова отъ правилно посланныхъ, имже вѣрити и повиноватися подобаєтъ, яко слушаѣй ихъ Христа слушаєтъ, у Луки въ гл. 10. Суть же и домостроители, вѣдущіи даяти мѣру пшеницы во свое время, у Луки 12. Вскую многшихъ употребляю? Въ семъ гражданствѣ внѣшнемъ бываетъ служеніе таинствъ, ихже дверь есть крещеніе, бываетъ тѣло Христово въ Его воспоминаніе, бываетъ руковозложеніе, ко еже пріяти Духа Святаго, вяжутся грѣси и рѣшатся. Еще же на коемждо соборѣ вселенстѣмъ сами глаголють епископи, паче же и на соборѣ Іерусалимстѣмъ святой Іаковъ, первый епископъ Іерусалима (бѣше единъ отъ семидесяти, а не отъ числа двою-

надесяти, якоже свидѣтельствуєть Григорій Нисскій въ словѣ о Христовѣ воскресеніи). Сей, глаголю, Іаковъ, или отъ Апостолъ рукоположися по устроєнію Христа Господа, якоже повѣдаєть Евсевій въ книзѣ 2 въ гл. 23, или отъ святаго Петра съ сынома Заведеовыма, якоже годѣ есть святому Златоустому, въ бесѣдѣ 87 на Іоанна. *Азъ сужду, рече въ Дѣяніихъ, въ гл. 15, ихъ не непокоитися.* Разсуждаю оно, еже, азъ сужду, си есть со властію повѣдаю тако быти писателно. Никтоже бо вземлетъ чести, развѣ званъ, аки Ааронъ, по Павлу къ Евреомъ въ гл. 5. Азъ, глаголетъ, сужду, за неже есмь сего мѣста епископъ, якоже толкуєть Златоустый въ бесѣдѣ 33 на Дѣянія Апостолская. Видиши, о Никито, како судъ самымъ предстателемъ церквей приличствуєть, иже чрезъ рукоположеніе имѣша Духа Святаго во своемъ поставленіи. Оттуду св. Апостолъ Павелъ, въ первомъ посланіи къ Коринѣомъ, въ гл. 11, глаголаше: *сіе же заповѣдую не хваляще, о прочіихъ же егда прииду устрою.* Отнюдуже великій Аѳанасій въ дѣлѣ(?) пасхи глаголетъ: отцы Никійскаго собора повѣдаху: изволися намъ, ибо та вещь церкви дѣйству токмо приличствуєть. Егда паки вещь бѣше о вѣрѣ, не глаголаху изволися намъ, но: сиче вѣруєть церковь Каѳолическая,—и абіе исповѣданіе самое вѣрованія прилагашеся, во еже бы показати не новый сей быти разумъ, но Апостолскій, и яже ими писахуся, не быти своя вымышленія, но Апостольская ученія, еже явѣ воспоминаєть Сократъ въ церковной исторіи, въ книзѣ 1, въ гл. 5, глаголюще о

соборѣ Александрійскомъ, на Македоніаны и Аполлинаріаны собраномъ.

Изъ нихже двое поне собирается. Первое, яко Апостоломъ Христосъ Господь даде величайшую оную и совершенную власть, ово внегда реши ему: *вы есте свѣтъ міра, вы есте соль земли*, у Матѳея въ гл. 5; *якоже посла мя Отецъ, и Азъ посылаю вы; шедше научише вся языки, научающе я блюсти вся, яже заповѣдахъ вамъ*, у Матѳ. въ послѣдней главѣ. Ово, яко сицевую власть, отъ Христа пріятую, дѣйствоваху вси Апостоли, якоже явѣ есть изъ навершенія одного словостязанія ¹, еже во времена Апостолская прозябло быше, о храненіи законныхъ. Собраша бо ся во градѣ Антиохійстѣмъ тако Апостоли, якоже и старцы, еже видѣти о семъ словеси. Веліе же сотворше взысканіе, заключаютъ по странѣ отрицательной, и судъ сотвореный къ церквамъ посылаютъ, глаголюще: *сице изволися Духу Святому и имъ*, въ Дѣяніихъ въ гл. 15, о неяденіи си есть удавленого и крове, и о идоложертвенныхъ. Сиче Павелъ въ первомъ къ Селуняномъ, въ гл. 4 подлагаетъ: *сія отмѣтаяй, не человека отмѣтаетъ, но Бога, давааго Духъ свой Святыи въ насъ*. Второе собирается, всю сію власть высочайшую отъ Апостолъ прейти на ихъ наслѣдники, сирѣчь на епископы. Еже сиче доводствую. Христосъ Господь рече святому Петрови, у Луки въ гл. 22: *утверди братію твою, во вѣрѣ сирѣчь и во ученіи моемъ*. Павелъ, въ Дѣяніихъ, въ гл. 20, исходя

¹ Было: *словопрѣнія*.

изъ Ефеса, бесѣдуетъ къ епископомъ, ихже положи Духъ Св. правити церковь Божию. Тойжде Апостолъ остави въ Критѣ Тита, дабы поставилъ во градѣхъ презвитеры, — быше же въ то время Критъ стоградный островъ, отнюдуже Омиромъ глаголется.... Прейде убо къ епископомъ, какова бяста Титъ и Тимоѳей, власть чрезъ руковозложеніе Павлово, отнюдуже самъ заключаетъ: *аще кто епископства желаетъ, добра дѣла желаетъ*. Назначени добрѣ, яко дѣла рече, а не богатства. Отсюду подвиженъ, святой Иринеѣ, свѣдѣтель древнѣйшій, именова епископы наслѣдники Апостолскія, глаголетъ бо сице: отъ Апостоловъ постановлени суть во церквахъ епископи, ихже и наслѣдниковъ оставляху, мѣсто свое учителству ихъ предающе, и того ради вся вѣры таинства имъ явствоваша, дабы во всемъ совершени и необходимыми были. Тойжде исповѣдуетъ святой Кипріанъ, толкуя онаѣ словеса Христова: *слушайъ васъ Мене слушаетъ*, у Луки, въ гл. 10. Не ко всимъ пишетъ Христосъ сія, рече, но чрезъ Апостолы ко всимъ предстателемъ, иже Апостоломъ намѣстнымъ становленіемъ наслѣдствуютъ. Паче же и Августинъ, толкуя онъ Давидскій псаломъ 44: *вмѣсто отецъ твоихъ быша сынове твои*, си есть, глаголетъ, епископи вмѣсто Апостолъ наступиша.... Но нудятъ Лютрокалвинистове: Апостолове быша виднѣ отъ Христа постановлени посланницы, посланіе паки на посланницѣ оканчивается, ниже къ наслѣдникомъ преносится: убо на Апостолѣхъ окончися ихъ посланіе. Отвѣтую, яко чиновная Апостолская власть быше епи-

скопляя, или пастырская, и того ради послашася во всю вселенную: *шедше*, рече Господь, *во весь міръ, проповѣдайте Евангеліе всей твари*, у Марка, въ гл. послѣдней. Еже посланіе не преста, но преїде на наслѣдники, тожде служеніе имущія, си есть проповѣданія слова вѣры, служительства таинствъ, отъ Христа Господа установленныхъ. И во утверженіе привожду Исаію, въ гл. 54: Азъ, глаголетъ Господь, постелю по чину каменія твоя. Назнаменай добрѣ, о Никито, по чину, въ немже, во еже бы знаменовати не смѣшенное, но чинное быти ихъ званіе; и основлю тя на сапфирѣхъ: чрезъ сапфиры Апостолы знаменуетъ, и ихъ наслѣдники разумѣтъ. Настоятъ паки еретицы: всякъ вѣрный имѣтъ въ себѣ, отнюдуже судити о вѣрѣ: убо нѣсть искателна власть иная, паче тоя, яже въ коемждо есть отъ Бога: убо и міряне могутъ разсуждати нѣкая о вѣрѣ, аще и не вся. Отвѣтую. Не вси вѣрующіи абіе, еже вѣрують, разумѣють, но ови токмо, якоже глаголетъ Апостоль ко Евреомъ, въ гл. 5: *иже имѣють умъ искусенъ ко разсужденію благаго же и злаго*; сіи бо суть могущіи пріяти пищу твердую, прочіи же токмо млека причастницы. Не яко ино есть млеко, иноже пища твердая, но яко тойжде вѣры членъ единому есть млеко, яко вѣруеть просто, иному твердая пища есть, яко разумѣтъ и духовнѣ. Сиче пресвятыи крестъ нѣкимъ бѣше соблазнъ, инымъ же буйство. Паче же и Христосъ камень бѣше претыканія погибающимъ, и камень соблазна... намъ же, якоже непщуетъ Екуменій,

муро и ѿиміамъ... Ибо муро свинія погубляетъ, голубъ же бываетъ бодрѣйшъ сладостію мвра, глаголетъ Нисскій Григорій; се же по коегождо устроенію сладкая оная воня приносить жизнь, или смерть. Отнюдуже наворачаетъ: аще жукови тожде муро положится, абіе онъ погибаетъ и исчезаетъ, якоже и суши, по Клименту Александрійскому, въ книзѣ Педагога, въ гл. 8. Такожде палуцы мвра ненавидѣти повѣствуются. Еще же о жукахъ свидѣтельствуется, яко они, шипчанымъ помащеніемъ помазани суще, умирають. Паки поновляютъ тіижде: у Матѳея, въ гл. 18, глаголетъ Христосъ Господь: *аще ты не послушаешь, повѣждь церкви*, си есть всему собранію: убо высочайшій судъ о исправленіи дается всему собранію. Утверждается. Ибо Церковь есть тѣло таинственное, къ Римл. въ гл. 12; но во единомъ тѣлѣ мнози суть уди: убо подобнѣ мнози едино есмы тѣло во Христѣ, въ первомъ посланіи ко Коринѳомъ, въ гл. 12. Отвѣщаю, иную быти власть духовную, или вышестественную, ину же естественную, по чину естества. Власть бо естественная послѣдствуетъ воли дателя; послѣдовательно же, яже тѣлу естественному приличествуютъ, тѣлу духовному не приличествуютъ. Инако бо не было бы между има подобіе, но тождество. Паче же отразитися можетъ обличеніе. Апостолъ явственнѣйшими словесы научи, въ первомъ ко Коринѳомъ, въ гл. 12, церковь быти тѣло, состоящее изъ удесъ различныхъ, яко то, еже имѣетъ своя ноги, руцѣ и очеса. Убо яко суть различни уди, тако

и дарованія; ниже дарованія главы воспріиметъ нога, или рука, или инъ низшій членъ, но дарованіе главы, самой токмо дается главѣ, си есть власть и благодать сужденія о вѣрѣ и правыхъ писанія правилъ. Отнюдуже Августинъ, въ книзѣ о пастыряхъ, въ гл. 1, провѣща: христіане есмы нась дѣля, предстателствуемъ же развѣ васъ дѣля. Воистинну не вси суть пророцы, не вси учителя, не вси языки глаголютъ, ниже вси сказуютъ. Еще ктому реченіе церковъ, на мѣстѣ предреченомъ, не можетъ знаменовати повсемственныхъ церкве, но знаменуетъ Церковь нераздѣлнѣ, или неопредѣленнѣ. Паки, братъ наказуется отъ предстателя чаственныхъ церкве, ейже подчиняется: того ради судъ епископовъ есть судъ церкве, и изобщенный епископомъ, нарицается изобщенъ церковію. Сице толкуютъ сіе мѣсто Златоустый, Теофілактъ и Евѡимій, вся сія собирающіи изъ словесъ послѣдствующихъ: *яже свяжете и яже разрѣшите*, чрезъ яже умствуется рѣшенія и изобщенія судъ, мужемъ токмо церковнымъ соизволенный. На послѣдокъ задаютъ: раздѣленіе сіе епископовъ, архіепископовъ, и митрополитовъ родися отъ подражателства языческа: въ тѣхъ бо градѣхъ, идѣже жрецы бяху,.. установлени быша епископи, идѣже паки архи-жрецы — архіепископи, якоже свидѣлствуетъ Климентъ Римскій, въ посланіи первомъ къ Іакову брату Господню, егоже посланія по правдѣ излиха побораеть Турріанъ. Но Господь возбрани древнимъ людемъ многая, яже быша чина языческаго. Убо и сія степени церковныя, аки языческія

отринуті нужда єсть. Придаждь еже Павель кѣ Ефесеомъ въ гл. 4 воспоминаеть вся церковная служеніа, яже ко единства вѣры сохраненію до-влѣють. Воспоминаеть бо Апостолы, пророки, евангелисты, учителя и пастыря, не считаетъ же митрополитовъ и патріарховъ: убо сіа суть суетная титлованія и послѣжде обрѣтенная. Отвѣщаю. Канонъ Апостольскій 34 глаголетъ: всякого рода епископомъ вѣдати подобаетъ, кто между ими первый и начальникъ єсть, и его за главу имѣти. На соборѣ Никійстѣмъ, въ канонѣ 6 и 7, митрополитовъ и патріарховъ тайнѣ раздѣленіе отъ епископовъ воспоминаеться. Тоже глаголють быти по обычаю церкви древнему, или, якоже глаголетъ соборъ Антіохійскій, въ гл. 9, по древнему отъ отецъ правилу. Воистинну Аѳанасій патріархъ бѣ Александрійскій, и сицевую власть дѣйствоваше. Святый Кипріанъ всея Нумидіи и Мавританіи попеченіе имяше. Святый Василій всея Каппадокіи митрополитъ бѣ, Кесаріи же токмо епископъ. Якоже и Амфілохій Иконійскій епископъ, всея же Ликаоніи митрополитъ, глаголетъ Θεодоритъ въ книзѣ 4 въ гл. 11. Сей Θεодоритъ Кира убо быше епископъ, но надъ осміюсотъ епархій пастырь бысть. На послѣдокъ святый Златоустый патріархъ вселенскій именується, тоже по собору Цариградскому, на немже патріаршія области на-наменовашася, по свидѣтелству Сократову, въ кни-зѣ 5 въ гл. 8. Суть иже именуютъ Адама, перваго нашего отца, патріархомъ. Отнюдуже сынове Но-евы, иже числятся седмдесятъ и два, отъ святаго

Епифанія именуются патріарси... князи, и аки рода главы. Обаче же въ святомъ писаніи обрѣтается сіе имя патріархъ, яко колѣна си начальникъ... ибо тожде знаменуетъ, еже колѣно; колѣно же, яко видѣти есть у Свида... именуется, отнюдуже... именуются сродницы. Обаче въ обычай прииде сіе имя патріархъ по разореніи града Іерусалимска, якоже явѣсть изъ книги Θεодосіевы.

Назнаменованіа достойно есть мѣсто святаго Епифанія, повѣствующаго у Іудей быти патріарха и его присѣдѣтелей именоватися апостолы. Отнюдуже наворачаетъ, яко во время Константина великаго бѣше во градѣ Тиверіадскомъ патріархъ Іудейскій, именемъ Еллелъ, иже послѣжде святымъ крещеніемъ освятися. Но речетъ Никита: христіани глаголются, или отъ Христа Спаса нашего, или отъ святыя хризмы, еюже помазываемся по крещеніи: святой же Іоанъ повѣствуетъ, въ первомъ посланіи въ гл. 2: помазаніе учитъ вы о всемъ, внутрь сирѣчь вдыхающе. Убо мы, иже имѣемъ хризму и именуемся христіани, можемъ входить на соборъ, паче же занеже Христосъ Господь глаголетъ у Матѳ. въ гл. 18: *аще два, или три собрани будутъ во имя мое, Азъ есмь посредъ ихъ*, идѣже Христосъ не различственнѣ глаголетъ тако о мірянѣхъ, якоже и о церковницѣхъ: убо чрезъ присутствіе Святаго Духа могутъ міряне сходитися на соборѣ помѣстномъ, или вселенскомъ. Но прежде неже ти отвѣтъ дамъ, слыши яже рече Ареѳа митрополитъ Кесарійскій, на Апокал. гл. 16, исполняя оная словеса: *и Вавилонъ великій помяно-*

венъ бысть предъ Богомъ. Чрезъ Вавилонъ, глаголетъ, не Римъ старый хотѣлъ быхъ тя умствовати, но самый Римъ новый, Цариградъ, въ немже древле истинна царствова, нынѣ же въ немъ нѣкимъ устремленіемъ и усиствомъ и челоукоубійцы правятъ, еще же тощно усиствуютъ, еже власть гражданскую высшу сотворити отъ церковнаго достоинства; а еже еще худше есть, яко не равныхъ истязуютъ свободствъ съ церковники, но далечае поступуютъ, негли воеже бы возжещи паче гнѣвъ Божій. Убо Вавилономъ тщишися сотворити христоименитый сей градъ Москву, о новый Немроде! Второй столпъ... здати усиствуеши. Нынѣ къ доводомъ прійдимъ. Іоанъ Апостолъ исповѣдуетъ въ своемъ соборномъ посланіи: *нынѣ антихристи мнози быша*. Аще же согласиши его: откуда толико ихъ число изыде? Отвѣтъ дастъ: по истиннѣ отъ насъ изыдоша, но не быша отъ насъ, си есть не быша отъ части спасаемыхъ... якоже толкуетъ сіе мѣсто ученій Екуменій: аще бо были бы отъ насъ, съ нами бы пребыли, но нынѣ занеже разлучишася и раздѣлишася отъ насъ, явишася уже яко не быша отъ нашихъ, ниже съ нашими, занеже припрягошася прочіимъ супостатомъ¹ нашимъ. Былъ еси иногда съ нами, о Никито; но нынѣ Лютрокалвинистомъ прицѣпился еси, иже не согласуютъ съ нами. Паче же лживѣйшій антихристъ сотворился еси, антихристово сѣюще ученіе, на нивѣ Евангельстѣй. Паки, не всякъ имѣяй хризму, абіе

¹ Было: врагомъ.

пророкъ есть. Мы, имѣющіи хризму пресвятую высочайшаго іерейства, приводимъ вы во всякую истинну, а не противнѣ¹ вы, иже помазани есте отъ насъ архіереовъ, того ради строителей именуемыхъ всѣхъ таинствъ, учителей всего здраваго ученія, пастырей ко всякому дѣлу истинны. И о нашей пресвятой Церкви предвозвѣща Исаіа въ гл. 2: *и слово Господне отъ Іерусалима*. И отсюда Августинъ доводитъ, яко Донатистове не могутъ имѣти истинныя Церкви, яко ихъ начало не отъ Іерусалима, но отъ Карѳаины бѣше, отнюдуже первіе... епископа противъ епископа возвышающе положиша. Калвинъ твой архисинагогъ, о Никито, въ Геновѣ сѣлъ есть, и Лютеръ твой первоучитель въ Витембергу, и тамо мниси Августиніани начаша всѣхъ прежде чинъ литургіи оставлять, отнюдуже послѣжде Калвинъ хуляше, глаголюще, яко древнѣйшіи отцы подражаша Іудейскому паче священія обычаю, неже отъ Христа узаконенному и отъ Евангелія написанному. Каролстадій, другъ Лютровъ Витемберскій, первый блудницу вмѣсто жены своея поялъ есть, бывъ прежде іеромонахъ, и первый образы изъ Церкви изверже, и отрече соборы вселенскія, и святыхъ отецъ досточестіе и согласіе нивчтожествова. Того ради нѣціи препираются и на части раздираются, взаимными писанми на девяностъ уже частей раздѣлившеся, даже вся имъ погубити чрезъ служителиборство въ Саскихъ странахъ, у ихже Сассовъ, воистинну каменныхъ умомъ и сердца,

¹ Было: *вопреки*.

Августа҃нски есть ихъ Іерусалимъ, оттуду бо на-
чаша изъяслятися, и о ней похваляются дивнѣ¹,
яже обаче на свѣтъ изыде въ лѣто 1551, не ина-
ко, якоже и Манихей изъ своего ученіа исповѣ-
давый правду отъ себе изъявленну быти, доселѣ
всѣмъ родомъ невѣдомую. Малѣйшая преидоша
лѣта, и съ великимъ торжествомъ сотное годище
своея ереси праздноваша. Святѣи же отцы выну
обличаху своего времени еретики, тѣмъ единымъ
обличеніемъ новости: тако въ Галліи Вигилантіа,
святыхъ мощей честь отрѣвавша; Іовиніана во Ита-
ліи, дѣвства похвалу гаждавша; на востоцѣ Аеріа,
молитвы о усопшихъ попиравшаго. Ихже обаче
ересеначальниковъ стопамъ послѣдуютъ, и идутъ
ими нынѣ Лютрокалвинистове пребезвстыдно, ибо
и святыхъ иконъ честь обхуждаютъ, нечестиво
седмый соборъ вселенскій, яко иконоборцы, отрѣ-
цающе. Убо якоже Аерій осужденъ бысть того
ради, яко ересь Аріанскую уставилъ быше, и Іови-
ніанъ, яко непщеваше чловѣка по крещеніи не
мощи погрѣшити: тако обличати паче и паче по-
добаетъ Лютрокалвинистовъ, яко умершія ереси
оживиша на свою погибель и прочіихъ, слушающихъ
ихъ и объемлющихъ. Но оглаголетъ ны Никита,
яко не правильно крещаемъ, занеже не употребля-
емъ трехъ погруженій, но полеваній. Отрекохъ,
и трижды отрекохъ, и паки отрицаю, и сопротив-
ляюся. Но давше, а не соизволивше, еще правильно
крещаемъ, и привожду Богослова онаго величай-

¹ Было: чудеснѣ.

шаго Григоріа, въ словѣ 40 о крещеніи, идѣже обычаемъ си высокимъ же и изряднымъ сице глаголетъ: три камени имамъ, имиже Филистима поражу и побѣжду; три на Сарепты Сидонскія сына вдохновенія имамъ, имиже челоуѣки, смертію похищенныя, ко животу возведу; три на дрова имамъ возливанія, имиже жертву посвящу водою, еже, весма вѣмъ, превышаетъ огонь возгнѣшая. Идѣже сказатель, Іераклійскій митрополитъ именемъ Никита, но истинно побѣдитель и торжественникъ въ богословскихъ стязаніихъ... истолкова... возливанія. И преизряднѣ: приравняетъ бо святѣйшій учитель Назіанзинскій къ тремъ онымъ Іліинымъ возливаніамъ, написанымъ въ третьихъ книгахъ Царствъ, въ гл. 18: *наполните, глаголаше, чѣтыри водоносы воды и возливайте на всесожженія и дрова*, идѣже разсуждаю оно: возливайте, отнюдуже производится и возливаніе. Паче же ниже тойжде Богословъ глаголетъ: аще же храмлеши въ таинствѣ Троицы, взыщи, что ты мочить, или паче угашаетъ.... Убо должнствоваше глаголати *καθαπαντισιν* или *καθαδυσιν*, аще бы погруженіе умствовалъ быше. Обаче же не употреби сицеваго рѣченія, но написа *Επιχυσιν* или *Επικλυσινъ*.¹ Вмѣсто навершенія и заключенія приложу исторію утѣшную. Гелимелъ Мавританскій царь, въ обстояніи бывъ отъ храбраго нашего Хійскаго Велисаріа, трехъ прошаше напоследокъ, по долгомъ обстояніи: хлѣба, губы и гущерей. Хлѣба желаше, не воеже бы отъ

¹ Всѣ эти четыре слова написаны русскими буквами.

него вкусити, но токмо воеже бы нань зряще веселитися; губы,—воеже бы слезъ своихъ токи утирати; гущерей,—воеже бы держаще я руками и бряцающе, мощи множество бѣдъ си воспѣвати. Азъ самъ единыя губы желалъ бы вмѣсто сударя, егоже наипаче употребляше святой Арсеній на безпрестанныя слезы, яже изливаше на теплѣйшихъ своихъ молитвахъ. Плакати ми и слезити подобаетъ, видящу, яко вплезають уже въ пресвѣтлѣйшее сіе и христоименитшее царствіе Московское ереси Лютрокалвинскія. И вскую, о братіа мои благочестивѣйшіи, прочее медлите и косните? Волцы уже внидоша во стадо, татіе влезоша чрезъ окна. Внѣ гладъ, внѣ гладъ!—вопіяху Римляне. Возопію и азъ съ Богословомъ и Евангелистомъ Іоанномъ: внѣ пси, внѣ пси! яко Стенфоръ, иже, по Омиру, во гласѣ... и во пѣніи пресилень.



З а к л ю ч е н і е.

Правило, или врачбу душъ Назіанзскій Бого-словъ, въ первомъ си словѣ, хитростей хитрость и разумовъ разумъ быти провѣща, еже чрезъ нѣкое снесеніе съ человѣческихъ тѣлесъ врачеваніемъ и ликованіемъ свое бесѣдованіе утверждаетъ. Есть же плотская врачба, хитрость дѣемая о тѣлесѣхъ, здравія вина дѣйственная, и имѣетъ за вещество тѣлеса человѣческая, за конецъ же наше здравіе. Противнымъ паки обычаемъ, душевнаго врачества человѣческія дѹши суть вмѣсто нѣкоего подлога, конецъ же—ихъ спасеніе и обоженіе благодатію. Тая убо, яже о тѣлесѣхъ дѣйствуетъ, неудобна негли и трудна есть; но душевная много труднша; ово за вещества естество (сей бо дѹши вмѣсто подлога суть), ово за конецъ дѣла и дѣйства (обѣщаетъ бо сія человѣки отъ Бога благодатію претворити). Ибо здравіе есть стихій, отъ нихъ же состоимъ, лѣпое устроеніе; недугъ же—тѣхъ же неустроеніе. Того ради конецъ послѣдній добраго врача есть, еже присутствующее тѣлу здравіе и полезное здравствованіе тѣми, яже недугомъ ползуютъ, врачествы соблюсти, или отсутствующее и погубленное тѣми паки, ими же исправитися можетъ, возвратити помалу. Душевному же врачеству то пред-



пріятіе есть, воеже бы душу вкрылити, и возвысити ю, и ввыспрь вознести, сирѣчь свободяюще отъ вещей земныхъ тяготы и аки крыла нѣкая влагающе ей, дѣйство купно и зрѣтелство, сирѣчь оба, ветхій и новый, завѣта, егоже единъ преступленія погибель намъ содѣваетъ, другій же, сирѣчь новый завѣтъ, и отъ страстей злыхъ работы на свободу изводитъ, и поощряетъ ко добрыхъ дѣланій усилству. Отсюду явѣ бываетъ, яко чловѣка правити, всѣхъ звѣрей хитрѣйшаго и нравы различнѣйшаго, есть излиха дѣло трудное. Напослѣдокъ искусніи врачебныя хитрости обыкоша, егда желаютъ недугъ нѣкій совершенно познати и и увѣдѣти, внутреннего недуга начала испытати. Взыскуютъ бо внутрь винъ, воеже бы имъ мощи приличная даяти врачеванія и лекованія, и остро сражаются между собою, воеже бы недугомъ держимому чловѣку отъ паденія не страдати.

Искахъ и азъ корене духовнаго сего недуга, преходящаго нынѣ въ семъ христоименитѣйшемъ царствѣ, и тщахся обрѣсти, откуда бы сіе ересей наводненіе истекало и возрастало на толику нашу общую пагубу. Напослѣдокъ, умомъ обраща, обрѣтохъ изъ двою... истекшее, си есть отъ лишенія и неимѣнія народныхъ училищъ, такожде отъ скудости и недостаточества святыя книгохранилищъ.¹ Еже дабы ми показати и предъ очима явѣ поставити, нѣкая назнаменуя знаменованія достойнѣйшая.

¹ Было: *Вивліотеки*.

Прехрабрый нѣкто воевода Алкивіадъ отвѣтъ даде древле Аѳиномъ, яко ко благополучноратованію три вещи суть нужны: первая есть злато, вторая злато, третія злато. Азъ же, вопрошенъ о санѣ церковномъ и гражданскомъ, кѣи бы были столпы и завѣсы обою, реклъ быхъ: первіе УЧИЛИЩА, второе УЧИЛИЩА, третіе УЧИЛИЩА пре-
нужна быти.¹ Толикую бо вижду быти тѣхъ училищъ нужду и ползу, яко же ихъ кромѣ никоеже въ насъ бываетъ внутреннее преображеніе. Училища суть, отнюдуже духъ животный чрезъ жилы во все тѣло разливается, суть крыла орля, имиже слава пролетаетъ всю селенную. Піитическая баснь есть, яко Орѳей гусли своими каменіе притягнулъ есть къ себѣ, звѣри и пни, — си есть каменные разумы, своимъ сладкословіемъ чрезъ привабленія привлекаше, не инако, яко же Галлійскій Еркуль златыми си цѣпи оныя людіе привлекаше. Еда чело-
вѣцы² естествомъ си не яко скрижалъ суть углажденная, на ней же ничесоже написася, вся же могутъ написана быти? Не платно суть бѣлое, всякій цвѣтъ пріяти могущее? Не суть ли подобни каменеви во всякій образъ изваятися могущему? Но въ училищахъ благоговѣнія же и благоговѣйства писмена на сихъ скрижалѣхъ пишутся. Во училищахъ бѣлое сіе платно окрашивается живыми честности и чело-
вѣколѣпія зарми. Во училищахъ же суть образотворцы искуснѣйшіи, иже пишутъ чело-
вѣка во образъ Бога треблажайшаго

¹ Было: *подобаетъ быти*.

² — *людіе*.

и величайшаго. Въ тѣхъ училищахъ исполинскія укрощаютъ дерзновенія, циклопская возхлещается жестота, эпикурское исправляется житіе; сихъ кромѣ обрѣтенное оное сокровище общаго гражданства растлѣвается, сему же сокровищу растлѣвшу и самое гражданство падаетъ, якоже не нелѣпо вящихъ родовъ благодѣтели пишутъ, яко отъ училищъ, аки отъ источниковъ, благополучіе народное, не инако, аки отъ звѣздныхъ натеченій и тайное искапаетъ. Поемленіе¹ Сократово бѣ: аще бы въ Аѣинахъ речено было: возстаните о ризошителіе, абіе бы премнози возстали; но аще бы возопихъ: возстаните о мудріи въ Аѣинахъ, о коль мали возстати видѣни были бы. Ты убо, о пресвѣтлый царю, подражай Θεодосіемъ, Іустиніаномъ, и созижди здѣ училища ради остроумныхъ младенецъ, ко изученію тріехъ языкъ коренныхъ, наипаче греческаго, латинскаго и славенскаго. Имаши бо, о благочестивѣйшій царю, подъ своею прекрѣпкою рукою толико пребогатыя митрополіи, толико преизобилующія архіепископіи, толикія величайшія монастыри. Молю, да повелиши, воеже бы каждо сихъ начальниковъ, по мѣрѣ своихъ приходовъ, толико имѣлъ питомцевъ и толико клирикъ препитати тщился ради изученія сихъ трехъ языковъ. Подобнѣ же и архимандритове монастырей ти царскихъ тожде да сотворятъ. То бо по мысли блаженныя памяти Іереміи патріарха и прочихъ собратій его будетъ народное добро-

¹ Было: *ομολογαντε*.

дѣтелство. Сїи бо святѣйшіи архіереи, въ Хрисовулѣ ономъ постановленіа патріарха Московскаго, подражающе судови собора иже въ Труллѣ, велѣша все-явственѣйшими словесы во оставшихъ увѣщаніихъ. Ибо отъ сего новаго училища Алексіевскаго, извѣстнаго известнѣе изыдутъ, аки изъ коня троянскаго, христоименитшіи борцы, иже о добродѣтели твоего пространнѣйшаго царства, о умноженіи сего чина церковнаго и о общей напослѣдокъ ползѣ всего христоименитшаго гражданства ратовати будутъ, не инако, но якоже быша соратницы Кадмови изъ зміевыхъ зубовъ Мирмидономъ онымъ подъ царемъ Еакомъ не неравніи.

Рѣхъ, яко первіе языку греческому изучитися лѣпотствуетъ того ради, занеже бо есть корень и пріискрній языкъ. Тїи бо, иже гречески писаша, яко же святїи Евангелистове, Духа Святаго вдохновеніемъ писанія греческая изобразиша. Ибо болшая есть чистота источника, нежели потока. Отнюдуже, къ началу греческихъ реченій, аки къ твердыни, въ недоумѣнныхъ вещьхъ прибѣгаемъ, паче же аки къ источнику нетлѣнному жаждущіи притекаемъ, не весма вѣрующе сказателемъ, иже токмо словеса, яже разумѣютъ, прелагають своимъ обычаемъ. Того ради премногочасто сказатели суть паче предатели, неже сказатели, и того дѣля ниже толикія вѣры удостояются, занеже они не суть пророцы. Убо изучитися годствуетъ начальнымъ писменамъ въ греческомъ языкѣ за вящшее достоинство же и извѣстіе. Убо седмидесяти и дву

сказателю изъ еврейскаго діалекта на греческій преложеніе за священное писаніе держати подобаетъ весма, яко еще отъ Христа Господа и отъ Его святыхъ Апостоловъ за сицевое держася. И того ради часто воспоминается, яко слова писанія, въ Апостольскихъ писаніяхъ, и обычно отъ святыхъ отецъ вездѣ похваляется, по греческому оному древнему преложенію отъ творца Августина, за неже бо Духъ, иже бѣ во пророцѣхъ, егда провѣщаша, той же самъ Духъ и седмдесятъ и двумъ мужемъ присутствова, егда оная толковаша. Убо достовѣріе того прелаганія пребываетъ несумнительно, аще и нѣкая мѣста седмдесятъ сказателей съ еврейскою истиною разгласовати явствуются,— обаче, аще бы доліе познана была, между собою не противятся, ниже разгласна, но глаголаній различіе съ единствомъ духа купно согласуютъ, аще и многая оскудѣваютъ, обрѣтаемая въ писаніи еврейскомъ. Отвѣщаетъ Іеронимъ, яко того ради оніи сказателіе нѣкая о Христѣ и о Троицѣ преидоша, не злобнѣ же, ниже нерадивше, но разумнымъ нѣкимъ совѣтомъ, трехъ ради оныхъ винъ, яже тамо толикій учитель воспоминаетъ. Придаша же поистинѣ нѣкая, яже во еврейскомъ не быша, обаче же зѣло рѣдко и мало, глаголетъ святой Епифаній въ посланіи на псаломъ сотный четыредесятъ седьмой: *Господи воззвахъ къ Тебѣ, услыши мя, вонми гласу.* Седмдесятъ сказателей приложиша: *молитвы моя,* и цѣлый стихъ сотвориша. Се же каждо отъ нихъ, еже воистину великаго достойно удивленія, единодушно божественнымъ нѣкіимъ

строєніємъ сотвориша: ибо кромѣ Духа Святаго дѣйства не могоша тако согласно сказати, воеже бы ничесому же отъ себе разнствовать и не въ единомъ, поне малѣйшемъ, реченіи бѣдствовать есть были, но тожде едино реченіе изобразиша. Якоже въ псалмѣ 71: *и честно имя его предъ ними*, или, по иныхъ сказанію, *предъ нимъ*, яко лежитъ въ еврейстѣмъ, за еже обаче сказателіе они положиша: *и честно имя его предъ очима его*.¹ Не тако еретицы нынѣшняго времени, истинно пиѣицы, иже въ предконечномъ стизѣ втораго псалма: *пріимете наказаніе*, сирѣчь ученіе Мессіино, они прелагаютъ: *лобзайте сына*, отъ силы реченія презлобно отклоняющеса. Сіи подобнѣ же ростлиша псаломъ 118: *приклонихъ сердце мое сотворити оправданія твоя во вѣкъ за воздаяніе...* за воздаяніе, еже мзду благъ знаменуетъ.... Монстерій приложилъ, даже до конца подражавъ евреомъ, иже отложиша: *ископаша руцѣ мои*, и вмѣсто сего положиша: *яко левъ*, кромѣ всякаго разума и словъ согласованія. Но нѣсть дивно о іудеехъ, древнее писаніе за ненависть на христіаны бохма (?) растлившихъ, точки нѣкія изобрѣтше и новая помраченія сотворше въ писаніи, противящеса всячески христіанскому нашему благочестію, еже воеже бы намъ жидовскую ихъ лѣсть испити. Ибо точки тыя различныя и разныя припѣтія различный рѣченій знаменуютъ разумъ и вводятъ купно. Отсюда подвигошася нѣцыи, и достолѣпно, иже повѣдаша, яко нѣсть требѣ иное

¹ На полѣ замѣчаніе Полоцкаго: Slau. pred' nimi.

изданіе въ церкви творити, развѣ нашего греческаго, яко святаго и достовѣрнаго. Ниже бы Дамась понудилъ Іеронима, воеже бы новый завѣтъ ко греческой возвелъ истинѣ, аще бы не позналъ и не уразумѣлъ новаго завѣта вѣрность изъ греческаго источника исчерпати нуждѣ¹ быти. Еже и сотвори, и крѣпко заступилъ есть послѣжде отъ клеветникъ своихъ въ епистоліи къ Маркелу, егда глаголетъ, яко ветхій завѣтъ противъ еврейскія правды истолкова, новый паки по греческой вѣрности преведе. Истинно, весь завѣтъ новый (кромѣ токмо Евангелія святаго Матѳея, еже обаче изъ еврейска языка превелъ есть на греческій св. Варнава, и обрѣтесе на Кипрскомъ островѣ во время Зинона царя, и развѣ послѣдняго посланія Павлова къ евреемъ, еже гречески преложи Климентій Римскій), не инымъ, развѣ греческимъ языкомъ написася отъ св. Апостоловъ и Евангелистовъ, того ради, яко въ то время всѣмъ родомъ наипаче общъ быше языкъ еллинскій, якоже свидѣтельствуется и Кикеронъ въ словѣ на Архія піиту. Убо оное греческое писаніе есть свято и отъ Духа Святаго виновника произведесе.

Латинскій же языкъ потребенъ есть нынѣ, ибо нынѣ царствуетъ во училищахъ, въ книгахъ, въ княжихъ домахъ, и аки обычный нещуется и глаголетъ же ся едва не отъ всѣхъ родовъ. Еще же и Вивліа латинская, наипаче народная, и новая отрази нѣкая, Іеронимомъ исправленная, отло-

¹ Было: *требъ*.

жившимъ, еже ему появися, и приложшимъ, еже како либо согласова. Отнюдуже онъ излиха печалится всего Іова быти растлѣнна и не цѣла отдревле; яко же въ книгахъ Есѣири и Даніиловыхъ приложишася нѣкая обычаемъ витіискимъ: въ книзѣ убо Есѣири шесть главъ, въ книзѣ же Даніиловой исторія о Сусаннѣ, о Вилѣ и змѣи, кромѣ еврейскія истины повѣдаетъ быти приложена. Того ради Левъ первый Еразмово преложеніе зѣло похвали за свѣтлость и изрядство реченій. Слова бо народная быста, простшая и малоугодная и знаменателная. Но собесѣдателно здѣ есть, како что растлѣнно быти глаголется, сугубо умствоватися мощи, ибо или сице, яко же прочему писанію весма противитися и нѣчто отъ извѣстнаго писанія отымати, еже есть всячески нестерпимо, или сице есть, емуже разнымъ токмо быти, а не противнымъ, и меньше совершеннымъ, не весма не цѣлымъ, еже есть, егда изъясненія ради въ преложеніи нѣчто приводится, или нѣчто оставляется краткости ради. Обою бо сію сама толкованія нужда или требуетъ, или нудитъ, якоже Іеронимъ въ книзѣ о блажайшемъ родѣ толкованія писаній учитъ и провѣщаетъ изобилнѣ.

Иллирическа, или славенска языка весма учитися подобаетъ Россомъ, но со правиломъ грамматическимъ, а не простообычно и кромѣ основанія обычаемъ....¹ Ибо языкъ истинно преславный есть, и зѣло преславенъ, якоже отъ самага реченія

¹ Одно слово не разобрано.

слава явѣ есть, аще что и противно повѣствуетъ Прокопій, отъ имени Греческаго... оно производяще, отъ плѣнниковъ прешествія. Ибо сей языкъ вамъ матерній непщуется и отъ дву святую отцу, Меѳодіа и Кирила, пречудно расширенъ же и просвѣщенъ. Обычай же есть всякому своя хвалити и даже до небесъ возносить, того ради, яко сладка есть любви по роду, сладко своихъ видѣти. Тако св. Василій, хотяще святаго Гордіа мученика прославити словомъ своимъ, сію привнесе вину на среду совѣта своего, еяже ради его прослави паче прочихъ славленія, народнымъ бесѣдованіемъ чествовати пріялъ есть, яко онъ гражданъ Кесарійскихъ изряднѣйшій бѣше. Словеса толикаго отца вѣрно предложу. Бѣ сей мученикъ блаженнѣйшій гражданинъ нашъ Кесарійскій. Чесо ради нѣсть удивительно, аще ума нашего страсть къ нему наипаче прилагается, занеже то ко истинному и домашнему творить украшенію. Обаче же истинна истинну любитъ и зѣло почитаетъ, и сія выну пребудетъ во вѣки, занеже она глаголется и есть всѣхъ силнша и вся премагаеть, якоже изряднѣ рече Зоровавель, прочію двою клевету си мудршій, царя Дарія... тѣлесе стражникъ.... Далече отъ насъ да будетъ ласкательство и да имѣетъ... занеже воистину ласкатель есть душъ вранъ.... Немогу отрещися, еже како либо, лѣпо или нелѣпо, якоже глаголется, нынѣшняя погрѣшенія грамматическая, соликизмы и варваризмы, заступати. Обаче выну останутъ враски и пороки на дѣвственномъ лицѣ славенскія плоти, занеже истинно благо,

нѣсть благо, развѣ еще благо совершится.... Нѣсть ми невѣдомъ Іеронимъ, иже исповѣдуетъ и радѣетъ Россомъ по нѣкоей части, глаголюще, яко Евангеліа исправленая мало исправиль есть, воеже бы не разгласовали отъ чтенія Латинскаго обычая. Тако бо, глаголетъ, трость устроихомъ воежебы та токмо, яже разумъ видѣшася измѣняти, исправивше, прочіимъ остати, якоже бяху, претерпѣти намъ. Сей воистинну Іеронимовой кротости еще бы Еразмъ и прочіи подобніи сказателіе подражали быша, лучше бы церковь и себе самая ползовали. Паче же, зане сицевое исправленіе, аки кроткое, похвали и ублажи Августинъ, въ епистоліи 10 пишущее къ самому Іерониму. Обаче исправиша хитріи лютрокалвинистове, еще погрѣшенія толкованія латинскаго и не быша погрѣшенія въ вѣрѣ, того ради, яко лживаго разума никакоже содержаща, но нѣкіи паче солекизмы и варваризмы, или vпервала, мрачно и сумнительно истолкованая, или наконецъ преложена, измѣненная писателей или типографовъ погрѣшеніемъ и невѣжествомъ. Егоже рода погрѣшенія и поползновенія чрезъ снисхожденіе нѣкое... и самъ Іеронимъ въ своемъ исправленіи неисправлена самохотнѣ остави, якоже сими словесы свидѣтельствуется: воежебы не много разгласовати Евангеліамъ исправленнымъ. Обаче Левъ, яко добрыхъ писаній любитель, похвали толкованіе Еразмово, занеже святое писаніе изъ нова толкуя, краснѣе преложи и отъ солекизмовъ свободы. Хотите да правду предложу? Хотите негли, еще же правда иногда ненависть раждаетъ.

Три наипаче ми въ святаго сѣмвола преведеніи не суть годѣ. Первое: *имже вся быша*, еже аріанство мудрствовать видится, того ради, яко творить Сына, аки орудіе токмо Бога Отца. Второе оно: *глаголашаю пророки*, ибо мы потолику пророкомъ вѣруемъ, поелику намъ прорѣкоша та, яже Святыи Духъ безсредственнѣ имъ сказалъ есть, не яко челоуѣкомъ просто, но удвоительно, яко пророкомъ. Третее: *чаю воскресеніа мертвыхъ*, полагаетъ бо воскресеніе, еже извѣстно будетъ, во усумнѣніи, занеже надежда есть о вещи, яже можетъ быти и небыти. Ожидаю паки знаменуетъ вещь извѣстно будущую, якоже индѣ пространнѣе истолкуется на Никитѣ подобныя клеветы.

Обаче же ко второму предложенію нашего члену приступимъ, сирѣчь о вивліотецѣ. Оссирій, еже имя знаменуетъ многоочита, во языцѣ Египетстѣмъ различныя книгохранилницы создалъ быше, яже учители Египетстїи святыми нарицаху. Сицевая была книгохранилница Симандіа, древнѣйшаго царя Египетскаго, егоже врата сїе написаніе изваянное имѣша: сїе есть ума врачевство.... Наслѣдствова Птоломей Филадельфъ, иже отверзлъ есть и училище въ Александрїи и стяжаше отвсюду премногія книги, и, якоже пишетъ святыи Епифаній о мѣрахъ и мѣрилѣхъ, писаніа до коегождо царя посылаше, имиже усердно проаше, дабы еже либо у себе пїитовъ, или инаго рода писателей, ветіевъ, софистовъ, врачей, историковъ и прочіихъ имѣли, то къ нему прислали. Растущу по вся дни дѣлу, и собраннымъ отвсюду книгамъ, негли при-


ключися отъ книгохранителниці строителя (сей же бѣ Димитрій Фалирей) царю нѣкогда вопро-
сити, елико бы по сіе время книгъ въ вивліотеку
собралъ. На сіе онъ: пятьдесятъ уже и четыре ты-
сящи книгъ, со осмью сотъ, меньше или вѣще,
быти, отвѣтъ далъ. Обаче слышу, рече Фалирей,
въ Іерусалимѣ обрѣтатися нѣкія пророческія книги
божественныя, яже о Бозѣ и о міра созданіи по-
вѣствуютъ. Чесо ради написа царь къ Іудеомъ,
въ Іерусалимѣ жившимъ, воежебы книги сія при-
слали, такожде Еврейска же и Греческаго языка мужи
благоискусныя. И быша послани, избранію бывшу,
сѣмьдесятъ и два сказатели, Моисеову образу по-
дражавше, иже съ собою сѣмьдесятъ и два мужа,
восходяще на гору, избралъ быше, во исходѣ въ
гл. 22. И тако дѣло оное преизрядное на грече-
скій языкъ преложиша, на островѣ Фари, съ ве-
личайшею славою, прежде Христова рождества за
триста лѣтъ, архіерействовавшу тогда Елеазару. Сія
яко славнѣйшая книгохранилница бранію Алексан-
дрійскою, юже Юлій Кесарь дѣяше¹ на Птоломея,
воежебы Клеопатру, отъ него изгнаную, на цар-
ство возвести, сожжеся: ибо егда Кесарь царскія
полки повелѣ зажещи, той огонь, и во часть града
впадше, сѣмьдесятъ тысячъ книгъ, отсюду и
онуду собранныхъ, въ ближнихъ зданіяхъ положе-
ныхъ и сохраненыхъ, сожже, якоже свѣдѣтел-
ствуетъ Орозій въ книзѣ 6 въ гл. 24. Такожъ
Василиску царствовавшу, пожаръ величайшій въ Ца-

¹ Было: *иляше*.

риградъ завзяся, иже напослѣдокъ пожре книгохранилницу царскую, въ нейже сто и двадцать тысячъ книгъ быша положены. Тамо присутствовала кишка зміева, на нейже Одиссеи и Иліасъ Омировы написаны быша письмены тончайшими. Но и Неемій, егда во Іудею возвратися, въ послѣднее лѣто царства Артаксерксова, книгохранилницу изрядную созда во Іерусалимѣ, и книги тако мірскія, якоже и святыя въ ней положи. По истиннѣ въ книгохранилницахъ бесѣдуютъ усопшихъ души безсмертныя, и никакая книга толико зла непщевательна есть, воежебы отъ нѣкоея части не имѣла читателя ползовати. Ниже ползуетъ многія имѣти книги въ книгохранилницѣ, но не многія добрыя же; и много полезнѣе есть тщатели въ немногія творцы вдатися, неже нерадивѣ многія пребѣгати. Якоже бо не вящше ядущіи, но иже по требованію приѣмлютъ и трудятся, лучше здравствуютъ: тако не премногая чтущіи за мудрыя и тщаливыя имѣти подобаетъ, по Аристиппу, иже повѣдаше ученыя отъ неученыхъ тако разнствовать, якоже кони укрощенныи отъ неукрощенныхъ, или живыи отъ мертвыхъ. Отнюдуже сей философъ, видяще неученаго на камени сѣдяща, провѣща: камень на камени! Подобнѣ и Діогенъ, человѣка неучена видѣвъ, се, рече, овца златымъ руномъ облаченная! И того ради заключилъ быше, яко унше есть ниществовати, неже неучену быти: овъ бо злата, сей же человѣколѣпіа зѣло требуетъ. Паки разумъ въ благоденствіи есть украшеніе, въ противныхъ прибѣжище и блажайшее путепище къ старости; сіе

ученіе даєть юношамъ трезвеніе, старѣйшинамъ утѣху, убогимъ богатства, богатымъ лѣпоту. Убо учитися подобаєть тымъ, яже мужемъ полезна имуть быти, и сицевая пѹтепищія стяжательна суть намъ, яже во время кораблекрушенія купно исплыти могутъ. Но о сихъ довольно глаголана да будутъ истиннымъ сердцемъ и душею праведнѣйшею, якоже подобаєть, архіереомъ. Того ради молю, да приимеши усердно сія, правовѣрнѣшій царю!





Эп и л о г ъ.

Доселѣ съ Никитою подвизахомся... си есть подвигъ онъ неудобнѣйшій Делфическій, всѣхъ силъ, о Божіей славѣ употребляюще. Христовы бо вои міра сего воевъ дерзновеншіи суть, и имѣютъ, по Павлу къ Ефесеомъ, въ гл. 6, вѣры щитъ, имѣютъ броня правды, шлемъ спасенія, мечъ духовный. Чесо ради аще и воста дерзновенный Никита, новый Голіаѳъ, варварскими неистовствами и безумствами напыщенъ ересей; обаче побѣдитъ Христосъ съ нами, якоже побѣдилъ и Давидъ, пять каменей держай въ тоболцѣ, въ первыхъ царствѣ въ гл. 17. Воистинну тоболець есть на земли церковь, по разуму Александрійскаго патріарха Кирила, яже многія честныя и драгія камени въ себѣ содержитъ, по оному Захаріину изреченію въ гл. 6: камени честныи и святыи... на земли. Есть псаломъ Давидовъ пятьдесятъ девятый, иже сицевое надписаніе содержитъ: во столпоу надписаніе, еже написалъ быше пригвоздя,¹ Сирію уже всю разоривъ и истребивъ. Подобное надписаніе возложимъ и

¹ Было: *прибивая*.

мы, новую ересь поправше и побѣдивше, и новую пѣснь возопіемъ съ Евангеліемъ новаго завѣта, доброе вѣствованіе вѣщающимъ, еже книгою священническою назва Амвросій, всякія амвросіи и нектара сладшій. Никиту бо вергохомъ во море Чермное, иже зѣло досадилъ быше христоименитшимъ людемъ, поистиннѣ Израилеви, иже толкуется умъ Бога видящъ.... Истинно Маріа, сестра Ааронова и Моусіова, егда людіе Израильстіи свободждени быша отъ лютѣйшихъ фараоновыхъ рукъ, море Чермное прещедше, оное превеселое пѣніе, своима руками біюще въ тѹмпанъ [егоже съ собою изнесе, аки пророчица, воежебы абіе, имѣвшу быти, побѣду пѣти], купно со иными младшими дѣвцами и женами, воспѣваше: *воспоимъ Господеви, славно бо прославися; коня и всадника воверже въ море.* Но и Девора, побѣдивши уже Сисарру, обидившаго возлюбленныя Божія люди,¹ воспѣваше съ Варухомъ онъ ѹмнѣ пресладкій: Внегда отдасть отмщеніе обидящимъ Израиля, во изволеніе людемъ, благословите Господа. Слышите цари, и внушите князи: азъ Господеви воспою, и восхваляю Бога Израилева. Пояше равнѣ и Іудиѹ, обезглавивши Олоферна, глаголющи: начните Господу въ тѹмпанѣхъ, пойте Богу нашему въ кѹмвалѣхъ, воспойте Ему пѣснь нову, радуйтесь предъ Нимъ, и призывайте имя Его. Новыя бо суть радости, по Апокалипси въ гл. 21. Воспѣваше напоследокъ и царствующій пророкъ въ псал. 143:

¹ Было: *досадившаго возлюбленнымъ Божиимъ людемъ.*

Боже, пѣснь нову воспою Тебѣ, во псалтири десяти-
струнной пою Тебѣ. Извѣстно уже вѣмъ, совер-
шенно знаю никого отъ васъ невѣдѣти, что есть
мусикія и сладкопѣніе.¹ Есть бо соединеніе нѣкое
и совокупленіе совершенное равныхъ и неравныхъ
гласовъ, или звуковъ, иже вси ко единому ды-
шутъ² согласію, и того ради именуется отъ му-
сикіевъ гармонія, или число нѣкое звучное. Не инако
реши о семъ, токмо якоже отъ разныхъ и раз-
личныхъ ароматъ и видовъ вонеродныхъ драгое
муро составляется и готуется. Научаютъ убо му-
сикіи, яко неравныи гласы творятъ разстояніе и
отлеглость мусикійскую... нареченную³ тако, во еже
бы фтону вящему десять комматъ, сирѣчь ча-
стей, содержати, и нарицается вящее система,
или соединеніе, или сложное,⁴ изъ десяти чертъ
состоящее, якоже система меньшее, или простое,
состоитъ изъ пяти чертъ. И тако разстояніа сложна
суть дисдіапасонъ⁵ сирѣчь сугубая осмица, или 24.
Трисдіапасонъ⁶ есть та, яже на три осмицы про-
тивогласныя раздѣляется. Аще бо мусикіевъ древ-
нѣйшихъ лѣствица бѣше токмо единыя осмицы
діапасонъ,⁷ ради простоты коренныя. И пифаго-
рическая бѣше дисдіапасонъ⁸ сугубая осмица, или

¹ Было: *согласіе*.

²—*стремятся*.

³—*именованную*.

⁴—*срѣженое*.

⁵ Это слово написано по русски, скорописью.

⁶ Написано также русскими буквами.

⁷ Написано такъ же.

⁸ Такъ же.

шестнадесятица, того ради, яко осмица состоитъ изъ пятого и четвертаго равенства, ради мѣрности честныя. Обаче нынѣ есть... трегубая осмерица, или... четверогубая осмерица, или 32, за равенство пріятное мусикии гласныя же и орудійныя. Яже лѣствица синтона есть всѣхъ согласнѣйшая.... Ейже угодно примѣщается діатона. Десятострунную бряцахомъ во имя Господа Ісуса Спаса нашего, Егоже первое письма І десять объемлюще знаменуетъ, якоже и десятиструнное, изъ десяти состоящее струнъ, подобіе имѣюще величайшее съ Божіимъ десятизаповѣдіемъ, си есть со десятию заповѣдей, извѣщенныхъ чрезъ Моисія, или унше со десятию Христа Спаса нашего изрядными таинствами. И первая убо струна есть воплощеніе. Вторая рождество. Третья обрѣзаніе. Четвертая принесеніе въ Церковь. Пятая Богоявленіе. Шестая торжественное во Іерусалимъ въѣханіе. Седмая горчайшая Его страсть. Осмая преславное воскресеніе. Девятая вознесеніе. Десятая Духа Святаго низпосланіе въ день пентикостіи. Отъ сего истолкованнаго десятиструнія виситъ вся наша мусикиа духовная, все наше восклицаніе, все наше усердное благодарствіе и возглашеніе... торжественное. Но хошѹ, да вещь инако судимъ. Въ Никитовыхъ сихъ свиткахъ тридцать погрѣшеній величайшихъ обрѣтохомъ, яже чрезъ неизмѣнное письма Л, еже есть начало реченія λῖθος, еже есть камень, изобразуются и пишутся, си есть чрезъ знамя истинное каменныя сего совѣсти на будущую вѣчную вещи память. Имѣютъ Евреи 22 писмена, отъ нихже пять усугубляются:

Кафъ, Менъ, Нунъ, Фи и Алефъ, глаголетъ свя-
 тый Епифаній. Коимъ же образомъ? Занеже 22
 книзѣ числятся, обаче двадесять и семь обрѣтают-
 ся, того ради яко отъ нихъ пять усугубляют-
 ся.... Руѣ съ книгою Судіевъ случается и за
 едину отъ Евреевъ непщуется. Паралипомена съ
 первыми и вторыми Царствъ, сирѣчь съ первыми
 двѣма, и толикожде послѣдними въ едину книгу
 совокуплены. Прочія суть книги двѣ: Ездрина пер-
 вая, другая Есѣири, яже различно числятся и въ
 канонѣ воспоминаются отъ Апостоловъ въ пра-
 вилѣ послѣднемъ. Чесо ради ветхаго завѣта вся
 книги симъ чиномъ числятся: 5 къ закону при-
 личествуютъ: Бытіа, Исхода, Леввитскія, Числѣ, Вто-
 раго закона. Сія глаголется и есть первая Пента-
 тейхъ, еюже весь законъ предлагается. Послѣду-
 ютъ иныя книги пять, яже стихами состоятъ: Іовъ,
 Псалтирь, Притчи Соломони, Екклісіастъ, Пѣсни
 пѣсней. Таже третій ликъ книгъ, иже Грече-
 ски... именуется и содержитъ святое писаніе, какова
 есть книга Ісуса сына Наввина, книга Судей, Пара-
 липоменонъ, Царствъ первыя и послѣднія. Четвер-
 тый полкъ послѣдствуетъ, въ онъ же 12 пророцы,
 вящшіи же и меншіи, собрани суть. Тако двате-
 сять и двѣ книзѣ по числу письменъ Еврейскихъ
 числятся. Еже бо ко двѣма онѣма приличествуетъ,
 еже стихами раздѣленъ естъ, си есть Премудрость
 Соломона, яже Панареѣтъ написуется, и Ісуса сына
 Сирахова книга, Ісусова внука, иже изъ языка
 Еврейска на Греческій пренесе, въ число писаній
 относиться не обыкостѣ, еяже ради вины ниже

полагастѣся внутрь кіота завѣта. Обаче зѣло полезнѣ быти, ко еже изучитися и чести, увѣщають святіи Апостоли, въ канонѣ послѣднемъ. Пріяты же суть народнѣ книги Макавейскія, такожде Іудиѣи и Товіи, аки правилныя и святое писаніе, яже обаче нынѣшніи еретицы аки недостовѣрныя имѣють. Ибо Іеронимъ, глаголюще о книгахъ Соломоновыхъ, рече, яко сицевыя ко созданію народа чтены быти обыкоша внѣ отъ древнія церкви; но не ко утверженію догматъ извѣствомъ ихъ. Отнюдуже пишетъ святой Аѳанасій въ Синопси, яко самымъ токмо оглашеннымъ чтены бѣху. Обаче же Августинъ книгу Премудрости вмѣсто божественнаго писанія приводитъ, занеже бо, глаголетъ, ближній Апостоломъ изрядный сказателіе ея въ свѣдѣтельство употребляху, еяже бы никако употребляли быша, аще не бы Божіе быти свѣдѣтельство вѣроваша, ибо ю въ восточной церкви часто чтемъ. Убо церковь, сие изволившу Духу Святому и попустившу, явствованіе отложи, правды же никакоже остави, и того ради судомъ тоеяжде церкви удостоишася послѣжде достовѣрія Божественнаго, якоже глаголетъ Августинъ о книзѣ Премудрости, и тожде исповѣдуетъ о книзѣ церковника премудраго Сираха.

Нынѣ къ погрѣшеніямъ, или еленхомъ Никитовымъ да приступимъ, чрезъ кратчайшее нѣкое оглавленіе. И во первомъ убо обличеніи, еже бѣ: въ Божіи смиреніи, свое въ глаголаніи невѣжество показалъ есть. Во второмъ, еже бѣ о ревности благочестія, свое явилъ есть безумство въ доводѣ-

ствованіи. Въ третіемъ, еже есть: во еже бы очиститися нивѣ церковной, свое непостоянство въ состязаніи показа. Въ четвертомъ, еже бѣ о Божіей тмѣ, самъ ся издалъ быти явна еретика, отрѣцающа посредѣ свѣта святѣйшая свѣтила всея церкви. Въ пятомъ, еже бѣ о мышленіи смерти, предложеніа чина нимало окаянный уразумѣлъ есть. Въ шестомъ, еже о Христѣ бѣ, яко дарѣ Божо(іе)мъ, явствовано съ Несторіемъ обличаетъ. Въ седмомъ, о образованіи тѣла Христова, проситъ доводства, еже предъ очима доводствованно имяше у святыхъ отецъ Василіа и Дамаскина. Въ осмомъ, еже бѣше о Божественной вѣпостаси, показася стязатель смѣхотворный. Въ девятомъ, еже бѣ о Сынѣ воплощенномъ, безуменъ показася и лстецъ нечестивый. Въ десятомъ, еже бѣ о единосуществѣ Сына, раздѣленіа лѣпаго принести не умѣлъ есть. Въ первомнадесяте, еже бысть о присномъ дѣвствѣ Богородицы, показася пречудно сумняйся, идѣже сумнитися недостояше. Во второмнадесяте, еже бѣ о первородномъ грѣсѣ, безумнѣ правду утаити тщася. Въ третіемнадесяте, еже бѣ о винѣ убіеніа Захаріи, новая и безмѣстная изрече, противно мысли Василіа Великаго и Григоріа Нискаго. Въ четвертомнадесяте, еже бѣ о Маріи Дѣтородицы, явѣ жидовствова. Въ пятомнадесяте, еже бѣ о анти типахъ, химеры и чудовищная смышляти не усумнѣся. Въ шестомнадесяте, еже бѣ о поклоненіи іерею, несущему дары святыя, отрѣцаетъ честь тую, еяже и Александръ Великій, человекъ языческій, Іоадѣ архіерееви Іудейскому не отреклъ

есть, глаголюще, яко во архіерей самому Богу поклонился есть. Въ седьмомнадцате, еже бѣ о разнствѣ преждесвященныхъ отъ непреждесвященныхъ, смущеніе паки и бездну воведе, никако раздѣляя, яже весма раздѣляти подобаше, а не сливати. Въ осмомнадцате, еже быше о крещеніи, дѣйствованомъ отъ лаика въ нуждѣ, излиха неукротимъ и нечестивъ явствуется, жестосердно отрѣцая та, яже нужна весма суть ко общему спасеніа дѣлу. Въ девятомнадцате, еже бѣ о растлѣніи словесъ въ таинствѣ мвропомазанія, уже возвращается къ началу... якоже глаголется, изъ своихъ растлѣннѣйшихъ писаній, тысящми погрѣшеній обилующихъ, растлѣніе сицевое усилствовавъ показати. Въ двадцатомъ, еже бѣ о книгахъ растлѣнныхъ отъ Латинъ, въ ихъ странахъ Гречески печатаныхъ, свое неблагодарнаго сердца знаменіе вострубляетъ, желчь вмѣсто меда воздая имъ. Въ двадцать первомъ, еже бѣ о звѣздахъ, собесѣдующихъ Богу, явствуетъ свое въ тропяхъ и образцѣхъ вѣтійскихъ дебѣлое невѣжество. Въ двадцать второмъ, еже бѣ о знамени крестнѣмъ, первыми персты изображеномъ, ересь быти папы Формоса глаголетъ убо, но не доводитъ отъ искусныхъ творцевъ: того ради жезла требуетъ въ наказаніе. Въ двадцать третьемъ, о обычай благословенія архіерейскаго, въ конецъ безумствуетъ, не разумѣя таинствъ, содержаемыхъ въ немъ, тѣмже требуетъ Анкирскаго Екевора. Въ двадцать четвертомъ о латинскомъ крестѣ, на просвирѣ изображенномъ, лживый клеветникъ познавается, обличаяй то, еже во упо-

требленіи и дѣйствѣ обрѣтается въ повсемственной восточной церкви. Въ двадесять пятомъ, ежесть о антиміиссахъ, ниже реченіа окаянный антиміиссовъ разумѣтъ и знаетъ, занеже бо латинское есть реченіе, онъ же латины ниже малѣйшимъ прикоснуса перстомъ. Въ двадесять шестомъ, еже бѣ о антиміиссовъ положеніи на престолѣ чрезъ седмъ днѣй на совершенное посвященіе, лаетъ яко Керверъ. Въ двадесять седмомъ, въ немже быше о приложеніи во умнѣ трисвятаго, вся силы своя является изнурити. Въ двадесять осмомъ, въ немже быше о зломъ толкованіи: и въ Духа Святаго Господа, а не истинна, пиѳоновъ паче неже истинный Духъ содержати свѣдѣтельствуется. Въ двадесять девятомъ, еже бѣ о умнѣ Богородичномъ, отъ преподобнѣйшаго Космы сложеномъ, въ годищномъ обхожденіи великаго пятка, посмѣятельнаго исторіографа показа себе. Въ тридесятomъ и послѣднемъ обличеніи, еже бѣ о синода собраніи, не токмо отъ церковныхъ лицъ, но и отъ мірскихъ, весьма себе лютрокалвинисту быти явствова, ихже вѣра ниже древняя есть, ниже достовѣріе повсемственное.

Ихже ради тридесати ересей самому Никитѣ никогда же рукъ дахомъ, ниже впредъ имамы дати знамене дружества, во праведнѣйшія истинны основаніе. Воистинну, десятное число есть первое число кругловидное... того ради выну непщевася отъ Пиѳагориговъ, аки число совершенное, сеже яко содержитъ вся образы, и коеждо естество числѣ объемлетъ въ себѣ. Еяже ради вины между сим-

волми и оно числяшеся: никому же скоро даждь десницы; десницъ да не случиши. Десницы бо случити держася во знамя добровѣрія, занеже бо на обѣю десницу десятица перстовъ изображается.

Ниже кто съ Никитою да дерзаетъ обличати мя, яко внѣшнихъ баяній употребляхъ многажды и изобильно. Ибо и священное писаніе обыче то многократнѣ содѣвати, якоже многими показываетъ, въ словѣ 9 на пѣсни пѣсней, Григорій Нисскій, изъ главы 40 Іова, идѣже бываетъ о дочерехъ его преславное помяновеніе, ихже красоту выше мѣры похвали, и имена положи, глаголющи, писаніе: едину убо именоватися День, другую Касія, третію же Амалѣей-рогъ. Се же есть коемуждо явно, еже о Амалѣеи Греческая баснь смысли повѣсть, юже баснословятъ, зане бѣше коза доилицею Діа Критскаго, еяже рогъ егда спаде, баснь сотворила питическая изъ среды рога плиты всякій родъ жита и овощей изобилство.... Еда убо святое писаніе вѣрова тѣмъ, яже о Амалѣеи басненно повѣствуются? Никако. Но яко дщи Іовля плодоноснѣйша бѣше всѣхъ, яже изъ добродѣтели благъ, симъ именемъ назнаменовася, басненнымъ суетамъ далече отверженнымъ бывшимъ. Симъ придаждь Григорія Назіанзина, греческими баянми радовавшася, ово ради проявленія всемудрія¹ си, ово ради украшенія своего слова. Егоже стопамъ подражающе, глаголахъ же и писахъ, яже пріятію моему прилична видѣшася. Оставляю Іустина мученика,

¹ Было: великомудрія.

и Климента Александрійскаго, Θεодорита, Аѳенатора, и иныя подобныя, иже изъ басней обличенія многая изводяще, еллины еллинскими хитрословіи видѣни быша возобличати.

Поемлетъ на мя усиленно Никита, яко его именовахъ еретика явѣ. О, да бы ми ложну въ семь явиться! Но Сократоваго онаго изряднореченія не забуду: глаголи, да ты увижду! глаголаше той философъ. Бесѣда твоя и писанія твоя такова ты являютъ и издають, о друже! Измѣни разумѣніе и умъ, буди каѳоликъ, и таковаго ты народнѣ извѣщу быти. Но занеже отческія вѣры оставитель и отпадникъ явствуешися быти, како ты не нареку нечестива еретика? Ересь блудница есть, сыны имѣя подверженныя, и собираетъ яко куропатва она, яже никогдаже роди. На добрый путь возвратися, и абіе дамы ти цѣлованіе мирное, яко блудному сыну. Есть псаломъ Давидовъ, иже имѣетъ сицевое надписаніе: о измѣняемыхъ.... Изъемше бо токмо Божественное оное пресущественное естество, еже всякаго измѣненія и преложенія чуждо есть, прочая вся измѣняться могутъ, или въ лучшее, или въ худшее. Царствующій убо пророкъ намъ совѣщаетъ измѣненіе всячески пріяти, еже наученіе о измѣненіи паче и паче знаемо будетъ, аще различныя сказатели услышимъ, ихже единъ убо о цвѣтѣхъ, иной о кринѣхъ прелагаетъ вмѣсто того, еже о измѣняемыхъ. Тогда бо цвѣтъ исходитъ, егда зима на весну измѣняется, еже знаменуетъ, по уму святаго Григорія Нисскаго, прешествіе отъ злобы, измѣненіе же на лучшее... еже явѣ есть

въ кринѣ, измѣненномъ изъ чернаго и мрачнаго въ снѣжный видъ и млечный. Къ сицевому премѣненію и новому преображенію тебе, Никито, единодушно увѣщаемъ и преложенія твоего желающе на лучшее, Бога молимъ, да услышитъ молитвы наша.

Ктому увѣщенныхъ васъ всѣхъ имѣти хошу, архіереовъ, и за вѣчный завѣтъ будущія памяти повѣствую, яко въ сихъ и прочіихъ моихъ писаніихъ всего мене подлагаю разсужденію святыя церкви, въ нейже наипаче царствуетъ званіе видѣнія и разсужденія. Вѣще бо видятъ очи, неже око. Ибо Никитова писанія, станицамъ Авгіевымъ подобная, не одинаго мене, Паисія, яко оны единого Еркула, ко изсушенію требуютъ. Изобилуютъ воистинну лжами безчисленными, яже еще не бы крѣпчайшими винословіи веригами связаны быша, гонзателныя избѣгли бы рукъ, яко о истуканѣхъ¹ Дедаловыхъ утвержаше Платонъ, паче же въ легкую нѣкую и суетную сѣнь, измѣнишеся, гонзнули бы, якоже отъ Иксіона излюбленная Ира премѣнишя въ облакъ, избѣгающе очесъ. Соблюдохъ прописанный чинъ въ заключеніи и отраженіи лживыхъ мнѣній, воежебы угоднѣе и удобнѣе тщаливый читатель... могъ имѣти въ предручіи отвѣты и соблюденія исчерпненная и истолкованая отъ различныхъ отецъ истинныхъ свѣдѣтельствъ, обличая чрезъ прешествіе сего времени еретики, иже не отъ Христа, но отъ чловѣкъ свое хотятъ

¹ Было: *образъхъ*.

производити именованіе, не инако, якоже Самаряне отъ Іудей различствовати являхуся. Александръ Макидонскій, по свѣдѣтельствѣ Іосифа, въ книзѣ 11 въ гл. послѣдней, седьмаго года данъ отпустилъ быше Іудеомъ. Просиша подобнѣ и Сихимити у него тоеяжъ благодати, занеже бо и они ничесоже сѣяху по закону. Обаче же вопросившу царю, кто бы они были, отвѣтоваша Еврея себе быти, именоватися же отъ сосѣдовъ сихимитами. Имже на се Александръ отвѣтъ даде, яко онъ сію свободу точію Іудеомъ даровалъ есть, а не инымъ. Правовѣрныи соотвѣтуютъ Іудеомъ, еретицы же Самаряномъ. Имѣяй уши слышати, да слышитъ. Но о сихъ довлѣетъ.

А п о с т р о ф ъ.

Павелъ Апостолъ учитель языковъ, пишуще къ Тимоѳею въ посланіи 2, въ гл. 4, сія единою назнаменовати не усумнися: *подвигомъ добрымъ подвизахся, теченіе скончахъ, вѣру соблюдохъ, прочее же отложимися вѣнецъ правды.* Подвизахся воистинну и азъ, пресвѣтлый, благочестивый и непобѣдимый царю, о вѣрѣ каѳолической, о церкви вселенстѣй, и совершивъ сіе дѣло, тебѣ, преблагоденственнѣ царствующу, подаю и подношу е. Дерзновенъ негли быхъ ко пріятію сицеваго труда, ко взятію толика бремене, силамъ моимъ не равна; обаче онаго увѣщанія память содержа, еже въ Дѣяніихъ Апостолскихъ, въ гл. 18, чтется ко Павлу сотворенное: *не бойся, но глаголи, и да не*

*умолкнеша. Пятилѣтнее оное Пифагорическое молчаніе растерзахъ, вредно быти всячески оно въ нуждномъ дѣлѣ непуща. Ибо и величайшій, купно же и мудрейшій во царѣхъ, время глаголанія и время молчанія назнаменова. Не невѣдѣхъ о бѣдствѣ, еже належитъ учителемъ во обличеніи погрѣшеній: глаголетъ бо Еккліастъ: *сѣкій дрова, бѣду приимлетъ въ нихъ*, въ гл. 10. Дровами притайнѣ¹ и образно именуя умная зрѣнія, яже въ писаніи бо-годухновенномъ многочастнѣ содержатся. Еда о дровахъ радить Богъ,—глаголетъ Павелъ въ первомъ ко Коринѣомъ въ гл. 9, си есть о дровахъ неплодныхъ? Инако же писано есть во второмъ законѣ въ гл. 20: *да не постычиши садовѣа ея, возложивъ желѣзо на нѣ, но да яси плодъ отъ нихъ, а самаго да не постычиши*, сирѣчь древа плодоноснаго. Нападохъ воистинну на дрѣвеса неплодная, или на кислая, на писаніа Никитова, яже изсѣщи весьма подобаеъ желѣзомъ духовнымъ и вовеци во огонь, по второму закону, повѣлевающу: *дрѣво, еже увѣси неполезно ко ястію, погубиши и изсѣчиши*. Приложися на послѣдокъ пресвѣтлаго твоего царскаго величества повелѣніе изволенія, егоже азъ простѣйшая мановенія вмѣсто благочестивѣйшихъ заповѣдей держу и вмѣсто повелѣній прилежнѣйшихъ: и того ради препоясахся на сей подвигъ, помняще оное Давидское, въ псал. 44: *препояши оружіе твое по бѣдрѣ твоемъ, силне, красотою твоею и добротою твоею, и наляци и успѣвай*. Воистинну,*

¹ Было: *подтаителнѣ*.

подража твое пресвѣтлое царское величество въ дѣлѣ семъ пчеламъ, между безсловесными остроумнѣйшимъ. Ибо пчелы... яже... сицевое содержатъ именованіе, егда медъ свой тщатся слагати, не шипкомъ прилагаются, не криномъ присѣдаютъ, наркиссовъ не ищутъ, гіакинѳовъ не взыскуютъ, ниже инаго коего благоуханнаго цвѣта, сладостію дышуща, хотятъ, но сія вся оставше и нерадиво минувше, идутъ къ дятелинѣ скоро. Еста же дятелины два рода, единъ бѣлый, другій черный, изъ еюже сокъ изсысающе испиваютъ пресладко, иже обаче острѣйшій быти повѣствуется, и отъ всякія сладости далече. Обаче же двоедятелинный оный медъ всякую иную сладость превосходитъ, и превышаетъ. Убо господственнѣйшая твоя благодать, оставивъ преизрядныя иныя мужи, тако въ наставленіи процвѣтшія, яко во ученіихъ воспитѣнныя, на мя единаго, аки на дятелину, призрѣла есть, во еже бы сердцу моему отрыгнути сладчайшая слова Божія, всякою медвенною сладостію изобилующая, тако, аки бы быти во устѣхъ моихъ хитрости нѣкой медотворной. Но по истиннѣ нѣсмь пчела Аттическая, яко Ксенефонъ онъ словеснѣйшій въ Греческомъ языкѣ, ниже изобилую ветійскими украшенми и образы, имиже обычно обыче слово помрачатся. Но аще глаголю, въ дусѣ кротости глаголю, въ простотѣ глаголанія, немного устранився¹ отъ употребленія и обычая святыхъ отецъ, иже не удержаваяхуся отъ словесъ прос-

¹ Было: чуждѣ.


тыхъ, ибо Господь, въ книгахъ Леввитскихъ, въ гл. 2, заповѣда, воежебы. ничесоже или кваса, или меда въ жертву было приношено. Идѣже именемъ меда Климентъ Александрійскій сего ветійства мірскаго ласкательства знаменовати свидѣтель есть. Мала поистиннѣ между крылатыми... есть пчела, по медоточному Соломону; обаче начало сладости плодъ ея. Могло бы воистинну здѣ торжествовати мое слово, аще не бы многословіе было мнѣ гонзательно. Женихъ къ невѣстѣ си глаголетъ въ пѣснѣхъ пѣсней: *вертоградъ еси замкненный, сестро моя невѣсто*. Сія невѣста есть душа вѣрная, аще Григорію Нисскому вѣру имемъ, — Божественныхъ жениха Христа таинствъ общница бывши; есть же убо вертоградъ красный и благоцвѣтущій, всякихъ имѣющъ въ себѣ древесъ красоту, сирѣчь сладкую смоковницу, плодоносную маслину, високовѣтвенный финиксъ, и изобилующую лозу, — нетернистую купину, ниже драчіе, но вмѣсто ихъ кипарисъ и мирсина. Сицевыми древеси изобилуетъ вертоградъ сей благонасажденный, отвсюду огражденный, во еже бы татемъ и звѣромъ никоего къ нему имѣти прихода. Того дѣля и финиксъ плодъ свой, аки сокровище, горѣ сохраняетъ, во еже бы ко плоду его татемъ не удобно приступити. Есть же отвсюду огражденъ оградой заповѣдей и повелѣній окопомъ того ради, во еже бы не мощи приступити и попати иноку дивому, изъ лѣса изшедшу. И что, молю, ино бѣше рай, первозданныхъ полата, да не реку царское жилище, развѣ утѣхъ вертоградъ, иже и насадителя достоинствомъ и

дѣлателя святостію, и зданія красотою, изобиліемъ вещей, мѣста пространствомъ, небесе благодатію иная вся превосхождаше, четырехъ рѣкъ изобиліемъ о нихже благолѣпо речеши: рѣки тамо млека, и рѣки нектара плыша и текоша, дву дереву изяществомъ, жизни и вѣдѣнія, прекрасный и преизрядный, яко ниже Адоридову, ниже Алкинееву, ниже Гесперидскому, ниже Семирамидину верту, или еще суть нѣціи сихъ честншіи, со раемъ симъ въ сравненіе когда либо пріити возможи? Воистинну Кирилъ, въ сказаніи на Евангеліе святаго Іоанна, сицевая дрeвеса истолкова быти умная зрѣнія, и книги вертомъ сравниетъ: суть, глаголетъ, книги, имже всѣваются различная зрѣнія, яко духовный нѣкій рай, иже изобилство раждаетъ плодовъ Святаго Духа. Еще же Іліа Критскій, въ первомъ словѣ Назіанзиновомъ, образно именована чрезъ всякое древо, отъ негоже Адаму ясти никакоже возбранися, быти познаніе, яко то, еже враждается во умѣхъ нашихъ изъ всѣхъ вещей созданныхъ, такожде и отъ Божественнаго строенія и власти. Но вскую долгше сими упраздняюся? О Іосіи царѣ Святый Духъ во вѣчныхъ скрыжалѣхъ запечатлѣнно быти изволи, яко онъ еще юноша нача искати Бога Давида отца своего: сіе воистинну благочестіа служеніе, между иными изрядными добродѣтелей роды, во пресвѣтломъ твоємъ царскомъ величествѣ обрѣтаю, и наслѣдственнымъ нѣкимъ закономъ пресланое и глубоко утвержденное созерцаю. И поистиннѣ, идѣже свое есть благочестію мѣсто [величайшее же сіе имать быти

и изрядное], тамо всякихъ благъ обилуетъ множество и плодъ, того дѣля, яко сія богословская добродѣтель не кромѣ дороносцевъ обрѣтается, ниже кромѣ прики (?) долгше жити можетъ. Ничесоже бо истиннѣе гласа Бога самаго: чтущія мя почту, презирающіи мя презрѣни будутъ. Аще же гдѣ, наипаче же въ князѣхъ, ихже Богъ на высотѣ постави, то преимуществовати должнствуетъ, занеже ихъ честншихъ отъ людей и вездѣ благополучнѣйшихъ сотворилъ есть. Яко царь убо превелій, вящше отъ Бога треблажайшаго пріялъ еси, но и связнѣйшимъ таинствомъ привязанъ сый къ его чести, по вся дни паче и паче понуждаешися. Отнюдуже преизвѣстенъ есмь, яко величество твое благочестивѣйшее не точію сопротивляется, но и всимъ сердцемъ отмещетъ тыя, иже сицеваго... благочестіа не чтутъ усердно, но явѣ противятся ему, или злобами рвы ископавше колеблють. Сими убо винами подвигненъ, сіе благочестіа служеніе всячески архіерейское воспріяхъ, и твоему пресвѣтлому царскому величеству все, еликоелико есть, отдаю и вручаю. Но да благоволитъ, молю, твое пресвѣтлое царское величество премилостивно и благодатнымъ сердцемъ сія моя нощедѣнія пріяти, по обычныя своя благодати желанному усердію, не тако на даръ сей взирая, иже есть зѣло скуденъ и малъ безмѣрно, но на внутрности усердіе и внутрене говѣинство вручающаго... не инако, якоже Артаксерксъ царь онъ Персидскій, иже милостивно пріять Синетову воду, юже онъ обѣма рукама си, отъ ближнія рѣки по-

черпше, волею цареви принесе вмѣсто дародаяніа. Не лѣпо бо мняше предъ толикимъ самодержцемъ явитися кромѣ всякаго дара, еже все и Богъ высочайшій древле Евреомъ повелѣлъ быше, глаголюще: *да не явишися предо Мною тощъ*, сирѣчь кромѣ всякаго дара. Дѣло убо мое есть Еркуловому едва трудови не равное во укрощеніи и сожженіи чудовиднѣйшія сея новыхъ ересей гидры, Никитовыхъ свитковъ. Сіе ко стопамъ твоимъ подложивше, самъ простерся, вручаю тебѣ, писаній рачителиви и возвысителеви, тебѣ мужей ученыхъ величайшему любителеви, Тебѣ, моему изрядному милостивѣйшему благодѣтелеви, емуже Божіе строителство да дастъ свыше Несторіевы Олимпіады, такожде Арганѳоническая да даруетъ и Мафусаиловы лѣта, ради разширенія вѣры благочестивыя, благоденствія дѣля сего величайшего царствія, и нашихъ ради отмщеній. Иныи иная твоему пресвѣтлому царскому велич: да усердствуютъ торжества и готуютъ. Азъ же того твоей непобѣдимѣй славѣ во первыхъ желати непрестану, да чрезъ твой родъ, кудеравыми украшенный власы... всю Греческую землю отъ мучительства свободиши и возмстиши, дабы когда либо, не на земли токмо, но и на небеси назнаменованною памятію, безсмертнаго изъ смертна тя сотворили безмѣрныя побѣды на видимыя и невидимыя враги, и да рекутъ вси людіе: буди, буди! Аминь.





П Р И Л О Ж Е Н І Е.

Въ той же академической рукописи (№ 68), въ которой находится переведенное Полоцкимъ сочиненіе Паисія Лиарида противъ челобитной Никиты, помѣщены, вслѣдъ за нимъ, еще два Паисіева сочиненія, также переведенныя Полоцкимъ съ латинскаго на славянскій языкъ и писанныя также польскими буквами,—одно озаглавлено: «Назнаменованія, или наблюденія изъ различныхъ соборовъ о обычаяхъ, еюже употребляху св. отцы въ синодотвореніи», другое: «Поученіе, или бесѣда увѣщательная».¹

«Назнаменованія», излагающія именно «обычай», или внѣшній порядокъ, въ какомъ происходили древніе, и именно вселенскіе, соборы, съ указаніемъ на то въ особенности, какое участіе принимали въ нихъ греческіе императоры, какъ надобно полагать, составлены Паисіемъ, можетъ быть, по просьбѣ царя Алексѣя Михайловича, въ виду предстоявшихъ соборовъ 1666—1667 и. по дѣлу раскольниковъ и по

¹ Предъ этимъ «Поученіемъ» въ рукописи приклеенъ листокъ, съ обѣихъ сторонъ исписанный полатынью: это есть собственноручное, весьма любопытное письмо Паисія Лиарида къ царю Алексѣю Михайловичу, въ которомъ онъ излагаетъ свои злоключенія, приведшія его въ неоплатные долги, и проситъ у царя помощи. Письмо это, надобно полагать, Паисій далъ Симеону Полоцкому для перевода на русскій языкъ и Полоцкій сохранилъ его на память.

дѣлу патріарха Никона, для показанія, какъ могли быть устроены сіи послѣдніе по образцу древнихъ примѣровъ и какое участіе долженъ былъ принять въ нихъ самъ царь. Въ этихъ видахъ, къ изложенію порядка семи вселенскихъ соборовъ, Паисій прибавилъ такое же изложеніе и двухъ соборовъ, извѣстныхъ съ именемъ осмаго вселенскаго,—то есть собора, бывшаго по дѣлу патріарха Фотія, и собора Флорентійскаго. Въ изложеніи своемъ Паисій руководствовался извѣстнымъ изданіемъ Бинія *Concilia generalia et provincialia graeca et latina*, 1618 г.: на это изданіе онъ дѣлаетъ и ссылки съ указаніемъ страницъ.¹

«Поученіе» на праздникъ Рождества Христова составлено Липаридомъ отъ имени присутствовавшихъ въ Москвѣ патріарховъ Паисія и Макарія. По нѣкоторымъ частнымъ указаніямъ въ этомъ поученіи можно полагать, что оно составлено уже послѣ суда надъ раскольниками, такъ какъ въ немъ упоминается объ устраниніи книжныхъ неисправностей въ нашихъ церковныхъ книгахъ и о торжествѣ православія; но главное содержаніе и главную цѣль поученія составляетъ то же, о чемъ Паисій говорилъ въ заключительныхъ статьяхъ своего сочиненія противъ Никиты,—то есть указаніе на отсутствіе въ Россіи образованія и настоятельную нужду открыть училища, особенно для изученія греческаго языка,—указаніе, дѣлаемое теперь царю и архіереямъ россійскимъ отъ

¹ Въ Описи патріаршей библіотеки, прошлаго столѣтія, значится подъ №№ 556 и 567 «Соборовъ вселенскихъ іереклатинскихъ десять» (книгъ). Не это ли именно изданіе Бинія разумѣется здѣсь? Теперь книгъ, означенныхъ подъ указанными нумерами, въ Синодальной библіотекѣ нѣтъ.

лица вселенскихъ патріарховъ. Достойна также особа примѣчанія изложенная здѣсь мысль о необходимости пріобрѣтенія русскимъ правительствомъ въ Іерусалимѣ земельнаго участка и построеніи на немъ храма, въ видахъ облеченія русскому народу благочестиваго паломничества во святую землю,—мысль, только въ наше время приведенная въ осуществленіе.

Въ одномъ изъ сборниковъ сочиненій Полоцкаго, находящихся въ Синодальной библіотекѣ (№ 657), есть «Слово въ день Рождества Христова отъ лица святѣйшихъ патріархъ Паисія Александрійскаго и Макарія Антіохійскаго о взысканіи премудрости Божественныя» (л. 697 и слѣд.). Слово это находится здѣсь въ двухъ спискахъ, слѣдующихъ непосредственно одинъ за другимъ: первый, черновой, писанъ собственноручно Полоцкимъ, совершенно такъ же, какъ и сочиненіе Лиарида противъ Никиты, т. е. польскими буквами; другой перебѣленный, писанный по русски, малороссійскимъ почеркомъ, но съ поправками самаго Полоцкаго.¹ Надобно полагать, что слово это сочинено также Паисіемъ Лиаридомъ, и Полоцкимъ только переведено съ латинскаго на русскій языкъ. Въ этомъ убѣждаетъ особенно самый характеръ витійства, какимъ оно отличается, свойственный именно Лиариду, обладавшему несомнѣнно большимъ ораторскимъ талантомъ; притомъ же во второй своей половинѣ оно имѣетъ по содержанію близкое сходство

¹ Переписчикъ—малороссъ хотя и умѣлъ читать писанную польскими буквами рукопись, но не все разбиралъ правильно: поправки Полоцкаго касались именно такихъ, неправильно разобранныхъ, словъ; но нѣкоторыя касались и первоначальнаго текста.

съ тѣмъ «поученіемъ» Лиарида, составленнымъ отъ имени патріарховъ, которое находится въ академической рукописи: и здѣсь говорится также о необходимости образованія для Россіи и учрежденія съ сею цѣлію школъ, особенно для изученія греческаго языка. Притомъ же нельзя и допустить, чтобы патріархи поручили составить отъ ихъ лица поученіе незнакомому съ ихъ языкомъ Симеону Полоцкому; а Паисій былъ въ Москвѣ ихъ главнымъ руководителемъ и совѣтникомъ, такъ что ему, по всей вѣроятности, принадлежала и самая мысль о патріаршемъ поученіи къ Царю и народу руссійскому указаннаго содержанія.


Въ «Патріаршихъ выходахъ», подъ 25-мъ числомъ декабря 1666 года, записано, что въ этотъ день патріархи Паисій и Макарій служили литургію и что «послѣ обѣдни поученіе ихъ челъ Рязанской архіепископъ Иларіонъ» (Доп. къ Акт. Ист. т. V, стр. 100). Можно съ вѣроятностію полагать, что здѣсь разумѣется одно изъ составленныхъ Паисіемъ на этотъ день патріаршихъ поученій, и именно то, списки котораго находятся въ синодальной рукописи, такъ какъ въ этомъ поученіи нѣтъ рѣчи о расколѣ, окончательный судъ надъ которымъ еще не былъ произнесенъ тогда, и такъ какъ въ рукописи есть уже и перебѣленный его списокъ: по этому списку, или по переписанному еще тщательнѣе, вѣроятно, и было прочитано Иларіономъ патріаршее слово.¹

¹ Самъ Паисій, по незнанію русскаго языка, произноситъ въ Россіи поученія не могъ. Извѣстенъ, впрочемъ, случай, когда онъ говорилъ рѣчь по-гречески. Это было 26 сент. 1667 года, при погребеніи вдовы Бориса Ивановича Морозова, Анны Ильиничны, сестры царицы Маріи Ильиничны: въ

Было ли прочитано въ церкви, или другимъ способомъ доведено до слуха Государя другое поученіе, извѣстій объ этомъ мы не знаемъ.

Оба Паисіевы поученія на Рождество Христово и «Назнаменованія изъ различныхъ соборовъ», какъ имѣющія отношеніе къ сочиненію Паисія противъ Никиты и вообще къ исторіи раскола, мы признали не излишнимъ напечатать въ видѣ приложенія къ его опроверженію Никитиной челобитной.

Н. С.



«Патріаршихъ выходахъ» замѣчено: «послѣ опитыванія поучилъ, смотря на гробъ, Паисій митрополитъ Газскій, съ доклада юсударя царя и съ благословеніемъ святѣйшихъ патріарховъ, руки ихъ всѣхъ трехъ цѣловавъ; и о в о р и л ъ своимъ языкомъ и разсуждалъ руками, указуячи на гробъ (Доп. къ Акт. Ист. V, стр. 115). Знаменитая въ расколъ боярыня Морозова, вдова Глѣба Ивановича, безъ сомнѣнія, присутствовала на похоронахъ своей близкой родственницы, и можно представить, какое впечатлѣніе произвело на нее это Паисіево «разсужденіе руками», столь несвойственное древнерусскому чтенію церковныхъ поученій...



I. Поученіе, или бесѣда увѣщательная.

Аще когда бысть, нынѣ воистину есть привѣтно Христова рождества торжество въ господствующемъ и царствующемъ семъ градѣ Москвѣ. Того ради, яко достоинъ бысть тѣшиться и видѣти своима очима дву селенскихъ патріарховъ литургисающихъ, благословящихъ его и посвѣщающихъ. Сего ради благоприличествуетъ оно псаломское восклицати пѣніе: се есть день, его же сотвори Господь во спасеніе, или паче реку во свобожденіе повсемственное. Время же сіе есть восклицанія по Божественному¹ Іоанну Златоусту: сіе есть празднество празднествъ и торжество торжествъ. И того ради сугубъ есть радости извѣтъ въ семъ богоспасаемомъ градѣ и въ святой великой соборной Христовой Церкви. Якоже убо сугуба суть дарованія, сирѣчь небесная и земная, тако по сугубому человѣку, внутреннему и внѣшнему, прилагаются, раздѣляются и дарствуются.

Премудрость Сынъ и Слово Божіе есть и глаголется, въ Егоже похвалу величайшій царь Юстиніанъ внутрь новаго Рима Христу Богу и человѣку созда святую Софію, приличнымъ именемъ именуя. О ней же, премудрости, глаголаше премудрый Соломонъ: *премудрость созда себѣ храмъ*,—дѣвственное сирѣчь жилище, Богородицу Марію,—еже утверди седмю столпами, сирѣчь седмочисленными дары Духа Пресвятаго, имиже ю преблагій Архитектонъ Богъ полную сотвори благодатей. Вождѣлѣ праотецъ нашъ Адамъ равенъ быти Богу премудрѣйшему, и того ради снѣдѣ отъ древа

¹ Доселѣ писано плохой словянской скорописью; далѣе польскими буквами.

вѣдѣнія злаго и добраго, дабы познати доброе и злое; но паде отъ надежды того божества, дондеже съ небесе снити превѣчной божественной Премудрости и воплотитися. Тогда бо Богомъ чловѣка сотвори, даруя ему священное писаніе, сирѣчь истинную премудрость, законъ писанный, пречестное новыя благодати Евангеліе. А занеже ветхій завѣтъ писанъ быше еврейски и того ради зѣло немногимъ знаемъ быше, восхотѣ Богъ, создатель всѣхъ, прежде Христова воплощенія акцъ за 250 лѣтъ, претолковатися на языкъ греческій, воежебы вѣдѣти народомъ и языкомъ отъ пророковъ провѣщанная языкомъ еврейскимъ о Христѣ Мессіи, пріити хотящемъ. Того ради многія славы достоинъ нещуется быти царь Птоломей, по рекломъ Филадельфъ. Сей бо тщаливъ бывъ и зѣло рачитель ученія, книгохранилницу создалъ быше въ Александріи градѣ, идѣже собрани бяху во малѣ времени пятьдесятъ тысящъ книгъ и 4800 свитки различные, по святому Епифанію. Сей убо между иными книгами взыска Пентатевхонъ и книги пророческія, дабы на языкъ греческій преложити. И убо преложишася отъ 72 премудрыхъ сказателей, по образу божественнаго Моисея, иже взялъ быше 72 старцевъ, по шести отъ коегождо колѣна, болшаго ради извѣта покоя, да не были бы смущенія между 12 колѣны Израиля, якоже намъ предаде Аристей. Обаче сіи сказатели разумно многая еврейская реченія оставиша не истолкованныя, якоже: аминь, осанна, Саваоѣъ, Адонаи, аллелуіа, большія ради вѣры, паче же нѣкоего ради почитанія старѣйшаго языка еврейскаго, отъ егоже нынѣ имѣетъ начальную вѣрность. Нѣціи бо, якоже Акила, Θεодотіонъ, Симмахъ, развратиша святое писаніе, истолкованное, іудейскимъ умысломъ толкующе и держаще. Но всеу трудишася; того ради, яко остается всегда текущій источникъ, свѣтло и чисто пловущъ, источающъ языка еврейскаго рѣки, во вся вѣки будущія. Оттуду Лукіанъ, Антіохійскій пресвитеръ, святыя книги видя много быти развращенны, самъ вся разсмотрѣвъ изъ еврейскаго діалекта, до первыя приведе красоты. Преведошася же и отъ греческаго языка на арабскій мнози свитки;

обаче сохранишася нѣкія церковныя книги, яже и до днесь еллински чтутся и поются; тако, воежебы ни единому арабу мощи нынѣ хиротонисану быти, развѣ ащебы греческому прежде научился языку и природный арабскій умѣлъ бы чести кромѣ всякаго препятія. Пріяша же отъ греческаго языка и западніи премногая; обаче и отъ нихъ сохранишася многая, яже еллински пишутся и толкуются,—якоже: киріе-елеисонъ, агіось о ѿеось, агіось исхирось, агіось атанатось, елеисонъ имась,—якоже слышася пѣніе сіе въ небеси, отъ невещественныхъ силъ. Гречески нынѣ чтется Апостолъ; гречески и святое Евангеліе поется, и самый св. символъ на серебрянныхъ дскахъ гречески изваянъ бѣше во время Лва папы Римскаго на обличеніе противноумствовавшихъ и на утвержденіе рода христіанскаго. Тоже сотворися, да соблюдется на вѣки корень, и во время усумнѣнія на соборахъ греческая начальнѣйшая писанія да сохраняются во газофилакіяхъ на будущее время чиста и непорочна. Еще же и во время Венедикта блаженѣйшаго папы гречески всѣмъ италіаномъ повелѣно бысть явѣ чести символъ святой, да не быти бы коему соблазна извѣсту братіи въ будущее время ради языка сокращенія и мрачности. И того ради иже имаше быти хиротонисанъ на римское пресвитерство, никоимъ образомъ утвержденъ бѣше, развѣ аще бы первѣе символъ греческій написалъ и ко вселенскимъ послалъ патріархомъ: тогда бо уже, по исповѣданіи вѣры, имаше свободную власть на престолѣ. И Дамасъ папа увѣщаваше святаго Гіеронима, пять языкъ умѣвша, дабы отъ языка греческаго Новый Завѣтъ преложилъ и до начального греческаго писанія правости возвелъ, вѣдуще искусно, яко отъ языка греческаго весь Новый Завѣтъ имѣетъ свою правду и нелживость. Но и иніи роди, нынѣ во всемъ востоцѣ живущіи, нѣкія ради чести и отъ отцевъ преданія хвалы, на литургіяхъ возгласы обыкоша еллински творити, и прочая нѣкая блюдутъ зѣло неповрежденна, яко: трисагіонъ, или докса Патри, Киріе елейсонъ, агіось, агіось, агіось Киріось; понеже вси роди похваляются имѣти начало отъ

языка греческаго и наслѣдно отъ него нисходити. Паче же и святыи символъ еллински чтутъ нынѣ, чести ради божественныхъ отецъ, собравшихся во преизрядный градъ Никейскій и въ царствующій градъ Константинопольскій на первый и на второй соборъ; воеже бы яко они составиша еллински символъ святыи, тако бы и чести. Вы же, о православнии людие россійстие (но молю, да не во зло вмѣните себѣ, внемлите услышати вамъ отъ насъ, дву патріарховъ, правду), вы, глаголемъ, толкующе греческія книги на словенскій вашъ языкъ, и ни единыя книги оставляюще греческія кромѣ толкованія и преведенія, тако, яко ниже сѣни, или останкомъ якимъ нашего греческаго языка въ нихъ оставить вамъ во память. Того ради послѣдствоваша нѣкая погрѣшенія: сія же не злая ради вины, точію невѣжества дѣля, и нерадѣнія о греческомъ языкѣ, иже единъ правильно и твердо держитъ священносвятое Христово Евангеліе, якоже повсемественный и по всемъ мѣрамъ разліянный. Въ семъ бо въ началѣ составишася и отъ трехъ Евангелистовъ, Божественнѣ подвигнутыхъ, въ началѣ народствована быша (Ибо единъ Матѣей еврейски написа Евангеліе, еже и Варнава великій Апостолъ на языкъ греческій преведе, еже обрѣтоша во время Зинона царя въ преславномъ островѣ Кипрскомъ, егоже ради даровася архіепископу Кипрскому еже быти не подчиненнымъ. Якоже и епистолію св. Павла, ко евреомъ писанную, Римскій Климентъ преложи на греческій языкъ). Прочіи же вси Евангелисти, Марко, Лука и Іоаннъ, еллински написаша. Но откуда непщуете родишася прозябли (прозябенія) суетныхъ словесъ, нынѣ по всей Москвѣ разсѣянныхъ, развѣ отъ самага лишенія греческаго языка, еже вы, не добро творяще, весьма отвергли есте? Ибо во иныхъ странахъ зизанія ересей и блядивая ученія возрастоша; едино точію зерно чистое, еже собрано быше многимъ потомъ и превеликими труды, сѣмо къ вамъ принесено быше, зерно чистое, кромѣ куколя и кромѣ тернія,—и хлѣбъ чистый Божіею милостію и благодатію, по седми святыхъ вселенскихъ соборахъ, въ сей преславнѣйшей земли уквасися. А

занеже символъ святыи есть основаніе истиннаго нашего исповѣданія, Фотій, между патріархи премудрѣйшій, еллинскими письмены потщися изображену ему быти на саккосѣ архіерейскомъ. И тако, златомъ написавъ, преслалъ къ вамъ яко даръ на соблюденіе и сохраненіе православныя вѣры во будущія времена, непщую патріархъ, еже быти ему во знамя любви ко грекомъ неизмѣнныя.¹ Но прелсти его и насъ всѣхъ надежда, того ради, яко ни самому Трисвятому слышимъ вами пѣтися, ниже Херувимской пѣсни. Тѣмже, прииде сонмъ злыхъ, помалу всходя, якоже всему церковному древнему преданію измѣнитися и смутитися, сирѣчь, яко всякъ хотяше быти учитель, не слушая онаго Іакова брата Господня увѣщанія: да не будутъ мнози учителя въ церкви, такожде не разсуждая онаго завѣта другаго: да не преїдеши предѣловъ положенныхъ отцы вашими. Обаче, да не будетъ нашъ глаголъ свидѣтельства кромѣ, нѣкая изъ многихъ свидѣтельствъ, произведемъ на среду. Посвященіе воды во всѣхъ четырехъ міра сего странахъ обыче дважды бывать; здѣже невѣмы отъ кого узаконено бысть, еже единожды быти паче чина великаго Типика. Обаче оное реченіе: *днесъ*, еже многажды въ молитвѣ блаженнѣйшаго патріарха Іерусалимскаго Софронія усугубляется, не ношъ, но явѣ день изъясляетъ, ко еже той тайнѣ совершатися. Что же о аллилуіа глаголати подобаетъ, еже трижды въ 19 главѣ Апокалипсіа глаголется отъ 74 старцевъ, и паки вмѣсто слава Тебѣ Боже поется аллилуія, яко *воцарися* Господь Богъ всемогущій? Точію да трижды, а не дважды поемъ аллилуія, съ приложеніемъ: слава Тебѣ Боже. Что паки глаголателно есть о знаменіи креста святаго, еже изображается первыми тремя персты, якоже отъ св. Мелетіа патріарха Антіохійскаго научихомся, иже тако изрядно Св. Троицу изъяви народнѣ христіанскимъ людямъ; тому же прежде онъ научился святому

¹ Рѣчь идетъ, какъ надобно полагать, о саккосѣ митрополита Фотія, доселѣ хранящемся въ Синодальной ризницѣ, котораго Паисій смѣшалъ съ патріархомъ Фотіемъ.

увѣщанію отъ святаго Игнатія, иже престолъ онъ Антіохійскій украси богоугодно.... Но прешель бы день, ащебы хотѣти намъ вся оскуденія считати, болѣзнь намъ паче творяще внутрь, духовнымъ отцемъ вашимъ и истиннымъ пастыремъ. Убо, о крѣпчайшій и Богомъ вѣнчанный господине царю, великій княже Ал. М. в. В. М. Б. Р. самодержче, иже расширилъ еси и умножилъ еси сіе, тебѣ отъ Бога врученное, царство, отъ Царя царей и отъ Господа господей господствующихъ на земли, воздвигни очеса ума твоего предобрѣйшая, и зри веселымъ лицомъ Христову Церковь, яже уже отлагаетъ одѣяніе смутное вдовиное и свѣтлыми одѣвается одеждми, аки невѣста прекрасная, законнаго своего жениха в малѣ ожидая. И на насъ призри, отъ далечайшихъ странъ Востока пришедшихъ, чрезъ величайшія горы и юдоли и стропотнѣйшія пути, твоему точію царскому повинующихся повелѣнію, еже ко извѣщенію благочестія, ко повсемственныя свободы изъявленію. Уже отъиде велій онъ мракъ и темная сѣнь разсыпая, уже прогнася Египетская оная тма, яже чрезъ 9 лѣтъ здѣ плачевнѣ помрачаше, и возсія на послѣдокъ денница радости, и вездѣ солнце правды пресвѣтлое явѣ есть, извѣствуя веселія вѣсти. Поистинѣ, никогдаже дву солнцу весь міръ видѣ; два же вселенская солнца благочестивый градъ Московскій видѣ на свое веселое благополучіе. И того ради надежднѣ восклицаемъ и глаголемъ: радуйся и веселися, о царствующій граде Москва, иже скипетры Палеологовъ наслѣднѣ пріялъ еси и не кромѣ Божія смотрѣнія сіе наслѣдствіе держиши (Софію бо Палеологовну великій князь московскій Иванъ въ жену поятъ, по лѣтописцу греческому, дочь господаря Θомы Палеолога, господствовавшая въ Пелопонесѣ)! Веселися, глаголемъ, того ради, яко погрузися новый Фараонъ совсѣми своими полки, Израильскій же весь людъ Чермное море преиде, аки ногами немокрыми, предшествовавшу блаженѣйшему Моисею, купно съ священнѣйшимъ Аарономъ, его собратомъ. И древле святой Златоустъ, похвалу твоя своей отчинѣ Антіохіи: глаголаше: нашъ сей градъ Христу есть любезнѣй прочихъ.

всѣхъ градовъ, ибо якоже Петръ во Апостолѣхъ первый проповѣда Христа, глаголя: ты еси Христосъ, Сынъ Божій, тако между грады сей первый аки вѣнецъ нѣкій пречудный себѣ прицѣпи имя христіанское. Буди убо намъ, о Богомвѣнчанный господине, царю, и в. к. Алексіе Михайловичъ, звѣзда ведущая къ престолу нашимъ восточнымъ, подобнѣ яко звѣзда она, яже весело три цари веде ко Христу Господу. Се уже тебѣ седмкратъ очищенное на седми святыхъ соборахъ вселенскихъ сребро православія изъявихомъ, и талантъ намъ патріаршества свыше ввѣренный предъ тобою никакоже сокрыхомъ. Едино точію остается, да еллински украсится святая Россійская Церковь, не точію славенски глаголющи, но и гречески поющи охтай. Тако бо исполнится и премудрая Платонова похвала, иже рече той градъ блаженный быти, въ немже царь философствуетъ еллинствуя, или грекъ царствуетъ философствуя, все житіе свое ведый гречески, или яко второй Птолмей въ семъ богохранимомъ градѣ Москвѣ основаніе полагая новыхъ собраній училищныхъ, или, да паче речемъ, свѣтлыя мирницы умовъ, ко взысканію и совершенному стяжанію греческаго языка, тако, воежебы греческимъ юношамъ отсюду сѣмо пришествовати во царствующій градъ Москву, ради чтенія и разума пристяжанія.

Не хотимъ же, возлюбленіи о Христѣ людіе, да вся тягота и бремя на прекрѣпкій царскій престолъ возложится, яко едва не безконечныя имѣющій иждивенія на оборону и утвержденіе своея державы: то бо было бы зѣло тяготно и бремя не удобъ движимое. Но того хотимъ, да раздѣлится на архіереи и на избраннѣйшія начальные архимандриты, яко имѣющихъ многія общины и доходы доволныя, да приложатся единомушно ко Божественному сему дѣлу ревностію взаимъ творяще, суще яко очеса прочихъ, пачеже Церкви члены началнѣйшіе, и да будутъ содѣйственницы благому, греческій языкъ въ древнее приводяще досточестіе, аки пресаждаяще его, яко маслину, нынѣ мнимую лѣсную быти, да будетъ садовая и плодовая: егда бо ко-

рень благонасадится, тогда и вѣтви разширятся ко оствѣненію своимъ листвіемъ и сладкими овощми къ наслажденію исполненія Церкви. Убо молимъ, да нашимъ совѣтомъ здоровымъ душамъ вашимъ повинуется, сотворится дѣлатели во виноградѣ Христовѣ, искореняюще терніе и куколь душевредный извергающе. Можете бо очистити изъ плевель гумно, аще точію восхощете, занеже бо имѣете всякое благополучіе и доволство обилное въ рукахъ вашихъ; сотворите вамъ, вмѣсто сокровища тлѣннаго, души безсмертныя сокровиществовати, сыны духовныя раждающе, кромѣ всякія болѣзни, и питомцы творяще Спасу Христу. Обѣщаемъ бо, яко сіи немалую ползу сотворятъ вашимъ монастыромъ и епархіамъ, архіепископіамъ и митрополіамъ, егда тѣи спудеи и питомцы, паче и паче растуше въ премудрости, достигнутъ высоты премудрости, спасающе себе и прочія. Ибо когда и прежде бывшіи патріарси установиша здѣ патріархію, пятую оную быти утверждающе, между иными заповѣдми, яже единодушно уставиша, и то завѣтоваша, да здѣ соборъ училищный, украшенный различными приходами, сотворится, къ расширенію ученія и юношъ, хотящихъ учиться, умноженію вѣдуше велию быти оттуду Церкви и царству ползу. Прилагаемъ симъ и иное,—обаче не безъ слезъ то глаголемъ. Грекове, сущіи нынѣ подъ игомъ и повся дни отъ нечестивыхъ томиміи, въ самомъ кентрѣ, или пупѣ мучительства, въ самой, глаголемъ, Византіи училища отверзоша, тоже ради сохраненія перваго и царственнаго онаго діалекту дѣвственно и безвредно, налагающе многую цѣну нетако на доволное и нужное препитаніе спудеовъ, ниже ихъ учителей на возмездіе, яко на загражденіе ненавистныхъ гортаней нечестивыхъ, хотящихъ, да мы вси слѣпи пребудемъ и да не вѣмы писанія искусствомъ первыя нашея чести, премудрости и величества. Сіи Христовы врази, кто вѣсть, аще ненавистію и завистію не въ конецъ разорятъ училище сіе. Но вы, о преблагословенніи Россійстии людіе, Божіимъ милосердіемъ и благодатію ниже ига работы страждете, ниже данъ съ насиліемъ царемъ даете, но свободно жителствуете

и велій покой имѣете; обаче ученія лишаетеся волею, мало цѣняще е и мудрость предстоящую Богу, не добръ о ней дерзающе, презираете. Напоследокъ составися тое собраніе, да некому нѣцци Грекове извѣтъ дають, яко ходять въ страны западныя, еже стяжати ученіе греческое, уже во Цариградѣ имѣюще, яко въ дому отческомъ, доволная путищія спасенная. Престанеть же паче и паче извѣтъ, аще еще здѣ сичевое собраніе созиждется отъ васъ, право правящихъ: слово истины.

Но паки и паки возвращаемся къ тебѣ, пресвѣтлѣйшій великій государю, царю и великій княже Алексіе Михайловичъ всея Великія, Малыя, Бѣлыя Россіи самодержче, и глаголемъ: о, колика и какова была бы слава во всѣхъ подъ солнцемъ сущихъ рабѣхъ, иже имѣють часть нѣкую на святыхъ мѣстахъ, Божіими стопами топтанныхъ, аще бы монастырь, или часть нѣкую отъ святаго онаго мѣста вашъ родъ православно-россійскій тамо одержалъ, священная дѣйствуя народнѣ и царскаго имене воспоминаніе творя явнѣ и на проскомидіи молитвъ приношеніе! Ибо нѣсть рода отъ подъ солнцемъ сущихъ, иже бы не имѣлъ во святомъ ономъ градѣ и въ земли обѣтованія храма молитвеннаго, того ради, яко велико себѣ почитаютъ тамо имѣти домъ молитвенный, идѣже стоясте нозѣ Господни. Того дѣля отъсюду стекаются народи въ Іерусалимъ градъ, воеже бы поклонитися яслемъ Господнимъ и святымъ пеленамъ Христовымъ во Виѣлеемѣ, иже насъ ради воплотися и младенецъ бысть; такожде да видять на Голгоѣѣ Господню страшную страсть, распятіе и самое превеликое чудо—священнѣйшій свѣтъ, иже на спасенномъ гробѣ Господнемъ во вся лѣта является, и вѣрнымъ раздается, и отъ нихъ пріемлется; во ежебы видѣти храмъ Воскресенія Христова, гору Елеонскую, святой Сіонъ и гору Ѡаворскую, имиже утѣшаются иже свободу пріемлють хожденія тамо. Не суть ли здѣ премнози россійстїи люди, иже желаютъ видѣти и пити Іорданскія воды? Ей, мнози суть; но за страхъ мучительскій и прещенія тамо господствующихъ не могутъ шество-

вати. Убо, о непобѣдима царю Алексіе Михайловичъ, сотвори удобный путь, ведущій во Іерусалимъ, идѣже родися, обрѣзася и крестися, погребеся, вознесся нашего ради спасенія Іисусъ Христосъ.

Сіе наше есть поученіе и патріаршее увѣщеніе, еже яко благословное, праведное, благоговѣйное и законное отъ насъ предложися, сирѣчь, да не лишится приснаго господствованія православное царство прекрѣпкаго твоего царскаго престола, но да пристяжетъ и тамо особое нѣкое мѣсто къ жителствованію хотящихъ безмолвствовати и молити Бога о здравіи, спасеніи и утверженіи пресвѣтлости твоея, Богомъ-вѣнчанныя. Ему же да дастъ Господь вся прошенія полезная ко спасенію и вѣчнаго царствія совершенное наслажденіе. И рекуть вси людіе: буди, буди крѣпчайшему цареву и да исполнятся благоговѣйная его помышленія! Аминь.

2. Слово въ день Рождества Христова отъ лица святѣйшихъ патріарховъ Паисія Александрійскаго и Макарія Антіохійскаго о взысканіи премудрости Божественныя.¹

Во имя Отца и Сына и Святаго Духа. Аминь.

Христосъ раждается славите, Христосъ съ небесъ срѣтайте, правовѣрнии людіе россійстии! Христосъ Господь, иже родися предъ всѣми вѣки отъ Отца безъ матери, нынѣ раждается безъ Отца отъ пречистыя Дѣвы Матере, того ради, да ны, умершія въ отцѣ и матери, въ Адамѣ и Ёввѣ, грѣхомъ первороднымъ, отродить безъ отца и матери водою и Духомъ. Раждается же нынѣ Господь пречудно и вышеестественнымъ обычаемъ. Ибо яко безъ мужа отъ Пречистыя Дѣвы Пресвятаго Параклита дѣйствомъ зачася: тако безъ вреда чистоты дѣвственныя плотію родися. О, чудо превеликое и дѣвство неизглаголанное! Кто видѣ или слыша когда ма-

¹ Синод. ркп. № 657. Печатается по списку, писанному русскими буквами; варианты приводятся по списку, писанному буквами польскими.

терь дѣвствовати, или дѣву матерствовать, еже мы нынѣ и слышимъ и видимъ въ вертепѣ Виѡлеемскомъ? Чуже есть, поеть Церковь, матеремъ дѣвствовати¹ и странно дѣвамъ дѣти раждати; но на тебѣ, о Богородице, обое смотрѣніе бысть. Ибо Бога родила еси воплощенна; Богу же, вышшему естества нашего, вышесущественное подобаше и рожденіе. И нѣсть се невѣрно. Аще бо вещественныя лучи солнца могутъ чистый кристалль, не вредивше цѣлости его, проникати, аще гласъ сквозѣ каменныя стѣны, не вреждая² ихъ, умѣетъ проходить, аще зрѣніе человѣческое стекло и кристалль безъ растлѣнія ихъ проходитъ: колми паче Богу удобно, безъ истлѣнія ключа дѣвства, плотію рождену быти. Тако убо воистину Христа Бога нынѣ рожденна славите, православныи людіе, славите Его, имже кто обычаемъ возможетъ. Ибо Онъ родися безславно въ вертепѣ, да насъ прославить на небеси; Онъ, сый Богъ пребогатый, Егоже есть небо и земля, по псалмопѣвцу: *небо престолъ Его, земля же подножіе ногъ Его*, Богъ, Иже иматъ судити вселеннѣй въ славѣ и лѣпотѣ царствія своего, Богъ, Егоже вои небесныя славятъ и трепещутъ херувимы и серафимы, се въ конецъ обнищаль есть, даже въ скотстѣй ему хлевинѣ родитися и предъ Иродомъ во Египетъ бѣгство пріимати. Се же насъ ради грѣшныхъ, да мы небесными сокровищи обогатимся, и благословенныхъ жилищъ горняго Сіона жителемъ пріединимся, и отъ подземнаго, вѣчно темнаго Египта работы свобождени будемъ. Кто убо не блажитъ и кто не воспоетъ толико Бога смирившася нашего спасенія ради, паче же самимъ небеснымъ силамъ насъ на пѣніе возбуждающимъ и поющимъ: *слава въ вышнихъ Богу и на земли миръ, во человецѣхъ благоволеніе?*

О вашемъ благовѣнствѣ, православный роде россійскій, нѣсть намъ усумнѣнія, яко всякъ готовъ есть благочестно усты и сердцемъ новорождена славити Бога, глаголя: *готово сердце мое, Боже, готово сердце мое*, еже славити Тя, и

¹ Было: *dięwami byti*

² *newredia*

онъ стихъ царя въ пророцѣхъ: *благословлю Господа на всяко время, выну хвала Ею во устѣхъ моихъ. Но не вѣмы; можетъ ли всякъ истинно о себѣ ко Богу - сие глаголати: уста моя возлагаютъ премудрость и поученіе сердца моего разумъ. Видимъ бо, яко во многѣхъ отъ васъ не имѣтъ премудрость мѣста, идѣже главу приклонити, скитається она, якоже Христосъ, премудрость Божія, въ Виѣлеемстѣмъ вертепѣ, и нѣсть взыскай ея, аще и премудрый приточникъ вся вы сие увѣщаетъ: Сыне, аще приѣмъ глаголы моя и заповѣди въ себѣ сокрыеши, послушаетъ премудрости твое ухо и приложиши сердце свое разуму, приложиши е въ показаніе сыну твоему. Аще бо премудрость призовеши и разуму даси гласъ твой, чувства же взыщеша гласомъ великимъ, и аще взыщеша ея аки сребра, яко сокровища поймеша ея: тогда разумѣши боязнь Господню и разумъ Божій обрящеша. Яко Господь даетъ премудрость и отъ лица Ею познаніе и разумъ. И щадитъ исправляющимъ спасеніе, защищаетъ же шествія ихъ, сохранитъ путь оправданій и путь хвалящимъ Ею сохранитъ. Тогда разумѣши правду и судъ, и исправиши вся твоя блая. Се, коликая, о православніи людіе, премудрости изводства, полза и приобрѣтеніе. Вы же, оставивше греческій языкъ и небрегуще о немъ, отъ негоже имѣете просвѣщеніе ваше въ вѣрѣ православной, оставили есте и мудрость и аки оземствовасте ю. Странніи роды и противніи вѣрѣ православной, на западѣ обитающіи, греческій языкъ аки свѣтилникъ держатъ, ради мудрости его, и училища его назидаютъ. Арапове же не хиротонисаютъ и единаго, не искусна суша греческому языку, и иніи роды премнози за корень премудрости еллинскій нашъ языкъ имѣютъ, и того ради Святыи Боже, Херувимскую пѣснь поютъ гречески и возгласы греческимъ языкомъ творятъ, якоже Грузи, Серби, Болгари, Мултане и Волохи. Здѣ точію, лѣности ради, зѣло обезцѣнися. Тѣмже блюдемся, да не отъ васъ оно истинствуется, еже въ книгѣ Премудрости въ главѣ третей написана: премудрость и наказаніе уничижаяй не честенъ есть, и праздно упованіе ихъ, и труды безплодны, неключима*

дѣла ихъ, и прочая. Сиде убо мы, пастыріе стада Христова сущіи, наблюдше у васъ несовершенство, молимъ именемъ Божія Премудрости, нынѣ рожденныя міру, да взыщете премудрость, яже есть свѣтъ очесъ умныхъ и правило всему житію человѣческому. Не оныя премудрости, о нейже судъ избранный глаголетъ: *еллини премудрости ищутъ*. Та бо мудрость міра сего бѣше, яже предъ Богомъ есть буйство; но премудрости истинныя, еяже начало есть страхъ Господень, яже въ Божественномъ писаніи умудряетъ, въ твореніи заповѣдей Божіихъ¹ укрѣпляетъ и истинный путь благословеннаго житія свѣтло умови явствуетъ. Взыщите же ея толь тощнѣ, якоже искаху ея велицы вселенныя учителя Василій Великій, Григорій Богословъ, Іоаннъ Златоустый, Аѳанасій Великій, Діонисій Ареопагитъ, Іоаннъ Дамаскинъ и иніи многочисленныи свѣтильницы Церкви. Ниже отрѣцайтесь неимѣніемъ училищъ, ибо аще взыщете, дасть предвѣчная мудрость до сердца благочестиваго самодержца таково хотѣніе, еже училища построить и учителя стяжати въ семъ царствующемъ богоспасаемомъ градѣ Москвѣ.

О твоей паки Богомъ дарованной щедрости, благочестивѣйшій, тишайшій, самодержавнѣйшій государю царю и великій княже Алексіе Михайловичъ, всея Великія, Малыя и Бѣлыя Россіи самодержче, вѣмы то, яко теплый еси рачитель премудрости, видимъ тя подобна Соломону въ любительствѣ ея, тѣмже и дарова тебѣ Господь по желанію сердца твоего, еже вся разумно и премудро дѣлати, строити и правити. Точію о семъ твой царскій пресвѣтлый престолъ умоляемъ, да якоже солнце мѣсяцъ, звѣзды, планеты и всю поднебесную освѣщаетъ: тако и ты, солнце сый Россіи, даромъ премудрости, свѣще тебѣ дарованнымъ, вся тебѣ подчиненныя освѣтиши. Положи отнынѣ въ сердцѣ твоємъ, еже училища тако греческая, и иная, назидати, спудеовъ милостію си и благодатію умножати, учителя благоискусныя взыскати, всѣхъ же честми на трудолюбіе поощряти, то

¹ ieho

абіе узриши многи ученія тщатели, а по малѣ времени пріимеши, дастъ Богъ, плодъ стократный и полныя рукояти отъ сихъ сѣменъ. Тогда всякъ о себѣ возможетъ истинно глаголати ко Богу, источнику премудрости: *уста моя возлаголютъ премудрость и поученіе сердца моего разумъ*. Тогда возславятъ Господа и воспоютъ Ему разумно, по увѣщанію пророка, иже во царехъ, глаголюща: *пойте Богу нашему, пойте, пойте цареви нашему, пойте, яко царь по всей земли Богъ, пойте разумно*. Но и нынѣ пойте правовѣрніи людіе всею душею и сердцемъ со ангелы, поющими Христу рожденному славу, пойте богати и убози, яко пребогату Богу, но насъ ради нынѣ обнищавшему, пойте велицыи и маліи превеликому Богу, васъ ради умаленному, пойте старіи и младіи Ветхому денми, васъ дѣля младенчествовавшему, пойте господіе и раби всѣхъ Господу, зракъ рабій пріемшу. Пойте нынѣ со ангелы. А со волсты, срѣтающими Господа, срѣтайте,—срѣтайте Его со муромъ умерщвленія страстей плоти вашей, срѣтайте со златомъ любви къ Нему, яко ко Богу, и ко ближнимъ вашимъ, да миръ будетъ между всѣми, по ангельскому имну: *и на земли миръ*. Срѣтайте напоследокъ съ кадиломъ молитвъ и поклоновъ боголѣпныхъ, глаголюще: *да исправится молитва моя яко кадило предъ Тобою*. А Онъ, пребогатый во милости Господь, за сіе перваго срѣтеніе пришествія, сотворитъ вы достойны быти восхищенія на облацѣхъ во второе свое пришествіе, во стрѣтеніе Его на воздусѣ, и тако всегда со Собою быти. Аминь.

3. Назнаменованія, или наблюденія изъ различныхъ соборовъ о обычаи, егоже употребляху святіи отцы въ синодотвореніи, отъ смиреннаго митрополита Газкаго Паисія собранная.

1. На первомъ соборѣ Никейскомъ въ началѣ положивша посланія, предваршія соборъ Никейскій, сирѣчь Александрово, Александрійскаго патріарха, соборное посланіе ко всѣмъ церкви католическія сослужителемъ, въ немже повѣствуетъ начало безбожныя ереси аріанскія.

Послѣдуетъ православнѣйшаго царя Константина Великаго слово къ собору Никейскому о мирѣ Церкви, якоже обрѣтается въ самомъ соборѣ Никейскомъ, такожде у Галасія Кизическаго въ книзѣ 2-й. Еще епистолия царя Константина, ко Александру и ко Арію посланая, и иная, въ нейже царь Константинъ повелѣ епископамъ соборъ въ Никеи творити. Имъ же собраннымъ бывшимъ прииде и самъ царь Константинъ въ Никею; вшедъ же, ста посреде, и не изволи прежде сѣсти, даже епископи умолиша, къ нимъ же преславнѣйшій царь всещателное премудрѣйшее сотвори слово, благодаря Бога, толику себѣ благодать даровавша. Видѣти и чести годствуєтъ сіе благочествѣйшаго царя Константина слово, еже имѣ ко освященному собору, на листѣ 746.

Посемъ начато бысть состязаніе о ипостаси Сыновней, есть ли истинно Богъ, или тварь, такожде о божествѣ Св. Духа. Потомъ провѣщается символъ вѣры и подписанія епископля, Никейскій соборъ утверждающія. Царь же Константинъ воставъ съ престола, благодаритъ Бога. На послѣдокъ читаются каноны церковные, на соборѣ томъ опредѣленные, еще же и посланіе соборное ко всѣмъ православнымъ христіаномъ народное, тако царское, якоже и соборное.

2. На соборѣ Цареградскомъ есть слово Григорія, по рекломъ Богослова, глаголанное предъ лицемъ сто и пятьдесятъ епископовъ. Потомъ слово высокогласнопохвальное ко благочестивѣйшему царю Θεодосію. Чтеніе символа Никейскаго со истолкованіемъ всего, еже приличествуєтъ ко Духа Св. божеству, противу духоборцевъ.

Таже послѣдуютъ каноны и потомъ епистолия обычная епископовъ, во Царьградъ собравшихся.

3. На соборѣ Ефесскомъ въ началѣ есть бесѣда Св. Прокла епископа Кизикійскаго. По ней послѣдуетъ епистолия св. Кирила Александрійскаго патріарха къ инокомъ Египетскимъ. Таже другая епистолия, писанная ко благочестивѣйшему царю Θεодосію о правой вѣрѣ. Потомъ начи-

наются различная свидѣтельства святыхъ отецъ о истинномъ Христовѣ воплощеніи, противъ Несторію патріарху Цариградскому, къ нему же писаше Кирилъ св. епистолію увѣщательную, такожде и папа Келестинъ епистолію обличающую, десятый ему день назнаменуя ко обращенію. Симъ же днемъ прешедшимъ, св. Кирилъ дванадесять оныя анаѳематизмы сложи, имже противная написалъ быше Θεодоритъ, яко противникъ. Послѣдуетъ наконецъ судъ низложенія, отъ освященнаго собора на Несторія изнесенный, съ рукоподписанми, и посланъ быше во утрешній день къ Несторію сицевый судъ отлучительный. И бысть извѣщеніе о Несторіевѣ низложеніи благочестивѣйшимъ царемъ Θεодосію и Валентиніану. Бысть же бесѣда св. Кирила, во Ефесѣ чтена, по низложеніи Несторіевѣ. На послѣдокъ конецъ и отпущъ собора.

4. На Халкидонскомъ соборѣ обрѣтаются епистоліи, собору приличствующія, прежде его бытія написанныя, сирѣчь Лва папы къ Флавіану патріарху Цариградскому и къ благочестивому царю Θεодосію, отвѣты взаемъ Маркіана православнаго царя къ благочестивымъ епископамъ, вездѣ обрѣтающимся. Послѣдствова слово Маркіана царя, къ собору глаголанное. Но воистинну самъ царь не присутствова первому собора сѣдѣнію, но прииде точію на шестое сѣдѣніе, егда и судіи рекоша, яко вся дѣянія долженствуютъ царю возвѣщена быти, яже обаче самъ разсмотрѣлъ есть и бесѣдова явѣ, егоже слово зри въ дѣяніи шестомъ на листѣ 32.

Разсуждати здѣ подобаетъ нѣкія вещи, знаменованія достойнѣйшія, яже суть сія. Сѣдящимъ благороднѣйшимъ и славнѣйшимъ судіямъ посредѣ, предъ преградою олтаря святаго, отъ шуіа¹ страны, сѣдящимъ преосвященнымъ епископомъ и намѣстникомъ боголюбезнѣйшаго святѣйшаго Лва, предстателя стараго² Рима, и Анатолію преподобнѣй-

¹ Должно быть по ошибкѣ написано *шуія* вмѣсто *десныя*.

² Было: *ветхаго*.

шему архієпископу царствующаго града Константинополя, преосвященному Максиму архієпископу Антіохійскому, Тарасію епископу Кесарійскому, Стефану епископу Ефескому; отъ шуія паки страны подобнѣ сѣдящимъ преосвященному Діоскору архієпископу Алескандрійскому и Іувеналію епископу Іерусалимскому, Квинтилию епископу Ираклійскому, Петру епископу Коринѣскому, ктому и освященнымъ Палестины епископомъ, якоже видѣти лѣтъ есть въ второй части соборовъ на листѣ 5-мъ. Предложивше же посредѣ святое и пречестное Евангеліе Христово, Пасхазинъ епископъ и намѣстникъ престола Апостолскаго, стоя посредѣ со своими клевреты, рече: заповѣди въ рукахъ имаю, да Діоскоръ Александрійскій архієпископъ не сѣдитъ на соборѣ, но ко отвѣтомъ да впустится. Сіе намъ соблюсти нужда есть, аще убо повелѣваетъ ваше преизящество: или онъ да изыдетъ, или мы исходимъ. Судіи рекоша: да извѣстится вина. Посланныцы рекоша: о преступленіи своемъ да дастъ онъ отвѣтъ, требѣ есть; егда же впущенъ будетъ, годствуетъ вину сему задати: тако бо мы противу заповѣди престола Апостолска и противу узаконенію присутствовать не можемъ, не можемъ бо терпѣти толикія кривды нашея и вашея, дабы сѣдѣти судитися имущему. И дадошася о семъ свитки молителныи.¹ И дадеша отвѣтъ отъ царя, дабы прочіи архіереи, во первыхъ же Іерусалимскій Іувеналій, сіе дѣло окончили. Но понеже присутствовала нѣцыи отъ мірянъ, возопися, яко царь епископы призва, соборъ епископскій есть, прочіи чѣсо ради вопіютъ.

Евтихій архимандритъ умысли не исходити изъ монастыря своего. Написа ему великій соборъ сія: и нынѣ вторымъ симъ тебе призваніемъ зовемъ, да пріидеши кромѣ медленія, ко еже довлесотворити освященному собору: пріиди убо въ соборъ, ни мало отлагая, да не яко опасаяся въ лице обвиненъ быти подпадеши божественныхъ правилъ казнемъ.

¹ Было *хартіи молителныя*; потомъ *челобитныя*.

Принесошася многая свидѣтельства святыхъ отецъ о истинномъ воплощеніи Христа Господа; между иными же вмѣстишася и святаго Августина Гиппонискаго епископа, такожде и Гиларіа святаго.

Потомъ послѣдствова осужденіе Діоскора, съ подписаніи рукъ разныхъ епископовъ, и судъ собора Халкидонскаго на Діоскора. Тамо воспоминается Натирій епископъ Газкій иже подписа согласуя.¹

На сія благочестивѣйшій царь Маркіанъ къ освященному рече собору: да речетъ освященный соборъ, еда всѣхъ преосвященныхъ епископовъ согласіемъ опредѣленіе нынѣ чтенное изречеся.² И возопиша вси: вси тако вѣруемъ; вси то само мудрствуемъ; Несторію, Евтихію и Діоскору анаѳема, и Троица сія три осуди, сія три изверже! Во вѣки да пребудетъ ваше царство!

Послѣдствуютъ суды каноновъ и раздѣленія, приличествующая ко патріархіи Антіохійстей и ко патріархіи Іерусалимстей; такоже Ивы преподобнѣйшаго невинность и прочихъ судъ съ полнымъ совершеніемъ.

Бяше и Аѳанасій епископъ Парренскій, иже званъ бывъ правильно отъ архіепископа Домна ко еже довлесотворити въ обвиненіи величайшими скареднѣйшими словами, не послушавше, бысть отъ всякаго церковнаго служительства отлученъ и всего архіерейскаго служенія обнаженъ, того ради, яко многое время пребысть ругаяся и попирая церковныя уставы. Того дѣля и инъ посвятися въ его мѣсто. И нынѣ паки отъ Екзархи восточныя епархіи призванъ и отъ освященнаго собора, занеже непослушливъ бываетъ, но долгія избирая пути шествуетъ, освященный настоящій соборъ нанъ судъ изнесе, по церковнымъ уставомъ, чужда его быти архіерейскаго сана, инаго же въ его мѣсто Парренской святѣй Божіи Церкви архіерея правильно и некосно, могуща по воли Божіи правити ю, и отъ тоя епархіи толико злѣ

¹ Было: *опредѣляя*.

²—судъ нынѣ *изреченный* изречеся.

совокупленіе отвратити, поставити. Посемъ честнѣйшіи судіи рекоша: впослѣдѣ да изыдутъ, иже тогда съ Домномъ низложиша епископа Аѳанасія. И пріиде Ѳеодоръ между иными, епископъ Дамаска, глагола: клирицы Парренскія церкви обвиненія нанъ принесоша, званъ же бывъ, не пріиде; третіему же призванію его бывшу, ему же пріити отрекшу, изнесеса нанъ правильно судъ низложенія, и того ради, яко не пріиде, отъ всѣхъ тогда сошедшихся епископовъ осудися: тяжкая бо нѣкая положена быша въ свиткахъ, на него написанныхъ, званъ же бывъ правильно, пріити возгордѣся и не бѣ послушливъ освященному собору антїохійскому. Многаци оно усугубляя, чесо ради не пріиде, сирѣчь яко имѣ нѣкія недруги на соборѣ между судіями. Скончася соборъ, данымъ бывшимъ повсюду писаніамъ, свѣдѣнія ради всѣмъ христїаномъ, что опредѣлися судомъ тамо.

5. На Пятомъ селенскомъ соборѣ, въ Цариградѣ собраномъ, царствующу Іустиніану, обрѣтается епистолія къ патріарху и къ инымъ епископамъ. Потомъ послѣдствуютъ многая свидѣтельства и различная Ѳеодора Мопсуестенскаго на безбожнаго Аполинарія. Также чтошася ту, яже противу Ѳеодору Мопсуестенскому и противу его хуламъ святїи отцы писаха, наипаче же Кирилъ Александрійскій и святой Прокль патріархъ Цариградскій. Къ симъ прилагается бесѣда благочестивѣйшаго царя Іустиніана, яже къ патріарху Минѣ, противу безбожному Оригену и его мерзкому разумѣнію. Также исповѣданіе истинныя вѣры Іустиніана царя, кратко собраное. И тако скончася соборъ пятый.

6. На шестомъ вселенскомъ соборѣ, въ Цариградѣ бывшемъ, писася епистолія къ святѣйшему папѣ Домну отъ царя Константина Погоната. Такожде иное писася посланіе къ Георгію патріарху Цариградскому. Также, предсѣдѣвшу тамужде великому царю въ полатѣ, Труллѣ нареченой, присутствовавшимъ совѣтникомъ и посламъ ветхаго Рима, мѣстодержавшимъ Агаѳона папы, Георгію Цариградскому, Петру пресвитеру, мѣстоблюдущу престола Александрійскаго,

Макарію Антіохійскому, Георгію іеромонаху и посланнику¹ Теодора, престола Іерусалимскаго. Сѣдяху же славніи патрикіи и совѣтницы, мѣстодержаще² благочестиваго и христолюбиваго царя Константина. По лѣвой же странѣ сѣдѣша пречестныи намѣстницы Агаѳона папы, Теодоръ архіепископъ Равенскій, Василій епископъ Гортинскій, Георгій іеромонахъ³ намѣстникъ престола Іерусалимскаго. Отъ десныя страны Георгій Цариградскій, Макарій Антіохійскій, Петръ іеромонахъ мѣстоблюститель престола Александрійскаго, по немъ же Θεодосій Ефесскій и прочіи епископы трона Цариградскаго и Антіохійскаго. Поставлше посредѣ святое Господа нашего Ісуса Христа Евангеліе. Тогда посланницы мѣстодержавшіи папы Агаѳона глаголаша: Премилостивѣйшій Государю! по писанной епистолїи послани есмы ко благочестивѣйшимъ твоя стопамъ пресвѣтлости; но занеже нѣцїи нѣкія новости реченій противныя православной вѣрѣ введоша и Церковь смутиша, молимъ боговѣнчанную ти крѣпость, да рекутъ отъ странныхъ тѣхъ предстателей сущи, откуда сїцевая реченій новостъ прїобрѣтется. Царь Константинъ отвѣща: да будутъ слышани патріарси и митрополити. И тако начася состязаніе и приведошася свѣдѣтельства соборная по вѣрѣ каѳолической, предложше посредѣ святое и непорочное Евангеліе. И абїе чтется епистолїа Агаѳонова, писанная къ царю Константину, и различныя бесѣды святыхъ отецъ и подписанія архіерейская, яже убо похвалиша и прочіи отцы собора, изъемше Антіохійскаго Макарія. Тѣмже освященный соборъ рече: занеже не бысть согласуя епистолїи Агаѳоновой, юже вси согласно и любезно прїяхомъ, судихомъ сему отъ сѣдалища си востати, да отвѣтуеть. И принесется писаніе патріарха Макарія и его исповѣданіе, егоже самаго рукоподписаніемъ укрѣпленное. Царь же повелѣ, да разсудится и да чтутся противная святыхъ отецъ свидѣтел-

¹ Было: *священномонаху и апокрисиарію*.

²—отъ праваго боку.

³—пресвитеромонахъ.

ства. И бысть судъ съ надписанми всѣхъ епископовъ. Посемъ послѣдова подписаніе благочестивѣйшаго Константина сице: Константинъ о Христѣ Бозѣ царь и повелитель римскій, чтохомъ и соизволихомъ. Возгласи же весь соборъ: сія есть вѣра апостольская, сія есть вѣра православныхъ! многа лѣта царю, вся еретики искоренившему! всѣмъ еретикомъ анаѣема! Емуже возглашенію даде царь отвѣтъ сице,—Чти ты слово глаголанное въ осмомъ надесятъ дѣйствѣ на листѣ 25 и слово восклицательное похвалное всего собора къ царю Константину, такожде образцы писаній посланныхъ къ папѣ Агаѣону.

На послѣдокъ суть каноны пятошестаго собора, иже въ Труллѣ, иже сто и два числятся, имже прилагають нѣцци иныхъ каноновъ девять, яже чти на листѣ 343, аще годѣ тебѣ будетъ, любиме читателю.

7. На седмомъ селенскомъ соборѣ суть епистоліи Григоріа папы о святыхъ иконахъ ко Лву Исавру царю, такожде списаніе краткое, изъясляющее та, яже быша прежде собора. Тѣмже придоша посланницы Адріана папы, Петръ архипресвитеръ и иный Петръ архимандритъ обители святаго Саввы, Тарасій Цариградскій, Іоаннъ іеромонахъ, намѣстникъ Александрійскаго, и Ѳома, Ѳеодора Іерусалимскаго патріархи мѣстодержатель, въ Никійской митрополіи, въ храмѣ великія церкви, именуемая Софія. Присутствовавшимъ и слушавшимъ честнѣйшимъ и благороднѣйшимъ княземъ, преподобнѣйшимъ архимандритомъ, игуменомъ и монахомъ, предложше святое и непорочное Христово Евангеліе, восташа преосвященнии епископи Сикилійска острова и глаголаша: достойно нещумемъ, да по зачатію изысканія главизнъ Цариградскій патріархъ предисловіе сотворить и двери слову отверзетъ. Тогда начать глаголати святѣйшій патріархъ Тарасій. По его словѣ рече Константинъ епископъ Кипрскій: аще годѣ есть освященному сему и вселенскому собору, да внидутъ епископи, въ сей странѣ обвиненнии. Освященный же соборъ рече: да внидутъ. И внидоша. Абіе же чтеся писаніе Константина царя и Ирины, вину изъясляющее

сего собранія. Посемъ даны быша свитки о соединеніи. И чтеся символъ святой, и зачася состязаніе о еретикахъ, возвращающихся къ святой Церкви, подобаетъ ли ихъ пріимати. И заключися, яко должно есть пріимати, и яко могутъ посвящени быти, точію аще не суть ересеначалницы. Также и посвященные отъ еретикъ и хиротонисанныя пріимати повелѣ, взявше прежде отъ нихъ свитки ересеотрицательныя.

На послѣдокъ принесошася въ посредѣ различная свидѣтельства отецъ святыхъ о святыхъ иконахъ, и бысть конецъ о почитаніи святыхъ иконъ, иже народнѣ чтеся и похвалися. Дадеся соборное извѣщеніе къ царю и ко всему клиру, издаде же ся анаѳема на образоборцы, и каноны составишася о различныхъ вещехъ, наипаче же на священнопродатели, поставляющія клирики, взявше прежде златницы.

8. Быша два иныи соборы, оба именуеміи осмыи, изъ ихже изчерпну нѣчто, знаменованія достойное и ко еже вѣдѣти ради творенія собора полезное и здоровое. На первомъ убо дѣяніи чтеся епистолия Адріана папы, яже къ Василию царю. Также епистолия Θεодосіа патріарха Іерусалимскаго ко Игнатію патріарху Цариградскому, епистолия Адріана папы къ Игнатію патріарху. Послѣдуетъ между бесѣдіе синклита, Митрофана митрополита Смирнскаго и римскихъ намѣстниковъ преніе. Призывается патріархъ Фотій; приходитъ и входитъ въ соборъ; вопрошается, кто бы былъ и пріемлетъ ли въ законенія святыхъ отецъ; бесѣдуетъ Фотій, намѣстницы же паповы молчатъ; глаголетъ къ нему Іліа мѣстодержатель Іерусалимскаго; отвѣщаетъ Фотій. И дану ему бывшу времени, исходитъ. Впускаютъ же епископы поборницы Фотіевы. Бысть состязаніе царя Василія съ епископы, страны Фотіевы, и увѣщаніе царское къ тѣмъ же схизматикамъ. Входитъ на послѣдокъ Фотій, о жезлѣ утвердився, егоже ему отъяти повелѣ Мариній римскій мѣстодержатель. Похвалное воскликновеніе Игнатіево къ собору, и анаѳема на Фотіа и сожженіе рукописаній неправедныхъ, написанныхъ отъ Фотіа на папу Николая и на патріарха Игнатія. Бысть стязаніе

ложныхъ свидѣтелей, на патріарха Игнатія клявшихся. Увѣщаетъ царь, да еще бы кто противно что собору хотѣлъ глаголати, безбоязненно сотворилъ то, еще и не лѣпо быти въ церковныхъ дѣлахъ мірскимъ челоуѣкомъ строителъствовати, учитель разумъ показываетъ. Похваленіе собора. Подписаніе епископовъ. Посланіе соборное къ Адріану папѣ. Епистоліа царская къ патріархомъ. Екзархове папины быста Донать и Стефанъ епископи и Маринъ діаконъ. Оома митрополитъ Тирскій мѣстодержай Антіохійскаго. Иліа пресвитеръ и ближній патріаршій мѣстодержатель Θεодосіа патріарха Іерусалимскаго. Прииде послѣжде и намѣстникъ Михаила Александрійскаго, именемъ Іосифъ архидіаконъ, иже и слово имяше къ сему собору преизрядно. И сотворише уставы, отыдоша во свояси съ епистоліами народными. Обаче сія пространѣе написашася отъ Никиты, по рекломъ Пафлагона, якоже видѣти годствуе въ третіей части соборовъ на листѣ 302.

Иный осмый соборъ есть обычно глаголемый. Флоренскій, на немже царь Іоаннъ Палеологъ самъ лицемъ си быше съ патріархомъ Цареградскимъ Іосифомъ и премногими архіереами. Такожде папа Евгеній со своими латинскими. Тамо величайшая прѣ и сваръ быше о сѣдалищахъ западныхъ и восточныхъ Церкви. Желаше бо папа, дабы по единой странѣ церкви всѣмъ его церковникамъ сидѣти, по другой паки царю и патріарху со всѣми своими, посредѣ же въ главномъ мѣстѣ самому папѣ. Противнѣ царь то царско паче быти, неже папино, глаголаше. О нейже вещи веліе притязаніе быше, даже прочтошася дѣянія соборная. На послѣдокъ сие согласишася, воеже бы папѣ и его епископомъ ту страну храма имѣти, яже шуйя есть входящимъ, другую же, сирѣчь правую, царю со своими. И тако сѣдалища симъ образомъ поставишася. Папы убо сѣдалище по странѣ, ему назнаменованной, отстоящее отъ святаго олтаря на 4 стопы, или шага. Подъ нимъ единою стопою сѣдалище Кесаріа Немецкаго праздное, точію во образъ поставлено. Внизу того сѣдѣша кардиналове, таже митрополитове и епископи, досту и пятьдесятъ, священницы паки и діаконы, и прочіи

первописатели быша безчисленни. Подобнѣ по другой странѣ престолъ царскій уготованъ быше, украшенный багрянымъ и златотканнымъ постланиемъ. По немъ патріархи сѣдалище и мѣстодержателей, и всея восточныя Церкви сѣдалища чинно поставишася.

Сѣдѣ убо царь по южной странѣ, сѣдѣ и патріархъ на високомъ же сѣдалищѣ, та же мѣстодержащій патріарховъ: Александрійскаго господинъ Антоній Ираклійскій и пречестный исповѣдникъ господинъ Григорій, Антіохійскаго паки господинъ Марко Ефескій; по сихъ чинъ митрополитовъ сядѣ, всякъ на своемъ мѣстѣ. Быста же и отъ Иверіи митрополитъ единъ и епископъ единъ. Таже сѣдѣша крестомназначеніи честныи мужіе окрестъ патріархи. Низу же игумени съ иноки горы святыя, и прочіи клирицы, всякъ по чину своему. По другой паки странѣ папа со своими кардиналы; по нихъ же сѣдѣша епископи и архіепископи, сто пятьдесятъ и многши, негли до дву сту; ктому игумени и архимандрити, и премнози иныи пастыріе церковныи. Прочее посреде храма, между двома клирома, предъ святымъ алтаремъ, престолъ преизрядный поставиша, преукрашенный же и златымъ устроениемъ, покровомъ, на немже сѣдѣ великій Судія и праведный Господь нашъ Ісусъ Христосъ, сирѣчь святое Евангеліе, положеннымъ бывшимъ отсюду и сюду святыхъ верховныхъ Апостолъ Петра и Павла главамъ, и свѣщамъ предъ ними возженнымъ. Симъ тако бывшимъ, всѣмъ же во священныя одежды облеченнымъ, тако восточныи, яко же и западныи епископи вси сидѣша. Бывшу же молчанію, папа веліимъ провѣща гласомъ: Благословенъ Господь Богъ Израилевъ! И начаша вси богославнѣ гимны и молитвы пѣти. Посемъ сѣдоша и обвѣщеніе собора на амвонѣ чести повелѣша. И тако воставъ діаконъ единъ, патріархій словоотноситель, нача глаголати... Таже избрани быста изъ обѣю страну дванадесяте, воеже бы между собою состязатися мирно. И отпустися соборъ тако. Въ послѣдствующихъ собраніяхъ начашася состязанія, бывшу прежде похвалну слову отъ Никійскаго митрополиты Виссаріона, еже

обрѣтается въ первомъ сѣдѣніи на листѣ 32. Не чтяху же символа ради частицы оныя и Сына приложенныя, о ней же прѣ велія бѣше. Тѣмже приведошася свидѣтельства всѣхъ соборовъ во укрѣпленіе, разрѣшеніе же толикаго раскола, и едва обрѣтеся согласованіе. Обаче убо, занеже еще время прохождаше, напоследокъ обѣю страну согласіемъ уставися, ежебы всячески во всяку седмицу трижды быти собранію, состязанію же три часа протязатися. Обаче ни тако полза обрѣтеся, ниже посредствіе кое-либо удобное къ соединенію стяжася, аще Виссаріонъ многія изрече къ сицевому концу главы. Напоследокъ, сотворше како-либо соединеніе, изыдоша грекове изъ града Флоренскаго, идоша же въ Венецію, оттуду паки возвратишася въ дома свои, въ лѣто отъ Рождества Христа Господа 1439, въ Цариградъ, глаголю, иже плѣнися отъ Магомета въ лѣто 1453 маія 29 числа, во вторникъ.



ОГЛАВЛЕНІЕ.

	Стр.
Отъ Редакціи	7
Опроверженіе челобитной попа Никиты:	
Предисловіе	13
Обличеніе 1-е	15
„ 2-е	17
„ 3-е	19
„ 4-е	21
„ 5-е	26
„ 6-е	31
„ 7-е	34
„ 8-е	39
„ 9-е	44
„ 10-е	48
„ 11-е	52
„ 12-е	57
„ 13-е	67
„ 14-е	73
„ 15-е	79
„ 16-е	90
„ 17-е	97
„ 18-е	105
„ 19-е	115
„ 20-е	122
„ 21-е	123
„ 22-е	128
„ 23-е	138
„ 24-е	154
„ 25-е	169
„ 26-е	175
„ 27-е	180
„ 28-е	185
„ 29-е	208
„ 30-е	216
Заключеніе	232
Эпilogъ	247
Апострофъ	259
Приложенія:	
Отъ Редакціи	266
1. Поученіе, или бесѣда увѣщательная	271
2. Слово въ день Рождества Христова о взысканіи премудрости	280
3. Назнаменанія изъ различныхъ соборовъ	284

Цѣна 1 р. 50 к.

